



8

4-C

23

7.8



M

~~8-4-C-23~~




HISTOIRE ET CHRONIQUE
D V
TRESCHRESTIEN
ROY SAINCT LOYS,
IX. DV NOM,
E T

XLIIII. ROY DE FRANCE.

Escrite par feu messire Ian Sire, seigneur
de Ionuille, seneſchal de Champagne,
familier & contemporain dudit
Roy S. Loys.


Avec la Genealogie de la maison de Bourbon.



A GENEVE,
Pour Jacques Chouët.

M. D. XCVI.





A V L E C T E U R.

Le principal but de la presente impression a esté plustost pour représenter la grande valeur & rare prud'homme du bon Roy croniqué en cest' œuvre, que pour faire fondement de certaines particularités qu'il faut rapporter simplement au temps & nourriture d'alors.



A V R O Y

*Tres-Chrestien, François
premier de ce nom,*

Anthoine Pierre treshumble salut.



L est tout certain,
SIRE, qu'entre
toutes les choses
qui en ceste mortel-
le vie peuuent pro-
fiter au genre humain, l'Histoire
doit obtenir le plus haut & prin-
cipal lieu. T'accorderai volontiers
que les Philosophes ont beaucoup
escrit, pour la perfection de l'ame
& du corps. Les Mathematiciens,
pour donner accroissement, & po-
lir les esprits des hommes, nous
ont baillé par escrit plusieurs do-
ctrines excogitées, & inventées
subtilement. Pareillement, ç'a esté



* 2



vn faict esmerueillable de chercher
 les secrets de Nature, & monter
 iusques au ciel, pour en amener ci-
 bas la cognoissance des choses,
 que Dieu pere & auteur d'icelles
 auoit voulu mettre loin de nostre
 sçauoir. Certainement telle ma-
 niere de philosopher a esté gran-
 dement profitable aux hommes, à
 ceux principalement qui ont vou-
 lu vsfer de raison: mais pource que
 elle n'estoit communiquee qu'à
 certains particuliers Philosophes,
 elle ne pouuoit donner à tous l'en-
 tree de felicité, comme elle nous
 est ouuerte par l'Histoire; en la-
 quelle nous voyons les faicts &
 gestes des Princes vertueux: & non
 seulement ce qui a esté fait de no-
 stre temps, mais aussi ce que nous
 n'auons peu voir du temps passé.
 Tellement que si nous mettons la
 cognoissance de l'Histoire deuant
 nos yeux, & vsons d'icelle, comme
 de la maistresse de nostre vie, sans
 nulle doute nous serons estimés
 dignes

dignes de plus grand bien & gouvernement que les Philosophes. Car par la seule intelligence de l'Histoire, nos esprits sont tellement incités à vertu, que nous detestons du tout le vice, pour acquérir vne louable renommée. Et si les Anciens, qui ont tant estimé la vertu, ont voulu celebrer les images & statues de leurs maieurs & ancestres, collocans icelles es temples & autres lieux publics; combien devons-nous estimer l'Histoire qui n'est point muette, comme sont les statues? qui n'est point vaine, comme vne peinture? mais qui nous exprime & represente les vrayes images des gens nobles & vertueux, ausquels nous pouuons parler, & iceux imiter, comme s'ils estoient en vie. Au moyen dequoi les Romains, par grand' diligence ont tant travaillé, à reduire non seulement leurs faiëts par escrit, mais aussi, ceux des autres nations: afin que les ieux-

nes Princes, en lisant l'Histoire de
 leurs predecesseurs, fussent plus a-
 nimés à soustenir le bien de leur
 Republique. Et certes ie puis dire,
 que les Romains ont pris cest ad-
 uantage sur les François seule-
 ment, qu'ils ont esté plus diligens
 à donner memoire à leurs guer-
 res, que les François n'ont esté.
 Mais quant à la gloire & vertus, si
 nous voulons diligemment regar-
 der & mesurer l'histoire Romaine
 avec celle des François, nous trou-
 uerons que les François doiuent
 auoir preference sur la nation Ro-
 maine: car il n'a esté iamais roya-
 me, dont les Rois ayent plus aimé
 leurs suiets, ne qui ayent fait tant
 d'honneur à la vertu & religion
 Chrestienne, comme ont fait les
 rois de France: Assez le tesmoi-
 gnent leurs Annales; mais avec le
 temps, il nous en sera donnee plus
 grande cognoissance: pource que
 nous trouuerons peu à peu, ce que
 le temps, avec la negligence des
 hom

hommes, nous ont tenu caché iusques à present. Il y a deux ans, ou environ, que moi estant à Beaufort en Valey, au pays d'Anjou, visitant quelques vieux registres du feu roy René de Cecile, pour y cuider trouuer quelque antiquité, dont il auoit esté amateur, auroy' trouué la Cronique du roy S. L o y s, es-crite par vn seigneur de Ionuille, seneschal de Champagne, qui estoit de ce temps-là, & auoit accompagné ledit roy S. Loys en toutes ses guerres. Et pource que l'Histoire estoit vn peu mal ordonnee, & mise en langage assez rude; ai icelle veüe, au moins mal qu'il m'a esté possible: & l'ayant polie & dressée en meilleur ordre qu'elle n'estoit au parauant, pour donner plus grand' cognoissance des grands & vertueux faicts de la treschrestienne maison de France, ai voulu icelle mettre en lumiere: estant asseuré, que par ce moyen les Princes & nations estranges

cognoistront plus asseurement, que le nom de Treschrestien a esté donné aux rois de France, par grand'raison. Et voyant l'œuvre estre Royal & Chrestien, m'a semblé, que le vous dedier, seroit l'approprier à son droit poinct: car telles gestes, cōme du roy S. Loys, estoient dignes de vostre Royale presence. Et aussi que pour le grād plaisir que vostre maiesté prend en la continuelle cognoissance des Histoires; en quoi, entre autres choses, auez voulu surmonter tous les Princes viuans, me sembloit que l'œuvre de lui-mesme estoit vostre. Je supplie donc treshumblement vostre maiesté, vouloir receuoir ce mien petit seruice, avec telle faueur & beneuolence qu'auez accoustumé receuoir les presens de chacun. Esperant, par ce moyen, prendre hardiesse faire quelque chose plus digne de vostre presence: Priant Dieu me vouloir en ce conduire l'esprit, sous vostre protection & autorité.



G V I L L A V M E
D E L A P E R R I E R E,
T O L O Z A I N,
au benin Lecteur, salut.



*E ne sçai d'où peut pro-
uenir, ami Lecteur, que
tant plus nous nous ap-
prochons de vieillesse,
tant plus nous nous esloignons de
bon iugement, & faisons comme
font communement les enfans al-
lans à l'Escole: lesquels prennent le
plus oblique & plus long chemin
qu'ils peuvent pour y aller, & lais-
sent le plus droit & le plus court.
Nous sommes dignes d'estre notés
de semblable erreur: car pour aller à
l'escole, c'est à dire, pour apprendre
& sçauoir les faiëts vertueux des
Anciens, nous cerchons le plus long
chemin, c'est à dire, nous sommes en-*



rieux d'estranger & lire les Histoires des nations estranges, Grecques, Latines, & Barbares: & laissons la droite & plus couuerte voye, de lire nos Histoires domestiques, de nostre climat & nation. En quoi nous faisons grand' faute: d'autant que tout ainsi (comme dit Ciceron, patron d'eloquence Romaine) que c'est folie, & reprouuee curiosité, d'aller acquerir honneur en pays estrange, quand on le peut acquerir en sa Cité ou Republique. Semblablement est chose superflue, chercher les exemples estranges, quand nous en auons des nostres à suffisance. Attendu mesmement que les exemples plus prochains, ont en nous plus d'energie & d'efficace, que les loingtains. Outre que la memoire des nostres et domestiques, porte plus de contentement à nostre esprit, que celle des estranges & forains. Tant de raisons ne peuvent encore suffire, que nous ne delaissons nos Histoires originaires, pour lire les autres.

AV LECTEUR.

Or est il, Lecteur, que si nous lisons les Histoires des François, nous trouverons que nos Princes n'ont esté moindres en tout exercice de vertu, soit d'engin, ou d'armes, aux Princes des autres nations : ains sont à l'adventure superieurs: ou (sans adventure) pareils. Car de douze cens ans en ça, ou environ, que le Lys des François commença à florir, à mespriser l'Aigle Romaine, & se ietter hors de servitude, nous avons eu des Princes dignes d'estre conferés aux Grecs, Romains, & Barbares. Les Hebreux louent leur Iosué, David, Salomon, & les Macabees. Les Grecs leur Achilles, Diomedes, Agésilas, Alcibiades, Pericles, Themistocles, Phelippe, & Alexandre. Les Romains se glorifient de leurs Camille, Scipions, Fabrice, Fabie, Sylla, Marius, Pompee, Iule Cesar, Auguste, & autres. Les Carthaginois se vantent de leurs Hanno, & Hannibal. Les Barbares de leurs Cambises, & Cyrus. Les Anglois

font grand cas de leur roy Artus, et de leur Table ronde : laquelle estoit plus remplie & assortie de mensonges, que de viandes : & de fables de leur Merlin, qu'ils tiennent pour leur Prophete. Les Espagnols se glorifient de leurs Alfonses. Les Germains de leurs Othons : mais à tous les dessus nommés, nous pouvons meritoirement bailler pour obiects, nostre Clodovee, Pepin, Charles-Martel, Charle-maigne, Phelippe Auguste, & autres plusieurs Princes, qui ne sont moindres aux superieurs, en tout exercice de vertu. Fut il petite emprise à Pharamond, de chasser & exterminer les Gaulois de leur terroir originaire, qui autres fois auoyent prins Rome, assiegé le Capitole, meurtri les Senateurs devant les huis de leurs maisons, & autres lesquels les Romains ne combattirent oncques que pour leur vie? Fut il peu de cas à Clodovee de chasser les Goths, Visigoths, & Ostrogoths des Gaules, & reculer insques
aux

aux Espagnes & Afrique, & tuer Alaric leur Roy, qui auoit constitué son siege Royal en nostre cité de Tholozé? Fut il peu de cas à Charles-martel, d'obtenir telle victoire, qu'elle sera à toute posterité memorable?

Fut il peu de gloire à Charlemagne, d'estre esleu Empereur de la monarchie Occidentale, & sacré à Rome, apres que l'empire Occidental eut esté acephale depuis la mort d'Augustulus, iusques audit Charlemagne: chasser les Lombars d'Italie, conuaincre les Saxons, paruant inconnuains, & les Gascons aux estroits des monts Pyrenees, dompter les Espagnols, celebrer le Concile vniuersel de l'Eglise, releuer l'authorité d'icelle, la douër, orner & enrichir tant de biens temporels, que de bonne institution & doctrine: instituer l'Vniuersité de Paris, en laquelle tout le monde est illustré de tout bon sçauoir, à laquelle ne sçauons point de seconde, ni aucune qui la precede? Quels Princes

trouuerons nous en la religion Chrestienne, de plus feruent zele, que fut Godefroi de Billon duc de Lorraine, & ses adherans, comme Pierre l'Hermite, le duc de Normandie, les comtes de Tarre, de S. Gille, de Foix, de Blais, de Chartres, de Flandres, Hugues le grand frere du roy de France, qui abandonnerent les delices & repos de leurs maisons, l'amour de leurs femmes & enfans, la familiarité & conuersation de leurs amis & parents, leur air naturel, leur propre heritage, pour estre pelerins es lieux tant lointains, & se mirent par mer, à la suiuetion des naufrages, & par terre à la suiuetion des espees des infideles? Eolus les guettoit en mer, & Bellone en terre: mais nonobstant l'abondance des richesses, & multitude de gens, leur iuste querelle, & la grandeur de leur zele, eut telle efficace enuers Dieu, que mil quatre vingts dix-neuf ans, apres le sang espendu de Iesus Christ, couronné d'espines, Godefroi

desroi fut couronné premier Roy
 Chrestien en Hierusalem : non mie
 de couronne d'or & pierrerie (la-
 quelle par humilité il refusa) mais
 de couronne d'immortalité. Et quoi
 que se glorifient les autres nations
 Chrestiennes, si ne se peuuent elles
 vanter d'un si memorable effort : le-
 quel, sans aucune controuerse, est at-
 tribué à la maison de France: de la-
 quelle estoyent extraits, ou vassaux
 les dessusdits. Que dirons-nous d'a-
 uantage, descendant plus pres de no-
 stre aage? Quel trouuerons des prin-
 ces Romains, auquel nous ne puis-
 sions comparer le bon roy S. Loys,
 qui pour le grand zele de nostre Foy
 passa la mer, pour combattre contre
 les Sarazins & infideles : dont de-
 puis, tant pour sondit zele, que pour
 l'integrité de sa vie, a merité d'estre
 mis au cathalogue des Saints?
 Cherche (ami Lecteur) tant qu'il te
 plaira les Histoires des autres na-
 tions, à peine trouueras-tu Prince
 ou Roy, qui ait en si grand zele à no-

AV LECTEUR.

stre Foy que cestui: lequel pour icelle
 mit sa vie à la merci du bois flottant
 en mer: laissa son Royaume tresfertile
 pour passer maint pays desert: si som-
 ptueux palais, pour loger bien souuēt
 en petites & basses maisonnettes: ses
 vīns delicieux, pour boire de l'eau
 corrompue: sa liberté, pour estre escla-
 ue. Bref, tous les aises & plaisirs que
 pourroit Prince terrien auoir, pour
 endurer tous les malheurs, qu'infor-
 tune pourroit à un poure homme pre-
 parer, & le tout pour augmenter la
 Foy de Iesus Christ? Or (ami lecteur)
 pour autant que te vouloir au long
 declarer les louanges de ce bon & S.
 Roy, seroit outrepasser le propre &
 naturel d'une Epistre, ie te r'enuoye
 au present autheur, homme qui a sa-
 lué les bonnes lettres de front: & qui
 monstre bien qu'il n'est pas nai tant
 seulement pour lui, ains (cōme dit
 Platon, & apres lui Cicero & le Ju-
 risconsulte) pour l'utilité & profit pu-
 blic, tant des presens que de la poste-
 rité: lequel a pris peine de mettre en
 lum

lumiere l'Histoire des faicts & gestes, vie & mort dudit glorieux S. Chose encore non mise en champ de publication: où tu trouueras au long & en bon ordre expliqué ce que Gaguin, Paule Amylien, & autres Historiens n'ont peu atteindre. Et pour fin, il te plaira considerer, que ce n'est moindre louange de bien polir un diamant, ou une autre pierre fine, que de la trouuer toute brute. Pareillement, tu ne dois pas attribuer moindre louange au present Auteur, d'auoir réduit en bon ordre & elegant style, la presente Histoire, qu'à celui qui en fut premier compositeur: Te priant de la lire: & te tenir pour assuré qu'en icelle, non seulement les Princes, mais tous autres humains trouueront empraint le vrai & naïf formulaire de bonne vie, sans laquelle est impossible de bien mourir, & consequemment paruenir à souveraine felicité.



GENEALOGIE

de la maison de Bourbon.



E roy Louis ix. canonizé, ap-
pellé Sainct, couronné roy de
France l'an 1226. & mort l'an
1270. le 25.iour d'Aust, eut &
laissa deux fils, assauoir, Philippe iij. du
nom, surnominé le Hardi, son successeur à
la Couronne; & Robert, comte de Cler-
mont. A Philippe succederent à la
couronne ses descendans en droite ligne,
assauoir, Philippe le Bel, Louis Hutin,
Philippe le Long, Charles le Bel, Philip-
pes de Valois, Iehan, Charles v. dit le Sa-
ge, Charles vj. Charles vij. Louis xj. Char-
les viij. Le fils puisné de Charles v. fut
Louis duc d'Orleans, qui eut deux fils,
Charles pere de Louis xij. successeur de
Charles viij. decedé sans enfans; & Iean
comte d'Angoulesme, pere de Charles
ayeul de François j. successeur de Louis
xij. son cousin. De François j. sont issus
Henri ij. François ij. Charles ix. Henri iij.
tué par vn Iacopin pres de Paris, le 2.iour
d'Aoust, 1589. En Henri iij. est faillie la
race des masles descendans du fils aîné
du roy S.Louis. Robert son fils puis-
né, mari de Beatrix fille d'Archambaut
de

GENEALOGIE.

de Bourbon, eut vn fils nommé Louis, dont les terres furent erigees en Duché l'an 1327. Louis duc de Bourbon eut deux fils, Pierre & Iaques. Pierre est du tout defailli, quant à la ligne masculine, en Charles duc de Bourbon tué en la prise de Rome l'an 1527. Iaques puisné de Louis, conestable de France, eut vn fils nommé Jean, qui espousa Catherine comtesse de Vendosme & de Castres, & dame de Condé, & autres seigneuries. Ce Jean eut trois fils, Iaques, Louis, & Jean. La lignee de Iaques est entierement defaillie il y a plus de cent ans. Louis eut deux fils, assauoir, François & Louis. Du puisné, fait seigneur de la Roche-sur-Yon, est issu le duc de Montpensier qui vit à present. Le prince de la Roche-sur-Yon, aîné de ceste branche, est mort sans enfans depuis quelques annees. François fils aîné, eut de Marie de Luxembourg sa femme trois fils, Charles, François, & Louis de Bourbon. François comte de S. Paul deceda sans hoirs males; Louis fut Cardinal; Charles l'aîné marié à Françoisse d'Alençon, eut cinq fils, Antoine, François, Charles, Louis, & Jean. Antoine l'aîné espousa Ieanne d'Albret roine de Nauarre l'an 1549. D'eux est issu HENRI DE BOURBON, nai l'an 1553. le 12. iour de Decembre. Or Henri iij. dernier de la race des males descendants du fils aîné du roy S. Louis, estant decédé sans enfans, la Couronne eschet,

selon le droict du Royaume, à Henri de Bourbon, iij. de ce nom; comme aussi il fut recognu par la plus saine partie des François, & salué Treschrestien Roy de France & de Nauarre, incontinent apres le trespas de Henri iij. qui peu auant sa mort le declara son legitime heritier & successeur.

*

Faut noter, que le chap. lviij. commence à ces mots; entores le Roy seiournant en Acre, &c. fol. 205. lign. 19. dont en voici le sommaire:

Autre Ambassade que le Roy receut du Prince des Beduyns, autrement dit le Vieil de la Montagne; & des propos qu'ils eurent avec le Roy: & comme les maistres du Temple & de l'Hospital parlerent à l'Ambassadeur, des presens que ledit Prince des Beduyns ennoya au Roy, de son estat, & de sa loy.



A TRESHAVT & TRESPVISSANT
SEIGNEUR

*PHÉLIPPE ROY DE
FRANCE,*

*filz de tressainte memoire le Roy S. Loys,
& Comte Palatin,*

Ian Sire de Ionuille Seneschal de Cham-
pagne, treshumble salut.



RESHAVT & puissant Sei-
gneur, feu madame vostre
Mere, que Dieu absolue, ay-
ant singulier & affectonné
desir, que la vie & faits du

Roy S. Loys, son loyal espous, vostre Pe-
re, fust mise & reduite par escrit, pour en
icelle lisant, remettre deuant ses yeus, la
memoire de lui, & de sa sainte maniere de
viure, m'auroit plusieurs fois requis & ad-
monnesté trefaffectueusement, de vouloir
mettre & coucher par Histoire, la vie &
gestes de son Seigneur & espous. Sachant
tresbien, que nul autre que moi, ne pou-
uoit auoir plus ample et entiere connois-
sance de sa vie. Comme celui qui par l'es-
pace de xxij. ans, aurois suiui, tât en Fran-
ce, qu'Oùtre-mer, sa compagnie; et si fa-
milieremēt vescu avec lui, que ses grands
et secrets affaires ne m'estoient aucune-

A



ment celés. A ceste cause, voulant de tout mon pouuoir obeir au mandement et sermôce de madite dame vostre Mere, aurois recuit en ce present liure, la vie et gouuernement du Roy S. Loys, vostre treshonoré Pere; ensemble les choses dignes de mémoire, qui sont aduenues durant son regne, tant en France qu'en Egypte, lesquelles i'ai veues, ou entendues par autres que par moi, dignes de vrai tesmoignage. Et pourtant que mort a prinze madite dame vostre Mere, auant que i'eusse mis fin a ce mië petit labeur, il m'a semblé chose trop plus que raisonnable, de vous satisfaire du reste de l'obligatiō en quoi i'estoi demouré redeuable enuers madite Dame: c'est de vous presenter & dedier cette presente Histoire; estant asséuré qu'elle ne vous sera moins chere qu'agreable; & qu'à vous seul, entre les vifs, vous estoit iustement deuë, comme vrai successeur, tant au Royaume, qu'en vertus & prouesse, de vostre treshonoré & redouté Pere. Et aussi qu'il me sembloit que faits Royaus sont dignes de connoissâce royale. A ceste cause, Sire, il vous plaira recevoir en gré cedit mien petit liurè, lequel treshumblement ie vous presente. Vous suppliant de lui vouloir donner telle faueur, qu'à vostre exemple il puisse estre miroir aus autres Princes de bien & iustement viure; & a moi que perpetuellement ie puisse demourer vostre treshumble & tresobeissant seruiteur.

CRON



CRONIQUE ET VIE
du Roy Saint Loys.

*

CHAP. I.

Quel fut le Roy S. Loys; ensemble de ses conditions & bonnes meurs.



LE Roy S. Loys (la vie duquel nous voulons ici escrire) fut si parfaitement accompli & excellent en toutes vertus, que par vn commun consentement il surmonta de prouesse & glorieuse renommee tous les autres Princes du monde. Et tant fut il de sainte conuersation, que non seulement ses ennemis, mais les Turcs, & Indesles auoient son Nom en grand honneur & reuerence: en sorte que plusieurs Sarazins, par le seul exemple & bonne vie de ce saint Roi, receurent la Foy & creance Euangelique. Par sa grand' & incroyable prudence il ordonna si bien de l'estat & police de son Royaume, qu'il rendit ses suiets (au parauant lui tant oppressez) en repos & tranquillité. Il aimait tant droiturè & iustice, que nul ne se complaignoit a lui, qu'il ne lui fust droit & equité. & par ses Loix & Ordonnances, en France establies, il pourueut si iustement a l'ordre & long traict des proces, en abolissant plu-

sieurs abus , que les iuges commettoient, que le Royaume de France, qui auant son aduenement à la couronne, estoit pillé & corrompu de mauuaises coustumes, se pouuoit a bonne raison nommer dispensateur de iustice & equité. Le bon Roi fut en sa vie tant ami de verité, qu'onques ne faussa sa foy : mesmes les Sarazins, auxquels plusieursfois promit accomplir de grandes choses, n'eurent onques occasion de l'arguer de promesse. Sa liberalité fut si tresgrande, que tous ceus qui en auoient la conoissance, l'estimoient vne grand' merueille : & plus encores donnoit il admiration a tous de sa tresgrand' sobriété: car onques en sa vie ne demanda viandes exquisés ne delicates ; mais se contentoit seulement de ce qu'on lui seruoit a table. Et tant fut il dous & gracieus en son parler, qu'onques ne lui oys dire vne mauuaise parole de sa bouche. En magnanimité & force de courage, il fut tant excellent, qu'onques crainte, n'aucune infortune, ne le foruoyerent de raison: mais tousiours rendoit graces & louanges a Dieu, de ses aduersités. Onques voyant son armee en danger & peril, ne se voulut departir d'elle, pour sauuer sa personne: mais tousiours vouloit attendre avec ses gés les derniers hazards de fortune. Avec telles vertus & plusieurs autres, vesquit si tresbien le Roi S. Loys, qu'apres sa mort glorieuse, il fut canonisé, & mis au nombre

bre des saints Confesseurs, & bien esleus de Dieu. Et comme nostre Seigneur mourut en la Croix, pour racheter l'humain lignage, aussi le bon Roy S. Loys mourut a Carthage, croisé pour recouurer la Terre sainte, comme nous dirons par le discours de nostre Histoire qui est telle.

CHAP. II.

De la naissance du Roy S. Loys, & a quel iour, & quelle signification il referoit de ce iour là. A quel iour il fut couronné: aussi de la bonne doctrine qu'il apprint en sa iennesse, par le moyen de sa mere. Ensemble les bons enseignemens qu'elle mesmes lui donnoit.

IL nasquit (comme ie lui ai ouy dire plusieurs fois) le iour & feste de S. Marc apostre & Euangeliste, apres Pasques, & celui iour (disoit il) on apportoit aus Processions que l'on faisoit par toute France, des Croix, que l'on appelloit les Croix noires, qui estoit vraye figure & demonstration (comme depuis il auoit pensé) que il seroit vn iour croisé & plusieurs hauts princes avec lui, pour aller recouurer la Terre-sainte, des mains des Sarazins & Infideles, comme depuis il aduint: auquel voyage plusieurs Princes Chrestiens, & infini nombre d'autres gens, moururent vrais crucifiés, tant en Egypte qu'en Carthage, ainsi qu'il vous sera recité tout au long ci apres. Le douzieme an de son aage (apres la mort du Roi Loys son pere) il fut

sacré & couronné Roi en l'Eglise nostre Dame de Reims, par l'Euesque de Soissons, pource que l'arceuesque de Reims estoit nouuellement decedé. Et n'auoit encores esté pourueu de pasteur en ladite Eglise. A son couronnement assisterent les Princes de France, faisant tout l'honneur & reuerence dont ils se pouuoient aduiser, au nouveau Roi. Et fut son sacre fait le premier iour de Decembre, l'an de grace mil deus cens vingt six: auquel iour le seruice de la messe se commence par ces mots: *Ad te leuauí animam meam, &c.* Et le bon Roi (qui depuis son enfance auoit esté bien instruit a viure saintement) oyant chanter l'Eglise en sa personne, a l'initant commença a suivre ledit verset, disant, Beau sire Dieu, i'ai leué mon ame & mon cueur enuers toi, & toute ma confiance est en toi mise. & ceci disoit-il, considerant la grand' charge qu'il venoit a prendre, en receuant le gouvernement du Royaume, qui ne peut par la prudence de l'homme estre bien conduit, s'il n'est tenu en la main de Dieu. La Roine Blanche sa mere (qui par testament du feu Roi Loys auoit esté ordonnee Regente du Royaume) par tous les moyens dont elle se peut aduiser, le fit endoctriner en ses ieunes ans, & apprendre la Loy de Dieu: en sorte que pour la grand' affection qu'elle auoit d'auancer son enfant en sciences & bonnes meurs, elle lui mit en sa compagnie les plus

plus ſçauans hommes qu'elle peut trouuer en ſon Royaume, & par eſpecial gens de Religion, leſquels elle faiſoit preſcher deuant ſon fils tous les Dimanches, & Feſtes de l'annee, lui faiſant remonſtrer continuellement comment vn Prince, auquel eſt commiſe la charge & gouuernement d'un peuple, ſe doit maintenir enuers ſes ſuiets. Et tant deſiroit la bonne Roine Blanche edifier le Roi S. Loys a bien & iuſtement viure, qu'elle lui diſoit ſouuentefois telles paroles: J'aimerois trop mieus (cher fils) vous voir mourir deuant mes yeus, que vous voir commettre vn ſeul peché mortel, dont Dieu eſt tant offenſé. Ceste diuine doctrine fut grandement profitable au Roi S. Loys: car comme il m'a pluſieurs fois conté, il ne fut iour de ſa vie qu'il ne lui en ſouuinſt: mettant peine tant qu'il lui eſtoit poſſible de la bien garder.

Et ſi bien fut eſleué & appris es inſtitutions Chreſtiennes, par la merueilleuſe ſollicitude de ſa mere, qu'il n'y auoit homme de ſon temps plus deuot, & plus religieux que lui: en maniere qu'il eſtoit l'exemple & miroir de vertu aus Princes Chreſtiens.

CHAP. III.

Comme le Comte de Tholoſe print Chasteau Sarazin, pres Tholoſe: & comme la Roine Blanche, mere du Roi S. Loys, pour reſiſter auſſi

*Comte, enuoya armee contre lui; & de ce qui
en aduint.*

INcontinent apres son couronnement, la Roine Blâche sa mere fut aduertie que le Comte raimond de Tholose (qui auoit esté déclaré heretique par le Pape) estoit venu a grosse troupe de gēs assieger Chasteau Sarazin, qui est apres de la ville de Tholose, & auoit icelui prins a composition, en dechassant les François qui estoient dedans en garnison, pour la defense du lieu. A l'occasion de quoi elle delibera & print aduis de donner ordre a toute diligence, a cette nouuelle & soudaine guerre, & chastier la temeraire entreprinze dudit Comte de Tholose. Et pour ce faire aussi tost enuoya contre ledit Comte, Vmbert lieutenant du roi, & bien experimenté au fait de la guerre, accompagné de grand nombre de gens de guerre. Lequel Vmbert estant arrivé a Tholose, mist le siege a la ville, & l'assaillit de tous costés, si viuement que les ennemis n'auoient loisir de se fortifier, ne de pouruoir a leur infortune. Il commença a gaster & destruire tout le país a l'environ: en sorte qu'il mit en peu de temps les villes qui estoient a l'entour de Tholose, en l'obeissance du roi. Voyans les Tholosains telle diligence, & prenant exemple a leurs voisins, furent contraints de se rendre, & receuoir en leur ville ledit Vmbert. Et considerât le Comte que fortune

tune n'estoit pas des siennes, & que par la conduite d'une seule femme il auoit esté vaincu, qui tousiours auoit esté trouué inuincible, fut cōtraint faire la paix (qui estoit son dernier espoir) avec la Roine Blanche, & accepter le parti & conditions que la roine lui offroit. Il auoit vne fille vnique, nommee Ianne, de l'aage de neuf ans; laquelle fut fiancée a Alphons frere du Roi, qui estoit aussi en bas aage: & fut conuenu que le Comte, sa vie durant, demoureroit possesseur du Comté de Tholose, & apres sa mort lui succederoit ledit Alphons son gendre. Ainsi fut donnée fin a cette guerre, par le bon conseil de la Roine Blanche, le Roi S. Loys, estant encores sans aucune administration.

CHAP. IIII.

De l'entreprinse du Comte de Boulongne, pour auoir la Regence du Royaume de France, & l'oster a la Royne Blanche, mere du Roy S. Loys. Ensemble ceus qui tenoient le parti dudit Comte de Boulongne: & de la bonne vigilance que ladicte Royne Blanche auoit pour resister a leur entreprinse.

CES choses ainsi appaisées, fortune qui defauorisoit au Roi, lui procura nouvelle haine, & a la Roine sa mere. Philippes Comte de Bouloigne, & oncle du Roi, se tenoit grandement outragé, que

que la regence du Royaume ne lui auoit esté baillée, & qu'une femme d'Espagne, & d'estrange país, comme estoit la Roine, lui estoit preferée: parquoy resolut en soi de chasser la Roine, & prendre la regence du Roiaume. Au moien dequoy commença de faire grans brigues & factions en la Court, & tira de son parti plusieurs Princes & gros seigneurs: ausquels il fit entendre l'injure qui leur estoit faite, tant a lui qu'a eus; c'est d'estre conduits & gouvernés par le moien d'une femme estrangere. Ceci entendu par les Princes & Seigneurs, promirent de lui aider, & secourir en tout ce en quoi il les voudroit emploier: & des l'heure le firent leur Seigneur & maistre.

Voiant donques le Comte de Bouloigne la Roine estre sans aucuns amis au Royaume de France, & le Roi estre encores en son ieune aage, delibera d'excuter ce qu'il auoit entrepris. Et pour ce faire (aiant vne partie des tresors du roi Phelippe Auguste son pere, & du roi Lois son frere dernier decedé) fist fortifier Calaix, & enuironner de murailles: pour ce qu'il voioit bien telle ville estre conuenable pour mener la guerre, & mesme-ment sur la Mer: & que de là il pouuoit bien aisement & en brief de temps passer en Angleterre, si la necessité l'en contraignoit. La Roine Blanche estant aduertie de la fortification que le Comte de Bou.

Bouloigne faisoit, eut crainte qu'il ne fust aduise de quelque mauuais conseil : toutesfois il conduisoit si secrettement son affaire, qu'on ne pouuoit trouuer moien de l'accuser enuers le roi ; & d'autre part il auoit la plus grād' partie de la noblesse de France, qui du tout (comme il a esté dit) lui fauorisoit. Parquoi la roine print aduis de lui mettre au deuant vn Prince voisin, puissant en biens & renommee. Au moien dequoi elle fit amitié avec le roi Ferdinand d'Espagne, lequel nouuellement auoit esté racheté par la roine sa femme ; & par cette amitié commença l'autorité du Comte de Bouloigne a diminuer enuers les François. D'auantage elle s'aduisa (pour augmenter & renforcer sa puissance) d'attirer a soi par prieres le Comte Thibaut de Champagne, lequel de ligne paternelle descédoit de la maison de France, & de par sa mere, descendoit d'Espagne ; lequel Comté de Champagne (comme l'on vouloit dire) fauorisoit au Comte de Bouloigne. D'autre part estoient le Duc Pierre de Bretagne, & son frere Robert Comte d'Eureus, lesquels auoient tant d'ennui, qu'ils ne pouuoient trouuer repos en leur esprit, de se voir du tout priués de l'administration du royaume. Au moyen dequoi ils coniurerent a l'encontre du roi, avec propos delibéré, de lui nuire a leur puissance. La cause de les induire a faire telle

trahison, furent aucuns des Barons de France, lesquels apres le couronnement du roi, auoient demandé a la roine que elle leur voufist donner certaine quantité de terres qui estoient du domaine du roi. Et pource que la roine leur auoit refusé de ce faire, ils delibererent d'en prendre vengeance. Et vn iour s'assemblerent a Corbeil, pour parler & prendre conseil avec le Duc de Bretaigne, auquel tous d'un accord promirent par grand' trahison, que s'il vouloit entreprendre de faire la guerre contre le roi, qu'ils seroient a son aide, & tiendroient son parti: lui promettant d'auantage, que si le roi dresseoit armee contre lui, & qu'ils y fussent mandés, qu'au mandement du roi, ils s'y trouueroient: mais qu'ils ne meneroient avec eus que deus hommes de guerre chacun, affin de plus legerement le roi* conuaincre. Et comme ils auoient promis au Duc, ne faillirent de tenir leur promesse, ainsi qu'il vous sera recité ci apres.

c. vendre
reincis.

CHAP. V.

Ce que voulurent faire les Duc de Bretaigne & Comte d'Euzeux son frere en la dite conspiration a l'encontre du Roy S. Loys, & qui fut cause de rompre leur entreprise.

Donq

DOnques le Duc de Bretagne, & le Comte d'Eureus son frere, pour le commencement de la guerre, prindrent deus fors Chasteaus, c'est assauoir S. Iaques de Beuron, & Belesme, qui estoient en l'obeissance du roi. Lesquels le roi son pere, en allant contre les Albigeois, auoit baillé en garde au Duc de Bretagne. Par la prise de ces deus Chasteaus, la trahison fut descouuerte: au moien dequoi, les deus freres furent accusés de trahison enuers le roi & desloiauté. Le roi, par le conseil de sa Mere, les enuoia deffier, delibérant leur courir sus a grand' puissance, pour les punir de leur meffait. Mais le Comte de Champagne, voiant que le Duc de Bretagne auoit trop peu de resistance, pour la force du roi, moienna d'appaier le roi, lui remontrant qu'il deuoit premierement faire appeller lesdits conspirateurs par deuant lui, & entendre leur cause par eux mesmes. Le roi trouua bon ce conseil: parquoi manda au Duc de Bretagne, & a son frere, qu'ils vinssent parler a lui, pour s'excuser de la trahison: autrement qu'ils deliberaissent d'auoir la guerre en brief. Le duc & son frere firent responce, que la Paix leur estoit tresaggreable: suppliant au roi qu'il lui pleust assigner le iour & lieu, pour se trouuer par deuers lui, pour defendre leur cause, & traiter de la paix. Le lieu leur fut assigné a Chinon: mais au iour accordé

ils firent défaut , & ne comparurent point. Parquoi de rechef appellez, promirent venir a Vandosme , & la (selon le vouloir du Roi) se purger de ce dont ils estoient coupables. Le Roi partit de Paris pour aller a Vendosme : & le Duc & son frere estants bien aduertis du parlement du Roi, excogiterent vne plus grande trahison , & firent resolution de prendre le Roi par force a ce voyage , & le tenir a leur puissance , hors des mains & gouvernement de sa Mere. Et pour mettre fin a leur entreprinse, firēt vne embusche de Gens d'armes a Estampes, pour attendre & guetter le Roi , & le prendre quant il passeroit par la. Le Roi estant arriué a Montleheri, fut aduerti, par le moyen du Comte de Champagne , de cette trahison qu'on auoit brassée contre lui: delibera de ne passer plus outre. Et pour ce que l'on lui fit entendre que la plus grand' partie des Barons ses ennemis estoient assembles a Corbeil, pour lui porter dommage: il n'osa partir de Montleheri pour retourner a Paris, craignant que ses ennemis ne lui vinssent au deuant. Parquoi soudain enuoya a sa Mere, lors estant a Paris, pour l'aduertir du danger ou il estoit. Laquelle apres auoir entendu le peril de son Fils, delibera sans aucune demeure, lui donner secours. Au moyen de quoi subitement incita les Parisiens a se mettre en armes, pour aller
don

donner aide a leur Roi. Les Parisiens assemblèrent grosse troupe de gens, & tirent droit a Montleheri ou estoit le Roi: & quant les insidiateurs conurent la venue des Parisiens, ils se retirerent secretement, sans mot dire. Et le roi estant mis hors de danger, fut amené & conduit par les Parisiens, iusques en la ville de Paris. Plusieurs fois lui ai ouy dire, que depuis Montleheri iusques a Paris, les chemins estoient pleins & serrés des deus costés de Gens d'armes, & autres gens qui estoient venus là pour le defendre: & crioient tous a haute vois, que Dieu lui voulist donner longue vie & prosperité, & le garder des mains de ses ennemis.

CHAP. VI.

Comme les ennemis du Roy tascherent par diuers moyens d'attirer a eus Thibaut comte de Champagne, ou bien de le mettre en la male grace du Roy.

VOyans doncques les ennemis du roi, qu'il leur estoit eschappé, & que leur trahison auoit esté descouuerte, par le Comte Thibaut de Champagne, furent grandement marris & indignés contre icellui Comte Thibaut. A l'occasion dequoy, delibererent de prendre vengeance de lui, & le desheriter: se delib^{*c.} lui faire perdre son rans d'enuoier querir la royne de Chyp^{pays.}

pre, a laquelle par droit de succession appartenoit le Comté de Champagne, comme nous dirons apres. Toutesfois ce conseil ne fut pas trouué bon d'aucuns Barons: parquoi cette entreprise (pour l'heure) delaissee, prindrent autre aduis. C'est de moyenner la Paix entre le Duc de Bretagne & le Comte de Champagne, esperans par ce moyen attirer a eux ledit Comte, & le rendre ennemi du roi: & quant bien il ne voudroit leur fauorifer, si pensoient ils bien qu'il encourroit la male grace du roi, pour auoir fait la paix avec le Duc de Bretagne. Et pour donner effet a leur conseil, chercherent tous les moiens, dont ils se peurent aduifer, pour paruenir a faire ladite paix. Et tant fut pourparlé d'un costé & d'autre, que le Duc de Bretagne promit donner a femme Blande sa fille vnique, a Ian fils du Comte de Champagne: & fut accordé que l'on ameneroit a certain iour la Damoiselle en la ville de Vaulserre, pres Chasteau-Thierri, pour la faire espouser audit fils du Comte de Champagne. Le Duc de Bretagne se partit de son pais, accompagné de la plus grand' partie des Barons de France, qui estoient ses parens, pour conduire sa fille iusques au lieu assigné. Et quant il fut arriué a Vaulserre, il manda au Comte de Champagne qu'il amenast son fils, pour faire les espousailles de lui & de sa fille, selon qu'ils auoient prom

promis l'un a l'autre. Le Comte de Champagne ayant receu le message du Duc, delibera incontinent de l'aller trouuer audit Vaulserre, pour lui tenir sa promesse: mais ainsi qu'il s'apprestoit pour partir, vint arriuer (selon que i'ai depuis entendu par ceus qui estoient presens) par deuers lui, messire Geoffroi de la Chapelle, qui lui presenta des lettres de par le roi: par lesquelles le roi lui rescriuoit qu'il auoit entendu l'alliance & amitié faite entre lui & le Duc de Bretagne son ennemi, & qu'il estoit bien informé du mariage, qui se deuoit faire entre son fils & la fille du Duc, lequel auoit tousiours conspiré & tasché a dommager le roi, depuis qu'il estoit venu a la couronne, & lui faire tout le mal qu'il auoit peu. Parquoi lui deffendoit expressement, par lesdites lettres, sur peine d'encourir sa male grace, & de perdre tout ce qu'il tenoit en France du roi, de n'accomplir point ledit mariage. Le Comte Thibaut de Champagne (apres auoir fait lecture desdites lettres) estant informé du vouloir du roi, delibera d'obeir & obtemperer a son mandement. Au moyen dequoi, manda au Duc de Bretagne, qu'il s'en retournast sans plus l'attendre, & que quelque incident lui estoit suruenu: parquoi il ne pouoit entendre a l'accomplissement dudit mariage.

CHAP. VII.

Comme le Duc de Bretagne, & autres Barons de France, se trouuans deceus et trompés de leur entreprife, manderent la Roïne de Chyppe pour faire la guerre contre Thibaut Comte de Champagne.

Quant le Duc de Bretagne, & les Barons de France, qui estoient (comme ie vous ai dit) attendans le Comte de Champagne, furent aduertis qu'ils estoient trompés & deceus de leur intention, ils conceurent mortelle haine a l'encontre dudit Comte: & par grand despit manderent la roïne de Chyppe; lui promettans aide & faueur, pour recouurer le Comté de Champagne, dont elle estoit vraye heritiere, lequel estoit a tort par ledit Comte vsurpé. Ces promesses meurent la roïne de Chyppe, en sorte qu'elle se retira par deüers eus. mais auant que passer plus outre en mon histoire, il m'a semblé conuenable de vous declarer comme ledit Comté de Champagne appartenoit a la roïne de Chyppe.

CHAP. VIII.

Incident, auquel est traité du droit du Comté de Champagne, querellé par la Roïne de Chyppe: ensemble d'aucunes choses faites tant par le Roy Thelippes, que par le roy Richart d'Angleterre, en vn voyage d'Oltre-mer.

Henr

Henri le Large, Comte de Champagne, espouza pour femme, Marie sœur du roi de France, & du roi richart d'Angleterre, duquel mariage il eut deus enfans, Héri qui estoit l'aîné, & Thibaut. Celui Henri s'en alla croisé en la Terre sainte, avec Phelippe roi de France, & le roi richart d'Angleterre: & a leur venue prindrent la Cité d'Acre. Mais le roi Phelippe s'en retourna incontinent en France, & demoura en Acre le roi richart, & avec lui ledit Henri: la ou ils firent tant de beaux faits d'armes sur les mescreans & Sarazins, que leurs histoires en sont toutes plaines. Et tant estoit rempli de prouesse icelui roi richart, qu'il fut plus craint & redouté des Sarazins, que ne fut onques Prince Chrestien: en sorte que quant les petis enfans des mescreans se prenoient a pleurer, les meres (pour les faire taire) leur disoient: taisés vous, voici le roi richart qui vient pour vous querir: & incontinent les petis enfans, oyans nommer ledit roi richart, se taisoient, sans plus plorer. Et semblablement les Turcs & Sarazins (si leurs cheuaus auoient paour de quelque ombre) en les piquant leur disoient, & cuides-tu que ce soit le Roi richart? Par le moien d'icelui roi d'Angleterre Henri de Champagne espouza la Roine de Hierusalem, qui estoit droite heritiere d'icelui Royaume: & de ce mariage eut deus filles,

dont la premiere fut Roine de Chippre,
& l'autre fut mariee au Comte Heirat
de Brienne, dont sortit grand lignage,
tant en France qu'en Champagne. Cette
Roine de Chippre, de laquelle ie veus
parler, estoit (comme vous pouués voir)
vraie Comtesse de Champagne, estant
ledit Comte Thibaut puisné seulement.

CHAP. IX.

*De la venue de la Roine de Chippre, & de ce
qui fut fait, tant par ceus qui tenoient son
parti, comme de la part du comte Thibaut.*

E Stant donques la Roine arriuee de-
uers les Barons, fut par eus receuë
treshonorablement : & lui declarerent
leur entreprife ; laquelle elle trouua
tresbonne. A cette cause firent inconti-
nent apres assembler & mettre en ordre
leurs gens de guerre, pour aller assaillir le
Comte Thibaut : mais auant que partir,
ils attirerent de leur costé le Duc de
Bourgoigne, qui auoit a femme la fille du
Comte Robert de Dreus, lequel leur
promit d'entrer a grosse armee en Cham-
pagne, du costé de la Bourgoigne, pour
destruire les pais du Comte Thibaut. Et
s'assignerent iournee pour assembler
leurs armees, devant la ville Troye, pour
la prendre. Le Duc de Bourgoigne mit ses
gens en pais, tirant droit en Champagne,
gast

gallant & bruslant tout ce qu'il rencon-
troit en son chemin. Les Barons entre-
rent du costé de la France, en Brie, & com-
mencerent a faire grand dommage par là
ou ils passoient, mettant le feu aus villes
& forteresses. Le Comte Thibaut se voi-
ant ainsi durement assailli de deus costés,
par si grand nombre d'ennemis, delibera
de pourvoir a sa nouvelle infortune, &
resister contre les assaillans. Si manda au
Roi la necessité ou il estoit, le suppliant
de lui enuoier secours. Le Roi n'y faillit
pas, mais fit dresser soudainement son ar-
mee, & lui mesmes en personne se mit en
chemin, pour aller au secours du Comte
Thibaut. Ce pendant le Comte brula &
destruit plusieurs villes & fortes places de
Champagne, comme Espernai, Vertu,
Cedane, & autres. A celle fin que si icelles
villes estoient prises par les ennemis,
qu'ils ne trouuassent point viures dedās,
ne lieu pour se fortifier a la retraite. Le
Duc de Bourgoigne arriua deuant Troye
le iour assigné, & se campa lui & ses gens
en la prerie: & le lendemain deuoient ar-
riuer aussi les autres Barons. Les bour-
geois de Troye se voyans n'estre point se-
cours de leur Seigneur le Comte Thi-
baut, manderent incontinent a Simon,
Seigneur de Ionuille, le danger ou ils es-
toient: le priant de les venir secourir. Le
Seigneur de Ionuille ce iour mesmes que
les Barons se deuoient trouuer deuant

Troye , arriua deuant l'aube du iour deuant la ville, & entra dedans. Les Barons a leur arriuee assaillirent asprement la ville, cuidans la prendre d'assaut; en sorte qu'il y eut dur conflit d'une part & d'autre: mais la ville fut si bien deffenduë, a l'aide & conduite du Seigneur de Ionuille, que les ennemis furent contrains cesser l'assaut, & se reculer pour se ioinde avec le Duc de Bourgoigne, qui (comme dit est) estoit desia campé.

Ne tarda gueres apres que le Roi vint arriuer avec son armee aupres de Troye: & estant aduerti que ses ennemis estoient en la prerie, delibera de les aller assaillir, & les combattre. Si tira droit a eus; mais les Barons voyans que le Roi estoit en personne en la bataille, se retirerent en leur parc, & ne voulurent ioinde a lui, pour le combattre. Si manderent supplier au Roi, que son plaisir fust de ne se trouuer point en la bataille; & qu'ils iroient volontiers combattre le comte de Champagne, & le Duc de Lorraine qui estoit en sa compagnie, a trois cents hommes d'armes moins que le comte & le Duc n'auoient. Le Roi leur fit responce, qu'il n'auoit point deliberé de mettre ses gens en bataille, si lui-mesmes n'y estoit en propre personne: & qu'il vouloit tenter le hazard de la guerre, comme son ami, qu'il estoit venu secourir. De cette responce furent les Barons grandement esbahis; en
forte

forte qu'ils ne sçauoient quel conseil ils deuoiẽt prendre : car ils ne vouloient point porter armes a l'encontre du Roi. Et craignans de ne courroucer le Roi d'auantage, lui manderent de rechef, que volontiers ils trouueroient moyen de faire entendre la Royne de Chippe a faire la paix, avec le Comte de Champagne, si le Comte aussi y vouloit entendre de son costé. Mais le Roi leur respondit qu'il n'entendroit aucunement a faire la paix, & ne permettroit aussi que le Comte de Champagne s'y accordast, que premicrement ils ne deslogeassent, & vuidassent de tout le païs de Champagne. Les Barons (apres auoir entendu l'intention & vouloir du Roi) leuerent incontinent leur camp, & se vindrent tout d'une traite loger a Illes, mais le Roi les chassa de là. Parquoy s'en allerent parquer au dessous de Iulli, ou le Roi les poursuiuit tousiours. Au moyen dequoy, voyans la grand' diligence du Roi, se retirerent en la ville de Langres, qui estoit au Comte de Neuers, qui tenoit de leur parti. Et ainsi le Roi deschassa ses ennemis du païs de Champagne, a grand' honte & confusion.

CHAP. X.

*L'appointement fait par le Roy S. Loys,
entre la Roine de Chippe, & Thibaut*

Comte de Champagne.

EStans donques (comme dit est) les Barons retirés a Langres, firent continuer le traitement de la paix entre la Royne de Chippre, & le Comte de Champagne. & tant fut l'affaire poursuiui, que par le moyen du Roi, la paix fut concludë & accordée. que le Comte de Champagne donneroit a la Royne de Chippre, pour le droit de son partage successif, deus mille liures en terre de reuenue, & quarante mille liures en argent comptant, pour rembourser la royne de ce qu'elle auoit fraié pour le fait de la guerre. Lesquels quarante mille liures, le roi paya depuis a la royne. & lui vendit le Comte de Champagne pour icelle somme, les fiefs & Seigneuries qui s'ensuiuent : C'est assauoir les fiefs des Comtés de Blois, Chartres & Sanxerre, avec le fief du Vicomté de Chasteaudun. Combien qu'aucuns vouloient dire que le roi tenoit lesdittes terres en gage seulement: mais ie le demandai vn iour au roi, nous estans Outre-mer, lequel me respondit qu'il les auoit acheptees purement & simplement, sans aucune condition.

Les terres que le Comte bailla a la Royne, tient au iourd'hui le Comte de Brienne, qui a present est, & le
Comte

Comte de Ioingni, pource que l'ayeule du Comte de Brienne fut fille de la Roine de Chyppe, & femme du present Comte Gautier de Brienne. Et pource qu'il vient a propos, ie n'ai voulu mettre sous silence, comme appartenoiẽt au Comte de Champagne les terres & seigneuries qu'il bailla au Roy. Le grand Comte Thibaut qui gist a Laigni eut trois fils, dont le premier s'appelloit Henri, le second eut nom Thibaut, & l'autre Estienne. celui Henri, qui estoit l'aîné fut depuis Comte de Champagne & de Brie: & pour la grand' largesse & liberalité dont il vsoit enuers tous, fut appelé le Large. Et entre autres largesses qu'il fit, en ai voulu escrire ici vne, qui est digne de memoire. Il y auoit vn trefriche Bourgeois a Troye, nommé Artaut, auquel le Comte Henri donnoit plus de foy qu'a nul autre de son conseil, & tant amassa de deniers icelui Artaut, qu'il feit bastir le Chasteau de Nogent, dont depuis a esté appelé Nogent l'Artaut. Or aduint qu'une feste de la Pentecoste comme le Comte alloit a S. Estienne de Troye, pour ouyr Messe, qu'un pauvre Gentilhomme ayant deux filles avec lui, se mit a genous deuant le Comte, lui suppliant au nom de Dieu, de lui vouloir aider pour marier ses deus filles, lesquelles il monstroĩt au Comte. Et Artaut de Nogent qui venoit derriere, sans attendre la responce du Comte, commen-

ça a reprendre le pauvre Gentilhomme, lui disant qu'il auoit tort de demander argent au Comte, qui en auoit tant donné, qu'il n'auoit plus dequoi. Et le Comte ayant entendu ce qu'auoit dit Artaut, se tourna deuers lui, en lui disant: Sire vilain, vous mentés faussement de dire que ie n'ai plus que donner. si ay dea, & encores vous-mesmes que ie donnerai tout a present. Et incontinent le print & dit au Gentilhomme: Tenés (mon ami) ie le vous donne, & le vous garantirai. Le pauvre Gentilhomme ne fut point estonné: mais soudainement empoigna mon Bourgeois bien estroitement, & ne le laissa oncques aller iusques qu'il lui eust baillé cinq cens liures pour marier sedites deus filles. Le second frere d'icelui Henri le Large estoit Thibaut, qui fut Comte de Blais: & le tiers fut Estienne, qui fut Comte de Sanxerre. Et ces deus freres ici tindrent leurs Comtés & heritages de leur frere aîné Henri le Large, & leurs hoirs apres eux, iusques à ce que le Comte Thibaut les vendit (comme dit est) au Roy S. Loys.

CHAP. XI.

*De la guerre de Bretagne, faite par le Roy,
& quelle fin elle eut.*

A Pres que le Roi eut donné fin a cete guerre, il s'en retourna a Paris, pour aller courir sus au Duc de Bretagne, qui

qui estoit encores en armes contre le Roi. Mais auant que de mouuoir, par l'aduis & conseil de la Roine Blanche sa mere, pour diminuer la force du Duc, il attira a son amitié Robert Comte d'Eureus, lequel vint vers le Roi, & obtint de lui pardon. Et vous assure que lon mettoit plus grand' diligence d'un costé & d'autre de solliciter & gagner des amis, qu'a faire la guerre par armes. A cette cause, le Duc de Bretagne se voyant delaisé du Comte de Eureus son frere, fut contraint aller querir loingtain secours. Au moyen dequoi, il s'allia avecq' Henri Roi d'Angleterre, pour faire la guerre au Roi S. Loys. Et lui promit le Roi d'Angleterre de passer la Mer (avecq' grosse troupe de gens) au Printemps prochain, pour se ioinde avec lui. Cest accord fut fait au commencement de l'hiver. Et le roi S. Loys en estant aduertí, delibera d'y pouruoir diligemment, & n'attendre point d'assaillir le Duc iusques a ce qu'il eust renforcé sa puissance. Parquoi estant au meillieu de l'hiver, assembla grosse armee, & tira droit a Angers, que le roi Loys son pere auoit rescous des Anglois, & l'auoit baille au Duc de Bretagne. A la venue du roi, les Angeuins se rendirent a lui. Et le roi parti de là, alla prendre plusieurs autres villes a l'entour, que le Duc de Bretagne tenoit des rois de France. Et comme le roi vouloit passer outre, pour entrer en

la Bretagne plus auant, le Duc se voyant auoir peu de resistance aima plus experimenter la benignité & clemence du roi, que tenter la fortune de la guerre. Parquoy s'en vint deuers le roi, pour lui requerrir pardon. Lequel (aus prieres de Robert son frere) lui fut octroïé. Il promit tenir en foy & hommage du roy, le Duché de Bretagne, & lui en fit le serment de fidelité deuant tous les Princes. Dequoy les Bretons lui dōnerent grand blafme despuis, l'appellans le Duc Mauclerc: mais ie ne sçai si a iuste cause les Bretons lui donnerent tel nom, veu qu'il deuoit estre bien sage, puis qu'il auoit si long temps estudié a Paris. Ainsi print fin la guerre de Bretagne, par la grand' diligence & prouesse du roi S. Loys.

CHAP. XII.

Comme le Roy estant en Paix, bailla le Comté de Poitou a son frere Alphons: qui fut moyen qu'Hugues Comte de la Marche, sa Femme, & autres s'esleuerent contre le Roy, qui fut commencement d'une grand' guerre.

* Auise que
l'Auteur

en parlant
de Poitou,
le nomme
quasi par
tous Com-
té, & non
Duché.

ET se voyant le roi estre en paix, & au dessus de tous ses ennemis, lui print auis & vouloir de visiter son royaume: & en le visitant erigea plusieurs Comtés, & Duchés: & par especial il erigea le Comté de Poitou en ^{*}Duché, & le donna a Alphons son frere: & commanda a tous les Seig

Seigneurs de Poitou de faire foy & hommage de leurs terres & Seigneuries au nouveau Duc: par ce moyen estoit requis a Hugues Comte de la Marche (qui estoit enclosé au Duché de Poitou) de reconnoistre pour Seigneur le Duc Alphons: mais sa femme lui dissuadoit tousiours de ce faire, & remonstroit que ce n'estoit point chose raisonnable qu'un pere de roi (comme estoit le Comte de la Marche) deuint homme lige du Duc Alphons. D'auantage, qu'elle estoit mere de roi, & auoit esté femme de roi, car elle auoit esté mariee au roi d'Angleterre, & qu'encores elle portoit le nom, & estoit appelée roine: parquoi (disoit elle) ie ne voi aucun droict par quoi le Duc Alphons doie auoir Seigneurie aucune sur nous, ne que ie soye tenue de faire reuerence a Ianne sa femme. Toutes ces remonstrances faisoit elle au Comte de la Marche son mari. Et encores d'auantage, elle sollicita le Comte Geoffroi de Luzignen, de ne point obeir au Duc Alphons, lui redulsant a memoire comment il auoit eu deus freres, qui auoient esté l'un roi de Hierusalem, & l'autre roi de Chyppe. Au moyen de quoi seroit indigne & mal seant a la maison de Luzignen, qui estoit de ligneroyal, de receuoir pour seigneur le Duc Alphons. Par ces persuasiōs, le Comte de Luzignen delaiſsa la foy & amitié du roi, deliberant de ne reconnoistre aucun droit de subie-

tion au Duc de Poitou : parquoi secrettement commança a fauoriser au Comte de la Marche : lequel desia (sans que personne s'en apperceust) donnoit ordre de faire assemblee de gens pour se deffendre, si le Roi le vouloit contraindre à faire hōmage au Duc de Poitou. Or aduint il vn iour ce temps pendant que le Roy estant en la ville de Saumeur, qu'il tint vne grand' court & maison ouuerte. Et vous veus ie bien faire certains (pource que i'y estois present) que ce fut vne chose de si grand' magnificence & appareil (veul'abondance de toutes choses & richesses qui y estoient) que lon eust sceu onques voir. A la table du Roi mangeoient le Duc de Poitou son frere, lequel auoit esté fait nouuellement Cheualier, le Duc Pierre de Bretagne, les Comtes d'Eureus nouuel Cheualier aussi, & de la Marche. Et en vne autre table deuant le Roi, a l'endroit du Comte d'Eureus estoit assis le Roi de Nauarre, qui estoit tresrichement accoustre de drap d'or en cotte & mantel, la saincture, fermail, & le chapeau d'or fin, deuant lequel ie seruoie d'Escuyer. Deuant le Roi S. Loys, seruoit le Comte d'Artois, & son frere, & le bon Comte de Soissons, qui trenchoit du cousteau. Et pour garder la table du Roi estoient ordonnés messire Imbert de Beauieu, qui puis fut fait Connestable de France, & messire Honnorat de Couci, & messire
Archib

Archibaut de Bourbon. Derriere ces trois Barons y auoit bien trente de leurs Cheualiers en cotte de drap de soye : & apres ceus ici grand nombre d'Huissiers d'armes & de salle, qui estoient au Comte de Poitiers, portans ses armes batues sur sandail. Le Roi y estoit si tres-richement habillé qu'il seroit chose merueilleuse & longue a le racompter. Et ai ouy dire a plusieurs de la compagnee, que iamais ils n'auoient veu tant de fercors, ne d'autres garnimens de drap d'or, comme il y auoit en celle feste. Apres vn temps le Roi se partit de Saumeur, voulant conduire le Comte son frere iusques a Poitiers, pour lui faire reprendre ses fiefs & seigneuries de la Comté. Quant il fut arriué a Poitiers, il ne demoura gueres que lon lui apporta nouuelles que le Comte de la Marche (qui auoit mangé a sa table a Saumeur) auoit assemblé grosse troupe de gens, & se tenoient en armes a Luzignen. Ce message entendu par le Roi, lui donna grand' crainte de quelque trahison, & comme il m'a dit depuis, il eust bien voulu estre a Paris. Apres ces nouuelles, il fut quinze iours dedans la ville de Poitiers, qu'il n'osoit sortir, doubtant le Comte de la Marche, qu'il ne lui courust sus. Et disoit on que le Roy, & le Comte de Poitiers auoient leur paix mal faite avec le Comte de la Marche. Le Roi pour sortir hors du danger ou il estoit, fut contraint d'aller

parler au Comte de la Marche, & a la Roine d'Angleterre sa femme: & fut fait entr'eus quelque accord fourré, lequel ne dura guerés apres, comme vous verrés ici.

CHAP. XIII.

De la gnerre que le Roy fit contre les Comtes de la Marche, & de Luzignen: & comme le Roy d'Angleterre vint à leur aide: ensemble des aguets que la Comtesse de la Marche dressa contre le Roy: & quelle fin print celle guerre.

A Pres cest accord le Roy partit incontinent de Poitiers, pour retourner en France: mais le Comte de la Marche avec ses alliés refusoit tousiours l'obeissance au Comte de Poitiers: parquoy le Roy fit dresser grosse armee, & tira droit en la Marche: & a sa venue assiegea Montreul, & Berme, & les print d'assaut, & y mettant garnison, vint assieger Fonçai, ou estoit Geoffroi Comte de Luzignen: & apres y auoir tenu le siege quelques iours, il le print a force d'armes, & entra dedans. Durant ces sieges, & que le Roy victorieusement mettoit a fin toutes ses entreprises, fut assailli d'un autre costé, dont il ne prenoit point de garde. La Comtesse de la Marche, usant de la malice des femmes, songea de faire mourir le Roy par poison. Parquoy elle trouua aucuns familiers, auxquels fit de riches dons, qui lui promirent d'empoisonner le Roy. Et ayant receue la
poison

poison par les mains de la Comtesse, s'en vindrent là où estoit le Roy. Et voulans exccuter leur damnable malice, furēt trouués & prins sur le fait, en iettant les poudres venimeuses par dessus les viandes du Roy. La verité confesse'e furent pendus & eltranglés. La Comtesse conoissant que sa meschanceté estoit descouuerte, entra en si grand rage de despit, qu'elle mesmes se voulut tuer, n'eust esté qu'aucuns de ses domestiques l'engarderent. Neantmoins elle demoura tousiours en son mauuais cueur, en sorte que le bruit courut iusques a la conoissance du Roi, qu'elle auoit attirés aucuns pour le tuer. Au moien dequoy, le Roi auoit tousiours a l'entour de sa personne grand nombre de gens armés, & ne parloit a lui aucun homme inconnu, qu'il ne fust premierement bien visité, s'il portoit aucun harnois. En ce mesme temps, icelle Comtesse enuoya en Angleterre certain nombre de gens, lesquels sous l'ombre de prescher la parole de Dieu, incitoient les Anglois a prendre les armes a l'encontre des François: disans que le Roy S. Loys molestoit par guerre toute la noblesse, & mesmement celle qui descendoit du Roi d'Angleterre, & auoit deliberé de l'abolir & perdre du tout. D'auantage (disoient-ils) il a chassé a tort les Anglois du pays de Normandie, & s'efforce encores occuper sur eus le Duché d'Aquitaine: il a spolié le

Comte de Luzigné de tous ses biens: & nō cōtent de ce, veut a present chasser le Cōte de la Marche de ses pays, & priuer ses enfans, qui sont freres de Roy, de leur vrai heritage, sans estre meū de pitié pour leurs ieunes ans, & sans auoir esgard à la noblesse dont ils descendent. Parquoi entreprendre la guerre contre le Roy de France, seroit plus iuste & raisonnable, qu'aller guerroyer les Sarazins & infidelles. Ces preschemens faisoit-on aus Anglois, par le moyen de la Comtesse. A ceste cause le Roi d'Angleterre print haine au Roi S. Loys, & mettant sus vne grosse armee (apres l'auoir deffié) passa en France, ou il conut depuis, qu'il auoit affaire a vn sage & puissant Roi. Auant que l'Anglois fust descendu en France, le Roy alla mettre le siege a Fontenai: lequel fut tresbien deffendu par ceus qui estoient dedans, & ne pouuoit le Roi les dommager grandement: parquoi commanda faire vne haute Tour de bois, par laquelle on pouuoit aisement voir dans la ville, & y ietter pierres & dards: mais ne tarda gueres que ceus de la ville ietterent le feu dans ladite Tour, & la bruslerent. En ce conflit fut nauré le Comte de Poitiers au pied, dequoi le roi grandement irrité, fit donner l'assaut plus dur que deuant, en forte qu'en brief de temps la ville fut prise & mise a sac, & ne demoura que les Eglises, que tout ne fut razé. Le fils du
Comte

Comte de la Marche fut trouué dedans & prins prisonnier. Apres le roi print & abatit Villiers appartenant a Guy de Rochefort, qui tenoit le parti de l'Anglois.

Le roi d'Angleterre s'auançoit tousiours pour venir ioindre au Comte de la Marche, & leur armées assemblees, se vindrent camper aupres de Taillebourg, ou passe vne riuere qu'on appelle Tarante*, * *a present* en laquelle n'auoit qu'un petit pont de *Charante* pierre bien estroit pour passer. Et estant aduertí le roi, que ses ennemis l'attendoient, il leua son camp, & tira droit a Taillebourg; le Comte de Poitiers conduisoit l'aduantgarde, & le Roi venoit apres en l'arrieregarde, quant Richard frere du Roi d'Angleterre, qui auoit la charge de deffendre le pont, & le passage de la riuere, entedit que le Comte de Poitiers estoit en l'aduantgarde, & que le Roi estoit bien loin encores, il tendit & haussa le bras deíarmé, & appella le Comte de Poitiers, & faisant signe qu'il vouloit parler avec lui: mais le Comte voyant que c'estoit contre la discipline militaire, sans le congé du Roi, ne voulut pour parler a celui Richart. Ne tarda gueres que le Roi vint arriuer au bord de la riuere: a son arriuee y eut dur conflit d'une part & d'autre, les vns pour prendre le pont, les autres pour les engarder: toutesfois les François furent vne fois repoussés: car les Anglois auoient de leur costé le Chateau

de Taillebourg, qui leur donnoit grand^e aide. Ce que voyant le Roi, se mit le premier pour gagner le pont. & tant fit d'armes, que maugré les ennemis il print le pont, & passa outre: mais pource que le passage estoit bien estroit, il fut suivi de bien peu de ses gens. Au moyen dequoi (estant desia le Roi d'Angleterre arriué en la bataille) le Roi S. Loys se trouua en grand peril de sa personne. Car pour vn homme qu'il auoit quant & lui, l'Anglois en auoit bien cent. Ce pendant que le Roi soustenoit le fais de cette bataille, ses gens passoient tousiours la riuere, les vns sur le pont, les autres sur bateaus. Et quand ils furent passés, les Anglois furent assaillis de telle furie, qu'ils reculerent, & commencerent à branler, pres à eus mettre en routte. Ce que preuoyant le Roi d'Angleterre, donnoit courage a ses gens, les admonnestant de bien faire, & que grand^e honte leur seroit, s'ils estoient vaincus par les François: mais tout cela ne lui seruit de rien, car les François faisoient tant de faits d'armes sur leurs ennemis, que l'Anglois commença a chercher le moyen pour se sauuer: & a l'instant tourna le dos, & s'en fuit droit a Xaintes, pour gagner la ville. Les Anglois furent si viuement poursuiuis par nos gens, que si le Roi n'eust commandé de prendre prisonniers, ceus qui se rendroient, il ne s'en fussent gueres sauues. Et tant fut la poursui-

te

de chaude, que plusieurs François, premier que se reconnoistre entrèrent à Xaintes, quant & les Anglois, lesquels furent dans la ville prins prisonniers. En cette bataille moururent grand nombre d'Anglois, & en furent prins prisonniers bien quatre mille ou environ. Celle mesme nuit (comme plusieurs m'ont dit) que le Roi d'Angleterre se fut retiré à Xaintes, il manda le Comte de la Marche, & se courrouça fort à lui : lui reprochant qu'il l'auoit fait venir en France, & l'assurant qu'il trouueroit grand'aide & faueur, entre les François. Parquoi la nuit apres ensuiuant, il fit mettre en armes ses gens, & commanda que les portes de la ville fussent ouuertes: & faignant d'aller assaillir les François, tourna son chemin & tira droit à Blaye, dont il estoit premier parti. Apres le partement de l'Anglois, la ville se rendit au Roi: qui reçeut les habitans gracieusement. Le Comte de la Marche se voyant seul, & de tous delaisié, delibera de ne plus prester l'oreille aus folles paroles de sa femme. Au moyen dequoi, prenant ses enfans, & sa femme, se vint rendre à la merci du roi, lui requerant pardon de son meffait & felonnie. Le roi par les prieres des Seigneurs, & en faueur de ses enfans, lui pardonna: avec condition que tout ce qu'il auoit prins sur lui par droit de guerre, demoureroit au Comte de Poitiers, pour qu'il la guerre auoit esté entreprise.

Aussi que le Comte quitta au Roy dix mille liures parisis de rente qu'il prenoit chacun an sur lui. Et demouroit seulement au Comte de la Marche Meffin, Cretoye, & Estarde: lesquels Chasteaus il tiendroit du Comte de Poitiers, & lui en fit le serment de fidelité.

CHAP. XFIII.

Le different qui fut entre les Comtes de Tholose, & de Prouence, qui fut cause dont ne l'un ne l'autre se trouuerent avec le Comte de la Marche, a la rencontre qui fut faite a Taillebourg. Et les alliances que fit ledit Comte de Prouence es Rois de France & d'Angleterre. Aussi de la guerre & paix faite avec le Comte de Besiers.

Estant donques la paix ainsi faite entre le Roy & le Comte de la Marche: le Roy d'Angleterre (qui estoit desia retiré a Bordeaux) ordonna ses Ambassadeurs vers le Roy, pour auoir treues avec lui: lesquelles lui furent accordees par le moyen de la roine Blanche, qui estoit sa tante. Le Comte de Tholose estant marri d'auoir perdu la domination de son Comté (comme dessus vous a esté recité) deuoit tenir le parti du Comte de la Marche, & du Roy d'Angleterre, & se fust trouué en la bataille precedente: mais la fortune l'appella en autres affaires. Les Prouençais mal traités de leur Comte Raimód, par

par plusieurs fois lui remōtrèrent le mau-
uais traitement qu'il leur faisoit, & pour-
ce qu'il ne vouloit entendre a s'amender,
ils le chasserent hors de la ville de Mar-
seille, estāns resolu de le mettre hors de
toute la Prouence: parquoy enuoyerent
querir le Comte de Tholose (qui estoit le
plus prochain parent du Comte de Pro-
uence) pour le faire leur Seigneur. Et cer-
te guerre s'esmeut entre le Comte de Pro-
uence & le Comte de Tholose, qui les em-
pescha tous deus qu'ils ne se trouuerent
point en la iournee des Anglois. Par la
paix qui fut entre le Roy S. Loys, & le Roy
d'Angleterre, icelui Comte de Prouence
fit alliance avec les deus Rois. Il auoit
quatre filles, c'est assauoir Marguerite que
il donna pour femme au Roy S. Loys: A-
lienor la seconde que le Roy d'Angleter-
re espousa: la tierce que Richart frere du
Roy d'Angleterre eut a femme: & Beatrix
la derniere, qu'il ne voulut encores ma-
rier. Et par le moyen de ces mariages, le
Comte remit en son obeissance la ville
de Marseille: mais pour l'iniure qu'il en
auoit receue, d'en auoir esté expulsé, il n'y
voulut onques plus entrer: mais vsa le de-
mourant de sa vie avec le Comte de Sa-
uoye, qui auoit espousé sa sœur: parquoy
ne restoit plus des ennemis du Roi, qui
fussent en armes, que le Comte de Besiers:
lequel estoit venu assieger Carcassonne, &
auoit desia prins les faulx-bourgs, dont il

battoit fort la ville, quand le Roy y vint pour faire leuer le siege. Le Comte de Bessiers ayant peu de force pour se deffendre, vint vers le Roy pour obtenir pardon. Le Roy (qui n'eut onques pareil en clemence & douceur) le receut, & lui pardonna son offense. Et ainsi demoura le Roy paisible en son royaume, sans auoir aucun ennemi.

CHAP. XV.

L'empeschement qui fut fait au Comte de Tholose, a ce qu'il n'esponsast Beatrix, la quatrième fille du Comte de Prouence: & comme apres la mort du Comte de Prouence, Charles frere du Roy fut marié avec elle: puis apres reduit le Comté de Prouence a lui, & depuis les Prouençais le receurent pour leur Comte.

VOUS aués entendu, par le chapitre precedant, que le Comte de Prouence auoit encores vne fille a marier. Le Comte de Tholose la vouloit auoir a femme, & le pere de la fille y donnoit son consentement: mais pource qu'ils estoient prochains parens, fut besoin premiere-ment d'enuoyer à Rome, pour auoir dispense: mais le Pape (fauorisant au Roy, & a Alphons son frere, qui deuoit succeder au Comte de Tholose) ne voulut accorder icelui mariage. Et cependant que l'affaire se demenoit à Rome, le Comte de Prouence deceda: parquoi du consente-
ment

ment du Comte de Sauoye, Beatrix fut mariee a Charles frere du roy S. Loys. Ainsi furent mariees les quatre filles du Comte de Prouence, les deus a rois, & les autres qui seront appellees roines comme verrés, par le discours de nostre histoire. Les Prouençais par la mort de leur Comte auoient reprise leur liberté, de laquelle ils abusoient, & les villes de Prouence estoient en discord, l'vne contre l'autre : parquoy Charles, a la faueur du roi, alla en Prouence, laquelle il reduit du tout en son obeissance. & pource qu'il auoit espousé la derniere fille du Comte de Prouence, comme nous auons dit, par le vouloir du roi, les Prouençais le receurent pour leur Comte & Seigneur : & d'auantage lui bailla le roi les Comtés d'Anjou, & du Maine : & a Robert son plus ieune frere, donna le Comté d'Arras.

CHAP. XVI.

Ce que faisoit le Roy S. Loys, apres auoir mis fin aus guerres precedentes: & des bonnes Loix qu'il establit en son Royaume: ensemble de ses vertus & bonne vie. Le voyage que firent les Comte de Champagne, & Duc de Bretagne en Asie, & aussi de celui du Roy d'Angleterre en Afrique.

Ces choses par le roi ainsi ordonnees, se voyant en meilleur repos & tranquillité qu'il n'auoit eucore esté depuis.

le commencement de son regne, delibera du tout s'appliquer au bien public de son Royaume, & donner police de bien viure a ses suiers. A cette cause, il se dedia entierement au seruice de l'Eglise, & fit plusieurs belles & saintes Loix, par lesquelles il abolit grand nombre d'abus, qui estoient en France: & entre autres choses il chassa de son Royaume tous Bastleurs, & autres ioueurs de passe-passe, par lesquels venoient au peuple plusieurs lasciuetés: & en ce temps, comme l'un mal accumulo l'autre, le Royaume de France fut griefuement opprimé de Peste & Famine: & comme le Roi, pour seder tant de maus, cherchast tous les moyens entre les hommes dont il se pouuoit aduiser, voulut aussi requerir l'aide de Dieu. Au moyen dequoy, apres auoir fait plusieurs Processions, lui-mesmes se mit a faire ieusnes & abstinences, & chargea sur sa chair la haire, & se battoit secrettement a tout des verges, ainsi qu'il fut manifestement coneu, par ceus qui viuoient pres de lui: qui est vne chose digne de grand' admiration, qu'un Roi pour la santé de son peuple, voulsist endurer tant de peine, comme faisoit le Roy S. Loys. Et si bien & iustement se monstroient en toutes choses equitable, qu'il estoit de tous réputé & tenu pour Saint homme: en sorte que le populaire l'appelloit, vrai Pere: la Noblesse, iuste Prince, & conseruateur des Loix: la

Fran

France, Roy veritable : & l'Eglise, Tuteur & deffenseur de son oppression. Il estoit aux estrangers paisible, & grandement debonnaire, & aus siens se monstroit liberal par tous moyens. Et ne doit-on prendre esbahissement, s'il viuoit si saintement, veu qu'au commencement de ses ieunes ans, il auoit esté tant bien instruit par la Roine Blanche sa mere : & aussi que lon tenoit pour certain, que le Roy Loys son pere, qui regnoit en vn temps de tout plaisir & volupté, auoit vescu si chastement, qu'il n'auoit onques eu accointance d'autre femme que de la sienne. Au moyen de quoi, & par iuste raison, tels parens de bonne vie, deuoient auoir vn tel fils, comme le Roy S. Loys. Tous ceux qui auoient porté armes à l'encontre de lui, comme par vne maniere de grand' repentance, tournerent leurs forces à l'encontre des ennemis de la foy Chrestienne. Le Comte de Champagne, & le Duc de Bretagne uauigerent en Asie. Le Roi d'Angleterre, avec grand nombre de François, alla en Afrique, pour domter ceus du pays, qui ne cessoient de courir en Espagne, & la piller tous les iours. Et ioignant le Roi d'Aragon son armee avec le roi d'Angleterre & les François, donna la bataille à ceus qui estoient passés d'Afrique, pour venir en Espagne, & demoura victorieux de ses ennemis: & reprint sur eus Valence, qu'ils auoient occupee. En cette bataille

les François eurent le los & prix de toute prouesse. parquoy le roi d'Aragon les colauda grandement, & leur fit plusieurs dons, avec lesquels, & ensemble les despouilles qu'ils auoient gaignees sur les ennemis, les François s'en reuindrent a grand honneur en France.

CHAP. XVII.

D'une maladie du Roy S. Loys. & comme il se croisa pour aller contre les ennemis de la Foy: & qui furent ceus qui se croiserent avec lui: & comme il s'embarqua à Marseille.

VOUS aués entendu, par le chapitre precedant, comme le roi S. Loys s'estoit du tout dedié seruir a Dieu, ayant tousiours l'œil sur le gouuernement de son peuple, pour le tenir en paix. Au moyen dequoy, discourant en son esprit qu'il estoit en la fleur de son aage, (car encores n'auoit-il regné que vingt ans) & qu'il estoit tant heureux en mere, en femme, en freres, & enfans, abondant en richesses, & que sa renommee estoit espādue par tout le monde: Considerant aussi que plusieurs Princes Chrestiens estoient allés, les vns en Syrie, les autres en Egypte, contre les ennemis de nostre foy, lui sembloit chose indigne que lui seul demourast en repos, sans faire seruice tres-agreable a Dieu: parquoy delibera de faire le Saint Pelerinage d'Outre-mer. Et comme il estoit sur
le

le point de faire le veu, avec plusieurs autres Princes, lui estant a Paris, cheut en vne tref-griefue maladie, qui le mit iusques a l'extremité: en sorte qu'un iour entre les autres, il fut de sa maladie si tref-fort pressé, qu'il perdit la parole du tout, & si ne lui voyoit-on aucun mouuement ne sentiment, au moyen dequoi on le tenoit pour mort: quand vne Dame qui le gardoit en sa maladie vint pour lui cuider couvrir le visage, pensant qu'il fust trespaslé: mais de l'autre costé du list (ainsi que le bon Roi lui-mesmes m'a compté) y auoit vne autre Dame qui empescha que son visage ne fut couuert, disant qu'il n'estoit point encores mort. Et comme ces Dames estoient en contention, nostre Seigneur lui rendit la parole: & la premiere chose qu'il dit, fut, qu'il demanda que la croix du S. voyage lui fust apportée: laquelle incontinent lui apporta l'Euesque de Paris. Et le Roi la receuant trefdignement se croisa, & feit le veu d'aller contre les infideles. Et si la Roine Blanche sa mere fut ioyeuse, quand elle ouyt que le Roi auoit recouuré la parole, elle cheut en grand mal-aïse ayant entendu qu'il estoit croisé. Avec le Roi se croiserent ses trois freres, le Comte de Poitiers, Charles Comte d'Anjou, & Robert Comte de Artois: Hugues Duc de Bourgoigne, le Comte Guillaume de Flandres, Guion de Flandres son frere, lequel mourut a

Compiegne, & ne se trouua point avec le Roi, le vaillant Hugues de S. Pol, Messire Gautier son neveu, lequel fit de grandes prouesses Outre-mer, & eult beaucoup valu s'il eust vescu longuement, le Comte de la Marche, Messire Hugues le Brun & son fils, le Comte de Sallebruche, & Messire Gaubert d'Apremont & ses freres, avec lesquels (pource que i'estois leur parent) ie passai la mer. Et quand le Roi fut prest a partir, il manda tous les Seigneurs & Gentilshommes de France, pour se trouver a Paris: & quand ils furent arriues, apres leur auoir faites plusieurs remonstrances, il leur fit faire foy & hommage, & iurer qu'ils tiendroient loyauté a ses enfans, s'il aduenoit aucune mauuaise chose de sa personne au Saint voyage d'Outre-mer. Si me manda le Roi aussi: mais pourautant que ie n'estois pas de ses suiets, ie ne voulus point faire le serment. Et d'autre part que mon vouloir n'estoit pas de demourer par deça. Il donna la charge du Royaume a la Roine Blanche sa mere, & la fit gouuernante, lui laissant ses principaus amis, & ausquels il auoit plus de confiance: & receut la Roine le gouuernement du Royaume, sans enuie aucune: pourautant qu'au commencement du regne du Roi, on auoit bien connu sa foy & prudence: & que maintenant (ses ieunes ans estans passés) elle auoit plus d'aduis & de bon conseil qu'elle n'auoit

uoit en en sa ieunesse. Le Roi auoit delibéré de laisser la Roine sa femme en France : mais elle ne voulut iamais l'abandonner : & disoit que quelque part que le Roi allast, elle le suiroit. Et autant en disoyent les Comtesses de Poitiers & d'Anjou de leurs maris. Parquoi le Roi partit de Paris accompagné de sa mere, & de sa femme la Roine, & tira droit à Marseille : & en trauersant pays, il salua le Pape Innocét a Lion ou il se tenoit, pour la crainte de l'Empereur Federic : & fit le Pape vn Legat, lequel il enuoya en Egypte avec le Roi. Quand le Roi fut arriué a Marseille, il s'embarqua le septieme iour du mois d'Aoust, mil deus cens cinquante quatre, auquel iour on celebre la feste du Roy S. Loys, depuis qu'il a esté Canonizé par le Pape. Apres que le Roi fut embarqué, la Roine Blanche sa mere s'en retourna en France, ou elle mourut apres, sans voir plus le Roi son fils. Le Comte de Poitiers ne partit pas avec le Roi, pource que la mort du Comte Raimond de Tholose son beau pere, retarda son partement. Le Roi donques estant parti de Marseille, fit faire voile droit en Chippre : ou ie le laisserai nauiger sans vous conter de ses aduentures sur mer, pourautant que ie n'estois pas en sa compagnie : mais ie vous diray de ce qui aduint a moi & a mes compagnons.

CHAP. XVIII.

Ici descript l'Auteur les choses qu'il fit sur la deliberation de son voyage d'Ouvre-mer : & les choses qui lui aduindrent depuis Champagne iusques a Marseille, & depuis Marseille iusques en Chippre, ou il vint trouuer le Roy S. Loys.

Quand ie fus prest a partir (apres auoir donné ordre a ma maison) i'en-
uoyai querir le bon Abbé de Cheminon,
qui estoit tenu & reputé le plus preud'-
homme de tout l'ordre Blanc, pour me
reconcilier a lui : & ayant fait mon deuoir,
le bon Abbé me bailla & saignit mon es-
charpe, & me mist mon bourdon en la
main : & cela fait ie partis de Ionuille, lais-
sant ma femme & mes enfans a grand re-
gret. Et le Comte de Sallebrusche & moi,
vinsmes disner a la Fontaine l'Archeuef-
que deuant Dongeus, ou l'Abbé de S. Vr-
bin nous vint voir, & nous donna de beaux
ioyaus. Partant de là, vinsmes a Auxon-
ne, ou nous nous mismes sur la Sonne, fai-
sant mener nos cheuaus par terre iusques
a Lion. Et de là entraumes dans le Rosne,
pour aller a Alles le Blanc. Et me sou-
uiant tres-bien, qu'en la riue du Rosne,
nous trouuasmes vn Chasteau (qu'on ap-
peloit la Roche Glui) que le Roi auoit
fait abbattre en passant : pource que le
seigneur du Chasteau, appellé Rogier, es-
toit vn homme de mauuaise vie, en sorte
qu'il

qu'il auoit destrouffés & pillés plusieurs marchans & pelerins, qui passoient par là. Et estant arriués a la Roche de Marseille, nous embarquasmes là, & avec nous grand compaignie d'autres pelerins. Et aussi tost que fusmes dans la Nauire, le maistre d'icelle fist monter en la hune tous les prestres qui estoient quant & nous, & leur feit chanter, VENI CREATOR SPIRITVS, tout du long: & en chantant les Nautonniers firent voile, & singlerent en Mer, si qu'en brief nous perdismes la terre de veue. Nous nauigeasmes, ayant rousiours bon vent, iusques en Barbarie, où nous vinsmes arriuer vn iour, enuiron l'heure de vespres, & passasmes aupres d'une grand' montagne toute ronde, qui estoit assise vis à vis de la Barbarie. Apres que nous eusmes passé celle montagne, nous tirasmes outre, toute la nuit sans cesser: & le matin, pensant auoir fait lx. lieues, nous trouuasmes encores deuant la montagne: de quoi nous fusmes grandement esbahis, n'ayans conoissance de nostre empeschement. Et tantost nauigeasmes comme deuant, tout celui iour: & la nuit apres ensuiuant, mais il nous aduint comme a la premiere fois, & nous trouuasmes encores deuant la montagne: & ainsi fut-il a la troisieme fois. Au moyen de quoi, nous fusmes plus esbahis que deuant, pensans estre tous morts: & nous disoient nos Nautonniers, que tan-

toſt les Sarazins de Barbarie nous viendroient courir ſus, pour nous mettre a mort. Alors nous ne ſçauions quel conſeil prendre: quant vn bon homme d'Egliſe, qu'on appelloit le Doyen de Mauru, nous vint dire: Seigneurs, i'ai ſouuenance, que moi eſtât en ma paroiffe, quand nous auions grand' ſeichereſſe d'eaus, ou que nous en auions trop habondamment, nous faiſions trois proceſſions, par trois diuers Samedis, & iamais ne paſſoit le dernier Samedi, que Dieu ne nous enuoyât ſa grace. Parquoi (diſoit le preud'hôme) ie ſerois d'aduis que nous fiſſions Proceſſiôs a Dieu deuotement, lui priant qu'il nous vueille deliurer de ce dâger. Ce conſeil fut de tous trouué bon: & a l'inſtant, qui eſtoit vn iour de Samedi, commençasmes a faire proceſſion a l'entour des mats de noſtre Nauire: & pource que i'eſtois griefuement malade, ie m'y fis amener par deſſous les bras. Incontinent que noſtre proceſſion fut faite, la Nauire commança à bouger, & nauigeasmes ſans aucun empeschement iuſques en Chippre, ou nous arriuasmes le tiers Samedi, d'apres qu'e fut faite noſtre troiſieme proceſſion.

CHAP. XIX.

Le grand appareil de viures que le Roy auoit en l'isle de Chippre. Du different des deus Arceueſques dudit lieu de Chippre, l'un Grec, l'autre

*l'autre Latin. La cause du long sejour du Roy
audit lieu de Chippre. De l'Ambassade qu'il
eut du Roy de Tartarie, & de la responce que
il lui fit. Et des autres nouvelles qu'il eut de
Syrie, que lui enuoyoit le maistre des Tem-
pliers.*

ET comme vous aués entendu, le Roi estoit parti de Marseille, & vint arriuer en Chippre le vingtiesme iour de Septembre apres son partement. Le Roi de Chippre lui vint au deuant, & le receut treshonorablement: lui faisant offre de tout son bien. Et quant nous arriuasmes en Chippre, nous trouuasmes le Roi qui auoit fait faire prouisions de viures, en telle abondance, que tout le monde s'en esbahissoit. Car en plusieurs lieux sur les champs, il y auoit tant de tonneaus de vin l'un sur l'autre, que les François auoient des deus ans au parauant achetés & fait apporter là, que de loing ils ressembloient de grands maisons. Et les greniers de fromens, orges & autres grains, ressembloient de hautes montagnes, tant les monceaux estoient grans parmi les châps: & a vrai dire, vous eussies dit que c'estoient montagnes: car la pluye qui estoit cheute dessus, des long temps, les auoit fait germer: en sorte que lon ne voyoit que l'herbe verte par dessus: & quant on les voulut leuer de là, pour les amener en Egypte, on osta les croustes, & l'herbe qui estoit en la superficie: & dessous les bleds

furent trouués si beaux, comme si lon les eust battus nouuellemēt. En Chippre il y auoit deus Arceuesques, l'vn Latin & l'autre Grec. Le Latin vouloit auoir aūthorité sur l'autre, & lui commander : mais le Grec, pource qu'il ne lui vouloit obeyr, fut contraint de s'en aller, & se retirer en Grece. Au moyen dequoi, l'Arceuesque Latin fit interdire le diuin seruice aus Euesques Grecs, qui estoient suffragans, d'icelui Arceuesque de Grece, & declara heretiques la plus grand' partie de la noblesse du pays : & ainsi estoit troublee & moleste l'isle de Chippre quant nous y arriuasmes, par la mauuaise opinion que auoient de nostre foÿ aucunes gens du pays : mais le Legat du Pāpe r'apella l'Arceuesque Grec, & fit faire le diuin seruice par toute l'isle de Chippre. Le Roy auoit grand desir de tirer droit en Egypte, sans faire long seiour en Chippre, & fust parti (comme lui ai ouy dire) avec bien peu de compagnie : mais les gens de son conseil lui remonstroient qu'il deuoit encores attendre ses gens, qui n'estoient encores tous arriués : mais ce pendant que le Roy seiournoit en Chippre, la peste se meit au Camp : au moyen dequoi le Roy fut contraint de diuiser son armee, & l'enuoyer en garnison par les villes de Chippre, attendant que la maladie eust fait son cours. En ce temps que le Roy seiournoit, vindrent en Chippre, par de-

uers

ners lui, les Ambassadeurs du Roi de Tartarie. Lesquels lui apportèrent des lettres, escriptes en langues & caracteres Arabes, que leur Prince enuoyoit au Roi : par lesquelles lui mandoit qu'il auoit esté auparavant idolatre : mais que maintenant il estoit deuenu Chrestien, & s'estoit fait baptiser, parquoi presentoit au Roy toute sa puissance, pour lui aider a conquerir la Terre sainte. Cette Ambassade fut par le Roi, a tresgrand ioye, receuë, ayant entendu que tel Prince estoit deuenu Chrestien. Parquoi il enuoya de ses Ambassadeurs au Roi de Tartarie, & lui rescriuit en cette maniere: qu'il estoit grandement ioyeux, d'auoir entendu qu'il estoit reuoké de l'erreur Payenne: lui prioit de demourer tousiours en la foy Chrestienne, & augmenter icelle par bonne vie. Avec ces lettres lui enuoya le Roi vne Tente d'escarlate, faite en maniere d'vne chapelle, qui estoit mout riche: & fist faire vne image de l'Annonciation nostre Dame, avec plusieurs autres representans les articles de nostre foy. & les lui enuoya par deux Cordeliers, qui parloient le langage Sarazinois: ausquels donna charge de prescher en Tartarie, la parole de Dieu, & le S. Euangile: mais ces Cordeliers ne furent pas long temps a reuenir. Le Pape Innocent y enuoya de Lyon grand nombre de gens de religion, pour prescher: lesquels firent tresbien leur deuoir: & atti-

rerent le peuple de Tartarie a croire l'E-
uangile. Et comme tous les iours ils pres-
choient le Pape, disans qu'il estoit vicaire
de Dieu en terre, le Roy de Tartarie, deli-
bera d'enuoyer au Pape Innocent ses Am-
bassadeurs, pour entendre si ce que ces
gens de Religion lui auoient presché, e-
stoit veritable: mais les Prescheurs em-
pescherent le voyage: conoissans que si les
Ambassadeurs venoient en France, qu'ils
verroient tout autrement viure le peu-
ple, qu'ils ne leur auoient dit & presché,
qui pourroit estre cause de reprendre leur
erreur Payenne. Les Ambassadeurs que
le Roy Sainct Loys enuoya au Roy de
Tartarie, furent deux ans a reuenir: & se-
roit longue chose a vous raconter, com-
me ils furent receus (ainsi que ie leur ai
ouy dire) & des grands merueilles qu'ils
virent estans par delà. Les Ambassadeurs
du Roy de Tartarie, promirent au Roy S.
Loys, que leur prince seroit l'esté apres
ensuiuant en Asie, a toute sa puissance,
pour guerroyer les ennemis du Roy, qui
occupoient la Terre sainte. Toutes-fois le
Roy de Tartarie ne tint pas sa promesse: &
croi qu'il fut veritable, ce qu'aucunes
gens de bien auoient dit, quand ils virent
arriuer les Ambassadeurs deuers le Roy:
c'est que leur venue porteroit plus de
dommage a leur nouvelle foy, que de
bien aux Chrestiens, attendu qu'ils pou-
uoient voir tout vice abonder entre nous,
qui

qui leur donnoit occasion de faire mauvais rapport de nous Chrestiens, a leur Prince le roi de Tartarie.

Le Roy, seiournant encores en Chippre, receut des lettres que le maistre des Templiers lui escriuoit de Syrie: par lesquelles lui mandoit que le Souldan d'Egypte auoit enuoyé par deuers lui vn de ses Admiraus, pour parler de la paix, si le Roy y vouloit entendre. Et comme le Roy tenoit son conseil, pour deliberer de la response qu'il deuoit faire, le roi de Chippre qui estoit tant sage, & conoissant la finelle du maistre des Templiers, dit au Roy S. Loys: qu'il estoit bié asseuré que le maistre des Templiers auoit enuoyé premierement deuers le Souldan, & qu'il auoit attiré a soi celui Admiral qui estoit arriué vers lui: laquelle chose estoit grandement a blasmer: attendu que par ce moyen le Souldan se tiendroit plus fier, quāt il entendroit que le Roi demanderait la paix pour s'en retourner en France. A cette cause, le Roy deffendit au maistre des Templiers, de ne receuoir aucun Ambassade du Souldan, ne de parler a eus, en quelque maniere que ce fust. Ainsi se conduisit le Roy, durant le temps qu'il estoit seiournant en Chippre, iusques au mois de Mars, qu'il delibera de partir, pour aller en Egypte. Mais auant que bouger, ie vous conterai vn peu des Princes d'Outre-mer, & de leur estat & puissance.

CHAP. XX.

Des Princes d'Oltre-mer, & de l'estat & puissance du Souldan de Comue, & aussi de celui de Babyloine : & en quel estat estoient lors leurs affaires.

LE Souldan de Comue estoit tenu le plus puissant & riche roi de toute la Payennie, & pour monstrier son grand auoir, il fit faire vne chose merueilleuse, il fit fondre vne partie de son or, de quoi il fit faire de grands vaisseaus, en façon de pots de terre ou l'on met le vin Outremer, & chacun de ces pots d'or, tenoit bien enuiron trois ou quatre muis de vin, & en fit faire iusques a six ou sept. Apres il fit rompre & mettre par pieces lesdits pots, & furent lesdites pieces d'iceus mises au descouuert en vn Chasteau: en sorte que tous ceus qui entroient là dedans, les pouuoient aisément voir & toucher: & le Souldan se delectoit aucunesfois a les regarder, sans les employer en autre v-sage. Et sa richesse apparut encores en vn pauillon, que le Roi d'Armenie enuoya au Roi S. Loys, estant en Chippre, lequel estoit estimé valoir cinq mille liures: & disoit le Roi d'Armenie, que l'un des Ferrais du Souldan de Comue lui auoit donné ledit pauillon. Et deus sçauoir, que ce Ferrais estoit celui qui auoit en garde & gouvernement les pauillons du Souldan, & qui auoit la charge de lui faire net-
royer

toyer chacun iour ses Salles & Maisons. Et estoit le roi d'Armenie homme suiet du Souldan, qui le tenoit en grand seruage: parquoi vn iour il se retira au grand roi de Tartarie, pour lui demander secours a l'encontre du Souldan, & lui promit de deuenir son homme, s'il lui vouloit aider. Le roi de Tartarie lui accorda sa demande, & lui bailla grosse troupe de gens, pour aler assaillir le Souldan. Et le roi d'Armenie s'en part a toute sa gent, & vint donner la bataille au Souldan, & le descōfit, a l'aide des Tartarins: parquoi il demoura hors de seruage. Il y eut beaucoup de nos gens, lesquels aians entendu que la bataille se deuoit donner entre le Souldan & le roi d'Armenie, partirent de Chippre, pour se trouuer en la bataille: mais onques puis n'en reuint aucun de ceus qui y estoient aliés.

Le Souldan de Babyloine estoit vn autre puissant Prince, & pensoit que le Roi S. Loys voulsist faire la guerre au Souldan de Hamault, qui estoit son ancien ennemi, & attendoit de se ioindre au Roi le printemps venu. Mais quant il conut que le roi ne venoit point vers lui, il alla mettre le siege deuant la Cité de Hamault, on estoit le Souldan. Quant le Souldan de Hamault se veit ainsi assiegé, il fut bien esbahi, en sorte qu'il ne sçauoit quel conseil prendre pour se sauuer: car il sçauoit bien que si le Souldan de Babyloine

regnoit longuement, qu'il le conquer-
roit, & mettroit en prison. Sis'aduifa de le
faire empoisonner; & pour ce faire il
trouua moien de parler a vn des valets de
sa chambre auquel il promit faire de
grands biens s'il vouloit empoisonner
son seigneur le Soudan de Babyloine. Ce
que le valet lui promit de faire, aussi tost
qu'il en trouueroit l'occasion. Et la ma-
niere de l'empoisonnement fut telle; le
Soudan souuentefois apres qu'il auoit
ioué aus eschets, se couchoit sur des nat-
tes, qui estoient au pié de son lit, & le va-
let qu'on appeloit en office Ferrais, estant
bien aduertit de la coustume du Souldan,
enuenima de poisons toute celle natte,
sur laquelle il se couchoit. Or aduint que
le Soudan se vint vn iour coucher sur la
natte, aiant les iambes nues, & en l'une de
ses iambes il auoit vne escorcheure, & en
se tournant il mit icelle escorcheure con-
tre la natte, & incontinent le venin lui
entra dans le corps: en sorte qu'il deuint
perclus de tout le costé du corps de celle
iambe: & quant le venin lui venoit a
monter au cueur, il en estoit si tresfort
passionné qu'il en perdoit la parole, & de-
mouroit bien deus iours sans manger. Et
quant ses gens virent tel accident estre
arriué sur leur Seigneur, ils le prindrent,
& le ramenerent en Egypte. Par ainsi le
Soudan de Hamaut demoura en Paix.

CHAP. XXI.

Comme le Roi partit de Chippre pour venir en Egypte: & comme il arriva deuant la ville de Damiette. Des fortunes qu'eut sur Mer son armee: & comme la ville de Damiette fut prise.

Pour reuenir donques au Roi S. Loys, qui estoit en Chippre. Quant le mois de Mars fut venu, le Roi fit recharger toutes les nauires de viures, pour estre prestes a partir quant il le commanderoit. Ce qui fut fait incontinent: toutes-fois le Roi ne partit pas au printemps, comme il cuidoit; pource qu'il attendoit encores ses gens qui auoient eu fortune de Mer, comme lon sceut apres. Et le Vendredi deuant la Pentecoste, le Roi s'embarqua en son Nauire, & se mit sur Mer; & fit crier que le lendemain chacun fust prest a partir pour le suiure droit en Egypte. Le lendemain, qui estoit iour de samedy, vigile de la Pentecoste, tout le monde se mit a nauiguer, chacun en son Nauire, en tel nombre qu'il y auoit dix-huit cens vaisseaus, que grans que petis, qu'il faisoit tresbeau voir; car on voioit tant de voiles en l'air, que toute la Mer que lon pouuoit voir, sembloit estre couverte de toilles. Le iour de la Pentecoste, le Roi vint arriuer au bout d'un terre qu'on appelloit la pointe de Limeillon, & les autres vaisseaus qui estoient partis

quant & lui. Si descendit le Roi a terre, & ouit Messe, pensant attendre la toute son armee: mais on lui vint apporter nouuelles que les Nauires qui estoient parties apres lui, auoient eu vn vent contraire en venant du costé d'Egypte, en sorte que la tempeste de la Mer les auoit separees & iettees en Acre, & en autres pais: dequoi le Roi fut tresgrandement marri, & sa compagnie aussi: & demourerent tout ce iour bien tristes & dolens, d'auoir perdu tant de gens. Car de deus mille huit cens Cheualiers qui s'estoient mis en mer, apres le Roi, ne s'en trouua a terre avec lui, que sept cens, & cuidoit le Roi qu'ils fussent tous mors & peris, & ne les reuit le Roi de long temps apres.

Le lendemain de la Pentecoste, aiant le vent assés propre, le Roi se remit en Mer, & toute sa compagnie; & faisans voile droit en Egypte, vinsmes rencontrer le Prince de la Moree, & le Duc de Bourgoigne ensemble, lesquels auoient seiourné tout l'hiuer en la Moree, & faisoit bon voir leur equipage. Si tirasmes tousiours auant, sans auoir aucun empeschement, iusques au iedi apres la Pentecoste, que nous vinsmes arriuer a Damiette, ou nous trouuasmes toute la puissance du Soudan, qu'il auoit fait mettre là, pour la defense du lieu: & pour empescher nostre descente; & a les voir ils estoient tresbelles gens, & en bon equipage pour le fait de

de la guerre: & y estoit le Souldan en personne, qui portoit ses armes de fin or, qui estoient moult reluisantes, quant le Soleil y frappoit. Quant les Turcz & Sarazins nous apperceurent, a l'instant ils se mirent a faire grant bruit, & sonnerent leurs Cors & Macaires, si tresfort que c'estoit vne chose bien estrange & espouuanteable aus François, d'ouir vn tel tumulte. Ce voiant le Roi, fit appeler tous ses Barons & Conseillers, pour entendre d'eus comme il se deuoit gouuerner en cest affaire. Et ils lui conseillerent qu'il ne se deuoit point hazarder a prendre terre: attendu qu'il auoit peu de gens avec lui, & qu'il deuoit encores attendre que le reste de ses gens fussent arriüés. Mais le Roi ne trouua pas bon ce conseil. Au moien de quoi ne si voulut onques accorder: & disoit que les ennemis, qui de leur nature sont presumptueus, voians nostre crainte hausseroient leur courage, & leur donneroit on occasion & loisir de prendre aduis, & de se renforcer. Aussi qu'il ne voioit poit aucun port pres de là, ou il se peüst tenir seurement, en attendant ses gens. & finalement que s'il demouroit longuement en Mer, comme il estoit, que il pourroit se leuer quelque horrible vent & tempeste de Mer, qui pourroit separer ses gens, & les ietter bien loing les vns des autres, comme il estoit aduenü n'auoit gueres au partir de Chippre. Parquoi il

deliberoit de ne differer d'auantage a prendre terre & de combattre visuellement ses ennemis, s'ils se presentoient au deuant de lui. Tous ceus qui estoient au conseil, commencerent a ployer du costé du Roi. Au moien dequoi fut conclud selon l'aduis du Roi: & que le Vendredi deuant la Trinité apres ensuiuant, on descendroit pour aller assaillir & donner la bataille aus Sarazins qui estoient sur le bord de la Mer.

Et commanda ce iour le Roi a monsieur Ian de Briemont de faire bailler vne Galee a monsieur Airart de Brienne & a moi, pour descendre nous & nos Gens d'armes: car les grans Nefz ne pouuoient venir iusques en la riue de la Mer. Et le vendredi venu, que nous deuions saillir, monsieur Airat de Brienne & moi, allasmes vers le Roi tous armés, pour auoir nostre Galee qu'il nous auoit promise: mais monsieur Ian de Briemont nous respondit, present le Roi, que nous n'aurions point de Galee. Si n'en fist le Roi a l'heure autre semblant, car ie vous assure qu'il auoit beaucoup plus de peine d'entretenir ses gens en paix & amitié, qu'il n'auoit a supporter ses ennemis & infortunes. Mais a l'instant ie trouuai autre secours: car vne Galee mienne vint arriuer, laquelle ie pensois auoir perdue, avec mes richesses qui estoient dedans. Et quant nos gens virent que nous reue-

nions

nions de chés le Roi, sans amener aucune Galee, ils se laisserent cheoir a grand' force dans la barque de Canters, qui m'estoit nouvellement venue: en sorte que la barque affondroit peu a peu. Les Mariniers voians le peril, habandonnerent la barque, & se mirent en la nef: & aiant entendu par le rapport des Mariniers, que la barque estoit trop chargée de dix huit hommes d'armes, ie la fis descharger de tel nombre de gens, & les fis mettre en la nef ou estoient mes gens: & en se remuant vn Cheualier de monsieur Airat de Brienne, nommé Plonquet, cheut en la Mer, lequel fut bien regretté. Et vous veus compter vne merueille qui aduint en ma petite barque: j'auois prins avec moi deux vaillans Bacheliers, dont l'un se nommoit Villains de Verzi, & l'autre Guillaume de Dommartin, lesquels auoient tant de haine l'un a l'autre, qu'impossible seroit de plus: en sorte qu'ils s'estoient desia battus par plusieurs fois, & n'auoit on sceu par aucun moien les accorder. Mais quant se vint que ma barque vouloit partir pour aller a terre, soudainement ses deus Bacheliers, sans auoir autres paroles, se vindrent embrasser l'un l'autre par grand' amour en pleurant & demandant pardon chacun de son offense: qui est pour monstrier que le danger de la mort, chasse toute inimitié & rancune.

Ce pendant le Roi & ses gens s'appre-

stoient & se mettans en equipage, pour aller prendre terre, & entra le Roi dans son grand nauire. Et alors commēçasmes tous a nauiguer, & estoit l'enseigne de S. Denis qui alloit la premiere. Quant les gens du Roi virent que ie m'aduançois trop, ils m'escrierent que i'allasse descendre là ou estoit l'enseigne de Saint Denis: mais ie feis semblāt de ne les auoir point entendus: & vins arriuer deuant vne grosse bataille de Sarazins, ou il y auoit bien six mille hommes a cheual ou enuiron: lesquels aussi tost qu'il nous virent, frapperent des esperons, & vindrent courir par grand' roideur droit a nous: & quant nous les vismes arriuer, nous fichasmes nos lances contre terre mettans le fer contre nos ennemis, pour les bien receuoir. Mais quant ils virent nostre deffense, & que nous prenions tousiours terre en auant, ils tournerent le doz tout court, sans nous donner autre assaut. Et soiés certains, que quant ie fu descendu a terre, ie n'auois nul de mes gens avec moi, de ceus que i'anois amenes de mon païs. Au moien de quoi, me voiant en si peu de compagnie, ie n'osois aller combattre celle grand' bataille de Sarazins, qui estoit deuant moi. Mais a l'instant que messire Baudoin de Raims fut en terre, il me manda par vn Escuier que ie l'attendisse, ce que ie feis volontiers. Car vn tel vaillant homme comme lui, meritoit bien d'est

d'estre attendu : dont depuis m'en sceut bon gré toute sa vie : & n'arresta gueres apres qu'il se vint ioindre avec nous, bien accompagné de mille Cheualiers. A nostre costé de la main fenestre, vint aborder le Comte de Iaphe, qui estoit cousin germain du Comte de Montbellial, & du lignage de la maison de Ionuille : & fut celui qui plus noblement descendit a terre, que nul autre de nostre compagnie; car sa Gallee estoit toute peinte & dedans & dehors a escussions de ses armes, qui estoient d'or a vne Crois patee de gueulles, ce que faisoit beau voir. Il auoit en sa Gallee bien trois cens Mariniers d'élite, portans chacun d'eus vne grande targe a ses armes, & a chacune targe y auoit vn penonceau aussi de ses armes, fait a or battu. Et tellement estoit équipé le Comte de Iaphe, que quand sa Gallee alloit sur mer, elle sembloit proprement voller, tant la contraignoient les Mariniers a force d'auirons. Si menoient tant de bruit les penonneaus, & le son des tabours & cors Sarazinois, qui estoient en la Gallee, qu'il sembloit que tout deust perir. Et quant le Comte de Iaphe & ses gens furent descendus en terre, ils s'en vindrent droit a nous, pour se ioindre a nos gens, & furent ses pauillons incontinent tendus; & si tost que les Sarazins les virent dressés, ils se mirent en grosse troupe pour reuenir courir sur nous : mais

quant ils virent que nous ne bougions de nos places, les attendans, ils tournerent bride en arriere. A vne portee d'arbaleste pres de nous, a la main dextre, estoit delia arriuee la Gallee de l'enseigne S. Denis; & aduint que si comme elle fut a terre, vn Sarazin s'en vint contre les gens qui descendoient de la Gallee, & ne scai pourquoi il le faisoit, ou qu'il ne peult arrester son cheual, ou bien s'il cuidoit auoir secours de ses gens. Mais le pauvre homme fut tantost decouppé & mis en pieces. Et quant le Roi fut aduerti que l'enseigne S. Denis estoit arriuee a terre, il sortit incontinent de son vaisseau, qui estoit ia pres de la riuë: & tant auoit grãd desir de combattre les Sarazins qu'il n'eut pas loisir d'attendre que son vaisseau fust a terre, ains se ietta outre le gré du Legat qui estoit avec lui, en la Mer, en sorte que il se trouua en l'eau iusques aus espaules: mais il sortit soudain de l'eau; & ayant l'escu au col pendu, & son glaiue en la main, voulut aller droit aus Sarazins pour les combattre: mais ses gens le firent arrester, & attendre que tous ses gens d'armes fussent en leurs places. Quant les Sarazins virent que le Roi, avec toute son armee, estoit delia descendu en terre, ils l'enuoierët dire au Soudan par trois fois: mais il ne leur fit aucune responce.

Quoi voyans les Sarazins, pensans que leur Souldan fut mort, ils habandonnerent

nerent la cité de Damiette, & se mirent en fuite. Les nouueilles vindrent au Roi de ceci: parquoi il enuoya iusques a Damiette, pour sçauoir la verité: & celui qui estoit allé, reuint tantost rapporter au Roi que le Souldan estoit mort pour certain, & qu'il auoit esté iusques dans les maisons, & que tous les Sarazins auoient laissé la ville. A cette cause le Roi fist incontinent appeller le Legat, & tous les autres Prelats qui estoient en nostre compagnie, & leur fist chanter *Te Deum* laud. tout du long. Cela fait, le Roi monta a cheual, & s'en vint loger lui & sa gent deuant Damiette. Quant nous fusmes en la ville, nous trouuasmes encores les pôrs tous entiers, que les Sarazins auoyent faits de neuf: & n'auoient point eu aduis au partir de les rompre, qui nous eust donné grand empeschement, s'ils l'eussent fait: combien que par autre moyen ils nous firent grand dommage: car auant qu'ils habandonnassent la ville, ils mirent le feu par tous les endroits de la Fonde, là ou toutes leurs marchandises & richesses estoient, & le firent par grand' malice, afin que de tels biens nul de nous n'en fust auancé: & fut vne telle chose, comme qui mettroit le feu au petit pont de Paris. En cette maniere la ville de Damiette demoura en l'obeissance du Roi, & entra mesmes dedans. en quoi lon peut facilement connoistre que Dieu estoit a

nostre aide, & batailloit pour nous. Quâd premierement nous descendismes en terre, sans auoir aucun empeschement de nos ennemis, qui estoient deuant, & qui pouuoient aysement nous courir sus, & mettre beaucoup de nos gens a mort, auant qu'ils eussent prins terre. Et d'autre part que sans attendre le siege, ils s'en fuirent, & nous laisserent la ville de Damiette, laquelle a force d'armes est imprenable, si la famine ne la contraignoit rendre. Et n'estime point qu'un Capitaine de guerre sceust receuoir plus grand' grace de Dieu, que quant il obtient victoire sur son ennemi, sans frapper coup d'Espee, & sans respendre le sang de ses gens. Mais comme vous sera dit ci apres, nous recogneusmes mal cette grace: & croi veritablement que Dieu s'en courrouça, comme il fit aus enfans d'Israel, qui l'oublierent apres qu'il leur eut donné la possession de la terre de Promission: & commencerai a le vous monstrier, en la personne du Roi mesmes.

CHAP. XXII.

De ce qui fut fait en la ville de Damiette, pendant que le Roi y sejournoit.

Quant nous fumes entrés en la ville de Damiette, comme aués peu entendre, le Roi fit assembler tous ses Barons, & les Prelats qui estoient venus, quant & lui, pour deliberer & prendre conf

conseil d'eus, de ce qu'il deuoit faire des biens qui auoient esté trouués & prins a Damiette, & comme il les deuoit departir. Vn Patriarche qui estoit là present, se mit a parler le premier, & dist au Roi: Sire, il me semble selon mon aduis, qu'il seroit tresbon, & grandement profitable, que tous les fromens, orges, ris, & autres viures qui ont esté trouués, fussent par vostre commandement retirés & despendus, selon raison, & la necessité de la guerre: a celle fin que la ville de Damiette ne demeure despourueuë de viures: & au regard des autres meubles, ils doiuent estre apportés en la maison du Legat, & y contraindre ceus qui les ont, sur peine d'excommuniment. Ce conseil fut trouué bon, & ainsi l'accorda le Roi, & tous les autres qui estoient assistans. Si commanda le Roi qu'il fust ainsi executé, comme il auoit esté conclud. Au moien dequoy, tous les meubles furent apportés en la maison du Legat: & furent estimés a six mille liures seulement. Apres l'estimation faite, le Roi enuoia querir le bon preud'homme messire Ian de Valeri, auquel il dit tout ce qui auoit esté fait: & qu'il auoit esté trouué par conseil, que le Legat lui feroit deliurance des sis mille liures, que valoient les meubles: afin qu'il les despartist a ceus qui en auroient affaire, & tout ainsi qu'il lui sembleroit estre a faire par raison. Sire, respondit le

preud'homme, ie vous remercie tres-humblement, de l'honneur qu'il vous plaist me faire, de me donner telle charge: toutesfois i'ai aduisé pour le present, que ie ne puis telle offre executer, sans mon grand deshonneur: d'autant que ie ne voudrois contreuenir aus louables & anciennes coustumes, qui ont esté obseruees par nos predecesseurs, estans en la Terre-saincte comme nous sommes: lesquelles coustumes sont telles. Qu'ayant nos predecesseurs prise sur les ennemis quelque ville, ou gaigné aucun gros butin, de tous les biens meubles qu'on trouuoit en la cité, le Roi, ou le conducteur de l'armee n'en prenoit que la tierce partie, & les autres deus pars, estoient departies entre les Pelerins. Et telle coustume fut tresbien gardee par le Roi Ian, quant il print la ville de Damiette, comme vous aués maintenant: & si ai ouy dire plusieurs fois a mes ayeux, que le Roi de Hierusalem, qui estoit deuant le Roi Ian, garda cette coustume entierement, sans y faillir d'un point. Mais aduisés (Sire, disoit le preud'homme) s'il vous plaist de me faire bail-ler les deus parts des grains, & autres meubles, qui ont esté trouués en la ville de Damiette, volontiers ie les despartirai aus Pelerins pour l'honneur de Dieu. Quant le Roi entendit telle responce, il ne la trouua pas bonne, & ne voulut on-ques faire ce que le preud'homme lui auoit

uoit

uoit conſeillé. Au moien de quoy la beſongne demoura ainſi, ſans prendre autre fin: dont pluſieurs ſe tindrent mal contents du Roi, de ce qu'il auoit tranſgreſſé les bonnes & anciennes couſtumes: ainſi le Roi commença a deuenir oblieus de la grace que noſtre Seigneur lui auoit faite, de lui donner victoire ſur ſes ennemis. Quant les gens du Roi furent logés dans Dammiette, ſe voyans eſtre a leur aiſe, commencerent a mal viure, faiſant routes les pilleries, & extortions dont ils ſe pouuoient aduiſer aus pources Marchans, & Viuandiers qui ſuiuoient l'armee: en ſorte qu'ils tenoient occupés par force tous les lieux & places de la ville, & iceus bailloient a ferme aus Marchans, pour drefſer leurs eſtaus & ouuroirs: dont ils prenoient grande ſomme de deniers: en maniere que les marchans commencerent a ſe plaindre grandement de telles mauuiſes inuentions: ſi que le bruit en courut par tous les païs a l'entour: de ſorte que les Marchans, & autres qui auoient de couſtume d'amener viures au Camp, laiſſerent d'y venir. dont il nous aduint vn tresgrand dommage, pour la faute que nous euſmes des viures.

Les Barons, Cheualliers, & autres Seigneurs qui eſtoient au Camp, qui deuoient ſagement garder leur bien, & eſpargner icelui pour ſ'en aider, & l'employer a la neceſſité, commencerent a le deſpendre

dre follement : faifans grands & exquis banquets, les vns aus autres, prenans tous les plaifirs & paffetemps dont ils fe pouuoient aduifer : en forte qu'en peu de temps tout leur argent fut defpendu : puis commencerent a opprimer & forcer le commun peuple, & les piller par tous moiens. Il n'y auoit femme ne fille qui ne fust violee, & mise a honte. Les bourdeaux eftoient espendus par tout le Camp, en forte que le Roi mefmes trouua plusieurs bourdeaux que ses genste-noient a l'entour de son paillon, a vn iet de pierre. & de ce aduerti le Roi donna congé a plusieurs de ses officiers. Et tant d'autres maus eftoient commis & perpetrés au Camp, qu'il seroit chose de grand' horreur qui les voudroit racompter. Ainsi donques tout le monde estoit mal viuant : mais nous en endurafmes la peine, comme sera dit ci apres.

CHAP. XXIII.

Comme le Souldan avec grand nombre de Sarazins vint assaillir les Chrestiens: & de ce qui fut fait pendant que l'un camp estoit deuant l'autre.

CE pendant que nous viuions ainsi delicieusement, le Souldan faisoit grand' assemblée de gens de toutes pars, pour venir assaillir nostre Camp: & aiant faite grosse arme, s'en vint droit a nous, & nous commença d'assaillir par terre bien

bien vigoureuſement. Et tout incontinent que le Roi en fut aduertí, il ſe fit armer, faiſant mettre tous ſes gens en point, pour combattre, a celle fin de defendre que les Turcs ne ſe miſſent dans nos loges, que nous auions faites aus champs. Apres que ie fus armé, ie m'en vins vers le Roi, lequel ie trouué pareillement armé & pluſieurs Cheualiers avec lui, qui eſtoient aſſis ſur des formes, & lui requis humblement qu'il me donnaſt congé d'aller avec mes gens hors de l'oſt, pour courir ſus aus Sarazins: mais incontinent que meſſire Ian de Beaumont, qui eſtoit lá preſent, eut entendue ma requette, ſans attendre la reſponſe du Roi, il ſ'eſcria a haute voix, & me defendit de par le Roi, que ie ne fuſſe ſi hardi de ſortir hors de ma loge, iuſques a ce que le Roi le me commanderoit. Et deués ſcauoir que le Roi auoit en ſa compagnie huit bons & vaillans Cheualiers, qui pluſieurs fois auoient eu & gáigné le pris d'armes, tant Outre-mer, que par deçá, & les appelloit on communément les bons Cheualiers du Roi. Entre leſquels eſtoient meſſire Geoffroi de Sergines, meſſire Mahon de Marby, meſſire Phelippe de Nantueil, & meſſire Ymbert de Beauieu, Connetable de France. Celui iour ils n'eſtoient pas avec le Roi, mais eſtoient allés aus champs hors de l'oſt, & le maíſtre des Arbaleſtiers avec eus, qui auoient

mené grosse troupe de gens d'armes, pour garder que les Turcs n'approchassent de nostre camp. Au moien de quoi, le Roi se tenoit encores en son Pauillon, attendant les nouvelles de ce qu'iceus bons Cheualiers exploiteroient. Si aduint pëndant ce temps, que messire Gautier d'Antrache se fit armer, & monta a cheual dans son Pauillon, & piqua roidemment droit contre les Turcs, sans qu'il fust suivi de personne, fors que d'un sien homme, nommé Chastillon; mais il lui aduint si tref-mal, que son cheual le ietta par terre tout estendu, en sorte qu'il ne se pouuoit releuer: pource que la plus part des Sarazins estoient montés sur des iuments, le cheual qui les sentoit, se print a courir droit a eus. Incontinent que les Turcs virent la cheute du Seigneur d'Antrache, il en y eut quatre qui vindrent courir sur lui, qui encores gisoit a terre, & en passant & repassant par deuant, lui donnoient de grands coups de masse, en sorte qu'il estoit en grand peril de mort, si le Connestable de France, avec plusieurs autres, ne le fussent allé secourir: & aiant perduë la parolle, des grands coups qu'il auoit receus, fut ramené par dessous les bras, iusques dans son Pauillon: & furent les Medecins & Chirurgiens incontinent mandés: & pource qu'il leur sembloit aduisqu'il n'estoit point en danger de mort, ils le firent saigner du bras, dont mal lui
en

en print: car ce soir mesmes il rendit son esprit, qui fut grand dommage: car il estoit de grand' hardiesse, & bien adroit aus armes: & fut de plusieurs grandement regretté. Quant le Roi en fut aduertí, il respondit que par sa faute il s'estoit fait tuer: & qu'il ne voudroit point auoir beaucoup de tels gens, comme le Seigneur d'Antrache, qui ne voulussent point croire & obeir a ses commandemens. Ainsi demourasmes certains iours, nous escarmouchans les vns les autres aucunefois.

Or deués entendre que le Souldan fit crier en son camp, qu'il donneroit vn besant d'Or, pour chascune teste de Chrestien que lon lui apporteroit. Au moien dequoi, ces trahistres Sarazins, conuoiteus de gagner, entroient la nuit secretement en nostre camp, & couppoient la teste aus Chrestiens qu'ils trouuoient dormans ça & là: & s'en apperceut on, pour ce qu'un soir ils tuerent la guette du Seigneur de Courcenay, & prenant la teste laisserent le corps sur vne table. La maniere qu'ils auoient pour entrer en nostre camp, c'estoit qu'ils auoient connoissance de nostre train, & que nostre guet estoit fait tous les soirs a cheual. Au moien dequoi, aussi tost que le guet estoit passé, ils venoient entrer dans nostre camp, faisans des maus innumerables. Le Roi en estant aduertí, ordonna que ceus qui auoient

accoustumé de faire le guet a cheual, le feroient desormais, a pied. & estoit nostre Camp si serré les vns contre les autres, qu'il n'i auoit pas vne place vuide. Et craignant le Roi que les Turcs n'entraissent a Cheual en nostre camp, il fit clorre tout le Parc a l'entour de grands & larges fossés, & sur iceus estoient ordonnés grand nombre d'Arbalestiers, & d'autres gens pour faire le guet toute la nuit: en cette maniere nous demourasmes longuement deuant Damiette: car le Roi ne trouuoit pas par son conseil, qu'il deust tirer plus outre, iusques a ce que le Comte de Poitiers son frere (que le vent auoit reiecté en Acre, comme i'ai dit) fust reuenu: car il auoit avec lui tout l'Arriere-Ban de France: & fut la feste Saint DENYS passée, auant que le Roi en sceust entendre aucunes nouvelles. Au moien de quoi lui & tous ceus de l'armee en estoient a grand mal-aise; car on doutoit grandement qu'il fust mort, pource qu'il tarδοit si longuement a reuenir. Et comme nous estions en telle peine, il me vint en memoire du bon Doyen de Mauru, duquel ie vous ai parlé deuant. Au moien de quoi ie deliberé en auertir le Legat, ce que ie fis: & lui contai comme par trois processions qu'icelui Doien nous auoit fait faire sur la Mer, Dieu nous auoit deliurés d'un grand peril ou nous estions: parquoi ie conseillai au Legat de faire
faire

faire le semblable, pour le Comte de Poitiers. Si creut le Legat mon conseil: & incontinent fit crier trois Processions, que lon feroit au camp, par trois Samedis. Et commença la premiere procession a la maison du Legat, & allasmes au monstier nostre Dame, dans la ville de Damiette, que le Legat auoit dedié en l'honneur nostre Dame, en la Mahommerie des Turcs: & a chacune procession qui fut faite, le Roi estoit tousiours present; & tous les autres gros Seigneurs, ausquels le Legat preschoit & donnoit courage de mettre a fin leur entreprinze. Au tiers Samedi arriua le Comte de Poitiers, avec tous ses gens: de quoi lon fit grand' ioye par toute l'armee: mais durant les deus premiers Samedis, il y eut si grand' tourmente en la Mer, deuant Damiette, qu'il sembloit que tout deust perir; en sorte qu'il y eut bien douze vingts vaisseaus, tant grands que petis qui furent tous brisés & perdus, & les gens qui les gardoient, tous noyés. Parquoi Dieu fit grand' grace au Comte de Poitiers, qu'il n'arriua point durant la tempeste de Mer, car autrement il eust esté mort & peri.

CHAP. XXIIII.

Comme apres que le Comte de Poitiers fut arriué à Damiette, le Roi delibera avec son conseil d'aller en Babyloine: & de ce qui lui aduint sur le chemin.

Quant le Comte de Poitiers fut arriué au camp, le Roi manda querir tous les Seigneurs & gens de son conseil, pour sçauoir s'il deuoit tirer plus outre, & quel chemin il deuoit prendre. & quant ils furent tous assemblés, le Roi leur demanda leur aduis, s'il deuoit aller en Alexandrie, ou en Babyloine.

Le Duc de Bretagne, avec plusieurs autres furent d'aduis que le Roi deuoit aller en Alexandrie, pource qu'il disoit que deuant icelle ville auoit vn beau port, ou les nauires pourroient arriuer seurement, & que par là aussi facilement on pourroit auoir des viures, pour aitailler le camp. Le Comte d'Arthois ne fut point de cette opinion: ains disoit que premier on deuoit aller assaillir la ville de Babyloine: & disoit vne raison tresbonne; c'est que Babyloine estoit la principale ville du Royaume d'Egypte, & que si elle estoit bien vigoureusement assaillie, on pourroit donner grand' crainte au Soudan, & a tous ceus d'Egypte; & en fin, que si la ville estoit prise, le demeurant se viendrait rendre au Roi sans attendre plus grand' guerre. D'auantage, que quant on veut mettre a mort le Serpent, on lui vient premierement a escacher la teste, ou est sa principale force, afin que le reste du corps soit de moindre resistance. Parquoy disoit il, ainsi deuous-nous faire du Royaume d'Egypte. Le Roi trouua ce conseil meilleur

leur, que l'opinion du Duc de Bretagne, parquoi il delibera de le suiure. Si fit mettre tous ses gens en equipage pour aller: & partismes de Damiette enuiron le commencement du mois de Decembre. & n'allasmes pas longuement, quant nous trouuasmes vn fleuue qui sortoit de la grand' riuiera, qui estoit mal-aisé a passer: parquoi le Roi fut contraint de sejourner la vn iour, attendant que le fleuue fust estouppé: ce qui fut fait assés aiseement, rés a rés de la grand' riuiera. Ce pendant que le Roi sejournoit aupres du fleuue, le Soudan s'aduisa d'une grand' finesse, pour empescher que nostre armee ne passast plus outre: Si enuoia au Roi cinq cens de ses Cheualiers Turcs les mieus montés, & mieus en ordre qu'il sceut eslire en son Camp: lesquels dirent au Roi qu'ils auoient laissé le Soudan, comme mal contans de lui, & qu'ils estoient venus pour le secourir. Le Roi les receut benignement, sans faire semblant de rien: combien qu'il entendoit bien pourquoi ils estoient venus. Si donnoient a entendre au Roi qu'il ne deuoit point aller en Babyloine, attendu que toute la puissance du Soudan estoit la: mais qu'il deuoit le combattre au pais ou il estoit. Le Roi, sans prendre esgard a ces paroles, fit marcher son armee le iour S. Nicolas: & fit faire defense a tous ceus du camp, sur peine de rebellion, qu'il n'y eust per-

sonne qui mist la main sur les Turcs qui estoient venus du Soudan : mais il s'en repentit bien puis apres. Car quant iceus Turcs virent que nostre camp estoit parti, & que le Roi auoit defendu de ne leur mal-faire, ils s'en vindrent tous de grand courage courir contre vne grosse troupe de Templiers qui estoient en l'aduantgarde; & y eut vn des Turcs, qui alloit deuant les autres, qui vint frapper d'vn coup de masse vn Cheualier des Templiers, & l'abatit par terre, deuant le Mareschal du Temple, qui en fut fort courroucé. Au moien de quoi, il s'escria qu'on courust apres ces Sarazins, pour les mettre a mort, & lui-mesmes piqua le premier, & tous ses gens apres: les Turcs qui se veirent de toutes pars enuironnés, se voulurent mettre en fuite: mais nos Cheuaux estoient plus frais que les leurs; parquoi ils furent tous mis a mort, ou noyés en la Mer, sans qu'il en reschappast vu seul. Apres celle desconfiture, nostre armee tira tousiours auant, iusques a ce que nous vinsmes logger entre le fleue de Damiette, & le fleue de Rexi; mais auant qu'aller plus outre en mon histoire, ie vous veus comter du grand fleue du Nil, afin que vous puissies mieus entendre ce que ie dirai ci apres.

CHAP. XXV.

Description du fleue du Nil, et des choses merueilleuses d'icelui.

Le

LE fleuve du Nil passe par le pays d'Egyte, & comme l'on dit il vient de Paradis terrestre : il est profond, & de grand' largeur, & court assés lentement : il est diuers entierement des autres riuieres : car il vient & court tosiours d'une mesme maniere, & ne croist point pour quelques eaus qui viennent choir dedans. Quant il est en Egypte, il fait sept branches, qui sont grans riuieres courans par toute l'Egypte : & quant se vient environ la S. Remi, ces sept branches s'epandent parmi le pays ; en sorte que tous les champs sont couuers d'eaus, & demeurent ainsi par aucun temps ; puis se viennent a retirer, comme elles estoient au parauant. Et a l'heure les Laboureurs du pais labourent leurs terres, a tout des charrues sans rouës, & y sement de toutes manieres de grains, qui se font si tres-beaus & fertiles, qu'on n'y scauroit demander d'auantage. Et ne scait-on la cause dont vient cette creuë d'eaus, sinon que Dieu l'a ainsi ordonné, sans aucune vertu naturelle. Et si le Nil n'arrousoit ainsi la terre, soiés certain qu'aucun fruit ne croistroit au pais d'Egypte, pource qu'il n'y pleut que de loing a loing, & les chaleurs y sont si tresgrandes, que tout seroit brullé autrement. Quant ce vient sur le soir, les gens du pais y viennent de toutes pars, pour auoir de l'eau pour boire : mais elle est si trouble, tant de sa nature,

que pour la grand' pressie & foule que lon y fait, que lon n'en sçauoit incontinent boire : mais ceus qui en puisent, y mettent dedans quatre amandes, ou quatre feues pillees, & le lendemain elle est claire & bonne a boire. Quant celui fleuve entre en Egypte, il y a des gens tous expres & acoustumés, qui se tiennent aupres de l'eau; comme vous pourriés dire les pelscheurs des riuieres de ce pays ici, lesquels au soir iettent leurs rets au fleuve, & le matin quant ils les tirent, ils y trouuent plusieurs sortes d'espicerie, que lon vend par deça au poix: comme Canelle, Gynembre, Reubarbe, Lignum aloës, & plusieurs autres. & me disoient les gens du pays, que toutes ces choses venoient de Paradis terrestre, & que le vent les abat des arbres qui y sont, ne plus ne moins comme il fait choir les fruits & arbres secs es forests de ce pays ici. Et ce qui cheoit dans le fleuve, l'eau l'ameine tant qu'il est arresté par les rets qui sont tendus, comme dit est. Et i'entendis de plusieurs au pays de Babyloine, que le Souldan auoit voulu sçauoir dont venoit icelui fleuve; & pour trouuer la source, furent ordonnés aucuns bien experts, lesquels estans bien equippés, de tout ce qui leur estoit necessaire, se mirent a suiure le haut du cours d'icelui fleuve, & furent si auant, comme il leur fut possible: & rapporterent iceus commis au Souldan, que ils auoient cheminé tant contremont

l'eau, qu'ils estoient venus iusques a vn grand tertre de roches taillees: sur lequel tertre, il n'estoit possible de monter, tant il estoit difficile & mal raborté; & de ce haut tertre, disoiēt ils, que cheoit le fleuve; & leur sembloit aduis qu'au sommet de la montagne y auoit grand' quantité d'arbres: & sur le tertre ils virēt plusieurs belles sauuages, de diuerses manieres, & façons estranges: comme Lyons, Oliphans, Serpens, & autres belles qui les venoient regarder dessus la riuue de l'eau, ainsi qu'ils alloient contre-mont. L'une des branches dudit fleuve vient passer en Alexandrie, & l'autre a Thunis, l'autre a Rexi, & la quatriesme a Damiette.

CHAP. XXVI.

Comme le Roi estant logé entre le fleuve de Rexi, & celui qui vient de Damiette, rencontra l'armee du Souldan qui lui empescha le passage.

POUR reuenir donques a nostre histoire, le Roi avec toute son armee, vint loger entre celle branche qui vient de Rexi, & celle qui vient de Damiette: & trouua mesmes tout le pouuoir du Soudan, comme dit est, de l'autre costé de la riuere de Rexi, pour nous garder & deffendre le passage: ce qu'ils faisoient bien aiseement: car il n'y auoit aucun passage, & n'eust-on sceu passer la riuere sans nager: parquoi toute l'armee estoit arrestee, sans pouuoir aller plus outre.

A cette cause, le Roi trouua par con-

seil, qu'il deuoit faire vne chaussee au tra-
uers de la riuere, pour passer outre ses
gens, & pour garder que les Sarazins qui
estoint de l'autre costé, ne fissent dom-
mager a ceus qui feroient ladite chaus-
see. Il fit faire deus beuffrois, qu'on appe-
loit Chats Chateils; pource qu'il y auoit
deus Chateils, deuât les Chas, & puis deus
maisons derriere, qui estoient pour rece-
voir les coups que les Sarazins iettoient
a tout des engins qu'ils auoient fait faire,
iusques au nombre de seize, lesquels de-
mouroient tous droits, & iettoient de
grosses pierres a merueilles, en sorte que
ils nous dommagerent grandement. Et
quant le Roi vit cela, il fit faire d'autres
engins, iusques a dixhuit, dont fut inuen-
teur & facteur vn nommé Iousselin de
Couruault. & avec ses engins nous com-
mençasmes a tirer les vns contre les au-
tres; mais ie n'ouis onques dire que les
nostres fissent vn beau coup. Et fut com-
mencee la chaussee a faire la semaine de-
uant Noel: & le Comte de Poitiers* guet-
toit de iour lesdits Chats, & nous autres
Cheualiers la nuit. Mais autant de chaus-
sees que nos gens pouuoient faire, autant
en deffaisoient les Sarazins de leur part.
Car ils firent de leur costé de grand' ca-
ues par terre, & comme l'eau se reculoit
pour la chaussee qui se faisoit deuers
nous, icelles fosses se remplissoient d'eau:
dont aduenoit, que tout ce que nous a-
uions fait en trois semaines ou en vn

* c. gardoit

mois, les Sarazins gastoient tout en vn iour, ou en deus, & a coups de trait ils tuoient tous nos gens qui portoient la terre pour faire ladite chaufsec.

CHAP. XXVII.

Le Souldan de Babyloine mort, les Sarazins esleurent Scecedun: & des faicts des deux costés.

ET deués sçauoir, qu'apres la mort du Soudan de Babyloine, qui mourut de la maladie qui lui print deuant la ville de Hamault, comme vous a esté conté ci dessus, les Turcs & Sarazins firent leur gouuerneur vn Sarazin, qu'on appeloit Scecedun, fils du Seic, qui vaut autant a dire en leur lāgage comme, Fils du Vieil: lequel estoit tenu l'vn des meilleurs & vail lants Cheualiers de toute Payennie, & lui portoient grād hōneur les Sarazins, pour la prouesse qu'il auoit tousiours eue. Il portoit en ses banieres les armes de l'Empereur, qui l'auoit fait Cheualier: & estoit sa banniere bandee, dont en l'vne des bandes il portoit pareillement les armes du Soudan de Halappe: & en l'autre bande de l'vn costé estoient les armes du Souldan de Babyloine. Celui donques Scecedun s'aduifa d'vne grand' entreprise: si enuoia vne partie de ses gens par deuers Damiette, pour passer la riuere, en vne petite ville nommee Sourmesac, qui est sur le fleuve de Rexi: & le propre iour de Noel vindrent arriuer aupres de nostre camp, & commencerent a nous es-

carmoucher; en sorte qu'ils nous vindrent assaillir iusques en nostre l'arc: & plusieurs de nos gens qui s'estoient escartés par les champs, furent par les Sarazins mis a mort, ou detenus prisonniers. Et moi estant a table pour disner, avec mon compaignon Pierre d'Aualon, a l'heure que lesdits Sarazins arriuerent, me fis soudainement armer, pour aller contre eus, & mon compaignon aussi, avec grand' troupe de nos gens; & estans venus au lieu ou les Sarazins combattoient, trouuasmes qu'ils auoient desia mis par terre, a force de grands coups, monsieur Peron nostre hôte, & le seigneur du Val son frere, qui estoient allés aus champs, & les emmenoiient liés tous deus ensemble: mais il leur aduint si bien, qu'a nostre venue, par nostre moien, ils furent si bien secourus, qu'ils furent rescous d'entre les mains des Sarazins; & ramenastes ces deus bons Cheualiers en nostre ost. Les Templiers qui eutendirent les cris de la meslee, vindrent au secours, & le firent si tres-bien que merueilles, en sorte que nonobstant quelque resistance, les Sarazins furent contraints se retirer: mais tous les iours ils nous venoient donner l'alarme en nostre camp, iusques a ce que le Roi l'eust fait clorre de fossés du costé de Damiette, depuis le fleuve qui vient dudit costé de Damiette, iusques au fleuve de Rexi. En ce mesme temps, le Roi fut aduertí, par ses Espies, que Scecedun

s'estoit vanté qu'il mangeroit en la tente du Roi dedans le iour de la S. Sebastien, qui prochainement venoit. A cette cause le Roi delibera d'y prendre garde: si fit ferrer ses gens-d'armes dans le camp: & donnant ordre a tout son equipage, commist le Comte d'Artois son frere, pour garder les Beuffrois & engins de guerre. Et lui, avec le Comte d'Anjou, furent pour garder le camp, du costé deuers Babyloine. Le Comte de Poitiers, & nous Seneschal de Champagne, fusmes ordonnés pour la garde du costé de deuers Damiette; & cela fait ne tarda gueres que Scecedun fist passer ses gens en l'isle qui estoit entre le fleuve de Damiette, & le fleuve de Rexi, en laquelle isle estoit nostre camp logé: & fit icelui Scecedun ordonner ses batailles, qui tenoient depuis l'un des fleuves, iusques a l'autre. Le Comte d'Anjou, qui auoit ses gens logés vis a vis de la venue des Sarazins, leur courut sus vaillamment: en maniere qui les mit en fuite, & en furent plusieurs tués, & les autres noyés dans lesdits fleuves. Combien qu'encores en ladite isle demoura grand troupe desdits Sarazins, que nos gens n'osoient approcher, a cause de plusieurs & diuers engins qu'ils auoient, dont ils nous faisoient grand dommage, en tirant tousiours contre nous. En ce conflict le Comte Guy de Ferrois estoit en la compagnie du Comte d'Anjou, & fit de merueilleus faits d'armes: en sorte que lui &

ses Cheualiers passerent la premiere bataille des Sarazins, maugré eus, & vindrent iusques a la seconde bataille, ou ils firent de grans prouësses: mais en fin ledit Comte Guy fut mis par terre, & eut la iambe brisée, & fut ramené par deus de ses Cheualiers hors de la bataille. Et vous assure qu'a grand' peine peut on tirer de la bataille le Comte d'Anjou, tant il estoit aspre & courageus; en sorte que plusieurs fois ie le vis en danger de mort. & depuis celle iournee il fut tousiours tenu pour vaillant Prince. Du costé ou le Comte de Poitiers estoit, vint arriuer vne grand' bataille de Sarazins, qui nous assaillirent vigoureuement; mais soiés certains qu'ils furēt tresbien receus, & seruisdemesme; en sorte que besoin leur fut de s'en retourner par la mesme voye dōt ils estoient venus, avec grosse perte de leurs gés, que les nostres auoient deffaits & mis a mort; & nous retournaſmes en nostre cāp, avec peu de pertē de nos gens.

CHAP. XXVIII.

Du feu Gregeois iettē par les Sarazins.

VN soir aduint, que les Sarazins amenerēt vn engin, qu'ils appelloient la Perriere, qui estoit grand & terrible, pour le dōmage qu'il nous faisoit; & fut mis ice lui engin vis a vis de nos Chars Chateils, desquels auōs parlé ci dessus: & quāt messire Gautier de Curelle bon Cheualier, & moi qui auois la charge de garder lesdits

Chats Chateils, vismes ledit engin, nous fusmes grandement esbahis: car les Sarazins commancerent a ietter contre nous Feu gregeois, en si tres-grande quantité, que c'estoit la chose plus espouuantable que ie veisse oncques. Quant le bon Cheualier messire Gautier mon compagnon, vit le gros danger ou nous estions, il s'escrie, disant: Seigneurs nous sommes tous perdus a iamais, si Dieu ne nous aide. Car si les Sarazins brulent nos Chats Chateils, incontinent nous mesmes serons aussi ards & brulés, & ne scaurions euitier tel inconuenient. D'autre part si nous laissons ici nos gardes, & nous retirons, nous serons tenus pour Cheualiers recreus, & viurons a grand' honte le demeurant de nostre vie. Parquoi me semble qu'il vaut mieus mourir vertueusement, que viure deshonorablement. Et pource qu'il n'est aucun qui nous puisse garentir de ce grand peril, que Dieu seul, ie vous conseille, & vous prie tous, que toutesfois & quantes que les Sarazins nous ietteront le feu gregeois, que chascun de nous se iette sur les coudes, a genous, & crions merci a nostre Seigneur, en qui est toute puissance, qu'il nous deliure du danger ou nous sommes a present. Et tantost que les Sarazins commencerent a ietter le premier coup de feu, nous nous mismes a genous sur les coudes, ainsi que le preud'homme nous auoit enseigné, & cheut le feu cette premie-

re fois entre nos deus Chats Chateils, en vne place qui estoit deuant, laquelle nos gens auoient faite pour estoupper le fleuve: & incontinent fut estaint le feu, par vn homme qu'auions propice a ce faire. Et la maniere de ce feu Gregois estoit telle, que quant il estoit ietté, il estoit gros deuant comme vn tonneau, & par derriere faisoit vne queue longue d'vne aune & demie: il faisoit tel bruit a venir, qu'il sembloit que ce fust foudre du Ciel, & me sembloit vn grand Dragon volant en l'air: & si rendoit si grand' clarté, que dans nostre Camp il faisoit si cler comme le iour, tant y auoit grand' flamme de feu. Et celle nuit nous en fut ietté trois fois, avec ladite Perriere, & quatre fois avec l'arbaleste a tour. Et toutes les fois que le bon Roi S. Loys voyoit que les Sarazins nous iettoient ainsi le feu, il se iettoit par terre, & rendoit ses mains, la face leuee au ciel, criant a haute vois a nostre Seigneur, & en pleurant a grosses larmes, disoit: Beau sire Dieu omnipotent, garde moi, & toute ma gent. & croi certainement que les prieres du bon Roi nous sortirent de ce grand peril, & a chascune fois que le feu estoit cheut deuant nous, il nous enuoyoit vn de ses Chambellans, pour sçauoir en quel estat nous estions, & si le feu nous auoit point greués.

Vne fois que les Turcs tirerent le feu, il vint choir aupres des Chats Chateils, que

que les gens de monsieur de Courtenai gardoient : & frappa en la rive du fleuve qui estoit là deuant, & venoit droit a eus tout ardent : & tantost vint vers nous courant vn Cheualier de celle compagnie, criant hautement : Aidés nous, Sire, ou nous sommes tous ards ; car voici vne grand' haye de feu Gregeois, que les Sarazins nous ont ietee, qui vient droit a nostre Chateil. Incontinent nous accourusmes celle part, & estaignismes le feu, a grand mal-aïse : car les Sarazins nous tiroient de l'autre part tout a trauers traits & pilots, dont nous estions tous plains. Le Duc d'Anjou guettoit de iour les Chats Chateils, & faisoit tirer avec arbaletes de carreaus dans le Camp des Sarazins. Et moi, & ceus de ma compagnie faisons le guet de nuict, qui nous tenoit en grand' peine & souci : car les Turcs auoient desia brisé & froissé nos taudeis & gardes. Si aduint que ces trahistres Sarazins amenèrent deuant nos gardes, leur Perriere en plain iour, & commencerent a ietter force Feu gregeois sur la chaussée du fleuve, vis a vis de nos taudeis & gardes : tellement que nul de nos gens ne s'osoient monstrier ne trouuer enuiron nos Chats Chateils : & tant continuellement nous ietterent le feu, qu'ils bruslerent nosdits Chats Chateils : dequoi le Duc d'Anjou, qui en auoit la garde, fut si marri, qu'il se vouloit mettre dans le feu pour l'estain-

dre, mais il fut retiré par ses gens. Et de cette infortune aduenue le iour, louasmes Dieu moi & mes Cheualiers: car si les Sarazins eussent attendu a la nuict de faire leur entreprise, nous eussions esté tous ards & brullés.

Le Roi voyant lui & ses gens en telle destresse, en danger de tout perdre, voulut pouruoir a tel inconuenient. Au moyen dequoi (pource qu'on ne pouuoit trouuer aucun bois là pres) il fit dire que chacun apportast tout le marrain des vaisseaux qu'ils auoient sur Mer, chacū pour sa part, pour faire vn autre Chat Chateil: ce qui fut fait: & chacun apporta dudit marrain selon son pouuoir. & fut estimé valoir dix mille liures quant tout fut assemblé. Au moyen dequoi ie laisse a penser aux lecteurs, combien de bastiaus furent gastés, & en quel danger nous estions detenus. Quant le Chat Chateil fut fait & accompli, le Roy ne voulut pas qu'il fust mis ne planté, que iusques au iour que le Comte d'Anjou son frere deuoit faire le guet, & commanda qu'il fust mis au propre lieu ou les deux autres auoient esté brullés: & ce faisoit il, afin de recouurer l'honneur de son dit frere: au guet duquel (comme dit est) auoient esté brullés les deux autres: & ainsi qu'il pleut au Roy, il fut fait. Quant les Sarazins virent nostre Chat Chateil, ils tirerent tous leurs engins, dont ils en auoient seize, & les couplèrent

plerent ensemble, en façon que tous tiroient contre nostre Chat Chateil: & tellement besongnerent que nos gens commencerent a craindre, & n'osoient aller ne venir a l'entour dudit Chat Chateil, pour la doute des pierres qu'ils tiroient. Et quant les Sarazins coneurent la crainte de nos gens, ils adresserent leur Perriere droit a nostre Chat Chateil, en sorte qu'en peu de temps, il fut brulé comme les autres.

CHAP. XXIX.

Comme vn Beduyn enseigna vngué pour passer la riuiere: & comme le Comte d'Arthois ayant baillé la course a ceus qui gardoient le gué, & poursuiui au trauers la ville de la Massourre, fut tué en repassant par ladite ville: & de la cruelle bataille qui fut faite par le Roy contre les Sarazins: & comme le Roy celle nuit logea au lieu dont il auoit chassé les Sarazins.

LE Roy estant aduerti que le Chat Chateil estoit brulé, lui & tous ses gens furent en grand trouble. Au moyen dequoi il fit appeler tous les Barons, pour auoir conseil de ce qu'il deuoit faire. Et estans assemblés lesdits Barons deuant le Roy, ne sçauoient quel conseil lui donner: car ils voyoient bien qu'il n'estoit pas possible de faire chaussee pour passer aux Turcs & Sarazins, par ce que nos gens

n'en pouuoient tant faire d'une part, comme les Sarazins en desrompoient de l'autre part. Et alors messire Imbert de Beauieu Connestable de France, vint dire au Roi, qu'un homme Beduyn estoit venu a lui, & lui auoit dit que si lon lui vouloit donner cinq cens besans d'or, qu'il nous enseigneroit un bon gué a passer a cheual bien aiseement. A quoi le Roi respondit, que tres-volontiers il s'accordoit, pourueu que le Beduyn dist verité. Si fut amené ledit Beduyn deuant le Roi: mais oncques il ne voulut monstrier le gué, que premier il n'eust les cinq cens besans qui lui auoient esté promis: & de fait il fut arresté que le iour de Carefme prenant, icelui Beduyn nous monstreroit le gué. A cette cause le Roi ordonna que le Duc de Bourgogne, avec les seigneurs d'Outre-mer, garderoient nostre Camp, de peur des Sarazins, & que lui & ses trois freres, avec leurs gens a cheual, iroient voir & essayer le gué que le Beduyn leur deuoit monstrier. Quant se vint donc ledit iour de Carefme prenant, le Roi avec ses gens se mit en bon equippage de guerre, & cheuauchasmes droit au gué, ainsi que le Beduyn nous conduisoit: & en allant, il y auoit aucuns de nos gens qui se tiroient pres de la riuie du fleuve, & pource que la terre y estoit lubrique & mouillée, ils cheoient dans le fleuve, & en furent plusieurs noyés en telle maniere: & entre les autres se

noyá messire Ian d'Orleans le vaillant Cheualier, qui portoit baniere. Quant nous fumes arriués au gué, nous apperceumes de l'autre part du fleuve, bien trois cens Sarazins montés a cheual, qui estoient là pour garder le passage. Mais sans crainte nous entraumes dedans le fleuve, & trouuerent nos Cheuaus assés bon gué, & ferme terre. Si tirasmes tousiours contre mont le fleuve, iusques a ce que nous vinsmes a l'autre riué, & passasmes sans aucun danger: & quant les Sarazins nous virent ainsi passés, ils tournerent le dos, & se mirent en fuite. Le Comte d'Arthois, frere du Roi, qui conduisoit la seconde bataille, courut apres avec ses gens: dequoi les Templiers, qui estoient a l'auantgarde, furent fort marris a l'encontre du Comte d'Arthois, pource qu'il leur faisoit honte & villanie, d'aller deuant eus: & commencerent a lui crier, qu'il auoit grand tort. Toutesfois le Comte n'en fit aucun semblant. Et quant les Templiers virent cela, pour euitier plus grand' infamie, ils se mirent a courir tous d'un accord apres le Comte d'Arthois, & suivirent les Sarazins qui s'enfuyoient deuant eus, & les firent passer parmi la ville de la Massourre, les mettant aus Champs par deuers Babyloine: mais quant nos gens cuiderét retourner arriere, les Turcs leurs lançoient par atrauers des rues qui estoient fort estroites, force traits, & gros.

ses pierres: en sorte que le Comte d'Arthois y fut tué, & le sire de Couci, qu'on appelloit Raoul, & plusieurs autres Cheualiers, iusques au nombre de trois cens. Et les Templiers, ainsi que le maistre Capitaine me dit, perdirent bien enuiron quatorze vingts hommes d'armes & de Cheual. Au lieu ou i'estois avec mes gens d'armes, vindrēt arriuer vne grosse troupe de Sarazins, qui estoient sortis de leur camp, pour venir secourir les autres: mais nous les contraignismes a force d'armes de reculer: & les chassâmes iusques en leurs loges. Et en cette chasse i'apperceu vn grand Sarazin qui montoit sur son Cheual, & lui tenoit le frain de son Cheual vn sien Cheualier, & ainsi qu'il mit les mains a la selle pour vouloir monter, ie lui donnai de mon espee, par dessus les escelles, tant comme ie la peus mettre auant: en sorte que de ce coup il cheut mort par terre. Quant le Cheualier qui lui aidoit a monter vit son seigneur mort, il l'abandonna, & me vint guetter au retour, si me donna de son glaive si grand coup entre les espaules, qu'il me ietta sur le col de mon cheual: & me tenoit si pressé, que ie ne pouuois tirer mon espee que i'auoye ceinte. Au moyen de quoi, ie fus contraint de tirer vne autre espee, qui pendoit à la selle de mon cheual, laquelle me fit bien mestier. Mais quant le Sarazin vit que i'auois mon espee au poing, il tira son

son glaive a lui, que l'auoye saisi, & s'en
fuit. Or aduint que moi & mes Cheua-
liers nous trouuâmes hors de l'ost des
Sarazins, pour nous cuidoier retirer: & en
retournant, trouuâmes par ci & par là,
bien pres de six mille Sarazins, qui s'e-
stoient mis aus champs, & auoient aban-
donné leurs loges: & quant ils nous eu-
rent apperceus ainsi a l'escart, ils nous vin-
drent courir sus tres-vigoureulement, &
nous firent si grief assaut qu'ils tuerent
messire Hugues de Trichetel, seigneur
Desconfians, qui portoit la baniere de no-
stre compagnee: & pareillemēt prindrent
prisonnier messire Raoul d'Vbanon de
nostre compagnee, lequel auoit esté aba-
tu a terre: & ainsi que les Sarazins l'em-
menoient, & moy & mes Cheualiers le
reconumes, & l'allâmes recourre & deli-
urer d'entre les mains desdits Sarazins. Et
en reuenant de celle bataille, plusieurs de
nos gens se commencerent a rallier, & se
mettre ensemble avec nous: mais les Sa-
razins nous reuindrēt a courir sus a grand
force: & a leur arriuee me donnerent de si
grans coups, que mon Chenal s'agenoilla
par terre, du grand pois qu'il sentoit, &
me iecterent outre par dessus les oreilles
de mon cheual: & m'eussent tué les Sara-
zins, n'eust esté messire Arnaud de Co-
menge Vicomte de Couzerans, qui me
vint secourir tres-vaillamment: & pour
la grand' vertu & prouesse qui estoit en

lui : il auoit laissé ses Arbaletiers qu'il conduisoit au Camp , avec le Duc de Bourgoigne , & auoit suivi le Comte de Poitiers, lequel il ne vouloit abandonner en aucun grand affaire. Et depuis qu'il m'eut donné ce secours , il ne fut iamais en iour de ma vie, que ie ne l'aimasse tres-affectueusement.

Après que ie fus rescous des Sarazins, ledit Vicomte de Couzerans & moi, pour attendre le Roi qui venoit , nous retirâmes auprès d'une maison qui auoit esté abatus, & ce pendant ie trouuai façon de recouurer vn Cheual. Mais ainsi que nous estions auprès d'icelle maison , voici venir derechef vne grosse troupe de Sarazins courans contre nous : & pource que ils virent nos gens au derriere de nous, ils passerent tout outre, pour aller a eus : & en passant, ils me ietterent a terre, mon escu hors de mon col , & passoient dessus moi, cuidans que ie fusse mort, dont il n'en faillit gueres. Et quant ils furent passés, icelui messire Arnaud de Commenge, après auoir bien combattu les Sarazins , reuint vers moi, & me releua sus ! & puis nous en allâmes tous deus , iusques aus murs de celle maison deffaitte.

A ces murs, se vindrent rendre a nous messire Hugues Descoffe , messire Ferreis de Loppei , messire Menaut de Menoncourt , & plusieurs autres : & là les Turcs nous vindrent assaillir de toutes parts, de
plus

plus grand' force que iamais: en sorte que la plus grand' partie d'eus entrerent iusques dedans la maison ou nous estions, & combatirent longuement contre nous main a main: tellement que pour le grand nombre qu'ils estoient, nous eusmes grād' peine a nous deffendre. Mais les Cheualiers qui estoient avec nous semirent a frapper si courageusement sur les Turcs, que c'estoit merueilles: dont ils furent grandement loués de tous ceus qui les virent, & qui en oyrent parler. Là fut nauré messire Hugues Descosse, de trois grand's playes au visage, & en autres endroits de son corps. Messire Raoul, & messire Ferreis furent aussi blessés par les espaules; tellement que le sang sortoit de leurs playes a grand randon. Messire Corat d'Esmercy fut nauré parmi le visage, d'une espee qui lui couppa le nés, tant qu'il cheoit sur la bouche. Messire Arnaud de Commenge fut nauré en deus lieux de son corps, aus espaules, & sur l'un des bras. Nous estans en ce dur conflit, messire Errat me vint dire: Sire, si vous ne pensiez que ie le fisse pour m'en fuyr, & vous abandonner, ie vous irois querir monsieur le Comte d'Anjou, que ie voi là en ces champs. & ie lui respondis: messire Errat, vous nous feriez grand bien & honneur, si vous nous alliez querir aide pour nous sauuer les vies, car la vostre est, bien en aduenture: aussi disois-je vrai, car il mou-

rut de celle blessure, & tous furent de cette opinion qu'il nous iroit querir secours. Lors messire Errat s'en courut au Comte d'Anjou, lui requerir qu'il nous vouffist secourir, au danger ou nous estions. Il y eut vn grand Seigneur avec lui, qui le voulut garder de venir a nostre aide: mais le bon Comte n'en voulut rien faire: ains soudain tourna son Cheual, & accourut droit a nous, avec plusieurs de ses gens qui le suiurent. Et quant les Sarazins les veirent venir, ils nous laisserent, & se mirent en fuite, en emmenant avec eus messire Raoul d'Vbanon, lequel fut soudainement rescous, & ramené bleffé en plusieurs endroits, & en piteux point.

Nous n'eulmes gueres attédu là, quant vismes arriuer le Roi, accompagné de grand nombre de gendarmerie, faisant si grand bruit, qu'il sembloit que le Ciel & la terre se deussent assembler, tant il y auoit de trompettes, clerons, & cors qui sonnoïent. Il s'arresta sur vn haut chemin, & fit arrester toute sa gent aussi, & commença de les enhorter & prier de bien faire. Son heaume estoit tout doré, & en sa main tenoit vne espee d'Almaigne toute nue: & vous promets que ie ne vis onques si bel homme comme il estoit: car il apparoiſſoit par dessus tous les autres depuis les espaules: & seroit chose difficile a croire, comme tous les Gensdarmes prenoient

noient grand courage de batailler, voyant le Roy en tel estat : en maniere que plusieurs Cheualiers, sans attendre le Roi, se vindrent mesler parmi les Turcs, & les assaillirent courageusement. Le Roi s'auançoit tousiours : & quant il fut pres des Turcs, la bataille recommença si durement que c'estoit vne chose bien estrange a regarder : & deués scauoir qu'a ce coup là, lon vit faire plus de beaus faits d'armes, que l'on ne fit oncques, en tout le voyage d'Oltre-mer, tant d'un costé que d'autre. Car nul ne tiroit dard ne trait, ne autre * artillerie : mais se combattoit on * *c. engin de force.* main a main, tout meslé l'un parmi l'autre, a grands coups d'espees, & de masses. Et me tarδοit mout grandement, & a mes Cheualiers, tous blessés que nous estions, que nous n'estiōs a la bataille avec les autres. Et tantost reuint vers moi vn mien Escuyer, qui s'en estoit fuy a tout ma banierre, par le moyen duquel ie fus remonté sur vn cheual Flamant qu'il m'amena, & sans faire arrest, m'en courus droit où estoit le Roi, & me mis a son costé. Le Roi faisoit merueilles de combattre : en sorte que plusieurs fois se voulut aller frapper au fort de la bataille : mais le bon preud'homme messire Ian de Valleri, l'en retiroit tous les coups : & lui conseilla qu'il se tirast a costé a main dextre, vers le fleuve : afin que si aucun danger suruenoit, qu'il peust auoir secours du Duc de

Bourgoigne, & de l'armee qui gardoit le Camp, que nous auions laiffé au partir. Et auffi afin que ses gens se peussent refreschir, & auoir a boire: car il faisoit vn extreme chaut. Alors le Roi fit retirer ses Barons & Cheualiers, & autres gens de conseil, qui estoient en la bataille des Turcs: & tantost qu'ils furent venus deuers lui, il leur demanda conseil de ce qu'il deuoit faire: & plusieurs responderent, que le bon Cheualier messire Ian de Valleri, qu'il auoit avec lui, l'auoit tresbien conseillé, & qu'il le deuoit ainsi faire. Lors le Roi se tira vers le fleue: mais il n'y eut gueres arresté, quant voici venir messire Imbert de Beauieu, Connestable de France, qui dit au Roi, que son frere le Comte d'Arthois estoit en grand' presse, & durement assailli des Turcs, en vne maison a la Massourre, & se deffendoit a merueilles: toutesfois qu'il auoit grand besoin d'estre secouru, & supplioit le Roi lui donner aide. Le Roi respondit au Connestable qu'il picquast deuant, & il le suiueroit apres. Je di aussi au Connestable, qu'en tel affaire ie voulois estre de ses Cheualiers, pour le suiuir: dont il me mercia de bon cœur. Et incontinent commençames à picquer vers la Massourre, passant parmi la bataille des Turcs: au moyen de quoi plusieurs de nostre compagnie furent tantost departis l'un de l'autre, par la grand' force des Turcs. Et vn peu apres
voici

voici venir vn Sergent a masse au Con-
nestable, avec qui i'estois, & lui dit que le
Roy estoit arresté des Turcs, & en grand
danger de sa personne: & a l'heure qui fut
bié esbahis, ce fut nous: en sorte que nous
estions en grand' peine pour le Roi: car
entré le lieu ou il estoit, & nous, y auoit
bien enuiron mille ou xii. c. Turcs parmi
lesquels il nous conuenoit passer: & nous
n'estions que six de nostre part. Lors ie
m'aduisé de dire au Connestable, qu'at-
tendu que nous ne pouuions passer parmi
la foule des Turcs, qu'il seroit bon d'aller
passer au dessus d'eux: ce que nous fîmes
incontinent, & nous mîmes a courir tout
au long d'un grand fossé qui estoit entre
nous & les Turcs: & soyés certains que
s'ils se fussent aduisés de nous, ils nous eus-
sent tués & occis sans merci: mais ils en-
tendoient au Roi, & aux autres grosses
batailles. Et ainsi que nous arriuasmes,
nous vismes que le Roy s'estoit retiré au
haut du fleuue, & que les Turcs en emme-
noient les autres batailles, & s'assembloy-
ent toutes leurs batailles, avec les batail-
les du Roi sur le fleuue, & là y eut vne pi-
teuse assemblee: car la pluspart de nos
gens, pource qu'ils se tenoient des plus
foibles, cuidoient passer a nous deuers
l'ost ou estoit le Duc de Bourgoigne, mais
il ne leur estoit possible: car les Cheuauls
estoint si las & trauaillés, & la chaleur es-
toit si grande, qu'ils n'auoient puissance

de rompre la force de l'eau. Au moyen de-
quoi, plusieurs estoient noyés & peris: en
forte que nous voyons l'eau toute couuer-
te de picques, lances, escus, gens, & che-
uauls qui perissoient & se noyoyent. Quāt
nous vismes cette grand' infortune, & pi-
reux estat, qui couroit sur nos gens, ie
vins au Connestable, & lui di: qu'il seroit
bon que nous demourissions deça le fleu-
ue, pour garder vn petit pont, qui estoit là
pres: car (disois-ie) si nous le laissons sans
garde, les Turcs viendront charger sur le
Roy par deça: & si nos gens sont assaillis
vne fois par deus lieux, nous pourrions
bien auoir du pire. A mon conseil s'arre-
sta le Connestable, & demourasmes par
deça le fleuue, pour garder icelui petit
pont. Et soyés certains que celle iournee
le Roi fit des plus grands faits d'armes,
que iamais i'aye veu faire en toutes les
batailles ou ie fus onques: & disoit-on a-
pres la bataille, que si n'eust esté sa per-
sonne, nous eussions esté tous perdus, &
morts a celle iournee; & ne croi point que
a l'heure sa vertu & force ne lui fust dou-
blee, par la grace de Dieu: car il ne se fai-
gnoit point de se mettre aus dangers &
perils de la bataille: & là ou il voyoit ses
gens en destresse, il se venoit frapper par-
mi, pour les secourir: & tant donnoit de
coups d'espee, & de masse, que les Turcs
n'osoient approcher de lui. Et me conte-
rent vn iour le sire de Courtenay, & mes-
sire

fire Ian de Salonay, qu'ils auoient veu que six Turcs s'estoient adressés au Roi celui iour, & l'auoient prins a force par le frain de son cheual, & l'emmenoient: mais le vertueus Prince, voyant le danger ou il estoit, s'esuertua de tout son pouuoir, & par grand courage frappa sur les Turcs qui le tenoient, en maniere que lui seul, se deliura de leurs mains en bref.

Après que nous eusmes demouré vn peu audit poncel, pour garder que les Turcs ne passassent, le bon Comte Pierre de Bretagne vint arriuer à nous, qui venoit de deuers la Massourre, là ou il y auoit eu vne autre merueilleuse escarmouche, & estoit tout blessé au visage, tellement que le sang lui sortoit de la bouche en grand'abondance, comme s'il eust voulu vomir de l'eau, qu'il eust eue en la bouche: il estoit monté sur vn gros courtaut, qui estoit assés farouche, & estoient toutes ses renes brisées & rompues, attachées à l'arçon de sa Selle, & tenoit son cheual a deus mains par le col, de paour que les Turcs qui le suiuiotent derriere, ne le fissent choir de son cheual: toutesfois il sembloit bien qu'il ne les doutoit pas grandement, car souuent il se tournoit vers eus, & leur disoit paroles en signe de moquerie. Enuiron la fin de celle bataille, vindrent encores vers nous le Comte Ian de Soyssons, & messire Pierre de Nouille, qu'on appelloit Cayer, qui assés auoient

souffert de coups , a celle iournee , & estoient demourés derriere : & quant les Turcs les virent venir , ils cuiderent aller au deuant d'eus : mais quant ils nous eurent apperceus , gardans le poncel , il les laisserent passer. Quant le Comte de Soissons , qui estoit mon cousin germain , fut arriué au poncel , ie lui di : Sire , ie vous prie que demouriés ici pour garder ce pont , & vous ferés tref-bien : car si vous le laissés , les Turcs que vous voyés là deuant nous , se viendront frapper parmi : & ainsi le Roi demourera assailli par derriere & par deuant. Et alors il me demanda s'il demouroit , si ie voudrois aussi demourer avec lui : & ie lui respondis qu'ouy volontiers. Et a l'heure le Connestable , ayant entendu nostre accord , me vint a dire , que ie gardasse bien ce passage sans partir : & qu'il nous alloit querir secours. Et ainsi que i'estois là entre mon cousin le Comte de Soissons , & messire Pierre de Nouille , voici venir vn Turc , qui venoit de deuers l'armee du Roi , qui vint frapper par derriere messire Pierre de Nouille , & lui donna si grand coup d'vne grosse masse pesante , qu'il le coucha sur le col de son cheual : & puis print la course par atrauers du pont , & s'en fuit deuers sa gent , cuidant que nous le suiurions apres , & abandonnerions le pont , afin qu'ils le peussent gagner. Mais quand les Turcs virent que nous ne voulions pas laisser le pont , ils se mirent

mirent a passer le ruisseau, en sorte qu'ils demourerent entre le ruisseau & le fleue. Et quant nous les vismes passés, nous nous approchastes d'eux: en maniere que nous estions prests & delibérés de leur courir sus, s'ils se fussent plus auancés pour venir vers nous.

Au deuant de nous, il y auoit deux Heraus du Roi, dont l'un auoit nom Guillaume de Bron, & l'autre Ian de Gaymaches, lesquels furent durement assailis des Turcs qui auoient passé le ruisseau: & amenerent grand nombre de gens de pied, qui estoient villains du pays, qui leur iettoient mottes de terre, & grosses pierres a rour de bras: & en fin ils allerent querir vn autre villain Turc, qui leur ietta trois fois le feu Gregois, & a l'une des fois, le feu prit a la robbe de Guillaume de Bron: mais tantost il l'estaignit, dont besoing lui fut: car s'il se fust allumé, il l'eust tout brulé. Et ne cessoient ces Turcs, de tirer pilles & traits a ces deus Heraus: en sorte que nous estions tous couuerts des traits, qui eschappoient ausdits Turcs. Or m'aduint que ie trouuai la pres, vn gaubison decouppé, qui auoit esté a vn Sarazin, lequel ie prins, & mis le fendu deuers moi, pour en faire escu, & me seruit bien a ce besoing: car autrement i'e-
stois mort, & encores fus-je blessé en cinq lieux de mon corps, & mon cheual en quinze. Vn peu apres arriua vers moi vn

de mes Bourgeois de Ionuille, qui m'apporta vne banniere a mes armes, & vn grand cousteau de guerre, dont ie n'auois point pour l'heure. Et estant ainsi equipé, ie me mis a courir droit a ces villains Turcs, qui tenoient en presse les deus Heraus : mais quant ils nous virent venir, ils s'en firent, sans nous oser attendre.

Aduint que sur le soir enuiron Soleil couchant, le Connestable nous amena les Arbalestiers du Roi, a pied, lesquels se rengerent au deuant de nous : & nous qui estions a cheual, descendismes, & nous mismes a pied, en l'ombre des Arbalestiers : & quant les Sarazins nous apperceurent ainsi en ordre, ils s'en firent incontinent, & nous laisserent en paix : & lors me dit le Connestable, que nous auions tres-bien fait d'auoir ainsi gardé le poncel, & que ie m'en allasse deuers le Roi sans aucun doute, & que point ne l'abandonnasse iusques a ce qu'il seroit descendu en son pauillon, ce que ie fis : & tantost que ie fus arriué deuers le Roi, vint a lui messire Ian de Valleri, & lui fit vne requeste, qui estoit : que le Sire de Chastillon lui supplioit qu'il lui donnast l'arriere garde : ce que le Roi lui ottroya moult volontiers : & cheminoit tousiours le Roi pour s'aller rendre a son pauillon : & ie lui leuai son heaume de la teste, & lui baillai mon chapel de fer : qui estoit beaucoup plus leger, afin qu'il prinst
vent

vent. Et comme nous cheminions ensemble, vint vers nous frere Henri, prieur de l'hospital de Ronnaÿ, qui auoit passé la riuere, & s'adressant au Roi, lui baïsa la main toute armee, & lui demanda s'il scauoit aucunes nouuelles de son frere le Comte d'Artois: & le Roy lui respondit, qu'ouy bien: c'est assauoir qu'il scauoit bien que son frere estoit en Paradis: & alors frere Henri le cuidant reconforter de la mort de son dit frere, lui dit: Sire, onques si grand honneur n'aduint a Roi de France, comme a vous aujourd'hui, car par grand courage & hardiesse, vous & toute vostre gent, aués passé a nou vne grand' & roide riuere, pour venir combattre vos ennemis. Et tellement aués fait, que vous les aués chassés, & gagné le camp, avec leurs engins, dont ils vous faisoient grand' guerre, & si coucherés encore a ce soir en leurs logis: & le bon Roi lui respondit, que Dieu fust loué de ce qu'il lui enuoyoit: & en disant cela, lui commencerent a choir des yeus les grosses larmes a grand abondance: en maniere que tous ceus qui estoient presens, voyans ainsi plorer le Roi, par grand pitié & compassion, se mirent a plorer comme lui, en louant le nom de Dieu. Nous arriuasmes a nos logis, si trouuasmes vne grosse troupe de Sarazins a pied, qui tenoient les cordes d'une tente, laquelle ils destendoient a force, contre plusieurs de

nos gens qui la vouloient rendre: & le maistre du Temple qui auoit l'auant garde & moi, courusmes sus a cette chenaille, en sorte que nous les mismes en fuite, & demoura la tente a nos gens: toutesfois il y eut dure metlee, & plusieurs gens qui estoient en grand' boubance, se trouuerent a grand' honte, les noms desquels ie ne mettrai point ici, & m'en deporterai pour le present, pource qu'ils sont maintenant morts, & nul ne doit mal dire des trespasés. Mais de messire Guyon Maluoisin, vous veus- ie bien dire qu'il fit de grandes prouesses celle iournee: car le Connestable & moi le rencontraimes en chemin, venant de la Massourre, bien se maintenant, & si estoit assés poursuiui & pressé de pres: & ne plus ne moins que les Turcs auoient rebouté & chassé le Comte de Bretagne & sa bataille (comme ie vous ai deuant dit) ainsi chassoient ils monsieur Guyon Maluoisin & sa gent. Toutesfois il eut grand los de celle iournee, car il se monstra vaillant & toute sa gent aussi, & n'estoit pas de merueilles: car j'ai depuis ouy dire a ceux qui scauoient & connoissoient bien son lignage, & tous les gens d'armes a peu pres, qu'il n'en falloit gueres que tous les Cheualiers ne fussent de son lignage, & gens qui estoient ses hommes, de foi & hommage lige: parquoy beaucoup plus grand courage auoient-ils a leur Capitaine.

Après

Après que nous eusmes chassés & desconfits les Turcs, les Beduyns, qui estoient grosse troupe de gens, se vindrent ferir dans l'ost des Sarazins, & prindrent & emporterent tout ce qu'ils peurent trouver, & que les Sarazins auoient laissé: dont ie fus grandement esbahi: car iceus Beduyns sont suiets & tributaires aus Sarazins. Toutes-fois ie n'ous iamaïs dire, que pour auoir pillé les biens des Sarazins, qu'ils en eussent pis. Et disoient-ils, qu'ils auoient tousiours de coustume de courir aus plus foibles, & qu'ils estoient de la nature des chiens: que quant il en y a vn qui est battu d'un autre, & qu'il se met a crier, tous les autres lui courét sus. Et d'autant que l'occasion se presente a parler des Beduyns, ie ne veus mettre sous silence a vous dire quelles gens ils sont, & de leur condition.

CHAP. XXX.

Quelles gens ce sont que les Beduyns: de leur Loy, habitation & façon de faire.

LEs Beduyns donques, sont gens qui viuent & habitent avec les Sarazins: mais ils tiennent autre maniere & façon de viure, car les Beduyns ne croient point en Mahomet comme font les Sarazins: mais ils tiennent & gardent la Loy Hely, qu'ils disent estre Oncle de Mahomet. Ils se tiennent aucunesfois es montagnes

& deserts: & croyent fermement entr'eus, que si l'un d'eus endure la mort pour son Seigneur, ou pour quelque autre bonne intention, que son ame va en un autre meilleur corps, & plus parfait, & est dans icelui corps a plus grand' aise qu'elle n'estoit auparavant. Au moyen dequoi ils ne font cōte de s'offrir à la mort. Par le commandement de leurs anciens, & supérieurs, ils n'ont ne Ville ne Cité, ou ils se puissent retirer: mais demourēt tousiours aus champs & aus deserts: & quand il fait mauuais temps, ils fichent par terre vne façon d'habitable, qui est fait de tonnes & de cercles, liés a des perches, ainsi que font les femmes, quand elles font secher leur lessiue, & par dessus ces cercles & perches, ils iettent des peaus de grands moutons, qu'ils portent tousiours sur eus, que on appelle peaus de Dommas, courroyees en Alun, & eus mesmes portent des pelices qui sont a grand poil, qui leur couvrent tout le corps: & quant se vient au soir, ou qu'il fait mauuais temps, ils s'encloyent & se retirent en leursdites pelices: puis le lendemain ils les estendent au Soleil, & les frottent quand elles sont seches, en sorte qu'il n'appert point qu'elles ayent esté mouillees. Ceux qui suivent les guerres, sont communement a cheual, & le soir ils tiennent leurs cheuaus aupres d'eus, & ne font que leur oster les brides, & les laissent paistre de l'herbe, sans leur donner

donner autre chose: ils ne sont iamais armés, quand ils vont combattre: pource que ils disent & croient, que nul ne peut mourir qu'un certain iour, qui lui est ordonné: & a cette cause ils ont vne façon entr'eus, que quand ils veulent maudire leurs enfans, ils leur disent en cette maniere: Tu sois maudit, comme celui qui s'arme de peur de mort. Et en bataille, ils ne portent qu'un glaive, fait a la mode de Turquie, & sont presque tous reuestus de linge blanc, comme si c'estoient sourpelis. Ils sont laides gens; & hideus a regarder: car ils ont les cheueus longs & les barbes, & noirs outre mesure. Ils viuent du lait de leurs bestes, de quoi ils ont grand'abondance. Ils sont en si grand nombre, que nul ne scauroit estimer: car il en y a au Royaume d'Egypte, de Hierusalem, & par toutes les autres Seigneuries que les Sarazins tiennent, auxquels ils payent grands tributs par chacun an.

CHAP. XXXII.

Les efforts que firent les Sarazins, pensant reconquerir les Engins que le Roy auoit gaigné sur eus: & de ce que fit vn Prestre a l'encontre des Sarazins.

Pour reuenir a ma matiere, & icelle poursuivre, aduint que ce soir mesmes, que fusmes retournés de la piteuse bataille, comme ie vous ai descrit ci de-

uant, & que nous fusmes logés au lieu mesme dont nous auions chassé les Sarazins: mes gens m'apporterent de nostre ost vne tente (que le maistre des Templiers, qui conduisoit l'auant-garde, m'auoit donnee) laquelle ie fis tendre vis a vis des Engins que nous auions gagnés des Sarazins. & pour le grand traual & playes que nous auions endurés tout au long du iour en la bataille, chascun se vouloit reposer: mais les Sarazins qui veilloient tousiours, pour nous surprendre, ne nous laisserent pas longuement en tel repos: car auant que le iour fust arriué, on commença en l'ost a crier alarme, & moi aiant entendu le bruit, fis soudainement leuer mon Chambellan pour aller voir que c'estoit: mais ne tarda gueres qu'il retourna vers moi tout effroyé, m'escriant, Sire, armés-vous tost, car voici les Sarazins qui ont desia desconfits & tués ceus que le Roi auoit ordonnés a faire le guet, & garder les Engins que nous auions gagnés sur les Sarazins. Et auoient esté mis lesdits Engins deuant les Pauillons du Roi, & de nous, qui estions proches de lui. Si me leuai sur pieds, au cri de mon Chambellan, & iettai ma cuirasse sur le dos, & vn chapel de fer sur la teste: & aiant assemblé mes gens, tous blessés comme nous estions, courusmes sus aus Sarazins: & si bien fismes nostre deuoir, qu'en peu de temps nous les repoussasmes hors de

de deuant les Engins qu'ils vouloient recourre. Et pource que nous ne pouuions vestir nos haubers, le Roi nous enuoia messire Gautier de Chastillon, pour nous emparer, lequel se logea entre nous & les Turcs, pour estre au deuant des Engins. Durant lequel temps, les Sarazins s'essaierent plusieurs-fois a les desrober de nuit: mais messire Gautier de Chastillon les rebouta si tresfort, que plusieurs en perdirent la vie. Et quant les Sarazins virent qu'ils ne pouuoient rien gagner sur nous, ils se retirerent a vne grosse bataille de leurs gens a cheual, qui estoient aranges deuant nostre ost, pour garder que nous ne les surprissions de nuit. Apres cela, six des Chefuetaines des Turcs, mout bien armés, se descendirent & vindrent faire vn taudeys de grosse pierre de taille, afin que nos Arbalestiers ne les blessassent de leurs traits: & quant ils furent descendus, ils commencerent a tirer a la volee parmi nostre ost: en sorte que plusieurs de nos gens en furent blessés: & quant moi & mes gens-d'armes, qui auons a garder a celui endroit vismes leurs taudeys de pierre, nous deliberaſmes ensemble, que la nuit venue, nous irions deffaire leur-dits taudeys, & emporterions les pierres. Or auois-ie vn Prestre, nommé messire Ian d'Vbayſi, qui ouit nostre conseil & entreprise, & de fait il n'attendit pas la nuit, ains se departit de

nostre compagnie tout seul, & alla voir les Sarazins, (sa cuirasse vestue, & son chapel de fer sur la teste, & son espee sous l'esselle, de peur qu'on ne l'apperçust) & quant il fut pres des Sarazins qui ne pensoient point en lui, pource qu'il estoit tout seul, il leur courut sus asprement, & lieue son glaive & frappe dessus, en sorte qu'ils n'eurent loisir de soi pouuoir defendre, tellement que force leur fut de prendre la fuite. dont de ce furent mout esbahis les autres Turcs & Sarazins. Et quant ils virent ainsi leurs Seigneurs s'en fuir, ils piquerent des esperons, & coururent a mon Prestre qui se retourna vers nostre ost: incôtinent partirent bien cinquante de nos gens-d'armes, pour aller contr'eus: mais les Turcs ne voulurent ioindre a nos gens, ains gauchirent par deuant eus par deus ou trois fois: si arriua a vne des fois qu'un de nos gens-d'armes ieta sa dague, a l'un de ces Turcs, laquelle le vint frapper dedans les costes, & emporta le Turc la dague en son corps, dont il mourut bien tost apres. Quand les autres Turcs virent cela, ils n'oserent plus acourir contre nous: & adonc nos gens emporterent toutes les pierres de leur taudeys: & desormais fut mon Prestre bien connu en nostre ost: & lui disoit-on quand on le voioit: Voiés-ci le Prestre qui a tout seul desconfit les Sarazins!

CHAP. XXXII.

Ce qui aduint en vne bataille que le Roi eut contre les Sarazins: & quel ordre fut tenu, tant de la part du Roi, que de celle de ses ennemis.

CEs choses dessusdites aduindrent le premier iour de Carefme: & celui iour mesmes firent les Sarazins nouveau Capitaine, qui estoit vn tres-vaillant Sarazin, pource que leur Chefuetaine nommé Scecedun (dont ils vous a esté parlé ci deuant) estoit mort en la bataille, le iour de Carefme prenant: là ou semblablement fut occis le bon Comte d'Arthois, frere du Roi. Icellui nouveau Chefuetaine, fit regarder les morts qui gisoient par terre, & entre les autres fut trouué le corps du Comte d'Arthois, qui estoit richement habillé, comme a vn Prince appartenoit, si print ledit Chefuetaine la corté d'armes dudit d'Arthois, & pour donner courage aus Turcs & Sarazins, la leua haut deuant eus, leur donnant a entendre que c'estoit la cotte d'armes du Roi leur ennemi, qui estoit mort en la bataille; & pourtant Seigneurs (disoit-il) vous vous deués esuertuer, & prendre courage de vaincre & chasser vos ennemis: car attendu qu'ils sont sans Seigneur, ils ne sçauroient durer contre nous; & tout ainsi que le corps, sans teste, demeure orieus, & ne vaut rien, aussi l'ar-

mee qui est sans Prince ou Capitaine, ne se peut maintenir longuement. A cette cause, ie vous conseille, que Vendredi prochain chacun soit prest & en armes, pour aller courir sus nos ennemis, & les desconfire: en sorte qu'ils n'aient puissance de reuenir a nos pays, & vous prie de le vouloir faire ainsi: car soiés certains, que puis qu'ils ont perdu leur Roi, ils n'auront duree contre nous. Et a ce conseil & deliberation s'accorderent tous les Sarazins. Or deués sçauoir, qu'en leur ost, le Roi auoit plusieurs Espies, qui sçauoient leurs entreprinſes, & tout ce que ils deliberoient de faire. Au moien dequoy, aucunes desdites Espies, estans aduertis de l'entreprinſe des Turcs, s'en vindrent vers le Roi, lui conter les nouuelles, & comme les Turcs pensoient qu'il fust mort en la bataille. Et adonc le Roi fit venir a lui tous les Capitaines de son armee, & leur commanda qu'ils fissent armer tous les gensd'armes, pour se tenir prests, & qu'a la minuit chacun sortist hors des tentes & pauillons, pour aller iusques au deuant de la lice, laquelle auoit esté faite, afin que les Sarazins n'entraſſent a cheual, & en grand nombre, en l'ost du Roi. Et tantost les Commissaires firent ainsi que le Roi leur auoit commandé: & soiés certains qu'ainsi que le Chefuetaine auoit ordonné & conclud, que pareillement se mit en diligence
d'exec

d'executer le fait; de sorte que le Vendredi arriué, enuiron l'heure de Soleil leuât, il vint arriuer a tout quatre mille Cheualiers bien equipés, lesquels il fit tous arranger par bataille, tout au long de nostre ost, qui estoit au long du fleuve qui venoit de deuers Babyloine, & passoit pres de nostre ost, & tirant iusques a vne Ville qu'on appelle ressil. Quant icelui Chefuetainse eut ainsi ordonnés en bataille ces quatre mille Cheualiers, deuant nostre ost, tantost il nous amena vne grand' armee de Sarazins a pied, en sorte qu'ils nous environnoient du tout de l'autre costé de nostre ost: & apres qu'il eut rengees cesdites deus armees, comme dit est, il fit venir aupres de lui tout le pouuoir du Souldan de Babyloine, pour lui aider & secourir s'il en auoit affaire. Et apres qu'il eut ainsi mis en ordre toutes ses batailles, il venoit lui-mesmes tout seul vers nostre ost, monté sur vn petit roussin, pour voir & aduiser nostre maniere, & les ordonnances & departement de nos batailles: & selon qu'il voioit que nos batailles & armees estoient, en aucuns endroits les plus fortes, il renforçoit ses batailles cõtre les notres. Ces choses faites, il fit passer bien trois millie Beduyns (desquels i'ai deuât parlé) par deuers l'ost que le Duc de Bourgoigne gardoit, qui estoit entre deus fleuves, & ce faisoit-il, cuidant que le Roi eust partie de ses gens d'ar-

mes en l'ost du Duc, & que l'armee du Roi qui estoit avec lui en fust plus foible, d'autant que les Beduyns garderoient que nous n'aurions point secours du Duc de Bourgoigne. Avant que ces choses fussent ainsi faites, l'heure de midi estoit desia venue, & alors le Chefuetaine fit sonner leurs macaires, & tabours tres-somptueusement a la mode Turquoise, qui estoit vne chose mout estrange a ouir, a qui ne l'auoit accoustumé: & commencerent les batailles, tant de pié que de cheual, a s'esmouuoir. Et pource que la bataille du Comte d'Anjou estoit la premiere des nostres, elle fut premierement assaillie, & aussi qu'elle estoit du costé de Babyloine, & vindrent les Turcs contre le Comte d'Anjou, en forme deschets; car les gens a pié venoient d'une part, courans sus a ses gens, & les brusloient de feu gregeois, qu'ils iettoient avec instrumens qu'ils auoient a ce propres; & de l'autre part venoient les gens a Cheual, qui leur donnoient tant d'affaires que merueilles: & si bien assaillirent & combattirent contre les gens du Comte d'Anjou, qu'ils les desconfirent: dont le Comte estant a pié entre ses gens, estoit en grand malaise. On vint au Roi soudainement, lui apporter nouuelles du danger & grand meschef en quoi le Comte son frere estoit. Le Roi aiant entendu cette infortune, craignant que son frere n'eust
du

du pire, ne peut se contenir qu'il ne l'allast incontinent secourir : & de fait, sans attendre personne, ferit son cheual des esperons, l'espee au poing, & se mist parmi la bataille, frappant de grans coups sur ces Turcs & Sarazins, iusques a ce qu'il fut arriué au lieu ou estoit son frere. Mais a son arriuee, Dieu sçait combien il endura de peine, & qu'ants beaus faits d'armes il fit : car soiés certains que la ou il voioit plus de presse & danger, il s'y iettoit sans aucune crainte : tellement que par sa grand' prouesse, il ietta hors de dangier son frere, & mirent en fuite les Sarazins, & les chasserent hors de leur ost. & bien fut le Roi celle fois gardé de Dieu : car les Sarazins auoient remplie la cuillere de son Cheual de feu Gregeois qui ne lui fist aucun dommage.

Après la bataille du Comte d'Anjou, venoit la seconde bataille, dont estoient Capitaines messire de Gui de Grimelins, & Baudouin son frere : en laquelle bataille estoient mis les Barons d'Outre-mer. & cette seconde bataille estoit ioignant la troisieme bataille que conduisoit messire Gautier de Chastillon, qui auoit avec lui grand nombre de vaillans gens. Ces deus batailles furent vigoureusement assaillies des Turcs : mais ils firent si tresbien leur deuoir a se defendre, qu'après auoir mis a mort plusieurs Turcs, le meilleur leur demoura, sàs qu'ils perdissent la place.

La quatrieme bataille du Roi estoit conduite par frere Guillaume Sonnat, maistre du Temple : lequel auoit avec lui peu de gens d'armes, qui lui estoient encores demourés de la bataille qui auoit esté donnee le iour du Mardi-gras : & pource qu'il se vit accompagné de peu de gens, il fit faire au deuant de sa bataille vne deffense des engins qu'on auoit gagnés sur les Sarazins, & y auoit mis grand' quantité de bois de Sapin, en forme de planches : mais cette deffense ne lui seruit de rien, car les Sarazins y misrent le feu Gregois, lequel se print de legier au bois, & brusta tout sans y laisser rien. Les Sarazins voians que le maistre des Templiers auoit petit nombre de gens pour resister a eus, ils n'attendirent pas que le feu fust embrasé, ne qu'il eust couru par tout ; mais se vindrent mettre parmi les Templiers bien asprement : en sorte que nonobstant quelque resistance qu'ils sceussent faire, en peu de temps ils furent par les Turcs desconfits. Et soiés certains que derriere les Templiers, il y auoit enuiron vn iourneau de terre, qui estoit toute couuerte de pillés, de dars, & d'autres traités que les Sarazins auoient iettés contre eus ; en sorte que lon ne voioit pas la terre. Le maistre Capitaine d'icelle bataille auoit perdu vn œil a la bataille du Mardi-gras, & a cette ci il y perdit l'autre : car il y fut occis & tué vaillamment.

Depuis la bataille de messire Guy de Maluoisin descendoit la lice dont ie vous ai deuant parlé, & venoit clorre l'ost ou i'estois le long du fleuve bien au iet d'une pierre, & passoit la lice par deuant l'ost de monsieur le Comte Guillaume de Flandres: lequel ost estoit a costé, & s'estendoit iusques au fleuve, qui descendoit en la Mer: & vis a vis du fleuve qui venoit de deuers messire Guy de Maluoisin, estoit nostre bataille. Et voyans les Sarazins que la bataille de messire Guillaume Comte de Flandres estoit au deuant de leurs visages, ils n'oserent venir frapper sur la nostre, de quoi nous fumes bien ioyeux: car ne moi, ne mes Cheualiers n'auions pas vn harnois en dos, pour les blessures & grans playes que nous auions eues en la bataille precedente. Au moien de quoi n'estoit possible de vestir aucun harnois. Mondit seigneur le Comte de Flâdres, & sa bataille, firent merueilles: car courageusement ils coururent sus aus Sarazins, & firent sur eus de beaux faits d'armes: en sorte qu'ils eurent tousiours l'auantage. Et quant ie vis le courage de nos gens, ie commandai a mes Arbalestiers qu'ils tirassent force traits sur les Turcs, qui estoient a cheual en celle bataille: & tantost qu'ils sentirent qu'on les bleuoit eus & leurs cheuaus, ils commencerent a fuir, & abandonner leurs gens a pié. Et quant le Comte de Flan-

dres, & son armee, virent que les Turcs s'estoient mis en fuite, ils passerent par dessus la lice, & coururent sus aus Sarazins qui estoient a pié, & en tuerent grād' quantité, & gagnerent plusieurs de leurs rarges : & là entre les autres se monstra vaillant, & se maintint vigoureusement messire Gautier de la Horgue, qui portoit la baniere a monsieur le Comte d'Aspremont. Apres celle bataille, venoit celle du Comte de Poitiers: en laquelle la plus grand' part des Gens-d'armes estoient a pié, dont grand mal leur aduint: car les Turcs les deffirent, & prindrent le Comte de Poitiers: & de fait l'emmenoient, si n'eust esté les Bouchiers, & les autres Marchans qui vendoient les viures & denrees en nostre ost; lesquels aiant entendu qu'on emmenoit ainsi le Comte, s'escrierent, & tous ensemble coururent sus aus Sarazins; tellement qu'ils les chasserent hors de l'ost, & fut par eus recous le Comte de Poitiers. Et en cette bataille se monstra vertueux & hardi messire Arnaud de Commenge Vicomte de Couzerans, dont j'ai ci devant parlé, pour cuider secourir le Comte, & portoit icelui de Commenge vne baniere: & ses armes estoient d'or a vn bord de gueules: lesquelles, (comme depuis il m'a compté, auoient esté donnees a ses predecesseurs, qui portoient le surnom d'Espagne anciennement, par le Roi Charlemagne

magne) pour les grans seruices qu'iceus Vicomtes de Couzerans lui auoiēt faits, lui estant en Espagne contre les infideles: & aussi qu'ils auoient chassé hors du païs de Commenge les Sarazins, qui le tenoient occupé, & l'auoient remis en l'obeissance du Roi Charlemaigne.

Après la bataille du Comte de Poitiers, estoit vne petite bataille, & la plus foible de toutes, de laquelle monsieur Iosserant de Brançon estoit le maistre & chief, & l'auoit amené en Egypte mondit seigneur le Comte de Poitiers. Toute celle bataille estoit de Cheualiers a pié, & n'y auoit homme a Cheual qu'icelui messire Iosserant, & messire Henri son fils: & furent si durement assaillis des Turcs, qu'ils ne leur pouuoient resister. Quoi voiant messire Iosserant & son fils, vindrent par derriere courir aus Turcs, & leur donnoient de grans coups d'espees: en sorte qu'ils estoient contrains de se tourner verseus, & laisser les autres qui estoient a pié en la bataille. Mais tout cela n'eust de gueres serui a nos gens, qu'ils n'eussent esté tous desconfits: n'eust esté que messire Henri de Coué, Cheualier de grand prudence, qui estoit en l'ost du Duc de Bourgoigne, voiant que nostre bataille estoit la plus foible, ainsi que les Turcs se reuirerent contre messire Iosserant, il faisoit tirer les Arbalestiers du roi contr'eus: en sorte qu'il fit tant par sa

prouesse, que messire Ioffrant eschappa de celle bataille, en laquelle il perdit grand nombre de Cheualiers, & d'autres gens, & lui mesmes, des grans coups qu'il y auoit receus, mourut vn peu de temps apres. Icelui seigneur estoit mon oncle: & lui ouis dire a sa mort qu'en son temps il auoit esté en xxxvij. batailles, desquelles par plusieurs fois il auoit emporté le pris d'armes, & de mon aage mesmes i'en ai connoissance d'aucunes. Car vne fois, lui estant en l'ost du comte de Mascon, qui estoit son cousin, il s'en vint a moi, & a vn mien frere, le iour d'un Vendredi saint, & nous dit: mes Neueus venés moi aider a tout vostre gent, & allons courir sus aus Alemans, qui abatent & rompent le Monstier de Mascon: & incontinent nous fismes prests, & allasmes droit aus Alemans, & a coups d'espees les chassasmes du Monstier, & plusieurs en furent tués & naurés: & quant nous eusmes ce fait, le bon preud'homme s'agenoilla deuant l'autel, & cria a haute vois a nostre seigneur, qui lui pleust auoir pitié de son ame, & qu'il le voulsist oster d'entre les guerres des Chrestiens, la ou il s'estoit trouué tant de fois, & veu tant de gens mettre a mort: & qu'il lui donnast la grace de mourir a son seruice, contre les Infideles. Ce que Dieu lui octroia (comme ie croi) a cette fois.

Après cette bataille, le Roi manda quer
rir

rir tous les Barons & Cheualiers de son ost, & les fit venir deuant lui, pour les reconforter, & leur donner courage. Et quant ils furent deuant lui, il leur dit: Seigneurs & amis, vous pouués claiement connoistre les grans graces & faueurs que Dieu nous fait tous les iours, en nous donnât la victoire sur nos ennemis. Vous sçaués que Mardi dernier, qui estoit a Carême prenant, nous les auons desconfits, & chassés hors de leurs logis, ou nous sommes a present. Aussi Vendredi passé, nous les auons combatus a pié & a cheual moult vigoureusement; en sorte que l'honneur nous en demeure, & a eus la perte & confusion. lesquelles victoires, nous auons obtenues par la seule benignité du Seigneur, en la puissance duquel sont les victoires mises, & non pas entre les mains des hommes.

Puis donc Seigneurs (disoit-il) que tant de biens nous viennent de lui, ie vous prie affectueusement, rendons lui graces: & le prions qu'il nous regarde de son œil de pitié, & qu'il nous donne la puissance de le pouuoir bien seruir contre les ennemis de sa sainte doctrine. Et soies certains que si ainsi le faisons, que le bon Seigneur ne nous oubliera point. Ainsi donnoit le bon Roi courage a ses gens, lesquels lui promirent que chacun feroit son deuoir: & en cette maniere se departirent de sa presence: mais auant

qu'aller plus auant en mon histoire, il m'a semblé chose conuenable de vous escrire ici, la maniere que le Souldan tenoit en ses guerres, & des gens qui le seruoient en icelles.

CHAP. XXXIII.

Quelles gens sont ceux que le Souldan communement mené en guerre, & comme ils sont aguerris: façon de faire du Souldan enuers eux.

VOus deuez entendre, que la plupart de sa Cheualerie estoit faite de gens estranges, que les marchans, faisans la traffique sur mer, vendoient aus Egyptiens, qui les achetoient par le commandement du Souldan: & communement les marchans les amenoient d'Orient: pource que quant vn des Rois d'Orient auoit desconfit l'autre, celui qui auoit la victoire, prenoit prisonniers tant de gens comme il pouuoit, & les vendoit aus marchans, qui apres les emmenaient en Egypte, comme i'ai dit. Et les enfans qui sortoient de ses serfs & esclaués, le Souldan les faisoit nourrir & garder soigneusement. Et quant ils commençoient a mettre barbe, le Souldan leur faisoit apprendre a tirer de l'arc par esbat, & chascun iour quant il estoit deliberé, il les faisoit tirer deuant lui. Et quant on voioit qu'il y en auoit aucuns qui commençoient a se renforcer, on leur ostoit leurs foibles arcs, & leur en bailloit on de plus
forts

fors, selon leur puissance. Telles ieunes gens portoient les armes du Souldan : & les appelloit on les Bahoris du Souldan; & tout incontinent que la barbe leur commençoit a poindre, le Souldan les faisoit Cheualiers: & les armes qu'ils portoient du Souldan, estoient d'or fin: sauf que pour difference on y mettoit des barres vermeilles, des roses, oiseaus, griffons, ou quelque autre chose a leur plaisir. Et telles gens estoient la appellés les gens de la Halcqua, comme vous diries les Archers de la garde du Roi: & estoient tousiours pres du Souldan, & gardans son corps: mais encores plus pres de lui, auoit il autres gardes, comme portiers & menestriers, & sonnoient iceus menestriers au point du iour au leuer du Souldan, & au soir a sa retraite. Et avec leurs instrumens faisoient tel bruit, que ceus qui estoient la presens, ne se pouuoient entendre l'un l'autre, & les oioit on clairement parmi l'ost. Et sachsés que sur le iour ils n'eussent esté si hardis de sonner, sinon par le congé du maistre de la Halcqua, lequel faisoit venir ses menestriers, qui sonnoient de leurs cors Sarazinois, Tabours, & Macaires: & alors s'assembloit toute la gent du Souldan deuant son logis; & estans assemblés, le maistre de la Halcqua leur disoit le vouloir du Souldan, & leur commandoit de l'accomplir. Quant il estoit en personne en la guerre

combatant, celui des cheualiers de la Halcqua, qui s'esprouuoit bien, & qui faisoit de beaus faits d'armes, le Souldan le faisoit ou Admiral, ou Capitaine de Gens-d'armes, selon ce qu'il auoit merité: & qui mieus faisoit, il estoit mieus remuneré. Au moien dequoi, chacun d'eus s'efforçoit de faire outre son pouuoir: mais en la fin le Souldan vsoit d'une grande tyrannie enuerseus. Car quāt aucuns desdicts Cheualiers de la Halcqua, par leur prouesse ou Cheualerie auoient gagné & acquis du bien, tant qu'ils n'auoient plus de souffrette, & qu'ils se pouuoient passer de lui, de peur qu'il auoit qu'ils ne le deboutassent, ou tuassēt, il les faisoit prendre, & mourir en ses prisons secrettement, & prenoit tout le bien que leurs femmes & enfans auoient. ce que ie vi par experience, durant le temps que nous estions Outre-mer. Car le Souldan fist prendre & emprisonner ceus qui auoient prins les Comtes de Montfort, & de Bar, par grand' haine qu'il auoit a leur vaillance & hardiesse: & en fin les fit mourir cruellement. Le semblable fit il aus Boudendars, qui sont gens suiets au Souldan. Ces Boudendars ici, apres qu'ils eurent deconfit le Roi d'Armenie, vn iour ils vindrent deuers le Souldan, pour lui compter les nouuelles, lequel ils trouuerent chassant aus bestes sauues: mais l'ayant salué, il leur respondit par vne grand

grand' malice, qu'il n'auoit cure de leur salut: & qu'il leur sçauoit tresmauuais gré de quoy ils estoient venus là, & lui auoient fait perdre sa chasse: & de fait leur fit couper les testes.

CHAP. XXXIIII.

Comme apres la mort du Souldan de Babyloine, son fils lui succeda: et de ce qu'il fit à son commencement de regne, qui causa sa mort.

ET pour reuenir a nostre matiere, vous aués bien entendu ci deuant, comme le Souldan mourut apres la prinse de Damiette; lequel auoit vn fils de l'aage de vint cinq ans, bien sage & instruit a la guerre; & pourtant que le Souldan doutoit qu'il ne le voulsist* desheriter, il ne l'a-
 *c. lui offe
 ou rai
 l'estat.
 uoit point voulu tenir aupres de lui, mais lui auoit donné vn Royaume qu'il auoit en Orient. Et tantost que le Souldan son pere fut mort, les Admiraus de Babyloine l'enuoierent querir, & le firent leur Souldan, & succelleur de son pere. Et quant il se vit maistre & seigneur, il osta aux Conneitable, Mareschaus, & Seneschaus de son pere les verges d'or, & offices qu'ils auoient, & les donna a ceux qu'il auoit amené avec lui d'Orient: de quoy ils furent grandement marris, & tous les autres aussi qui auoient esté du conseil de son Pere: & de cette heure ils lui porterent grand' haine, & doutoient qu'ils ne les voulsist faire mourir, comme son Pere a-

uoit fait mourir les autres, dont ie vous ai dessus parlé. A cette cause tous ensemble conspirerent contre lui, & delibérerent de le faire mourir, en quelque maniere que ce fust. Au moien dequoy, ils trouuerent moien de gagner les Cheualiers de la Halcqua, qui deuoient garder le Souldan; lesquels leur promirent qu'ils le mettroient a mort, aussi tost qu'ils en pourroient auoir l'occasion.

CHAP. XXXV.

Comme apres que les corps de ceus qui auoient esté occis es deus batailles precedentes, et iettés en la riuiera, quelque temps apres vindrent sur l'eau: & comme, sans pour cette occasion, comme pour autres, il aduint vne peste et maladie estrange a ceux du Roi: comme les Sarazins assamerent le camp du Roi: & comme le Roi repassa par deuers le Duc de Bourgoigne.

A Pres les deux batailles, dont ie vous ai deuant parlé, qui furent grandes & fortes a merueilles, il vint en nostre ost vn tresgrand meschef: car au bout de neuf ou dix iours apres, les corps de ceus qui auoient esté tués en la bataille, qu'on auoit iettés dans le fleuve, qui estoit entre les deus osts, se leuerent sur l'eau: & disoit on que c'estoit apres ce que le fiel estoit creué & pourri, & descendirent ces corps aual du fleuve, iusques au poncel, qui estoit sur ledit fleuve, par lequel nous passions de l'une part a l'autre: & pource
que

que l'eau qui estoit grande touchoit & joignoit a icellui pont, les corps ne pouuoient passer, & s'arrestoient là. & deués sçauoir qu'il en y auoit si grand nombre, que la riuere en estoit si couuerte, depuis l'une riue iusques a l'autre, que lon ne pouuoit pas voir l'eau. Et le Roi estant aduerti de ce ceci, fist prendre cent hommes de trauail, lesquels allerent audit poncel, pour separer les corps des Chrestiens, d'avec les Sarazins, que lon connoissoit assés. Et furent ces hommes huit iours sans faire autre chose: & faisoient passer les corps des Sarazins, a force dessous le pont, & les enuoioient aual la riuere, iusques a la mer: & les corps des Chrestiens, estoient mis dans de grans fosses, les vns sur les autres. Et Dieu sache quelle pitié c'estoit de voir les corps des grans personages, & de gens de bien qui y estoient. I'y vis le Chambellan de feu monseigneur le Comte d'Arthois, qui cherchoit le corps de son maistre entre les mors, & moult d'autres gros personages y vis ie qui cerchoient les corps de leurs amis. Et entendés que la puanteur estoit si tresgrande, qu'il n'estoit possible de l'endurer: en sorte que de tous ceus qui estoient là regardans & endurans l'infection & puanteur des corps, il n'en eschappa pas vn qu'ils ne mourussent tous. De tout ce Careme, nous ne mangeasmes autre poisson que des Burbotz,

qui est vn poisson qui se rend tousiours a vn corps mort, & en mange. Au moyen dequoi, tant pour auoir mangé desdits poissons, qui s'estoient nourris desdits corps morts, qu'aussi qu'il ne pleuuoit pas vne goutte d'eau la ou nous estions, il nous print vne griefue & meschante maladie: qui nous persecuta si fort, que la plus part de nos gens en moururent. Elle estoit telle, que ceus qui en estoient frappés, la chair de leurs iambes deuenoit seche iusques a l'os, & le cuir deuenoit tannellé de noir & de terre, tellement que vous eussies dit que leurs iambes estoient vieilles bottes, qui auoient esté cachees long temps derriere vn coffre. Et outre cela, il leur venoit en la bouche vn tres-grand mal, de ce qu'ils auoient mangé dudit poisson, en sorte que la chair se pourrissoit entre les gengiues, dont il sortoit vne puanteur si tres-grande, que lon ne se pouuoit approcher l'un de l'autre. Et n'en vi gueres eschapper de celle maladie, que tous ne mourussent. Et le signe de la mort estoit, que le nés se prenoit a saigner: & tantost on estoit bien assuré de mourir en brief. Et les Tures qui estoient bien aduertis de nostre maladie, a quinze iours de la affamerent nostre ost, en la maniere que ie vous dirai. Nos viandiers qui partoient de nostre ost, pour aller querir des viures, s'en alloient contre mont le fleue, droit a Damiette: mais
ces

ces paillars & infames Turcs les prenoyent subtilement, tellement qu'il n'en retournoit pas vn a nous, dont nous estions tous esbahis. Et aussi de ceus de Damiette, ils n'osoient venir a nous: car autant qu'il en venoit, ils estoient prins & tués des Turcs. Et iamaïs n'eussions sceu entendre celle perte de nos viuandiers, n'eust esté vne gallee du Comre de Flandres, qui eschappa des Turcs, & nous dit les nouuelles, & que les gallees du Soudan estoient sur l'eau, qui guettoient ceus qui alloient a Damiette, & qu'ils auoient desia gagné quatre vints de nos Gallees, & tué tous ceus qui estoient dedans. A cette cause il aduint en l'ost si tref-grand' cherté, que tantost que Pasques furent venues, vn beuf estoit vendu quatre vints liures: vn mouton trente liures: vn porceau autant: le muir de vin dix liures: & vn œuf douze deniers: & ainsi de toutes les autres choses.

Quant le Roi vit celle grande cherté, & que l'on n'y pouuoit mettre autre remede, il trouua par conseil, qu'il deuoit faire passer son ost deuers la terre de Babyloine, en l'ost du Duc de Bourgoigne. Et pour retraire ses gens plus aisement, il fit faire vne Barbecanne deuant le ponce, dont ie vous ai deuant parlé, & estoit faite en maniere qu'on pouuoit assés entrer dedans par les deus costés tout a cheual: & quant celle Barbecanne fut faite & ap-

prostece, tous les gens de l'ost s'armerent, & commençasmes a passer: mais les Turcs qui estoient aduertis de nostre partemēt, comme on entroit en la Barbecanne, vindrent frapper sur la queue de nostre armee, en sorte qu'ils prindrent messire Errat de Valleri, mais tantost fut rescous par messire Ian son frere. Le Roi ne voulut partir, iusques a ce que tous les harnois & armeures fussent passés outre, & alors passa le Roi, & nous apres lui: & messire Gautier de Chastillon demoura en la Barbecanne, pour faire l'arriere-garde. Et quand tout l'ost fut passé, & que il ne demouroit plus a passer que ceus qui estoient en l'arriere-garde, les Turcs les vindrent derechef assaillir, en sorte qu'ils les mirent en grand mal-aise: car les Turcs qui estoient a cheual, pource que la Barbecanne n'estoit pas haute, tiroient de visse a nos gens force traits, & ceus qui estoient a pied leur iettoient grosses pierres & dures mottes contre leurs faces, en sorte qu'ils ne se pouuoient defendre: & vous assure qu'ils eussent esté tous perdus & destruits, si n'eust esté le Comte de Anjou, qui les alla secourir, & les remena a sauueté.

CHAP. XXXVI.

Incident de la mort de feu Messire Hugues de Landricourt, & ce qui aduint a six Cheualiers

*liers : aussi de la maladie qu'auoit l'An-
sheur.*

IL aduint en ce temps là vne chose que
ie n'ay voulu obmettre, sans en faire
mention. Il mourut vn vaillant & hardi
Cheualier, qui auoit nom messire Hu-
gues de Landricourt, qui estoit avec moi
a Bauiere, & fut enterré en ma Chapelle:
& comme le corps estoit dans la Chap-
pelle, pour faire le seruice, & que lon di-
soit la messe, il y auoit six de mes Cheua-
liers, qui estoient appuyés sur des sacs
d'orge, lesquels parloient & rioient en-
semble hautement: en sorte qu'ils faiso-
ent grand ennui au Prestre qui chantoit
la messe: & alors ie me leuai, & leur allai
dire qu'ils se teussent, & que c'estoit cho-
se vilaine de parler & crier ainsi durant le
seruice: & ils me respondirent en riant
qu'ils parloient, ensemble de remarier la
femme d'icelui messire Hugues qui estoit
là mort: de quoi ie les reprins durement, &
que bien tost ils auoient oublié leur com-
pagnon: mais Dieu les punit de leur folie,
car peu apres ils se trouuerent entre les
Turcs, en maniere qu'ils furent tous six
mis a mort, & furent leurs corps gisans
aus champs, sans estre enterrés: & depuis
ai veu les femmes de chacun d'eus qui se
sont remarices. parquoi appert que tel se
moque d'autrui, qu'en fin il est moqué.

Quant au regard de moi, ie vous adui-
se que ie n'eus point mieus que les autres.

car soyés certains qu'outre les playes que j'auois prinſes le iour de Careſme prenant, ie fus malade de cette vilaine maladie, & mes iambes & bouche me deuindrent comme aus autres, & ſi auois vne fieure quarte double, (dont Dieu nous vueille garder) & me couché de cette maladie enuiron la mi-Careſme, ou ie fus longuement malade. Et vn iour que mon Preſtre, qui eſtoit auſſi malade chantoit meſſe deuant moi qui eſtois au lit couché, ie l'apperceus ſi tres-malade, que viſiblement ie le voyois paſſer: & quand ie vei qu'il ſe vouloit laiſſer choir par terre, ie me iettai hors de mon lit, tout malade, & l'allai embraffer par derriere, ſi lui donnai courage, en ſorte qu'il reuint a ſoy, & acheua ſa meſſe: mais tout incontinent il mourut.

CHAP. XXXVII.

D'aucun pourparlé de Paix entre le Roy & le Souldan, lequel n'eut effect. & de la grand' miſere de celle peſtilence qui continuoist de plus en plus dans l'oſt du Roy.

ENTre les conſeillers du Roi & du Souldan, fut fait aucun parlement pour entendre a la Paix: en ſorte qu'il fut assigné vn certain iour, auquel on ſe deuoit aſſembler, pour entendre les raiſons & offres, tant du Roi que du Souldan. Et le iour venu, il fut accordé ce que ſ'enſuit:

Quo

Que le Roy rendroit au Souldan la Cité de Damiette, & le Souldan deuoit rendre au Roy le Royaume de Hierusalem, & semblablement lui deuoit garder tous les malades qui estoient dedans Damiette, & aussi les chairs fallées qui y estoient. D'auantage lui rendroit tous les engins que le Roy auoit fait mettre en ladite ville, & seroit permis & loisible au Roy d'enuoyer querir toutes ces choses en ladite ville de Damiette. Et quand ce vint a donner ostages, pour l'assurance des choses dessusdites, le Roy vouloit bailler aux Turcs le Comte de Poitiers, ou le Comte d'Anjou, l'un des deus: mais le Souldan ne voulut point accorder cette offre, mais demandoit en ostage la personne du Roi. Et le bon Cheualier messire Geoffroi de Sergines, estant aduerti qu'on vouloit auoir le Roi, respondit qu'ils ne l'auroient pas, & qu'il aimoit beaucoup mieux que les Turcs les missent tous a mort, plustost qu'il leur fust reproché qu'ils eussent baillé leur Roi en gage. A cette cause demoura ainsi la chose, sans auoir aucune fin. Et ce temps pendant la maladie dont ie vous ai parlé, se renforçoit tousiours en l'ost, tellement qu'il falloit que les Barbiers arrachassent & coupassent la chair des malades qui surmontoit les gengiues, en maniere que lon ne pouuoit manger. C'estoit grand' pitié d'ouyr crier & braire par tout l'ost les pources malades, a qui on

estoit icelle chair superflue.

CHAP. XXXVIII.

L'appareil que le Roy fit pour retourner a Damiette, & de ce qui en aduint.

LE Roy S. Loys voyant celle grand' misere, il joignit les mains, la face leuee enuers le ciel, rendant graces a Dieu de tout ce qu'il lui enuoyoit. Et voyant bien qu'il ne pouuoit ainsi longuement demourer, sans qu'il ne mourust lui & toute sa gent, il ordonna de mouuoir de la, le Mardi au soir apres les octaues de Pasques, pour s'en retourner a Damiette, & fit commander aus Mariniers des gallees, qu'ils apprestassent tous leurs vaisseaus, & qu'ils recueillissent dedans tous les malades, pour les emmener. Et aussi commanda-il a vn nommé Iousselin de Couruant, & autres maistres d'œuvres & engins, qu'ils couppassent les cordes qui tenoient des ponts d'entre nous & les Sarazins: toutesfois ils n'en firent rien, dont grand mal en aduint. Et quand ie vis que chacun s'apprestoit pour s'en aller a Damiette, ie me retirai en mon vaisseau, moi & deus de mes Cheualiers, que i'auois encores de remanant seulement: & quand se vint sur le soir, qu'il commença a faire fort noir, ie commandai a mon Marinier, qu'il leuast son Ancre, & qu'il fist voile droit a Damiette: & il me dit qu'il n'ose-
roit

roit, pource qu'entre Damiette & nostre ost, estoient les grands Gallees du Souldan, qui nous prendroient & mettroient a mort. Les Mariniers du Roy auoient fait de grands feus, pour eschauffer les pources malades a la riue du fleue, ou ils estoient attendans les Gallees. Et ainsi que ie parlois a mes Mariniers pour partir, i'apperceu les Sarazins a la clarté du feu, qui entrerent en nostre ost, & tuoient les malades en la riue du fleue : & soudain que les Mariniers du Roy en furent aduertis, ils coupperent les cordes de leurs Gallees, & se mirent a descendre aual le fleue : en maniere que mon petit vaisseau estoit presque couuert, tellement que ie n'attendois sinon qu'il fust effondré, & mis au fons de l'eau. Voyant le Roy, qui auoit la maladie de l'ost, que nous le laissions, il commença a nous faire appeller : & nous faisoit tirer force garrots, pour nous faire demourer, iusques a ce qu'il nous donneroit congé de nager. Au commandement du Roy, toutes les Gallees s'arrestèrent : ou ie les laisserai, & vous conterai comme le Roy fut prins.

CHAP. XXXIX.

Comme le Roy fut prins des Sarazins.

VOus deués sçauoir que quant l'ost fut prest a mouuoir, le Roy laissa ses gens d'armes, & sa bataille, & se vint met-

tre, & messire Geoffroi de Sergines avec lui, en la bataille de messire Gautier de Chastillon, qui faisoit l'arrieregarde, & estoit monté le Roy sur vn petit courcier, vne housse de soye vestue. Et quand les Turcs virent que l'ost estoit desia parti, ils vindrent frapper sur l'arriere-garde, laquelle se deffendit tresbien, & le Roy qui faisoit merueilles de frapper, nonobstant sa maladie se mit si auant en la presse, que il fut abandonné de toute sa gent, & ne lui demoura (comme ie lui ai depuis ouy dire) de tous ses Cheualiers & gensd'armes, que le bon Cheualier messire Geoffroi de Sergines, lequel ne le delaisa iamais, mais deffendoit le Roy plus courageusement qu'un Lyon: & tant donnoit de coups sur ces Sarazins, que lon eust dit que sa force lui estoit doublee. Et toutes les fois que les Sarazins s'approchoient du Roy, messire Geoffroi de Sergines se mettoit deuant lui pour le couvrir, & recevoir les coups, & a tous les coups il les dechassoit de dessus le Roy, a grands coups d'espee: de sorte qu'il fit tant par sa prouesse qu'il l'emmena en despit des Sarazins, iusques a vne petite ville nommee Cazet, & là il fut descendu, & mis sur le giron d'une bourgeoise qui estoit de Paris: là cuida il mourir, & n'attendoit-on point de vie en lui, pour raison de sa maladie, & aussi de la peine qu'il auoit endurée: en fin le Roy fut prins en ladite ville:

mais

mais auant qu'il fust prisonnier, arriua de uers lui messire Phelippe de Montfort, lequel lui dit qu'il venoit de voir l'Admiral du Souldan, a qui il auoit d'autres fois parlé de la treue, & que si c'estoit son bon plaisir, encores derechef il lui en iroit parler. Le Roi le pria de le faire ainsi, & qu'il la vouloit faire & tenir, en la maniere que les Sarazins voudroient. Adonc partit messire Phelippe de Montfort, & s'en alla vers les Sarazins, lesquels auoient osté leurs touailles de leurs testtes, & bailla le sieur de Montfort son anneau, qu'il tira du doigt, a l'Admiral des Sarazins, en assurance de tenir les treues, cependant qu'on feroit l'appointement tel qu'ils l'auoient demandé autresfois, comme a esté touché ci dessus. Or aduint qu'apres ce fait, vn trahistre mauuais Huissier, nommé Marcel, commença a crier nos gens a haute voix, Seigneurs Cheualiers rendés vous tous, le Roy le vous mande par moi, & ne le faites point tuer. A ces mots furent tous effroyés, & cuiderent que le roi leur eust ainsi mandé. Au moyen dequoi chacun rendit aus Sarazins ses bastons & harnois. Et quand l'Admiral vit que les Sarazins emmenoient prisonniers les gens du Roi, il dit a messire Phelippe de Montfort, qu'il ne lui assureroit pas la treue, car il voyoit desia que tous les gens du Roi estoient prins des Sarazins. Quoi voyant messire Phelippe fut bien esbahis

car il ſçauoit bien, nonobſtant qu'il fuſt meſſager pour demander la trefue, que tantost il ſeroit auſſi prins, & ne ſçauoit a qui auoir recours. Or en Egypte y a vne tref-mauuaife couſtume, car quand entre les Princes de pardelà ſont enuoyés Ambaſſades, les vns aus autres, pour auoir trefues, & cependant ſi l'vn des Princes ſe meurt, le meſſager, s'il eſt trouué, & que la trefue ne ſoit point donnee, ſera prins priſonnier, tant d'un coſté que d'autre.

CHAP. XL.

Ici deſcri: l'Auſheur comme lui & les autres qui eſloyent ſur l'eau, & qui ſe penſoyent ſauuer a Damiette, furent prins des Sarazins: & comme ils furent traités par apres.

OR deués ſçauoir que nous qui eſtions en nos vaiſſeaux, cuidans eſchapper iuſques a Damiette, ne fuſmes pas plus abilles que ceux qui eſtoient demourés a terre: car nous fuſmes auſſi bien prins, comme vous verrés ci apres. Il eſt vrai que nous eſtans ſur l'eau, ſe leua vn terrible vent contre nous, qui venoit deuers Damiette, qui nous tollut le cours de l'eau, en façon que ne pouuions monter: & nous fut force retourner arriere vers les Sarazins. Et combien que le Roi euſt laiſſé grand nombre de Cheualiers pour garder les malades, car comme nous nous euidions retirer a eus, nous trouuaſ-

mes

mes qu'ils s'en estoient tous fuis. Et quand se vint vers le point du iour, nous arrivâmes au passage auquel estoient les Galees du Souldan, qui gardoient qu'aucuns viures ne fussent amenés a nostre Ost: quand ils nous eurent apperceus, ils menerent vn grand bruit, & commencerent a tirer a nous grand' foison de pilles avec feu Gregeois, tant qu'il ressembloit que les estoilles cheussent du ciel: & ainsi que mes Mariniers nous eurent remis au cours de l'eau, & que nous voulions tirer outre, nous trouuâmes ceus que le Roi auoit laissés a cheual pour garder les malades, qui s'en fuioient vers Damiette: & le vent se va releuer plus fort que deuant, en sorte qu'il nous ietta a costé, a l'une des rives du fleuve: & a l'autre riue y auoit si grand' quantité de vaisseaus de nos gés, que les Sazins auoient pris & gagnés, que nous n'osâmes en approcher; & aussi nous voyons bien qu'ils tuoient les gens qui estoient dedans, & ies iettoient en l'eau: & leur voyons tirer hors des nefes les coffres & harnois qu'ils auoient gagnés. Et pource que nous ne voulions aller vers eus, d'autant qu'ils nous menaçoient, ils nous iettoient force traits, comme i'ai dit: & lors ie me fis vestir mon haubert, & incontinent mes gens qui estoient au bout du vaisseau me vont crier: Sire, nostre Marinier (pource que les Turcs le menacent) nous veut mener a terre, ou nous serons

tantost tués & occis. Adonc ie me fis le-
uer, & prins mon espee toute nue, & di
aus Mariniers que ie les tuerois s'ils ti-
roient plus auant, pour me vouloir me-
ner a terre: & ils me respondirent qu'ils
ne me scauroient passer outre: & pource
que i'aduissasse lequel i'aimerois mieus:
ou qu'ils me menassent a la riuie, ou qu'ils
m'ancrassent en la riuier. & i'aime mieus,
fis-ie, estre ancré en la riuier: ce qui fut
fait, dôt bien m'en print, côme vous enten-
drés. Or ne tarda gueres que tantost voi-
ci venir vers nous quatre des Gallees du
Souldan, esquelles auoit bié dix mille hō-
mes, lors i'appelle mes Cheualiers, & leur
requis qu'ils me conseillassent de ce qui
estoit de faire, & si nous deuions aller rēdre
aus Gallees du Souldā qui venoient, ou a
ceus qui estoient a terre. & fut accordé de
tous, qu'il valoit mieux nous rēdre a ceus
des Gallees, pource qu'ils nous tiēdroient
ensemble, sans nous separer les vns des
autres. & me souuiēt d'un miē Clerc, qui
disoit tousiours, que nous ne nous deuions
point rendre: mais nous deuions tous fai-
re tuer pour aller en Paradis. ce que ne
voulusmes croire, car la peur de la mort
nous pressoit trop. Quand ie vi qu'il e-
stoit force de me rendre, ie prins vn petit
coffret que i'auoie, ou estoient mes ioyaus
& mes reliques, & ietté tout dedans le
fleue. Lors me dit l'un de mes Mariniers,
que si ie ne lui laissoye dire aus Sarazins
que

que i'estois cousin du Roi, qu'ils nous tueroient tous: ie lui respondis qu'il pouuoit dire ce qu'il vouldroit. Et adonc voicy arriuer a nous la premiere des quatre Gallces qui venoit de trauers, s'ancrant & ietterent leur ancre pres de nostre vaisfel, lors m'enuoya Dieu (& ainsi le croie) vn Sarazin qui estoit de la terre de l'Empereur, qui auoit seulement vnes brayes vestues d'une toille, & vint nouant iusques en mon vaisfel, & m'embrassant par les flans me dit: Sire, si vous ne me croyés vous estes mort, car il vous conuient (pour vous mettre a sauueté) sortir hors de vostre vaisfel, & vous ietter en l'eau, & les Sarazins ne vous verront mie, pource qu'ils s'attendent au pillage de vostre Gallee: & il me fit ietter vne corde de leur Gallee sur l'escr de mon vaisfel: & adonc ie failli en l'eau, & le Sarazin apres moi, dont besoing me fut, pour me soustenir & conduire en la Gallee: car i'estois si foible de maladie, que i'allois tout chancellant, en sorte que ie fusse allé au fons du fleuve.

Et ainsi ie fus tiré par le Sarazin, iusques dans leur gallee, en laquelle auoit bien encores quatre vingts hommes, outre ceus qui estoient entrés en mon vaisfel: & ce poure Sarazin me tenoit tousiours embrassé: & tantost ie fus porté par terre, & me coururent sus les autres, pour me vouloir couper la gorge, & bien at-

tendois de mourir : mon Sarazin ne me vouloit lascher, & leur crioit, le cousin du Roy, le cousin du Roy, & alors ie sentoie le cousteau emprés la gorge, & me tenoyent a genous a terre: mais Dieu par sa grace me deliura de ce grand peril, a l'aide de ce pource Sarazin: lequel me mena iusques au chasteau ou les Cheualiers Sarazins estoient : & quant ie fus arriué avec eus, ils m'osterent mon haubert : & de pirie qu'ils eurent de moi, ils me ietterent dessus vne menue couuerte d'escarlata, qui estoit fourree de menu ver, que Madame ma Mere m'auoit donnee: & vn autre d'eus m'apporta vne courroye blanche, dequoi ie me seignis par dessus ma couuerte: & vn autre Cheualier me baila vn chapperonnet, que ie mis sur ma teste. Et tantost ie commençai a trembler des dents, tant de la grand' peur que i'auois, qu'aussi pour raison de ma maladie: alors ie demandai a boire, & lon m'alla querir de l'eau en vn pot : & si tost que ie l'eus mise en ma bouche, elle me saillit par les narilles, & n'en peus oncques aualler goutte: car i'auois vne grosse apostume en ma bouche. & Dieu scait en quel piteus point i'estois. Et incontinent i'enuoyai querir de mes gens, & leur di que i'estois mort, & que mon apostume me causeroit en bref la mort : & quant mes gens me virent en tel estat, ils commencerent tous a pleurer, & a mener grand
ducil

dueil. Et le Sarazin qui m'auoit sauué, leur demanda pourquoi ils pleuroient: & ils lui firent entendre que i'estois presque mort, & que i'auois vne apostume en la gorge qui m'estrangeroit: & ce pource Sarazin va dire a l'un des Cheualiers qu'il me reconfortast, & qu'il me donneroit tantost quelque chose a boire, dont ie serois gueri dedans deus iours: & ainsi le fit-il, & fus gueri a l'aide de Dieu, & du breuuage.

CHAP. XLI.

Comme apres la prise de l'Autheur, l'Admiral des Galles du Souldan l'interrogea, & la responce qu'il fit audit Admiral: & comme les Sarazins traittoient les pources prisonniers qui estoient malades. & comme ledit Admiral mena l'Autheur au lieu ou le Roy S. Loys estoit prisonnier avec plusieurs autres.

TAntost apres que ie fus gueri, l'Admiral des Galles du Souldan m'en-uoya querir deuant lui, pour sçauoir si i'estois cousin du Roi, comme lon disoit: & ie lui respondis que non: & lui contai comme cela auoit esté fait par le conseil de mon Marinier: & l'Admiral me respondit que i'auois esté tresbien conseillé, car autrement on nous eust tous tués. D'auantage me demanda l'Admiral si i'auois aucune conoissance de l'Empereur Ferry d'Allemagne, & si i'estois point son pa-

rent : & ie lui respondi la verité, que j'en-
tendois que madame ma Mere estoit sa
cousine nee de Germain : & il me dit que
il m'en aimoit de tant mieus : & ainsi com-
me j'estois la deuant mangeant & beu-
uant, il me fit venir vn Bourgeois qui e-
stoit de Paris, lequel quand il me vit, me
va dire, ha Sire que faites vous, vous man-
gés de la chair le Vendredi ! & soudain ie
mis l'escuelle ou ie mangeois par terre : &
l'Admiral demanda pourquoi i'auois fait
cela : & on lui respondit, pource que c'e-
stoit le iour du Vendredi, auquel les Chre-
stiens ne mangent point de chair : & il res-
pondit que Dieu n'en seroit pas marri,
veu que ie n'y pensois pas.

Le Dimanche apres que ie fus pris l'Ad-
miral nous fit tous descēdre du Chasteau,
& nous fit remettre sur l'eau. Et quand ie
fus là, messire Ian mon Chappellain fut
tiré de la Soulte de la Gallee : mais incon-
tinent qu'il vit l'air, il se pasma, & les Sa-
razins le mirent du tout a mort deuant
moi, & le ietterent au fleuve : & a son
Clerc, les Sarazins lui ietterent vn mor-
tier sur la teste, & le mirent dans l'eau : &
ainsi firent ils des autres prisonniers : car
ainsi qu'ils les tiroient de la Soulte, s'ils e-
stoient trouués malades, ils estoient tués
& mis dans la Riuere : ainsi estoient trai-
tés les pources malades. Et en regardant
celle cruauté & tyrannie, ie leur fis dire
par mon Sarazin qu'ils faisoient grand
mal,

mal, & que c'estoit contre le commandement de Saladin le Payen, qui disoit que on ne deuoit tuer ne faire mourir homme, puis qu'on lui auoit donné a manger de son pain & de son sel: & ils me firent responce, que ce n'estoient pas gens de grand' valeur, & qu'ils ne pourroient rien plus faire, puis qu'ils estoient ainsi malades. Apres ces choses ils firent venir deuant moi tous mes Mariniers, & me disoient qu'ils estoient reniés. Je leur respondois, qu'ils ne le deuoient pas croire, & qu'ils auoient ce fait, de peur qu'on ne les tuaist, & qu'aussi tost qu'ils se trouueroient en lieu qui fust a leur aduantage, ils retourneroient a la Foy. Et a ce me respōdit l'Admiral, qu'il m'en croyoit bien, & que Saladin disoit, que iamais on ne vit d'un Chrestien bon Sarazin, n'aussi d'un Sarazin bon Chrestien. Tantost apres l'Admiral me fit monter sur vn Palfrey, & cheuanchasmes l'un ioignant l'autre, & me mena passer sur vn pont, & vinsmes arriuer au lieu ou estoit le Roy S. Loys prisonnier, & ses gens aussi. Et a l'entree d'un grand Pauillon, trouuasmes vn escriuain, qui escriuoit le nom des prisonniers de par le Souldan, & là fut mon nom escrit comme des autres. A l'entree dudit Pauillon, ce Sarazin qui m'auoit tousiours fuiui & accompagné me dit, Sire, ie ne vous puis suiure plus auant, & me pardonnés: ie vous recommande ce ieune

enfant qui est avec vous, & vous prie de le tenir tousiours par le poing, ou autrement ie sçai que les Sarazins le tueront. L'enfant auoit nom Barthelemi de Montfaucon, fils du seigneur de Montfaucon de Bar. Tantost que mon nom fut escrit, l'Admiral nous mena moi & le ieune fils dedans le Pauillon ou estoient les Barons de France, & plus de mille autres personnes avec eus: & quant les Barons me virent, ils commencerent tous a faire grand'ioye, car ils pensoient m'auoir du tout perdu.

CHAP. XLII.

Ici est traité bien au long de l'accord fait tant pour la deliurance du Roy comme des autres, qui estoient prisonniers avec lui: & les propos qui y furent tenus. ensemble d'autres choses bien pitoyables.

OR ainsi que nous estions ensemble, voici venir vn grand riche homme Sarazin, lequel nous vint prendre, & nous mena en vn autre Pauillon, de quoi nous eusmes grand ennui: & apres de nous auoit vne grand' court, qui estoit close de muraille de terre, en laquelle grand nombre de Cheualiers, & autres de nos gens estoient enfermés, & les Sarazins les faisoient tirer & mettre dehors l'vn apres l'autre: & puis leur demandoient s'ils vouloient renier leur foy, pour deuenir Sarazins: & ceus qui disoient qu'oui, estoient
mis

mis a part. & aus autres qui ne le vouloy-
ent faire, on leur couppoit incontinent la
reste. Et apres cela, ne tarda gueres que le
Souldan enuoya son conseil vers nous: le-
quel arriué, nous demanda a qui il deuoit
dire son message que le Souldan lui auoit
commandé: & nous accordasmes que ce
feroit au Comte Pierre de Bretagne. A-
lors vint vn Truchement qui parloit le
François & Sarazinois, lequel commen-
ça a dire en cette maniere: Seigneurs, le
Souldan nous enuoye par deuers vous,
pour sçauoir si vous voulés point estre
deliurés, & ce que vous voudriés faire, ou
lui donner pour vostre deliurance.

Et a cette demande respondit le Com-
te Pierre de Bretagne, que moult volon-
tiers voudrions estre hors de prison, &
auoir fait ou baillé au Souldan ce qu'il
seroit possible par raison: & lors le conseil
lui demanda si nous voudrions point
donner pour nostre deliurance aucuns
Chasteaus ou places, appartenans aus
Barons d'Outre-mer: & le Comte lui res-
pondit que nous ne le pourrions faire,
pource que lesdits Chasteaus & places es-
toient tenus de l'Empereur d'Allemai-
gne: & que iamais il ne consentiroit que
le Souldan tint rien sous lui. Derechef
demanda le Conseil, si nous voudrions
point rendre nuls des Chasteaus du Tem-
ple, ou de l'Hospital de Rhodes, pour no-
stre deliurance, & le Comte lui respondit

que ce ne se pouuoit faire: car ce seroit contre le serment accoustumé, qui est que quant on met les Chastellains & gardes desdits lieux, ils font serment a Dieu, que pour la deliurance de corps d'homme, ils ne rendront lesdits Chasteaus. Et quant le Conseil entendit cette responce, il nous dit, qu'il sembloit bien aduis que nous n'auions aucun desir ni enuie d'estre deliurés: & qu'ils nous enuoïroyent tantost les Maistres ioueurs d'espee, qui nous feroient comme aus autres, & ainsi s'en retournerent vers le Souldan. Tantost apres voïci venir vn grand vieil Sarazin, qui sembloit homme de grand' apparence, lequel amenoit quant & lui vne grand' compagnie de ieunes gens Sarazins, chacun ayant vne espee ceinte au costé. & ne faut pas demander si nous feusmes effrayés, quand nous vismes venir telle multitude de gens. Celui grand Sarazin nous fist demander par le truchement, s'il estoit vrai que nous creussions en vn seul Dieu, qui auoit esté né, crucifié, & mort pour nous, & au tiers iour apres sa mort ressuscité? & lors nous respondismes, que vrayement nous croyons fermement tout cela. Alors il respondit, que puis qu'il auoit tant souffert pour nous, que nous ne deuions point estre marris, ne nous desconforter, de souffrir telles persecutions pour l'amour de lui: veu que nous n'auions point enduré encores la mort pour lui,

lui, comme il auoit souffert pour nous: & que s'il auoit eu puissance de soi resusciter, que certainement il nous deliureroit de bref. Et adonc s'en alla ce Sarazin avec tous ses ieunes gens, sans nous faire autre chose, dont nous fusmes bien ioyeux: car nous pensions qu'ils fussent là venus pour nous couper les testes.

Après ces choses dessusdites, le conseil du Souldan reuint encores par deuers nous, & nous dit que le Roi auoit tant fait enuers le Souldan, qu'il auoit pourchassé nostre deliurance, & que nous lui enuoyassions quatre d'entre nous pour ouyr & entendre la maniere du traitté de nostre deliurâce. Au moyen dequoi nous lui enuoyasmes messire Ian de Valleri, Phelippe de Montfort, Baudouyn de Belun Seneschal de Chyppe, & Guyon de Belun son frere Connestable de Chyppe, qui estoit vn des beaux & mieux conditionnés Cheualiers qu'onques ie conusse, ne qui plus aimast les François. Tantost que ces quatre Cheualiers furent reuenus du Souldan, ils nous rapporterent la façon & maniere de nostre deliurance, comme vous entendrés ci après. Et deues sçauoir, que le Souldan enuoya pareillement par deuers le Roi son conseil, lequel lui fit telles & semblables demandes qu'il auoit faites a nous: mais le Roi lui respondit ne plus ne moins que nous auons fait par la bouche du Comte de Bretagne: & voyans les Sarazins que le Roy ne vou-

loit du tout obtemperer a leurs demandes, ils le menacerent de le mettre en Bernicles, qui est le plusgrief tourment qu'ils peuuent donner a vn homme. Et sont ces Bernicles deus grands tisons de bois qui s'entretiennent au bout: & quand ils y veulent mettre quelcun, ils le couchent sur le costé entre ces deus tisons, & lui font passer les iambes a trauers de grosses cheuilles, puis couchent la piece de bois qui est la dessus, & font assoir vn homme dessus les tisons, dót il aduient que tous les ossemens de celui qui est couchié sont desrompus: & puis pour lui faire pis, au bout de trois iours lui remettent les iambes qui sont grosses & enflees dedans celles Bernicles, & les rebrisent derechef, qui est vne chose moult cruelle a qui le peut entendre: & si les lient par la teste a gros nerfs de Beuf, de peur qu'ils ne se remuent la dedans. Toutesfois de toutes celles menaces, le bon Roy n'en fit aucun conte: mais leur dit, qu'il estoit leur prisonnier, & qu'ils pouuoient faire de lui comme bon leur sembleroit.

Quant les Sarazins virent qu'ils ne peurent vaincre le Roi par menaces: ils retournerent a lui, & lui demanderent combien il voudroit donner de finance au Souldan: en outre Damiette qu'il lui rendroit: & le Roi respondit que si le Souldan vouloit prendre pris & Rançon raisonnable, qu'il manderait a la Roine que elle

elle la payast pour la Rançon de ses gens. Et les Sarazins lui demanderent, pourquoy il le vouloit mander a la Roine: & il leur respondit que c'estoit bien raison qu'il le fist ainsi, & qu'elle estoit sa Dame & sa compagne. Et adonc le Conseil alla sçauoir au Souldan combien il demanderoit au Roi: & ne demurerent gueres qu'ils reuindrent vers le Roi, & lui dirent: que si la Roine vouloit bailler deus cens mille besans d'or, qui valioient lors cinq cens mille liures, qu'elle deliureroit le Roi en ce faisant. Et le Roi leur demanda par leur Serment, si la Roine leur payoit les cinq cens mille liures, si le Souldan consentiroit sa deliurance? & ils retournerent au Souldan, sçauoir s'il le vouloit ainsi promettre: & tantost rapporterent au Roi que le Souldan le vouloit tres bien, & lui en feirent le serment. Et si tost que les Sarazins lui eurent promis & iuré, le Roi iura pareillement qu'il payeroit pour la Rançon de ses gens, cinq cens mille liures, & pour la deliurance de son corps qu'il rendroit Damiette au Souldan: & qu'il n'estoit point tel qu'il se voufist redimer ni auoir la liberte de son corps pour aucune finance de deniers. Quant le Souldan entendit la bonne volonte du Roi, il dit: par ma loi franc & liberal est le François, qui n'a voulu barguigner, sur si grand' somme de deniers: mais a octroyé payer ce qu'on lui a de-

mandé. Or lui allés dire, fit le Souldan, que ie lui donne sur sa Rançon cent mille liures, & n'en payera que quatre cens mille.

CHAP. XLIII.

Comme le Roy & les autres prisonniers furent mis en des Gallees pour venir a Damiette: & comme en venant on les fit aborder en vne maison que le Souldan auoit fait tendre sur le fleuue, & la description de ladite maison.

A Donc le Souldan fit mettre en quatre Gallees tous les plus gros Seigneurs que le Roy eust, pour les mener a Damiette. Et en la Gallee ou ie fus mis estoient le Comte de Bretaigne, le Comte de Flandres, le Comte de Soissons, messire Imbert de Beauieu Connestable de France, & les deus bons Cheualiers messire Baudouin de Belun, & Guy son frere. Et ceus qui nous conduisoient en la Gallee nous firent aborder deuant vne grand' maison que le Souldan auoit fait tendre sur le fleuue, & estoit fait celui hebergement en cette maniere. Il y auoit vne belle tour faite de perches de Sapin, & toute close a l'entour d'vne toile taincte, & a l'entree de la porte y auoit vn grand Pauillon tendu, & la laissoient les Admiraus du Souldan leurs espees & bastons, quand ils vouloient aller parler au Souldan.

Après celui Pauillon y auoit vne autre
tref

tref-belle porte , par laquelle on entroit en vne grand' salle , qui estoit la salle ou mangeoit le Souldan.

Aupres de celle salle y auoit vne autre tour, faite comme la premiere, par laquelle on montoit en la chambre du Souldan.

Au meillieu d'icelle maison y auoit vn grand preau, auquel estoit vne tour, plus grande que toutes les autres. Et par celle haute tour, le Souldan montoit pour voir tout le pays d'enuiron. & d'auantage en icelui preau auoit vneallee, pour aller au fleuve : & au bout d'icelle , le Souldan auoit fait tendre vn Pauillon sur la riuie du fleuve, pour s'aller baigner : & estoit celui logis tout couuert par dessus le fust de beau treillis , & par dessus le treillis couuert de toiles d'Inde : afin que ceus qui estoient dehors ne peussent voir par dedans, & estoient toutes les tours, aussi couuertes de toile.

Et arriuasmes deuant celle Maison , le Ieudi deuant la feste de l'Ascension. Et là pres fut descendu le Roy en vn Pauillon, pour parler au Souldan : & pour accorder que le Samedi apres il lui rendroit Damiette.

CHAP. XLIIII.

La pitieuse mort du Souldan, par ses gens de la Halcqua, & ce a l'instance de ses Admirans.

ET ainsi comme l'on estoit sur le parlement pour aller a Damiette, l'Admiral qui auoit esté du temps du Pere du ieune Soudan, qui lors estoit, eut souuenance du tort qu'il lui auoit fait a son nouveau aduenement, & les autres Seigneurs aussi, de les auoir desapointés de leurs estats, ainsi qu'il vous a esté conté ci dessus. Au moien dequoi, ils s'assemblerent, & aduiserent que le temps estoit venu, qu'ils en deuoient prendre vengeance, attendu qu'ils l'auoient entre mains, hors de fortereffes: & que s'ils attendoient qu'il fust dans Damiette, qu'il les feroit tous mourir; parquoi se retirerent a ceus de la Halcqua, lesquels apres plusieurs promesses, promirent a ces Admiraus de tuer le Souldan, auant qu'aller a Damiette.

Or aduint que le Souldan auoit semós a disner ses Cheualiers de la Halcqua, & apres le disner que le Souldan se voulut retirer en sa Chambre, & qu'il eut dit Adieu a ses Admiraus, vn des Cheualiers de la Halcqua, qui portoit son espee apres lui, le ferit sur la main: en forte que il la lui fendit iusques empres le bras, entre les quatre doigts. Et adonc le Souldan se retourna vers ses Admiraus, qui auoient fait & conclud le cas, & leur dit: Seigneurs, ie me plains a vous de ceus de la Halcqua qui m'ont voulu tuer, comme vous pouués veoir a ma main! & ils lui resp

respondirent tous a vne vois, qu'il leur valoit beaucoup mieus qu'ils le tuassent, que nompas qu'il les fit mourir, ainsi que il le vouloit faire, si vne fois il estoit es forterefles de Damiette. Et sachs, que cauteleusement le firent les Admiraus, car ils feirent sonner les Trompettes & Mecaires du Soudan. Au moien dequoi tout l'ost des Sarazins s'assembla, pour sçauoir que le Soudan vouloit faire. Et les Admiraus leur dirent, que Damiette estoit prise, & que le Soudan si en alloit, & qu'il estoit desia parti: parquoi il leur commandoit que tous allassent apres lui en armes. Et tout incontinent les Sarazins s'armerent & s'en allerent picquans des esperons vers Damiette: dont nous fusmes a grand' malaise, car nous cuidiós de vrai que Damiette fut prise.

Et ce voiant le Soudan qui estoit encores ieune, & la malice qui auoit esté conspiree contre lui, il s'en fuit en sa haute Tour qu'il auoit pres de sa Chambre, dont i'ai deuant parlé: car ses gens mesmes de la Halcqua lui auoient ia abbattu tous ses Pauillons, & de fait ils enuironnerét celle Tour ou il s'en estoit fui: & deüés sçauoir qu'il y auoit avec le Souldan trois de ses docteurs qui auoient disné avec lui, lesquels lui escrierent qu'il descendist: & il leur dit que volontiers descendroit il: mais qu'ils l'assurassent de sa personne; & ils lui respondirent que s'il

ne vouloit descendre, qu'ils le feroient bien descendre par force, & maugré lui, & qu'il n'estoit pas encores a Damiette. Et tantost ils vont jeter le feu gregeois dedans celle Tour, & tout incontinent fut embrasée: & vous promets, que iamais ne vi si beau feu, ne plus soudain. Quant le Soudan vit que le feu le pressoit, il descendit par la voie du preau d'où i'ai deuant parlé, & s'en fuit vers le fleuve: mais en s'en fuyant l'un des Cheualiers de la Halcqua le ferit d'un grand glaiue parmi les costes; toutesfois ce nonobstant le Soudan se ietta a tout le glaiue dedans le fleuve. Et apres lui descendirent environ neuf ou dix Cheualiers qui le tuerent là dedans le fleuve, assés pres de nostre Gallee. Et quant il fut mort, l'un des Cheualiers qui auoit nom Faracatait le fendit, & lui tira le cœur du ventre: & lors il s'en vint au Roi sa main toute ensanglantée, & lui dit en cette maniere: que me donneras tu, quant i'ai occis ton ennemi, qui t'eust fait mourir s'il eust vescu? & a cette demande, ne lui respondit onques vn seul mot le Roi.

CHAP. XLV.

Comme apres la mort du Soudan, les Admirans traitterent les prisonniers: & comme les conuenances qui auoient esté faites avec le Soudan furent renouuclées avec les Admirans.

Quant

Quant ils eurent ce fait, ils entrèrent bien en nostre Gallee environ trente portans es mains leurs espees toutes nues, & au col leurs haches d'armes. & ie demandai alors a Monsieur Baudouin de Belun, qui entendoit bien Sarazinois, que c'estoit que ces gens disoient; & il me respondit, qu'ils disoient qu'ils nous venoient couper les testes: & tantost ie vi vne grosse troupe de nos gens qui la estoient, qui se confessoient a vn religieux de la Trinité, qui estoit au Comte de Flandres: mais quant a moi, ie n'auois que faire de confesseur, car ie vous promets qu'il ne me souuenoit d'aucun mal que i'eusse fait: en sorte que ie ne pensois qu'a recevoir le coup de la mort. Si m'agenouillai aupres d'un des Sarazins, lui tendant le col, & disant ces mots, & en faisant le signe de la Croix (Ainsi mourut sainte Agnes.) Aupres de moi tout a costé, s'agenouilla messire Gui de Belun Connestable de Chippre, & se confessa a moi, & ie lui donnai l'absolution, selon ma puissance: mais ie vous assure qu'onques il ne me souuient de chose qu'il m'eust ditte. Apres que les Sarazins nous eurent fait celle peur, ils nous mirent tous couchés le visage contre terre, dans la foulte de la Gallee; nous cuidions alors que les Sarazins ne nous osassent assaillir tous a vn coup; mais qu'ils nous auoient mis là dedans, pour nous auoir l'un apres

l'autre; & en tel meschief fusmes nous toute celle nuit. J'auois mes piés droit au visage du Comte de Bretagne, & il auoit les siens aussi pres de ma teste. Or aduint que le lendemain, nous fusmes tirés hors de celle soulte, & nous enuoierent dire les Admiraus, que nous leur allissions renouveler les conuenances, que nous auions faites au Souldan; & y allerent tous ceus qui peurent cheminer: mais le Comte de Bretagne, & le Connestable de Chippre, & moi, qui estiós griefuemét malades, demourasmes en la Gallee. Ceus qui allerét deuers les Admiraus, qui estoient le Comte de Flandres, & le Comte de Soissons, & plusieurs autres, confirmerent lesdites conuenances; & leur promirent les Admiraus, qu'aussi tost que nous aurions rendu Damiette, qu'ils deliureroient le Roi, & les autres gros personnages. Et leur dirent, que si le Souldan eust vescu, qu'il eust fait coupper la teste au Roi, & a tous les autres: & que desia, contre les conuenances qu'il auoit faites avec le Roi, il auoit fait emmener vers Babyloine plusieurs de nos grans Seigneurs.

CHAP. XLVI.

La forme & les conuenances faites avec lesdits Admiraus: ensemble les sermens faits, tant de la part desdits Admiraus, comme de celle du Roi. & a quoi il tint que le Roi ne fut esleu Soudan de Babyloine par les Admiraus.

Par

PAr cette conuenance, le Roi deuoit iurer qu'il bailleroit aus Sarazins deus cens mille liures, auant que partir du fleuve, & les autres deus cens mille, il leur bailleroit en Acre. Et pour seureté de paiement, ils retiendroient les malades qui estoient a Damiette, avec les arbalestes, armures, engins, & les chairs salées, iusques a ce que le roi les enuoieroit querir, & enuoieroit les deus cens mille liures. Et le serment que les Admiraus feirent au Roi fut tel: Qu'au cas qu'ils ne tiendroient leurs conuenances & promesses, qu'ils vouloient estre ainsi honnis & deshonorés, comme celui qui par son peché va en pelerinage a Mahomet, la teste toute nuë. Et celui qui laisse sa femme, & puis apres la reprent. Le tiers serment estoit, qu'ils fussent deshonorés & deshontés comme le Sarazin qui mange la chair de Pourceau. Et receut le Roi les sermés dessusdits, en la forme deuant dite, pource que maistre Nicole d'Acre, qui sçauoit leur façõ de faire, lui dit, que plus grans sermens ne pouuoient ils faire. Quant les Admiraus eurent iuré, & fait leurs sermens, ils firent escrire le serment tel qu'ils vouloient que le Roi fist, & le lui baillerent par escrit, par le conseil d'aucuns Chrestiens regiés qu'ils auoient, & estoit tel ledit serment: Que le Roi vouloit qu'au cas qu'il ne leur tiendrait promesse, qu'il fust separé de la compa-

gnie de Dieu, & de sa digne Mere, des douze Apostres, & de tous les autres Saints & Saintes de Paradis: & a celui serment s'accorda le Roi. L'autre estoit: que il fust reputé pariure, comme le Chrestien qui a renié Dieu & son baptesme, & sa loi, & qui en despit de Dieu crache sur la Croix, & l'escache avec les piés. Quant le Roi ouï celui serment, il dit que ia ne le feroit. Au moien de quoi les Admiraus estans aduertis de son refus enuoierent par deuers lui, ledit maistre Nicole d'Acce, pour lui dire qu'ils estoient tresmal contens de lui, & qu'ils auoient grand despit d'auoir iuré tout ce qu'il auoit voulu, & qu'a present il ne vouloit iurer ce qu'ils lui requeroient. Et lui dit ledit maistre Nicole, qu'il fust tout certain, que s'il ne iuroit ainsi qu'ils le vouloient, qu'ils lui feroient couper la teste, & a tous les gens. A quoi le Roi respondit, qu'ils en pouuoient faire a leur volonté, & qu'il aimoit trop mieus mourir bon Chrestien, que de viure avec le courroux de Dieu & de sa Mere. Vous deués scauoir qu'il y auoit avec le Roi vn vicil Patriarche de Hierusalem, de l'aage de quatre vingts ans ou enuiron, lequel d'autres fois auoit pourchassé l'assurance des Sarazins: enuers le Roi, & si estoit venu pour moienner la deliurance du Roi, enuers les Admiraus, & pource que le Soudan qui lui auoit donné saufconduit estoit

estoit mort, les Sarazins l'auoient retenu prisonnier, comme nous : car telle est leur coustume, ainsi qu'il vous a esté compté ci deuant. Voyans doncques les Admiraus que le Roi n'auoit aucune crainte de leur menace; l'un d'iceus va dire aus autres, que c'estoit le Patriarche qui conseilloit ainsi au Roi de ne faire point le serment; & leur disoit que s'ils le vouloient croire, qu'il feroit bien iurer le Roi: car il couperoit la teste au Patriarche, & la feroit voler au giron du Roi: mais les autres ne le voulurent de ce croire. toutesfois ils prindrent le bonhomme de Patriarche, & le lierent deuant le Roi en vn poteau, les mains derriere le dos, si estroitement que les mains lui enflerent en peu de temps, grosses comme la teste, tant que le sang lui sailloit par plusieurs lieux de ses mains: en sorte que du mal qu'il enduroit, il crioit au Roi; Ha sire, sire, iurés hardiment, car i'en prens le péché sur moi & sur mon ame, puis qu'ainsi est qu'aués desir & volonté d'accomplir vos promesses. ie ne sçai pas si en la fin le serment fut fait: mais quoi qu'il en soit les Admiraus se tindrent contens au dernier du serment que le Roi leur auoit fait, & des autres gros Seigneurs qui là estoient. Mais il vous faut entendre qu'apres que le Souldan fut occis, & que les Trompes & Macaires eurent sonné, comme ie vous ai dit, les Admiraus tindrent con-

feil, & furent en deliberation de faire le Roi Soudan de Babyloine: & comme i'ai depuis entendu, il tint seulement que les Admiraus disoient, que le Roi estoit le plus fier Chrestien qu'ils eussent iamais coneu; & ce disoient ils pource que quant il partoit de son logis, il prenoit tousiours sa Croix en terre, & seignoit tout son corps du signe de la Croix. Et disoient les Admiraus, que si leur Mahomet leur eust laissé souffrir autant de meschef, comme Dieu auoit laissé endurer au Roi, que iamais ils ne l'eussent adoré, ne creu en lui. Et disoient d'auantage, que si vn Sarazin en faisoit autant a Mahomet, que le Souldan l'occiroit, ou qu'ils deuiendroient du tout Chrestiens. Et me demanda vn iour le Roi, s'il deuoit prendre le Royaume de Babyloine, si les Admiraus le lui eussent offert? & ie lui di, qu'attendu qu'ils auoient occis leur Seigneur, qu'il ne le deuoit pas receuoir. Toutesfois il me respondit, qu'il ne l'eust pas refusé, & qu'il eust bien donné ordre au reste.

CHAP. XLVII.

Comme le Roi, avec les autres prisonniers estant arriué devant Damiette, fit deliurer la ville aux Sarazins: & ce qu'ils firent en ladite ville.

A Pres les conuenances accordees, & le serment fait par le Roi, il fut dit
quo

que le lendemain de l'Ascension, Damiette seroit renduë aus Admiraus, & que le corps du Roi & de nous seroient deliurés, & le iour mesmes qu'auoit esté dit, furent nos quatre Galees ancrees deuant le pont de Damiette, & y fit on tendre vn pavillon pour y descendre le Roi: & environ l'heure de Soleil leuant, messire Geoffroi de Sergines alla en la ville de Damiette, pour la faire rendre aus Admiraus, & furent tantost mises sur les murs les armes du Soudan, & entrerent les Cheualiers Sarazins dans la ville, & commencerent a boire des vins qu'ils y trouuerent: en sorte que plusieurs s'enyurerent tant que c'estoit grand merueilles; & entre les autres il en y eut vn qui vint en nostre Gallee, & tira son espee toute sanglante, en nous disant que d'icelle il auoit tué six de nos gens: ce que nous trouuasmes bien estrange & vilain. Et deués sçauoir que la Roine, auant que rendre Damiette, fut retirce en nos nefes, avec tous nos gens, fors que les pources malades, que les Sarazins deuoient garder & rendre au Roi, comme dessus a esté monstré: mais il en aduint tout autrement qu'on ne pensoit, car ces trahistres Sarazins, quand ils eurent la ville en leur puissance, ils tuerent cruellement tous les malades, decouperent les engins, & autres choses qu'ils deuoient rendre: & de tout firent vn grand lit, & y mirent le feu, qui fut si tresgrand,

qu'il dura trois iours entiers.

CHAP. XLVIII.

Comme apres que les Sarazins eurent en leur puissance Damiette, firent peu de conte de tenir leurs promesses au Roi. du differant qui fut entre les Admiraus, touchant la mort ou deliurance du Roi.

A Pres qu'ils eurent ainsi mis le feu, & brulé tout ce qu'ils nous deuoient rendre, nous pensions estre deliurés ce matin mesmes que nous estions arriués a Damiette, qui estoit le Vendredy : mais ces vilains infames Sarazins tindrent peu de conte de nous tenir promesse : en sorte que le Roi, & tous ses gens demourerent sans manger depuis le Soleil leuant, iusques au Soleil couchant : & furent les Admiraus en dispute les vns contre les autres, machinant nostre mort.

Et disoit l'un des Admiraus aux autres : Seigneurs si vous me voulés croire, & tous ces gens que voiés ici avec moi, nous tuerons le Roi, & tous ses grands personnages qui sont avec lui : & ne faut point craindre la vengeance d'icia XL. ans, pource que leurs enfans sont encores petits, & nous auons Damiette en nostre pouuoir : parquoi nous le pouuons faire seurement, sans aucun doute. Vn autre Sarazin qu'on appelloit Scebrecey, qui estoit natif de Mourentaigne, disoit au contraire, & remonstroit aux autres que
s'ils

s'ils tuoient le Roi, apres ce qu'ils auoient tué leur Souldan, on diroit que les Egyptiens seroient les plus mauuâis & iniques de tout le monde: mais a ce repliquoit celui Admiral qui nous vouloit faire mourir, & disoit par autres remonstrances palliees, que vraiment ils auoient grandement mespris d'auoir occis leur Seigneur le Souldan, & que c'estoit contre le commandement de Mahomet, par lequel il leur commandoit de garder leur serment, comme la prunelle de l'œil, & en monstroit ledit Admiral le dit commandement par escrit, en vn petit liuret qu'il tenoit en sa main: mais faisoit-il, Seigneurs, ie vous prie escoutés l'autre commandement de Mahomet: & en ce disant tournoit le feuillet du liure: il commande(disoit-il) qu'en l'asseurement de sa foy, on doit tuer l'ennemy de la Loy. Or regardés (& ce disoit-il pour reuenir a son entente) le forfait que nous auons commis d'auoir tué nostre Souldan, contre le commandement de Mahomet: & encores le grand mal que nous ferons, si nous laissons aller le Roi, & que ne le tuons, quelque assurance qu'il ait de nous? car c'est le plus grand ennemi de nostre Loy qui fut onques. Et tellement aduint par les remonstrances de ce maudit Admiral, que peu s'en faillit que nostre mort ne fust accordée: en maniere que cuidant du tout que les autres

Admiraus fullent de son aduis, & que lon nous deust faire mourir, il s'en vint sur la rive du fleuve, & ostant sa touaille de sa teste, commença a crier en Sarazinois, a ceus qui conduisoient nos gallees, qu'ils nous ramenassent vers Babyloine, & leur faisoit signe de sadite touaille d'ainſi le faire : & de fait nous fusmes desancrés, & menés arriere vers Babyloine, bien vne grand' lieue : & ie vous laisse a songer le grand dueil qui fut entre nous mené, & combien de larmes sortirent de nos yeus, nous voians ainſi estre traittés, & pensans en bref receuoir la mort : mais ainſi que Dieu n'oublie jamais ſes ſeruiteurs, auſſi il nous voulut regarder de l'œil de pitié : car quand ſe vint enuiron Soleil couchât, il fut accordé entre leſdits Admiraus, que nous ſerions deliurés, & nous ſit on reuenir vers Damiette, & furent nos quatre Gallees miſes au bort du fleuve : & alors nous requiſmes aus Sarazins qu'ils nous miſſent a terre, mais onques ils n'en voulurent rien faire, iuſques a ce qu'ils nous euſſent fait manger. Car ils diſoient que cela leur pourroit tourner a grand deshonneur, de nous enuoier de leurs priſons a iun ; & tantost nous firent venir de la viande pour manger, c'eſt aſſauoir de beugnets faits de frommage qui eſtoient roſtis au Soleil, afin que les vers n'y cuillissent, & des œufs durs cuits de quatre ou de cinq iours, & pour l'honneur de nos person

personnes, ils les auoient fait paindre par dehors de diuerfes couleurs.

CHAP. XLIX.

*De la deliurance du Roi & autres prisonniers;
& la forme qui y fut obseruee.*

A Pres que nous eusmes repeu de ces bonnes viandes, on nous mit a terre; & nous en allasmes deuers le Roi, que les Sarazins amenoient du Pauillon ou ils l'auoient tenu vers le fleuue, & y auoit bien vingt mille hommes Sarazins a pied apres le Roi, qui portoient leurs espees ceingtes. Quant le Roi fut arriué au fleuue, il se trouua vne Gallee de Geneuois deuant lui en laquelle on ne voioit rien qu'un fol, lequel voyant le Roi au droit de la Gallee, commença a siffler: & tantost voici sortir de la Soulté de leur Gallee biē quatre vingts arbalestiers, bien equipés, leurs arbalestes tendues, & le trait dessus; & si tost que les Sarazins les eurent apperceus, ils commencerent a fuir, comme brebis deuant le loup, & n'en demoura avec le Roi que deus ou trois. Les Geneuois ietterent vne planche a terre, & recueillirent le Roi, le Comte d'Anjou son frere, messire Geoffroi de Sergines, messire Philippe de Nemours, le Marechal de France, le maistre de la Trinité & moi, & demoura prisonnier le Comte de Poitiers, iusques a ce que le Roi eust payé les deus cens mille liures, qu'il auoit pro-

misés bailler auant que partir du fleuve.

Le lendemain de nostre deliurance, qui estoit le Samedi d'apres l'Ascension, vindrent prendre congé du Roi le Comte de Flandres, le Comte de Soissons, & plusieurs autres gros personages : ausquels le Roi pria qu'ils voussissent attendre iusques a ce que le Comte de Poitiers son frere seroit deliuré: mais ils lui firent response qu'il ne leur estoit pas possible, pource que leurs Galles estoient prestes a partir. Si s'en vindrent en France, & emmenerent quant & eus le Comte Pierre de Bretagne, qui estoit griesuement malade, dont il mourut sur Mer, trois semaines apres leur partement.

CHAP. L.

Des deniers que le Roi fit deliurer aus Sarazins, pour la rançon des prisonniers; & de sa loyauté au fait du payemēt de ladite rançon: & comme le Comte de Poitiers fut deliuré.

LE Roi qui n'auoit autre desir que de deliurer le Comte de Poitiers son frere, commanda a ses gens des finances de bailler les deus cens mille liures aus Sarazins; & le Samedi mesmes commencerent les Tresoriers a faire ledit payement, & dura iusques au lendemain au soir, qui estoit le Dimanche: & bailloit on les deniers au poix de la balance, & valoit chacune balance dix mille liures. Et quant ce vint le Dimenche au soir, les gens du Roi qui

qui faisoient le payement, lui vindrent dire qu'il leur falloit encores xxx. mille liures: & alors le Roi aduisa de qui il pourroit emprunter ladite somme de deniers, car pour l'heure il n'auoit en sa compagnie que le Comte d'Anjou, le Mareschal de France, le ministre de la Trinité, & moi: tous les autres estoient occupés a faire ledit paiement. Et alors ie vins au Roi, & lui di, qu'il deuoit emprunter les trente mille liures du Commandeur du Temple: mais le Commâdeur me reprint de ce conseil que ie donnois au Roi, & me dit: Sire, de Ionuille, le conseil qu'aués donné au Roi ne vaut rien, & n'est pas raisonnable: car vous sçaués bien que nous receuons les commandes a serment, & promettons de ne bailler les deniers d'icelles a autres qu'a ceus qui nous font faire les sermens. Et le mareschal du Temple, pour cuider contenter le Roi, lui disoit: Sire, laissés en paix les noises & questions du Seigneur de Ionuille, & de nostre Commandeur, car ainsi que dit nostre Commandeur, nous ne pouuons rien bailler des biens de nostre Commande sinon contre nostre serment, & que soions periures. Et sachés Sire (disoit-il) que le Seneschal de Champagné vous conseille tres-mal, de vous dire que si le Commâdeur ne vous en baille, que vous en deués prendre: vous en pouués faire a vostre plaisir; mais si vous le faites, nous

nous en desdommagerons bien sur le vostre qu'aués en Acre. Et quant i'eue entendu la menace, que le Mareschal faisoit au Roi, ie lui di, que i'en irois querir s'il le vouloit: & il me commanda ainsi le faire. Et tantost m'en allay a vne des Gallees du Temple, & vins a vn coffre, dont lon ne me vouloit bailler les clefs, & avec vne coignee que ie trouuai, ie voulu faire ouerture de par le Roi: & ce voyant le Mareschal du Temple, me fit bailler les clefs du coffre: lequel i'ouuri, & y prins d'argent assés, & l'apportai au Roi: lequel fut moult ioyeus de ma venue. Si fut fait & paracheué le paiement des deus. cens mille liures, pour la rançon du Comte de Poitiers. Et auant que paracheuer du tout ledit paiement, aucuns conseillèrent au Roi, qu'il ne deuoit pas rendre toute la somme aus Sarazins, que premier ils ne lui eussent deliuré la personne du Comte de Poitiers: mais il respôdit que puis qu'il l'auoit promis, il bailleroit toute la somme, auant que partir du fleue. Et sur ces paroles messire Phelippe de Montfort dit au Roi, qu'on auoit mesconté les Sarazins d'une balance, qui valoit dix mille liures: dont le Roi se courrouça asprement, & commanda a icelui de Montfort, sur la foy qu'il lui deuoit, & comme son homme de foy, qu'il fist payer lesdits dix mille liures aus Sarazins, s'elles n'estoient payees: & disoit le Roi, que ia il ne parti-
roit

roit du fleuve, iusques a ce qu'il eust payé tous les deus cens mille liures. Mais tous les grands Seigneurs, voians qu'il estoit toujours en danger des Sarazins, lui prièrent qu'il se voulist retirer en vne Gallee qui l'attendoit sur Mer, pour se tenir en seureté, & se sauuer des mains des Sarazins; mais a grand' difficulté leur voulut il accorder de ce faire: toutesfois finalement il se retira. Et au partir du fleuve disoit a ses gens, que quand a lui, il pensoit bien auoir acquité son serment, & qu'il n'entendoit point que les Sarazins fussent trompés desdites dix mille liures. Et adonc commençasmes a faire voile en plaine Mer, & allasmes bien vne lieuë de Mer, sans pouuoir dire rien l'vn a l'autre du grand dueil que nous auions d'auoir laissé prisonnier le Comte de Poitiers. Et apres nostre parlement, ne tarda gueres que voici venir messire Phelippe de Môtfort, qui estoit demouré pour faire le paiement desdites dix mille liures, lequel s'escria au Roi: Sire, Sire, attendés vostre frere, qui s'en va a vous en celle autre Gallee; & le Roi dit a ses gens qui là estoient: alume, alume, & tantost y eut grand' ioye entre nous tous, de la venuë du Comte de Poitiers. Si y eut vn pource Pescheur, qui alla dire a la Comtesse de Poitiers, qu'il auoit deliuré le Comte son mari, des mains des Sarazins: & elle lui fist donner vingt liures Parisis.

Adonc tous fismes voile , & nauigeafmes droit en Acre : mais auant qu'y arriuer, ie vous veus cōter aucuns cas dignes de memoire, qui aduindrent durant le temps que nous estions en Egypte.

CHAP. LI.

Incident de plusieurs choses qui aduindrent, tant en Egypte, comme en autre part, a plusieurs personnes, durant le temps que le Roy y estoit.

PRemierement ie vous veus conter de messire Gautier de Chastillon, le vaillant Cheualier, duquel me dit vn Cheualier digne de foy, qu'il l'auoit veu en vne Rue pres du Kasel, ou le Roi fut prins, tenant son espee au poing, & faisant tant de faits d'armes, qu'homme viuant sçauroit faire: en sorte que lui tout seul gardoit la Rue contre la puissance de tous les Sarazins. & quand il voyoit passer les Turcs par celle Rue, il leur couroit sus, si vigoureusement qu'a tous les coups il les chassoit deuant lui. Les Sarazins lui tiroient si grand' quantité de pilles, tant deuant que derriere, qu'il en estoit tout couuert: & me dit celui Cheualier, que quand messire Gautier auoit chassé deuant lui les Sarazins, il se deslichoit des pilles qu'il auoit sur lui, & s'armoit derechef: & ainsi fut il long temps combatant, sans auoir secours de personne. Et le vit plusieurs fois

fois qu'il s'esleuoit sur les estrieufs, criant a haute vois, ha Chastillon Cheualier, & ou sont maintenant mes preud'hommes? & que ne sont ils ici pour m'aider a vanger ma mort sur ces meschans Sarazins? mais onques ne se monstra homme pour le secourir. Et vn iour apres, comme i'estois avec l'Admiral des Gallees, ie m'enquis avec tous ses gens d'armes, s'il y auoit aucun qui m'en sceust dire aucunes nouuelles: mais oncq' ie n'en sceus scauoir autre chose pour l'heure, sinon qu'on croyoit bien qu'il fust mort. Vne autre fois ie trouuai vn Cheualier, qui auoit nom messire Ian Frumons, qui me dit, que quand on l'emmenoit prisonnier, il vit vn Turc qui estoit monté sur le Cheual de messire Gautier de Chastillon, & auoit le cheual la culiere toute sanglante, & qu'il lui demanda qu'estoit deuenue le Cheualier a qui estoit le Cheual: & le Turc lui respondit qu'il lui auoit couppé la gorge dessus son cheual, & que du sang le cheual estoit ainsi ensanglanté.

Il y auoit pareillement en nostre ost, vn mout vaillant homme, qui auoit nom messire Iaques du Chastel, Euesque de Soissons: lequel voyant que nous estions en chemin, pour nous en aller a Damiette, & que chacun auoit desir de retourner en France, il aimia mieus demourer avec Dieu, que s'en retourner au lieu dont il estoit né: & de fait, lui seul s'alla ietter par

mi les Turcs, comme s'il les eust voulu tous mettre a mort: mais tantost il fut tué par les Sarazins.

Vne autre chose ie vi, dont ie fus grandement esbahi, ainsi que le Roi attendoit sur le fleuve, le payement qu'il faisoit faire, pour auoir son frere le Comte de Poitiers, il vint vers lui vn Sarazin mout bien abillé, & fort bel homme a regarder, lequel presenta au roi du lart prins en pots, & des fleurs de diuerses manieres, qui estoient mout odorantes: & lui dit que c'estoient les enfans du Nazat du Souldan de Babyloine, qui auoit esté tué, qui lui faisoient ce present. Quand le Roi entendit celui Sarazin parler François, il lui demanda qui le lui auoit appris: & il respondit au Roy, qu'il estoit Chrestien renié. Et incontinent le Roi lui dit, qu'il se tirast a part, hors de deuant lui, & qu'il ne parleroit plus a lui. Lors ie le tirai a quartier: & lui demandai dont il estoit, & comment il auoit renié nostre Loy. Et il me respondit qu'il estoit né & natif de Prouins en Brie, & qu'il estoit venu en Egypte avec le feu Roi Ian, & depuis s'y estoit marié, & auoit acquis beaucoup de biens. Alors ie lui di, ne sçaués vous pas bien que si vous mourés en tel estat, que vous descendrés tout droit en Enfer, & serés damné à iamais? Il me dit, qu'oui certes, il le sçauoit bien, & si croyoit fermement qu'il n'estoit Loy meilleure que celle

celle des Chrestiens : mais fit-il, ie crains de m'en retourner en France, pource que il me conuiendroit viure pourement, & endurerois de grand's infamies & reproches, que lon me donneroit toute ma vie, en m'appellant renié. Pourtant (disoit-il) i'aime mieus viure a mon aise, & estre riche homme, que de deuenir en tel point. Et derechef ie lui remonstrei qu'il valloit trop mieus craindre la honte de Dieu, que celle du monde, qui est a present : attendu aussi que le iour du iugement, les pechés de chacun serôt manifestés a tout le monde : mais tout cela ne me seruit de rien : ains se partit de moi le Sarazin, sans qu'onques puis ie le visse.

Et combien que le Roy eust beaucoup d'infortunes & de persecutions, tant sur lui que sur ses gens, estant en ce pays d'Egypte, toutesfois la Roine son espouse n'en fut pas quitte, qu'elle n'en endurast plusieurs extremes, & si apres qu'elle endura beaucoup de peine, tant que nulle autre Dame eust sceu endurer. Et pour le vous donner a entendre, deués sçauoir qu'a l'heure que le Roi fut prins, la Roine estoit presse d'acoucher, en sorte que trois iours deuant qu'elle se deust acoucher, on lui vint apporter les nouuelles que le Roi estoit prisonnier : dequoi elle fit si grand dueil, & recut tant de tristesse en son cœur, qu'il seroit impossible de le pouoir expliquer : & tant eut de mal-aise la

bonne Dame, que sans cesser en son dormir, il lui sembloit aduis que toute sa chambre estoit pleine de Sarazins, qui estoient venus là pour l'occire, & sans fin elle s'escricioit a l'aide, a l'aide, là ou il n'y auoit ame. Et de peur que le fruit qu'elle auoit ne perist, elle faisoit veiller toute la nuit sans dormir, vn Cheualier, au bout de son lit, lequel estoit vieil & ancien, de l'aage de quatre vints ans & plus: & a chacune fois qu'elle s'escricioit, il la tenoit parmi les mains, & lui disoit, Madame n'ayés peur, ie suis avec vous. Et la bonne Dame auant que s'accoucher, fit vider de sa chambre tous ceus qui estoient dedans, & n'y demoura qu'icelui Cheualier tout seul, & alors que la Roine ne vit autre personne en sa chambre que lui, elle se vint a jeter a deus genous deuant lui, & lui requit vn don, lequel le Cheualier lui ottroya par son serment: & alors la Roine lui dit: Sire Cheualier, ie vous requiers sur la foy que m'aués donnee, que si les Sarazins prennent cette ville, que vous me coupiez la teste, auant qu'ils me puissent prendre: & le Cheualier lui respondit que tresvolontiers il le feroit, & que ia l'auoit-il en pensee d'ainsi le faire, si le cas aduenoit.

Le troisieme iour apres que le Roy fut prins, la Roine se deliura d'un fils, qui eut nom Ian, & en surnom, Tristan. La raison de son surnom fut, pource qu'il auoit esté
né

né en toute tristesse, & poureté. Et le propre iour mesmes qu'elle acoucha, on lui vint dire que tous ceus de Pise, de Genes, & toute la poure commune qui estoit en la ville, s'en vouloient fuyr, & laisser le Roi. La Roine les enuoya tous querir deuant elle, & leur dit en cette maniere: Seigneurs, ie vous supplie pour l'honneur de Dieu, de n'abandonner point la ville, comme i'ai entendu que voulés faire: car soyés certains, que si vous vous en allés, le Roi, & tous ceus qui sont prisonniers comme lui, seront perdus: mais si vous demourés ici, & voulés aider a defendre la ville, ie vous assure que les Sarazins pourront entendre plus aisement a la Paix, si on leur en presente les moyens. Et a tout le moins, disoit la bonne Dame, s'il ne vous prent pitié du Roi mon espous, ie vous prie ayés pitié de ceste poure chetifue Dame, qui ci gist, & vueillés attendre iusques à ce que ie soyē releuee. & en ce disant, les grosses larmes lui venoient aux yeux. Et ceux qui estoient là presens, lui respondirent qu'il n'estoit a eux possible de plus attendre, & qu'ils mourroient de faim en la ville, s'ils y estoient plus longuement. Et la Roine leur respondit, que ia ne mourroient ils de faim, s'ils vouloient demourer, & qu'elle feroit acheter tous les viures qu'on pourroit trouuer en la ville, & en feroit departir a chacun, & que deslors elle les rete-

noit tous aus despens du Roi:quoi oyant le Populaire, promirent a la Roine qu'ils ne bougeroient, pourueu qu'ils fussent ainsi nourris comme elle l'auoit dit. Et incontinent la Roine fit acheter toutes les viandes, qu'on peut finer dans la ville, & les faisoit departir a chacun selon son estat. Et deués sçauoir, qu'en peu de iours le nourrissement de ces gens lui cousta trois cens soixante mille liures & d'auantage: & si lui conuint se leuer auant son terme, pour aller attendre le Roi en Acre, pource qu'il falloit rendre Damiette aus Sarazins, comme il vous a esté dit. Voila en quelle peine & tristesse sont aucunes fois les grans Seigneurs & Dames, quant fortune leur tourne le visage, les mettant hors de leur auctorité & puissance.

Or deués sçauoir, que quant le Roi entra dans sa nef, il ne trouua ne lit, ne robes, n'aucuns autres biens: car ses gens n'en auoient sceu recouurer: & n'auoit le Roi nuls accoustremens que deus robbes, que le Souldā lui auoit fait bailler, quant il fut prins prisonnier, qui estoient de Samis noir, fourrees de vers & de gris, & y auoit grand' quantité de boutons d'or: & fut contraint le Roi de coucher six iours sur vn Matellas, sans aucuns draps, iusques a ce que nous fusmes en Acre. Cependant que nous estions sur Mer, le Roi me faisoit tousiours assieoir aupres de lui, pource que i'estois encores malade: & me
com

comptoit le Roi, la maniere comme il auoit esté prins des Sarazins, & comme il auoit moyenné sa rançon & la nostre, tout en la sorte que ie vous ai dit ci dessus. Et entre autres choses, se complaignoit fort le Roi de la mort du Comte d'Arthois, son frere. Pareillement se complaignoit grandement des Comtes de Poitiers & d'Anjou ses freres, de ce que ils ne lui tenoient autrement compagnie, attendu mesmement qu'ils estoient tous ensemble dans vn nauire. Et vn iour le Roi demanda que faisoit le Comte d'Anjou en sa chambre, & on lui respondit, qu'il iouoit aus tables avec messire Gautier de Nemours: & quant il eut ce entendu, il se leua, & alla tout chancellant (pour la grand' foiblesse de maladie qu'il auoit) iusques a eus: & quant il fut arriué, il print les tables & les dés, & les ietta en la Mer, & se controuça tresfort a son frere, de ce qu'il s'estoit prins si tost a iouer aus dés, & qu'il auoit desia mis en oubli la mort de son frere le Comte d'Artois, & n'auoit plus souuenance des gros dangers dont Dieu l'auoit deliuré. Et messire Gautier de Nemours en fut le mieus payé: car le Roi print tous ses deniers qu'il auoit sur la table, & les ietta apres les dés en la Mer.

CHAP. LII.

Comme le Roy avec sa compaignee arriva en

*Acre: & de plusieurs fortunes & miseres, qui
aduindrent a l'Autheur, lui estant audit
lieu d'Acre.*

QVant nous arriuasmes en Acre, ceux
de la cité vindrēt au deuant du roi,
pour le receuoir, iusques a la riue de la
Mer, avec les processions, a tresgrād' ioye.
Je voulus monter sur vn Palefroi, qu'on
m'auoit amené de la ville: mais aussi tost
que ie fus dessus, le cœur me faillit: en
sorte que ie fusse tombé par terre, n'eust
esté que celui qui m'auoit amené le Che-
ual, me tenoit bien serré, & a grand' peine
me peut on conduire iusques en la Salle
du Roi: & là demourai en vne fenestre
long temps, que personne ne tenoit com-
te de moi, & n'auois avec moi, de tous mes
gens que i'auois amenés en Egypte, que
vn ieune enfant de l'aage de dix ans, qui
auoit nom Barthelemi, & estoit fils ba-
stard de monsieur Ami de Montbelliar,
Seigneur de Montfaucon, duquel ie vous
ai parlé ci deuant. Et ainsi que i'estois là
attendant, il me vint vn ieune cōpagnon,
qui portoit vne cotte vermeille, a deus
royes iaunes, qui me salua, & me demāda
si ie le conoissois point: & ie lui respondi
que non: Alors il me va dire, qu'il estoit
natif du chasteau Descler, qui estoit a
mon Oncle: & me demanda si ie le vou-
lois retenir a mon seruice, & qu'il n'auoit
point de maistre: ce que ie lui accordai
tres-bien, & le retins mon vallet. Tantost
il

il m'alla querir des coiffes blanches, & me pigna moult bien. Apres cela, le Roy m'enuoya querir pour disner: & menai quant & moi mon nouveau vallet: lequel couppa deuant moi, & trouua maniere d'auoir viures pour lui & pour le ieune enfant: Apres le disner, celui nouveau vallet, qui s'appelloit Guillemmin, m'auoit pourchassé vn logis, tout aupres des bains: afin de me nettoier de l'ordure & salleté que i'auois gaignee en la prison: & quand se vint sur le soir, il me mit dans les bains: mais aussi tost que ie fus entré dedans, le cœur me pasma, & m'en allai a l'enuers en l'eau: en sorte qu'a grand' peine ne me peut on tirer vif, & m'apporter iusques en ma chambre. Et deués sçauoir, que ie n'auois aucun accoustrement, que vne pource iaquette, n'aucuns deniers pour en auoir, ne pour me gouuerner en ma maladie: qui me donnoit si grand' tristesse en mon ame, que i'estois plus tourmenté, de me voir en telle extreme indigence, que de me sentir si griefuement malade comme i'estois. Comme i'estois en telle perplexité, de bonne heure me vint voir vn Cheualier; qui auoit nom messire Pierre de Bourbrinne: lequel me voyant en si piteus estat, me reconforta a son pouuoir, & me fit deliurer des draps pour me vestir, par vn Marchant de la ville de Acre, & lui-mesmes respondit pour moi audit Marchant. Et quant se vint au bout

de trois iours, que ie fus vn peu guarri & renforcé, ie m'en allai deuers le Roi, lequel me blasma fort dont i'auois esté si long temps sans le voir: & m'enchargea sur tant que i'auois son amour cher, que ie demourasse a manger avec lui, soir & matin, iusques a tant qu'il eust aduisé si nous en irions en France, ou demourerions là.

Tandis que ie fus là avec le Roi, ie me complaignis a lui de messire Pierre de Courcenai, qui me deuoit quatre cens liures de mes gages, qu'il ne me vouloit payer: mais le Roi me fist deliurer incontinent ladite somme de quatre cens liures, dequoi ie fus bien ioyeux: car ie n'auois pas vn pource denier. Quant i'eue receu mon argent, messire Pierre de Bourbraine, que i'auoye retenu avec moi, me conseilla que ie n'en retinsse que quarante liures pour ma despense, & que ie baillasse en garde le demourant au Commandeur du Palais du Temple, ce que ie fi volontiers. Et quant i'eue despensé ces quarante liures que i'auoye retenues, i'en enuoyai querir autres quarante: mais le Commandeur du Temple me manda qu'il n'auoit aucuns deniers qui fussent a moi: & qui pis estoit, qu'il ne me conoissist point. Quand i'eue entendu cette response, ie m'en allai vers le maistre du Temple, qui auoit nom frere Regnaut de Bichiers auquel i'apportoys nouvelles du
Roi

Roi, & puis apres lui di mon infortune, & me plaignis a lui du Commandeur du Palais, qui ne me vouloit rendre mes deniers que ie lui auois baillés en garde: & aussi tost que i'eue dit la parole, il s'effroya asprement, & me dit: Sire de Ionuille, ie vous aime trop! mais si vous voulés maintenir tel langage, iamaïs ie ne vous voudrois plus aimer: car il sembleroit a vostre parler, & ainsi que maintenés, que nos religieux fussent Larrons. & ie lui respondi alors que ie ne tairois point la chose, & que c'estoit bien force que i'eusse mes deniers: car ie n'auois pas vn blanc pour viure: & sans autre response me departis ainsi de lui. Et vous assure que ie fus en grand fascherie de mon argent quatre iours durant, & ne sçauois a quel saint faire veu pour le recouurer. Durant ces quatre iours, ne fis autre chose qu'aller & reuenir, pour trouuer quelque moyen pour le r'auoir. Au bout de quatre iours, le maistre du Temple vint deuers moi en soufrian, & me dit, qu'il auoit trouué mes deniers, & de fait les me rendit, dont ie fus bien aise: car i'en auois grand besoing, & ne donnai plus la peine a ces religieux, de garder mon argent.

Après cette misere passée, ie ne fus pas encores du tout eschappé. car du grand desplaisir que i'auois eü de quoi lon me vouloit ainsi retenir mes deniers, ie cheus au lit malade, plus fort que iamaïs. I'estois

logé chés le curé d'Acre ou l'Euesque d'Acre m'auoit fait loger : & vous asseure que ie n'auois aucun homme avec moi pour me seruir, que Guillemain mon nouveau seruiteur : & aucunesfois quant il estoit absent, ie n'auois personne qui me reconfortast d'une seule fois a boire : & pour mieus me resiouir, tous les iours ie voyois apporter, par vne fenestre qui estoit en ma chambre, bien vingt corps morts a l'Eglise pour enterrer : & quant i'oyois chanter aux Prestres *Libera me*, ie me prenois a pleurer, a chaudes larmes, en criant a Dieu merci, & que son plaisir fust de me garder de telle pestilence qui regnoit. Je laisse a penser a ceux qui liront ceci, en quelle destresse & angoisse ie pouuois estre lors.

CHAP. LIII.

Le conseil que le Roy tint, sur ce qu'il denoit faire, ou retourner en France, ou contre les Sarraxins: & de la diuersité des opinions, qui fut en conseil: & du bon vouloir qu'il eut en cela.

Quelque temps apres, le Roi fit appeller ses freres, & les autres grans personnages qu'il auoit avec lui, a vn iour de Dimanche : & quant tous furent presens deuant lui, il leur dit : Seigneurs, ie vous ai enuoyé querir, pour vous dire des nouvelles de France. Il est vrai que madame ma Mere m'a mandé, que ie m'enuoi-

se a

se a la plus grand diligence qu'il me sera possible: & qu'autrement mon Royaume est en grand peril: car ie n'ai ne Paix, ne Trefues avec le Roi d'Angleterre, & il fait grand amas de gens, pour passer en France, cependant que ie suis ici. Et d'autre part, les gens de cette terre veulent que ie demeure ici, & cuident empeschier que ie ne m'en aille: car ils disent que si ie m'enuois que leur terre sera perdue & destruite: & que si ie m'enuois en France, qu'ils viendront tous apres moi. Pourtant ie vous prie que vous y veillés penser, & dedans huit iours me rendre response de ce que ie doi faire.

Le Dimâche apres ensuiuant, nous nous presentasmes tous deuant le Roi, pour lui rendre la response, & fut donnee la charge a messire Guyon Maluoisin, pour dire nostre aduis au Roi, touchant son allee ou demeuree. Lequel estant deuant le Roi, commença a lui dire en cette maniere: Sire, vos freres, & les autres personnaiges qui ici sont, ont regardé a vous conseiller ainsi què les aués requis, & ayant tout bien aduisé, ils ont trouué que vous deués partir de ces pays, le plustost que pourrés, pour vous en retourner en France: & que le long seiour vous pourroit estre grandement dommageable, en sorte que vostre honneur en amoindriroit, & le profit de vostre Royaume seroit en perte conuerti: car en premiet lieu, vous n'a-

ués ce qui vous est necessaire, pour faire la guerre pardeça aus Sarazins, & aussi que de tous les Cheualiers que vous amena-
stés en Chippre, qui estoient deus mille huit cens, il ne vous en eüst demouré a present qu'environ vn cent: & encores ceus la sont maladifs, & despourueus de gens & de deniers. Et d'autre part, vous n'aués nulle habitation en cette terre, ou vous vous puissiés retirer, ne vos gens aussi. Parquoi tout consideré, tous ensemble vous conseillons de vous en retourner en France, pourchasser gens d'armes & deniers, parquoi vous puissiés hastiue-
ment reuenir en ce pays, pour prendre vengeance des ennemis de Dieu & de sa Loy.

Quant le Roi eut entendu le conseil & la deliberation de ses gens, il n'en fut pas bien content: & en sorte qu'il demanda a chascun en particulier son opinion, & ce qu'il leur sembloit de cet affaire: & premierement demanda l'aduis du Comte d'Anjou, & du Comte de Poitiers, & apres des autres grans personnages: lesquels lui respondirent qu'ils estoient de l'opinion de messire Guy de Maluoisin. Apres le Roi demanda au Comte de Iaphé son opinion, lequel apres le commandement du Roi, dit que s'il pouuoit tenir maisons aus champs, que ce seroit son grand honneur de demourer, plus que de s'en retourner ainsi vaincu: & ce disoit

disoit le Comte de Iaphe, pource qu'il auoit des Chasteaus Oultre-mer. Et quant se vint a mon reng, qui estois le quatorziesme des assistans, respondi au Roi, que i'estois de l'opinion du Comte de Iaphe: & disois pour ma raison, que le bruit estoit, que le Roi n'auoit encores employé aucuns deniers de son Tresor: mais auoit seulement d'espendu l'argent des Clercs de ses finances. Et puis doncques, disois-je, que le Roi a encores tout son Tresor, il doit enuoier es païs de la Moree, & d'oultre-mer, pour auoir Cheualiers & gens d'armes a grand' puissance: & quant on oiroit dire qu'il donneroit largement de gages, il recouurerait incontinent gens de toutes pars: & par ce moien pourra le Roi deliurer tant de prisonniers qui ont esté prins a son seruice, lesquels iamais ne sortiront hors des prisons, si le Roi part de ce païs, sans y mettre autre ordre. Et sachés que de mon opinion ie ne fus pas repris: mais plusieurs qui estoient là presens, se prindrent chaudement a pleurer: car il n'i auoit gueres aucun, qui n'eust quelcun de ses parens ou amis prisonniers es prison des Sarazins. Apres que i'eue mon opinion ditte, messire Guillaume de Beaumont dit au Roi, que i'auois tresbien parlé, & qu'il s'accordoit a ce que i'auois dit. Apres ces choses, & que chacun eut dit au Roi son aduis particulierement, le Roi fut grandement troublé

en son esprit, pour la diuersité des opinions qu'il voioit en son conseil. Au moié dequoy, pour l'heure presente, il delibera de ne rien conclure : ains print terme d'autres huit iours, pour declarer son vouloit sur cet affaire, & ce qu'il en vouloit estre fait; & ainsi nous departismes de la presence du Roi. Mais il vous faut entendre, qu'aussi tost que nous fusmes hors du conseil, chacun des Seigneurs commença a m'assaillir, en me disant par despit & enuie: Ha, Sire de Ionuille, ie ne sçai combien le Roi aura de perte & dommage, s'il ne vous croit par dessus tout le conseil du Royaume de France! A quoi pour euiter noise, ie ne respondois rien: ains faisois semblant de n'en rien entendre. Et tantost que les nappes furent mises pour disner, le Roi se mit a table: & pource qu'il auoit tousiours de coustume de me faire assoir avec lui a sa table, si ses freres n'y estoient, & aussi qu'estant a table, plusieurs fois il me demandoit quelque chose, & mon aduis de beaucoup de propos qu'il auoit en mâgeant, ie fus tout esbahi qu'a cette fois il ne me dit mot, & ne tourna iamais sⁿ visage pour me regarder. Alors ie pensai en moi-mesmes qu'il deuoit estre mal content de moi, de ce que i'auois dit, qu'il n'auoit encores despendu ses deniers, & qu'il en deuoit despendre largement, pour retourner sur les Sarazins: & en cette pensee, ie demourai
tout

tout le long du dîner. Apres graces dites, ie me retirai a vne fenestre, qui estoit pres du cheuet du lit du Roi, & tenois mes bras passés parmi la grille d'icelle fenestre, & demourois là tout pensif & melancolique; disant en mon courage, que si le Roi s'en retournoit a ce coup en France, que ie m'en irois vers le Prince d'Autriche, duquel i'estois proche parent. Et comme i'estois en telle pensee, le Roi vint par derriere moi, & se vint appuyer sur mes espaules, me tenant la teste a ses deux mains: en sorte que ie ne pouuois la tourner ne d'un costé ne d'autre: & alors ie pensois que ce fut messire Phelippes de Nemours, qui m'auoit fait trop d'ennui celle iournee, pour le conseil que i'auois donné. Au moien de quoi ie commençai a dire: Laissez moi en paix messire Phelippes: & incontinent le Roi me passa sa main par deuant mon visage: & pource qu'il portoit vne esmeraude en son doigt, ie coneus bien que c'estoit sa main. A cette cause ie tournai soudain mon visage vers lui, & me voulus excuser, mais il me fit incontinent taire, & me dist en cette maniere: Venés ça Sire de Ionuille, comme aués vous esté si hardi de me conseiller sur tout le conseil des grans personnaiges de France, vous qui estes si ieune homme, & m'aués dit que ie ne doi encores partir de cette terre? Et alors ie lui respondi, que si i'auois donné tel conseil,

que ce n'estoit pas par aucune affection, mais qu'il me sembloit estre bien raisonnable. Toutesfois que mon conseil ne l'obligeoit, pas tant iusques là, qu'il fust tenu de l'ensuiure : & qu'il estoit en sa puissance de le croire, s'il le trouuoit bon, ou de le delaisser s'il le trouuoit mauuais. Et apres auoir ouïe ma responce, il me demanda de rechef, s'il demouroit, si ie voudrois point demourer avec lui : & ie lui respondis, qu'oui certes, & fust il a mes propres despens. Et lors il me dit qu'il me sçauoit tresbon gré de ce que ie lui auois conseillé sa demeure, & que tel estoit son vouloir : mais que ie me gardasse bien de le dire a personne : dequoi ie receus si tresgrád' ioie au cœur, qu'il seroit impossible de le croire : & toute celle semaine ie fis si bonne chere de celle parole, que le Roi m'auoit ditte, que nul mal ne me greuoit plus : & foies certains que ie commençai a me deffendre hardiment, contre les autres Seigneurs qui m'en assailloient. Or saches que lon appelle les Payfans de celle terre, Poullains, & a cette cause m'appelloit on par enuie, hors de ma presencé, Poullain : pource que i'auois conseillé au Roi de demourer avec les Poullains du país. Et messire Pierre Daualon mon cousin, estant aduertí qu'on m'appelloit ainsi, le me fit incontinent entendre : & me manda que ie m'en def fendisse contre tous ceus qui m'y appelle-
roient

roient, & que ie leur disse que j'aimois mieus estre Poullain Brusque, que Cheual recreu, comme ils estoient: ce que ie fis depuis.

Les huit iours passés, que le Roi auoit prins de respit, pour conclure de son retour, comme vous aués entendu, nous retrouvâmes tous deuers le Roi vn iour de Dimanche, & quant nous fûmes deuant lui, il commença a faire le signe de la Croix, disant que c'estoit l'enseignement de sa mere, qu'elle lui auoit donné, qu'en toutes choses qu'il voudroit dire ou faire, qu'il se seignist premierement, & qu'il inuokaist le nom de Dieu, & l'aide du saint Esprit. Apres nous commença a dire en cette maniere: Mes amis, ie suis marri dequoi ie vous voi en diuersité d'opinions, touchant l'affaire dont ie vous auois demandé conseil: & vous assure (& Dieu m'en soit tesmoing) que ie voudrois vous voir estre tous d'un mesme aduis: afin que plus aisement, au contentement de tous, j'eusse loisir de faire selon vostre deliberation & conseil: mais puis qu'ainsi est, j'ai deliberé de tenir de deus voyes l'une.

A cette cause ie remercie ceus qui m'ont conseillé de m'en retourner en France: & pareillement ceus qui m'ont donné par conseil que ie dois demourer en ce pais. & aiant bien visé tout ce qu'on peut en ceci considerer, ie trouue que

quant bien ie demourerai par deça , mon Royaume n'en sera pas en plus grand peril : car i'ai madame ma Mere, qui est par dela , laquelle par sa prudence & bonne conduitte, ensemble avec les gens de bien qui sont demourés quant & elle , pourra aisement pourvoir aus inconueniens qui y pourroient suruenir , & deffendre mondit Royaume , comme ie pourrois faire, si i'estois present.

D'auantage, ie regarde que i'aurai plus d'honneur de demourer en ce païs , que m'en retourner en France ainsi vaincu comme ie suis. D'autre part, ie veus auoir esgard au dire des Cheualiers de cette terre, lesquels m'ont donné entendre, que si ie m'en vois , le Royaume de Hierusalem sera perdu: d'autant qu'il n'y demourera personne apres que i'en serai parti. Or est il , que ie suis venu ici pour garder le Royaume de Hierusalem : lequel i'ai conquis, & nompas pour le perdre. A cete cause, i'ai resolu en moi de demourer encores en cette terre , sans m'en retourner en France. Pource(mes amis) ie vous prie que tous ceus qui s'en voudront retourner , qu'ils le dient hardiment , sans crainte : & aussi ceus qui voudront demourer avec moi : vous asseurant qu'a ceus qui voudront demourer, ie leur congratulerai si amplement, qu'ils en auront contentement : & n'espargnerai mes Tre-sors a recompenser les merites de ceus qui

qui auront fait leur deuoir, iusques qu'on ma coupe en quoi ie boi, ne s'era pas mienne, mais vostre. Ces paroles finies, plusieurs furent bien estonnés: car ils pensoient que le Roi s'en voulust retourner, & les autres se mirent a pleurer amplement. & en cette maniere nous declara le Roi son intention.

CHAP. LIIII.

Le preparatif que fit le Roi, pour remettre sus une nouuelle armee.

VN temps apres que le Roi eut arresté de demourer par dela, il donna congé a ses freres de s'en retourner en France; mais ie ne sçai si ce fut a leur requeste, ou de la propre volonté du Roi, & fut enuiron la feste de la saint Ian, qu'ils partirent pour s'en reuenir. Et ne tarda gueres apres leur partement, que le Roi voulut sçauoir comment ses gens (qui estoient demourés avec lui) auoient fait diligence de recouurer gens d'armes. Et le iour de la feste monsieur saint Iaques, apres que le Roi eut ouï Messe, il se retira en sa chambre, & fit appeler de ses principaus gens de conseil: c'est assauoir, messire Pierre Chambellain, qui estoit le plus loyal homme, & le plus droiturier que ie conneus oncques en la maison du Roi, messire Geoffroi de Sergines le bon Cheualier, messire Gilles le Brun le bon preud'homme, & les autres gens de son con-

seil, avec lesquels estoit le bon preud'homme, a qui le Roi auoit donné la Connestablie de France, apres la mort de messire Ymbert de Beauieu; ausquels le Roi demanda quels gens, & quel nombre ils auoient amassés, pour remettre son armee sus: & cōme s'il estoit courroucé leur disoit: Vous scaués bien qu'il y a vn mois, ou enuiron, que ie vous declarai que ma volonté estoit de demourer ici, & n'ai ouy encores nouuelles que vous ayés faite aucune assemblee de gens de guerre: & a ce lui respondit messire Pierre Chābellan pour tous les autres: Sire, si nous n'auons encores rien fait, touchant vostre gend'armerie, si n'en pouons nous mais, & la faute ne vient pas de nous: car soyés certain, que chacun se fait si cher, & veulent gaigner si grans gages, que nous n'oserions promettre de leur donner ce qu'ils demandent. Le Roi a l'heure leur demāda, a qui ils auoient parlé, pour scauoir qui estoient ceus là qui demandoient ainsi gros pris de gages: & tous ensemble lui respondirent, que c'estoit a moi qu'ils auoient parlé, & que ie ne me voulois pas cotanter, que ie n'eusse grosse somme de deniers: & disoit on toutes ces choses au Roi, moi estant en sa chambre, & les oiant tresbien: mais ie voiois bien qu'on faisoit tel rapport de moi, par haine qu'on auoit a moi, de quoi i'auois conseillé au Roi, qu'il deuoit demourer contre

tre l'opinion de son conseil. Lors le Roi me fit appeller: & moi estant venu deuant lui, me iettai a deus genous par terre: mais incontinent il me fit leuer & assoir, & puis me dit: Scneschal, vous sçaués biē combien ie vous ai tousiours aimé, & qu'elle confiance i'ai eue de vous en tous mes affaires, a occasion dequoy, ie pensois que vous eussies bon vouloir de me seruir affectueusement: mais toutesfois mes gens m'ont rapporté, que vous estes si dur, & difficile qu'ils ne vous peuuent contenter. dites moi donc (dit il) comment il en va? Sire, (respondi-ie) ie ne sçai comment vos gens vous font le raport de moi: mais ie vous assure, que si ie demande bons gages, que vous n'en deués point estre mal content de moi: car vous sçaués bien, Sire, que quand ie fus prins sur l'eau des Sarazins ie perdi tout ce que i'auois, & ne me demoura rien que le corps. Et pource, Sire, attendu que ie n'ai rien de mien, ie ne sçauerois entretenir mes gens, si vous ne me donnés gros gages, dequoy ie les puisse contenter. Alors le Roi me demanda combien ie voudrois auoir pour ma compagnie iusques au temps de Pasques, qui venoient prochainement, qui estoient les deus parties de l'annee: & ie lui demandai deus mille liures. Or me dites, dit le Roi, aués vous point encores trouué nuls cheualiers pour estre avec vous? Et ie lui respondi,

que i'auois fait demourer messire Pierre du Pont Moullain lui tiers a banriere: ausquels ie donne quatre cens liures: & alors conta le Roi par ses doigts, & me dit: Sont (fit il) douze cens liures, que vous cousteroient vos gens d'armes. Et ie lui di, Or regardés donc, Sire, s'il ne me faut pas bien huit cens liures, pour me monter de Cheuaus & harnois, & pour donner a manger a mes Cheualiers, iusques au temps de Pasques? A lors le Roi dit a ses gens, qu'il ne voioit point en moi aucune chose desraisonnable, & qu'il me faloit bien ce que i'auois demandé: parquoi (dit il) Seneschal ie vous retiens a moi.

CHAP. LV.

De l'ambassade de l'empereur Ferri d'Allemagne, qui alloit au Soudan de Babyloine: et des propos qu'ils eurent avec le Roi en Acre.

TAntost apres, & pendant que le Roi, donnoit ordre de remettre son armee sus, l'Empereur Ferry d'Alemagne enuoia son Ambassade deuers lui, avec lettres de creance, par lesquelles aussi il aduertissoit le Roi, comme il escriuoit au Soudan de Babyloine, lequel il pensoit encores en vie, qu'il ne voulsist faire faute de mettre le Roi en liberté, & tous ses gens aussi. Et dirent les Ambassadeurs qu'ils apportoint lettres de creance au Soudan, & que leur creance estoit telle comme dessus est dit. Mais soités certains, que

que le Roi ne ses gens n'eussent pas voulu que l'Ambassade fust arriué durant le temps que nous estions prisonniers : car on se doutoit bien que l'Empereur l'envoioit pour empescher nostre deliurance : & pour nous faire plus estroitement tenir : & quant les Ambassadeurs virent que le Roi estoit mis en liberté, ils s'en retournerent, sans passer plus outre.

CHAP. LVI.

Le Roi estant en Acre reçoit vn autre Ambassade du Soudan de Damas, et la responce que le Roi y fit : & des propos que le Religieux y enuoyé eut avec vne femme.

A Pres l'Ambassade de l'Empereur, vint pareillement au Roi, en Acre, l'Ambassade du Soudan de Damas, lequel se plaignoit au Roi par ses lettres, des Admiraus d'Egypte, lesquels auoient ainsi villainement tué le Soudan de Babyloine, qui estoit son cousin : parquoi lui promettoit, par ses lettres, que s'il le vouloit secourir contre lesdits Admiraus, qu'il lui deliureroit paisible le Royaume de Hierusalem qu'ils tenoient. Le Roi ayant entendu les Ambassadeurs, & l'offre du Soudan de Damas, les fit retirer en leur logis, leur disant qu'en brief il leur rendroit responce. Apres que les Ambassadeurs furent retirés, le Roi fit assembler son conseil, & mit en deliberation quelle responce il deuoit faire au Soudan de Damas : & finalement il fut resolu de tous, que le

Roi ne feroit point aucune response aus Ambassades: mais qu'il enuoyeroit de ses gens expressement avec eus, pour parler au Soudan, & lui dire la response du Roi. Et fut conclud qu'un Religieus qui estoit del'ordre des freres Prescheurs, nommé frere Yues le Breton, pource qu'il entendoit bien Sarazinois, feroit le message: & tantost fut enuoyé querir frere Yues: & ayant receu la charge du Roi, telle que son conseil auoit aduisé, s'en alla au logis des Ambassadeurs, leur dire que le Roi l'enuoioit avec eus deuers le Soudan de Damas, pour lui faire la response de ce qu'il demandoit au Roi. Et ne veus pas oublier a vous dire ce qui aduint audit frere Yues, en allant depuis le logis du Roi, iusques au logis des Ambassadeurs. Il trouua emmi la rue vne femme fort ancienne, laquelle portoit en sa dextre vne escuelle plaine de feu: & en la main senestre elle auoit vne fiole plaine d'eau, a laquelle frere Yues demanda: Femme, que veus-tu faire de ce feu que tu portes? Et elle lui respōdit, que du feu elle vouloit bruller Paradis: & de l'eau elle vouloit estaindre Enfer: afin que iamaïs plus ne fust de Paradis ne d'Enfer. Et frere Yues lui demanda pourquoi elle disoit telles paroles? & elle lui respondit, pource fist elle, que ie ne veus que nulli face iamaïs bien en ce monde, pour en auoir Paradis en guerdon: ni aussi que nul se gardé de
pech

pecher, pour la crainte du feu d'Enfer: mais que tous fâcions bien, pour l'entiere & parfaite amour, que nous deuons auoir a nostre createur Dieu, qui est le souuerain bien, & qui tant nous a aimés, qu'il s'est soufmis a la mort pour nostre redemption. Et quand frere Yues eut entendu la responce de cette femme, il passa outre, sans lui dire autre chose, tant il fut estonné de sa prudence. Et manda le Roi au Soudan de Damas par frere Yues, qu'il enuoieroit sçauoir aus Admiraus d'Egypte, s'ils lui releueroient & rendroient la trefue qu'ils lui auoient promise: laquelle ils lui auoient desia rompuë, comme dit est: & que s'ils en faisoient refus, que tresuolontiers le Roi lui aideroit, a venger la mort du Soudan de Babyloine, qu'ils auoient tué. encores le Roi seiournant en Acre, lui vint vne autre Ambassade du Prince des Beduyns, qui s'appelloit le Vieil de la Montagne: & vn iour apres que le Roi eut oui messe, il fit venir deuant lui ses Ambassadeurs, & les fit assoir pour dire leur message. Et alors commença a parler vn Admiral, qui estoit le chef de l'Ambassade, & demanda au Roi s'il connoissoit point leur Seigneur le Prince de la Montagne? Le Roi lui respondit que non. car il ne l'auoit iamais veu, mais bien auoit oui parler de lui. Et l'Admiral dit au Roi: Sire puis que vous aués oui parler de M^{seigneur}, ie m'esmerueille moult, que vous ne lui

aués enuoyé, tant du vostre que vous eussies fait de lui vostre ami : ainsi que font l'Empereur d'Alemagne, le Roi de Hongrie, le Soudan de Babyloine, & plusieurs autres Rois, & Princes qui lui enuoient tous les ans de beaux presens, pource que ils connoissoient bien que sans lui, ils ne pourroient durer, ne viure sinon tant que il lui plairoit. Et pource nous enuoie il par deuers vous, pour vous dire, & aduertir que le vueillés ainsi faire, comme les autres : ou a tout le moins, que le faciés tenir quitte de ce qu'il paye chacun an au grand maistre du Temple, & audit Hospital : & en ce faisant il se tiendra content de vous. Bien dit Monseigneur, que s'il faisoit tuer le maistre du Temple ou de l'Hospital (ce qu'il pourroit aisement faire) il n'y gagneroit rien : car il y en auroit incontinent vn autre en sa place : & pource ne veut-il pas mettre ses gens en peril, en vn lieu dont il ne pourroit tirer aucun profit. Le Roi ayant entendu parler cest Admiral, lui respondit, qu'il se conseilleroit sur ce qu'il lui auoit dit, & qu'il reuinist du soir par deuers lui, pour en auoir response.

Et quand se vint au vespre, qu'ils furent reuenus deuant le Roi, ils trouuerent avecques lui, le maistre du Temple d'une part, & le maistre de l'Hospital d'autre : & lors leur dit le Roi, que de rechef ils lui dissent, ce qu'ils lui auoient dit au matin.

Et

Et ils lui respondirent, qu'ils n'estoient pas conseillés de le dire encores vne autre fois, deuant ceus qui estoient presens au matin. Et adonc les maistres du Temple, & de l'Hospital leur commanderent qu'ils le dissent encores vne autre fois: & ainsi le fit l'Admiral, qui l'auoit dit le matin deuant le Roi, & le dit ainsi qu'il est contenu dessus. Et apres que l'Admiral eut mis fin a son parler, les Maistres leur dirent en Sarazinois, qu'ils vinssent au matin parler a eus, & qu'ils leur diroient la responce du Roi. Et au matin quād ils furent deuant eus, ils leur dirent que trop solement leur Seigneur, auoit mandé telles paroles au roi de France, & que si n'estoit pour l'honneur du Roi, & qu'ils estoient venus deuers lui comme Messagers, qu'ils les feroient tous ietter, & noyer dedans la Mer d'Acre, en despit de leur Seigneur. Et vous commandons (firent les deus Maistres) que vous vous en retournés deuers vostre Seigneur, & que dedans xv. iours, vous apportés au Roi lettres de vostre Prince, par lesquelles il contente, & appaise le roi tant qu'il soit satisfait de lui & de vous.

Auant que les quinze iours fussent passés, iceus mesmes messagers ne faillirent pas a reuenir deuers le Roi, & lui dirent: Sire, nous sommes reuenus a vous de par nostre Seigneur, lequel vous mande, que tout ainsi que la chemise est abillement le plus pres du corps, aussi vous enuoye-il sa

chemise, que voici, dont il vous fait present, en signifiant que vous estes celui Roi seul, lequel il aime plus, & desire a vous voir. Et pour plus grand' assurance de ce, voici son anneau qu'il vous enuoye, qui est de fin or pur, & auquel est son nom escrit: & de cet anneau vous espouse nostre Seigneur. & entend que desormais vous, & lui soyés tout vn, comme les doigts de la main: & entre autres choses enuoya icelui Prince de la Montagne, vn Olifant de Crystal au Roi, & plusieurs, & diuerses figures d'hommes, faites aussi de Crystal, Tables, & Eschets de Crystal, le tout fait a belles fleurettes d'Ambre, liees sur le Crystal, a belles vignettes de fin or. Et sâchés, que si tost que les Messagers eurent ouuert l'estui, ou estoient ces choses, toute la Chambre fut incontinent embasmee, de la grand' & souefue odeur, qu'elles rendoient.

Le Roi qui vouloit guerdonner le present que lui auoit fait, & enuoyé le Vieil Prince de la Montagne: lui enuoya par ses messagers, & par frere Yues le Breton, qui entendoit Sarazinois, grand' quantité de vestemens d'Escarlata, Couppez d'or, & autres vaisseaus d'argent. Et quand frere Yues fut deuers le Prince des Beduyns il parla a lui, & s'enquit de sa Loy: mais ainfi qu'il rapporta au Roi, il trouua qu'il ne croyoit pas en Mahomet, & qu'il croyoit en la Loy d'Hely, qu'il disoit estre
oncle

oncle de Mahomet. Et disoit que celui Hely, mit Mahomet en l'honneur, en lequel il fut en ce monde: & que quant Mahomet eut bien acquis la Seigneurie, & preeminence du peuple, il se despit, & s'esloigna d'avec Hely son oncle. Et quand Hely vit la mauuaise de Mahomet, & qu'il commençoit fort a le suppediter, il tira a soi du peuple ce qu'il en peut auoir, & le mena habiter a part es deserts, & montagnes d'Egypte: & la leur commença a faire, & bailler vne autre Loy, que celle de Mahomet n'estoit, & ceus-la qui de present tiennent la Loy d'Hely, disent entr'eus, que ceus qui tiennent la Loy de Mahomet, sont mescreans: & semblablement au contraire, disent ceus de Mahomet, que les Beduyns qui tiennent la Loy d'Hely, sont mescreans: & certes chacun d'eux dit vrai, car ils sont tous mescreans, & infideles.

L'vn des points, & commandemens de la Loy d'Hely, est tel: que quand aucun homme se fait tuer, pour faire & accomplir le commandement de son Seigneur, l'ame d'icelui qui ainsi est mort, va en vn autre corps, qui est plus aise, plus beau, & plus fort que le premier. Au moyen de quoi, ne tiennent conte les Beduyns de se faire tuer, pour l'amour de leur Seigneur, croyans que leur ame retourne en vn autre corps, ou elle est plus a son aise que deuant.

L'autre point de leur Loy, si est que nul homme ne peut mourir, iusqu'au iour qui lui est determiné, & ainsi le croient les Beduyns : & au moyen de ce, ils ne se veulent point armer quand ils vont a la guerre : & s'ils le faisoient autrement, ce feroit contreuenir a leur Loy, & a leur Foy : & quand ils maudissent leurs enfans, ils leur disent : Maudit sois tu, comme l'enfant qui s'arme de peur de la mort ; car ils tiennent cela a grand' honte. Et deués sçauoir que frere Yues le Breton, raconta au Roy, que lui estant deuers le Prince de la Montagne, trouua au cheuet de son lit vn liuret, auquel y auoit en escrit plusieurs belles paroles, que nostre Seigneur auoit d'autresfois dites a monsieur Saint Pierre, auant sa passion : & quand frere Yues les eut leuës, il dit au Prince des Beduins, ha Sire, que vous feries mout bien, si vous lisies souuent ce petit liure : car il y a de trèsbonnes paroles escrites. Et le Vieil de la Montagne lui dit, que si faisoit, & qu'il auoit mout grand' fiance en monsieur S. Pierre. Et disoit qu'au commencement du mode, l'ame d'Abel quand son frere Caim l'eut tué, entra depuis au corps de Noe : & que l'ame de Noe, apres qu'il fut mort reuint au corps d'Abraham : & depuis l'ame d'Abraham estoit venue au corps de monsieur Saint Pierre : laquelle est encores avec le corps en terre. Et quand frere Yues l'eut ouy ainsi parler, il lui remontra
que

que sa creance ne valoit rien : & lui com-
mança a prescher la Loy Euangelique :
mais onques n'y voulut entendre. Et di-
soit frere Yues, ainsi que ie lui ai ouy
conter au Roi, que quand celui Prince des
Beduins cheuauchoit aus châps, il auoit
tousiours vn hōme deuant lui, qui portoit
sa hache d'armes : laquelle auoit le mêche
couuert d'argēt, & y auoit au mêche, tout
plain de cousteaus tranchans : & crioit a
haute voix, celui qui portoit celle hache,
en son langage : Tournés vous arriere,
fuyés vous de deuant celui qui porté la
mort des Rois entre ses mains.

CHAP. LVIII.

*Comme mesire Ian de Valencienne alla en E-
gypte, vers les Admiraus, & de ce qu'il y fit.
& comme le Roy fit refaire les murailles de
la ville de Cefaree.*

A Pres ces choses, le Roi enuoya mes-
sire Ian de Valencienne en Egypte,
deuers les Admiraus, leur requerir qu'ils
voussissent satisfaire, & contenter le Roi,
des outrages, & violences qu'ils lui auoy-
ent faites depuis la trefue : ce que les Ad-
miraus promirent faire : mais que le Roi
se voulsist allier a eus, & leur aider a l'en-
contre du Souldan de Damas. & pour a-
mollir le cœur du Roi, ils deliurerent de
leurs prisons tous les Cheualiers qu'ils re-
noient prisonniers, & les enuoyerent au

Roi: & semblablement lui enuoyerent les os du Comte Gautier de Brienne: & en amena messire Ian de Valenciennes, deus cens Cheualiers avec lui, qui estoient prisonniers, & grand' quantité de menu peuple, qui estoit es prisons des Sarazins. Et quand il fut reuenu en Acre, Madame de * Secte, qui estoit cousine germaine du dit messire Gautier de Brienne, print ses os, & les fit enseuelir en l'Eglise de l'hospital d'Acre, bien & honorablement, & fut le Seruice beau a merueilles, en sorte que chacun Cheualier offroit vn cierge, & vn denier d'argent: & le Roi mesmes offroit vn cierge avec vn besant: & tout fut fait des deniers de ladite Dame de Secte, dont chacun s'esmerueilloit: car iamais on n'auoit veu offrir le Roi, que de ses deniers, & de sa monnoye: mais a cette fois, il le voulut faire d'autre monnoye, par vne grand' courtoisie.

Entre les Cheualiers que messire Ian de Valenciennes amena avec lui d'Egypte, i'en conu bien quarante, qui estoient de la cour de Champagne: & pource que ils estoient tous deschirés, & mal attournés, ie les fis abiller & vestir de mes propres deniers: de cote, & surquots de vert, & les menai tous deuant le Roi, lui prier qu'il les voulist tous retenir a son seruice: & quand le Roi eut ouye ma requeste, il ne me dit mot quelconque: mais se teut: & alors, il y eut vn des gens du conseil du Roi

* ou, peut
estre Saye-
cte.

Roi, qui estoit là present, qui me dit que ie faisois mal, d'apporter au Roi telles nouuelles, attendu qu'en son estat y auoit excés de plus de sept mille liures: & ie lui respondi, que la malle aduenture lui en faisoit bien parler, & qu'entre nous de Champagne, auions bien perdu au seruice du Roi, trente & cinq Cheualiers tous portans banierre de la Court de Champagne: & di hautement, que le Roi ne feroit pas bien, s'il ne les retenoit, veu le besoin qu'il auoit de Cheualiers: & ce disant, commençai a pleurer tendrement. Lors le Roi m'appaisa & m'ottroya ce que ie lui auois demandé, & retint tous ces Cheualiers, & les me mit en ma bataille:

Quant le Roi eut ouy parler les Messagers des Admiraus d'Egypte, qui estoient venus avec messire Ian de Valenciennne, & qu'ils s'en voulurent retourner: il leur fit response, qu'il ne feroit nulle trefue a eus, que premier ils ne lui rendissent toutes les testes des Chrestiens morts, qui pendoient sur les murs du Quahere: des le temps que les Comtes de Bar, & de Montfort furent prins: & qu'ils lui enuoyassent aussi tous les enfans, qui auoient esté prins petits, qu'ils auoient fait renier, & croire a leur Loy: & en outre qu'ils le tinssent quitte des deus cens mille liures, qu'il leur deuoit encores: & renuoya le Roi avec eus messire Ian de Valenciennne: pour la grand' sagesse, & vaillance qui

estoit en lui, pour annoncer sa responce aux Admirans.

Ne tarda gueres apres que le Roi se partit d'Acre, avec tout ce qu'il auoit peu recouurer de gens, & s'en alla a Cesarée, qui estoit a douze lieues d'Acre, tirant vers Hierusalem: & pource que les Sarazins auoient rompues, & abbatues les murailles: le Roi les fit refaire a grand' diligence, & la fit bien fortifier: en sorte que tout le monde s'esmeruilloit, comme en si peu de temps, le Roi auoit peu si bien clorre la ville de murailles: & durant tout le temps que nous y fusmes, personne ne nous dit mot, combien que nous estions bien petit nombre de gens.

CHAP. LIX.

Comme deus freres Prescheurs, que le Roy S. Loys auoit enuoyés au grand Roy de Tartarie, retournerent par deuers le Roy, et lui raconterent les grans merueilles qu'ils auoient veues par delà. de la premiere habitation des Tartarins, & de leur seruitute & tributs. de leur premier Roy, & de ses ordonnances: ensemble de leurs batailles & victoires.

VOUS aués entendu deuant, comme les Ambassadeurs du grand Roi de Tartarie estoient venus deuers le Roi, durant le temps que nous estions en Chypre: & que le Roi auoit enuoyé quant & eus, deus notables freres Prescheurs, pour prescher

prescher l'Euangile aux Tartarins. Or de-
ués doncques sçauoir, que durant ce tēps
que nous estions a Cefaree, ces freres
Prescheurs retournerent de Tartarie, &
conterent au Roi, que premierement ils
vindrent descendre au port d'Antioche,
& là se mirent par terre, pour aller là ou
estoit le Roi des Tartarins: & mirent bien
vn an entier a faire le chemin: & si faiso-
ient dix lieues par iour, & toute la terre
par ou ils passerent, estoit en l'obeissance
du Roi de Tartarie: & disoient que par
toutes les villes, là ou ils furent, qu'ils vi-
rent de grands monceaux d'ossements de
gens morts, si grands que l'on eust dit, que
c'estoient montagnes: en sorte que c'estoit
chose merueilleuse a voir: & leur dit-on
que c'estoient les ossements des gens qui
estoit morts, ou qu'ils auoient tués en
guerre, a la conqueste qu'ils auoient faite
du pays de Tartarie. Et alors les freres
Prescheurs s'enquirent, comment ils a-
uoient peu vaincre tant de gens, & ga-
gner tant de pays comme ils tenoient: &
les Tartarins leur respondirent, la manie-
re comment: & commençans a leur origi-
ne & naissance, leur dirent en cette façon:
Que vers la fin monde, il y auoit vne Ro-
che, qui estoit si grande, & haute a mer-
ueilles, tellement que iamais homme vi-
uant n'y sceut passer: & entre celle Ro-
che, & autres Roches, qui sont encores
par delà vers l'Orient sont enclos & ser-

rés les peuples des Gots, & Magots, qui deuoient venir en la fin du monde, avec l'Antechrist:& apres icelle grand'Roche, auoit vne grand' berrie de Sablon, la ou il ne croissoit nul bien:& en celle berrie, viuoient le temps passé les Tartarins, lesquels estoient vne partie suiets a Prestre Ian, & l'autre partie au Roi de Perse, qui les ioignoit d'un costé de sa terre:ausquels ils payoient de grans charges chacun an, pour les pasturages de leurs bestes, dont ils viuoient seulement. Et le Roy de Perse, & Prestre Ian les auoient en si grand desdain, & erreur, que quant ils leur apportoint leurs deuoirs, & rentes, ils ne daignoient parler a eus, ne les regarder, mais leur tournoient le dos: dont aduint qu'une fois entre les autres, vn sage Homme d'entr'eus, chercha toutes les berries, & alla parler ça & là, aus hommes des lieux: & leur remonstra le grand seruage, en quoi ils estoient:& comme ils estoient contemnés & hays de leurs Seigneurs: parquoi les prioit qu'ils voufissent aduiser, & prendre conseil de trouuer quelque moyen, pour sortir hors du seruage, auquel ils estoient detenus. Et de fait, tant besoigna celui sage Homme, qu'il les assembla vn iour tretous, au bout de celle berrie, a l'endroit de la terre de Prestre Ian, & apres plusieurs remonstrances que il leur fit, ils lui promirent de faire tout ce qu'il aduiserait, & qu'il leur diroit:

parq

parquoi le prierent de regarder par quelle maniere ils pourroient atteindre a se mettre en liberté: & alors ce sage Homme leur respondit qu'ils ne pourroient rien faire, s'ils n'auoient vn chef, & vn Roy, auquel ils obeissent, & fissent tout ce qu'il leur commanderoit, ce qu'ils lui accorderent: & la maniere de faire leur Roi, fut telle: Ils estoient cinquante & deus generations de Tartarins, & chacune generation apporta vne Saiette, qui estoit signee du seing, & nom de la generation, & furent mises les Saiettes deuant vn petit enfant de l'aage de cinq ans, & fut accordé, que le roi seroit fait de la generation, dont seroit la premiere Saiette que l'enfant leueroit. Si aduint, que la Saiette que il print la premiere, fut de la generation, dont le sage Homme estoit. Au moyen dequoi, il fit estre derechef cinquante deus hommes, les plus sages, & vertueux qui fussent en sa generation, dont il fut l'vn, & fit bailler a chacun vne autre Saiette signee de leurs noms, lesquelles furent mises ensemble, & dit que celle que l'enfant leueroit, celui seroit Roi, a qui elle seroit: si fut tel le sort, que l'enfant leua la Saiette d'icelui sage Homme, qui les auoit ainsi conseillés, dont tous furent bien ioyeux, & le firent leur Roi, & gouuerneur. Mais auant que prendre la charge, il leur dit: Mes amis, si vous voulés que ie soye vostre Seigneur, vous iurerés par celui qui a

fait le Ciel & la terre, que vous tiendrés, & observerés mes commandemens : ce qu'ils promirent, & iurèrent de faire.

Après que ce sage Homme fut créé Roy, il fit, & establit plusieurs belles loix a son peuple, pour le tenir en Paix & tranquillité: & apres leur remonstra comme le plus ancien ennemi qu'ils eussent, s'estoit le Prestre-Ian, qui des longs temps les hayoit tant, & leur auoit fait tant de maus: parquoy dit il: ie vous commande a tous que demain soiés prests, & appareillés, pour lui courir sus: & s'il aduient que nous soyons desconfits (ce que ie n'espere pas) que chacun face du mieus qu'il pourra. Aussi s'il aduient que nous soyons les victorieux, ie vous commande de suiure la victoire iusques en la fin: & vous defends, que nul ne soit si hardi de mettre la main, pour prendre les despouilles de ceus que nous mettrons a mort, iusques a tant que nous aurons tout desconfit: & puis apres ie vous promets, qu'ayant eue victoire de nos ennemis, que ie vous departirai le gaing si bien & iustement, que chascun en sera tresbien content: ce que tous lui promirent de faire.

Le lendemain venu, tous les Tartarins se trouuerent en equipage deuant leur Seigneur, ainsi qu'il leur auoit commandé: lesquels tous ensemble coururent sus a Prestre Ian, qui en rien n'y pensoit, par telle force, qu'ils mirent tous les gens qui estoient

estoyent de deffence a mort: tellement qu'en peu de temps, ils furent maistres & Seigneurs du pays: car les gens qui n'estoyent point de deffense, voyant la cruelle occision qu'ils faisoient, se venoient rendre a eus, & se mettoient en leur subiection.

Après que les Tartarins eurent fait celle conqueste, il leur aduint vn cas merueilleux: car l'vn des grans maistres de l'vne des generacions deuant nommees, se perdit, & fut absent du peuple par trois iours entiers, sans que personne en sceut aucunes nouuellés. Et au bout de trois iours, qu'il fut retourné, il conta au peuple qu'il auoit esté sur vn Tertre haut a merueilles, sur lequel il auoit trouué des plus belles gens, & les mieus vestus, & ornés, qu'il eust iamais veu: & au meillieu y auoit vn Roi assis, qui estoit le plus beau a regarder, de tous les autres, & le mieus paré: & son siege estoit vn trosne d'or, reluisant a merueilles. A sa dextre il auoit six Rois tous couronnés, & bien parés de pierres precieuses: a sa fenestre autant en y auoit pres de lui. A la dextre main, y auoit vne Roine agenouillée, qui lui disoit, & prioit qu'il pensast de son peuple. A sa main fenestre, y auoit agenouillé vn mout beau iuenceau, qui auoit deus aisles resplendissans comme le Soleil, & a l'entour d'icelui plusieurs autres, qui portoient aisles semblablement. Celui Roi appella le Tar-

tarin, & lui dit : Tu es venu de l'ost des Tartarins. Sire, fit il, le suis mon : Tu t'en retourneras, & diras au Roi de Tartarie que tu m'as veu, qui suis Seigneur du Ciel, & de la terre: & que ie lui mande, qu'il me rende graces, & louanges de la victoire, que ie lui ai donnee sur Prestre Ian, & sa gent : & lui diras aussi, que ie lui donne puissance de mettre en sa subiection, toute la terre. Sire, fit le Tartarin, comment m'en croira le Roi de Tartarie? Tu lui diras, qu'il te croye a telles enseignes, que tu t'en iras combattre a l'Empereur de Perse, avecq' trois cens hommes de tes gens: lequel tu vaincras de par moi, qui se combattra a toi, avec quatre cens mille hommes de ses gens: & auant que tu l'alles combattre, tu requerras au Roi des Tartarins, qu'il te donne tous les Prestres, gens de religion, & l'autre menu peuple, qui est demouré de la bataille qu'il a gagnée contre Prestre Ian: ce qu'ils te diront, que tu le croyes, & le faces: car ils sont de mes gens, & seruiteurs. Sire (fit celui Tartarin) ie ne sçauois m'en retourner, si ie ne suis conduit par quelqu'un: & adonc, le Roi se tourna, & appella vn de ses belles gens, & lui dit: George, va t'en conduire cet homme, iusques en son hebergement, & le rends a sauueté: & tanrost fut transporté de ce lieu. Et quant les Tartarins le virent, ils lui firent grand' chere a merueilles. Si demanda au Roi de
Tar

Tartarie, qu'il lui donnaſt les Preſtres, & gens de religion, comme lui auoit enſeigné le Roi, qu'il trouua au haut du Tertre, ce que lui fut ottroyé tref-volontiers. Et lors, les Preſtres commencerent a monſtrer la Loy de Dieu aus Tartarins: en ſorte que le Roi, & tous ſes gens furent Baptiſés. Et quant ils furent Baptiſés, il en print trois cens, & s'en alla aſſaillir l'Empereur de Perſe, lequel il vainquit, & chaſſa hors de ſa terre, tellement qu'il fut contraint de s'en fuir au Royaume de Hieruſalem: & fut celui qui depuis deſconfit nos gens, & print le Comte Gautier de Brienne, comme vous ouyrés ci apres.

CHAP. LX.

De meſſire Clenard de Semingam du Royaume de Nerone, qui vint au ſervice du Roy: & la maniere que lui & ſes gens obſeruoient, a la chaſſe des Lyons.

Pour reuenir a noſtre propos, durant que le Roi faiſoit fermer Ceſaree, il arriua deuers lui vn Cheualier qui ſe nommoit meſſire Clenard de Semingam, qui diſoit eſtre parti du Royaume de Nerone, qui eſt a la fin de l'Occident, pour venir ſecourir le Roi: & diſoit qu'il auoit fait faire ſa Nef audit Royaume de Nerone, & de là monta ſur la Mer, & environnant toute l'Eſpagne, auoit paſſé par les deſtroits de Maiore, ou il auoit enduré

beaucoup de maus, pour les grands dangers & perils, ou il auoit esté auant que d'arriuer a nous: & disoit celui Cheualier, qu'audit Royaume de Nerone, les nuicts estoient si courtes en esté, que lon voyoit bien encores le iour, au plus tard de la nuit. Le Roi le retint lui diziesme a son seruice: & aussi tost qu'il eut la conoissance du pays de Cefaree, il se mit lui & ses gens a chasser aus Lions, en sorte qu'ils en prindrent plusieurs: mais ils se mettoient en grand danger & peril, de leurs corps. Et la façon de les prendre estoit telle: ils alloient a la chasse, montés sur cheuaus, qui estoient autant bien courans, comme il estoit possible: & quant ils auoient trouué aucun Lion, ils le frapportoient d'un coup de trait d'arbalète, ou d'arc, & le Lion se sentant blessé, couroit sus au premier que il voyoit, & celui se mettoit a fuir tant qu'il pouuoit, & en fuyant, il laissoit choir quelque couuerture, ou piece de vieux drap, & le Lion qui la rencontroit, la prenoit & deschiroit, pensant que ce fust celui qui l'auoit frapé: & ainsi que le Lion s'amusoit a desrompre la piece de drap, les autres s'approchoient, & lui tiroient coups de traits, & le Lion derechef alloit apres celui qui l'auoit frapé, lequel laissoit choir une autre piece de drap, pour amuser le Lion. & ainsi faisoient-ils plusieurs fois, iusques a ce qu'a force coups de traits, ils auoient tué le Lion.

CHAP. LXI.

D'un autre Cheualier, du nom de Coucy, qui vint au service du Roy: & de ce qu'il dit au Roy de l'Empereur de Constantinoble, & du Roy des Commains.

VN autre Cheualier mout noble, vint encores au Roi, a Cefaree, qui se disoit estre de ceus de Coucy, & cousin du Roi, pource qu'il estoit descendu d'une des Sœurs du Roi Phelippe, que l'Empereur de Constantinoble eut a femme; & le retint le Roi lui dixieme, a son service. Et contoit au Roi celui Cheualier, que l'Empereur de Constantinoble s'allia vne fois d'un Roi, qu'on appelloit le Roy des Commains, pour auoir aide de lui, pour conquerir l'Empereur de Grece, qui auoit nom Vatache: mais icelui Roi des Commains, pour auoir seureté & fiance fraternelle de l'Empereur de Constantinoble, lui dit, qu'il failloit qu'eus deus, & tous leurs gens, fussent saignés: & apres qu'ils beussent le sang l'un de l'autre: en signe qu'ils estoient freres, & tous d'un sang; ce que fut fait. Parquoi il dit au Roi S. Loys, qu'il vouloit ainsi faire avec nos gens; ce que le Roi lui accorda, & furent saignés plusieurs de nos gens, & ses Cheualiers aussi, lesquels prenoient de leur sang, & du nostre, & le melloient avec du vin, & en beuvoient l'un a l'autre, disans qu'ils estoient freres de sang. Encores fi-

rent-ils vne autre chose: car ils firent passer vn chien entre nos gens, & eus, qui estoient separés les vns des autres; & decouperent le Chien, de leurs espees; disans qu'ainsi fussent-ils decouppés, s'ils failloient l'un a l'autre.

Vne autre grand' merueilleuse chose raconta au Roi icelui Cheualier de Coucy: Qu'au pays du Roy des Commains, estoit mort vn grand riche Chrestien & Prince, auquel apres sa mort on fit vne grand' fosse, & large en terre, & assist on le corps en vne chaire, mout noblement parée, dans ladite fosse, & avec lui on mit le meilleur de ses Cheualiers qu'il eust, & tout vif homme & cheual. Icelui Cheualier, auant qu'entrer dans la fosse, prenoit congé du roi, & des autres grans personages qui là estoient, & alors le Roi lui bailloit vne grand' quantité d'or & d'argent, qu'on lui mettoit en escharpe a son col: & lui faisoit promettre le roi, que quant il seroit en l'autre monde, qu'il lui rendroit son or & son argent; & ainsi le promettoit faire le Cheualier. Puis le roi lui bailloit vnes lettres, adressantes a leur premier roi, & lui mandoit par celles lettres, qu'icelui Preud'homme auoit moult bien vescu en ce monde, & qu'il l'auoit tref-bien serui, & pource lui prioit qu'il le voussist bien guerdonner: & apres que ils eurent fait tout ce dessus, ils couvrirent la fosse sur celui homme mort, & sur son

son Cheualier tout vif, & y mirent des planches de bois, bien cheuillies: & auant que s'aller coucher, celui iour qu'ils l'auoient enseveli, en memoire & remembrance de ceus qui l'auoient enterré, ils firent sur la fosse vne grand' montagne de pierres & de terre.

CHAP. LXII.

L'Auteur va voir le Roy a Cesaree, & des propos & conuenances qu'il eut avec le Roy.

ENuiron la feste de Pasques, que mon terme deuoit finir, ie partis d'Acre pour aller voir le Roi a Cesaree, & le trouuai en sa chambre, parlant avec le Legat du Pape: & aussi tost qu'il me vit, il vint vers moi, & me dit: Sire de Ionuille, il est bien vrai, que ie ne vous ai retenu que iusques a Pasques qui viennent, pourtant ie vous prie me dire combien ie vous donnerai encores, de Pasques iusques a vn an prochain venant? Et ie lui respondi, que ie n'estois pas venu deuers lui, pour telle chose marchander, & que ie ne voulois plus de ses deniers: mais qu'il me fist autre marche & conuenance: c'est assauoir qu'il ne se courrouceroit point de chose que ie lui demanderois, ce qu'il faisoit bien souuent: & aussi ie lui promettois de n'estre point marri, de chose qu'il me refuseroit: & lors il se mit a rire bien fort,

& me dit qu'il me retenoit par telle conuenance. & ce disant me print par la main, & m'amena deuant le Legat & son conseil, & leur recita la conuention de lui & de moi, dont chacun se print a rire, & furent mout ioyeus, de quoy ie demourois.

CHAP. LXIII.

De la iustice que le Roy fit faire a Cefaree pendant qu'il y estoit.

IE vous veus ici compter les iustices & iugemens, que le Roi fit a Cefaree, durant qu'il y estoit. Et premierement d'un Cheualier, qui fut trouué au Bourdeau: lequel fut condamné par condition, ou que la Ribaude, auec laquelle il auoit esté trouué, le meneroit parmi l'ost, en chemise, ayant vne corde liee en ses genitoires, laquelle la Ribaude tiendrait d'un bout. Ou s'il ne vouloit telle chose souffrir, qu'il perdoit son Cheual & harnois, & qu'il seroit dechassé & forbanni de l'ost du Roi. Le Cheualier esleut qu'il aimoit mieus perdre son Cheual & armures: & s'en partit de l'ost. Quant ie vi que le Cheual fut confisqué au Roi, ie le lui demandé, pour vn de mes Cheualiers, pour vn Gentilhomme: mais le Roi me respondit que ma requeste n'estoit pas raisonnable, pource que le cheual valoit bien de quatre vints a cent liures, qui n'estoit pas petite somme. Et ie lui di: Sire, vous aués
rom

rompu les conuenances d'entre vous & moi, quant vous vous courroucés de ce que ie vous ai demandé. & le roi me dit: Sire de Ionuille, vous dirés tout ce que vous voudrés: car ie ne m'en courroucerai ia plustost: mais quoi qu'il en fut, ie n'eus point le Cheual pour mon poure Cheualier.

La seconde iustice, que ie vi faire, fut d'aucuns de mes Cheualiers, qui allerent vn iour a la chasse, a vne beste qu'on appelle Gazel, qui est ressemblante a vn Cheureul: & les freres de l'Hospital, estans aduertis que mesdits Cheualiers estoient allés chasser, se vindrent mettre en embusche: & au retour les assaillirent durement: en sorte qu'ils porterent grand dommage a mesdits Cheualiers, qui n'estoient pas en si grand nombre comm'eus. Le m'en allai plaindre au Maistre de l'Hospital, menant quant & moi les Cheualiers blessés. Le maistre de l'Hospital me fit responce, qu'il m'en feroit raison, selon le droit & vsage de la Terre-sainte, qui estoit tel: qu'il feroit manger les freres qui auoient fait l'outrage sur leurs Manteaus: & ceus a qui l'outrage auoit esté fait, s'y trouueroient: & les Manteaus leur demoureroient. Aduint que le maistre de l'Hospital fit manger les freres ainsi qu'il auoit promis sur leurs manteaus: & ie m'y trouuai là present avec mes Cheualiers, & requismes au Maistre qu'il les fist le-

uer de dessus leurs manteaus, ce qu'il cuida refuser; mais en la fin, force lui fut de le faire; car nous nous assimes avec les freres, pour manger avec eus; ce qu'ils ne voulurent souffrir, & se leuerent d'avecq' nous, pour aller manger avec leurs autres freres a la table, & nous laisserent les manteaus.

Vn autre iugement fit le Roi, que i'ay voulu mettre ici: Vn de ses Sergens, nommé le Gollu, mit la main a l'vn de mes Cheualiers, & le bouta rudement, dequoy ie m'allai plaindre au roi; lequel me dit, que ie me pouuois bien deporter de cela, veu que le Sergent n'auoit fait que bouter mon Cheualier; & ie lui di que ie ne m'en deporterois ia, & que plustost ie quitterois son seruice, s'il ne me faisoit droit; & qu'il n'appartenoit pas a Sergent de mettre la main sur vn Cheualier. Ce que voyant le roi, me fit droit, selon l'vsage du pays, qui fut tel: que le Sergent vint en mon logis, tout en chemise, & deschaus, & portant vne espee en son poing; lequel se vint agenouiller deuant le Cheualier qu'il auoit outragé: & lui rendit l'espee par le pommeau, lui disant: Sire Cheualier, ie vous crie merci, de ce que i'ay mis la main sur vous: & vous ay apporté cette espee, que ie vous presente; afin que vous m'en couppés le poing s'il vous plaist le faire. Et lors ie priai le Cheualier de lui pardonner: ce qu'il fit volonton

lontiers. Plusieurs autres diuers iugemens
ie vi faire, & le droit & coustume de la
Terre-sainte.

CHAP. LXIIII.

*Comme le Roy & les Admiraus d'Egypte
auoyent deliberé de se trouuer a Iaphe,
pour iurer leur alliance: & ce qui empes-
cha que lesdits Admiraus ne s'y trouue-
rent point: & de ce que le Roy fit audis-
lien de Iaphe.*

VOus aués deuant entendu, comme
le Roi auoit mandé aus Admiraus
d'Egypte, que s'ils ne lui satisfaisoient des
outrages & villenies qu'ils lui auoient
faites, qu'il ne leur tiendrait aucune tref-
ue: parquoi les Admiraus renuoierent de-
uers le Roi leurs Ambassadeurs: lesquels
dirent au Roi, que les Admiraus lui vou-
loient satisfaire tout a son gré: & prin-
drent iournee pour se trouuer ensemble,
le Roi, & les Admiraus, a Iaphe: ou ils iu-
reroient au Roi de lui rendre le Royau-
me de Hierusalem: & le Roi leur iureroit
de leur donner aide & secours a l'encon-
tre du Soudan de Damas. Et quant icelui
Soudan de Damas fut aduertí de l'allian-
ce du Roi, & des Admiraus d'Egypte, il
delibera de les empescher, qu'ils ne se
trouuassent point ensemble au iour qui
auoit esté prins: parquoi il enuoya vingt

mille Turcs, pour garder le passage: & combien que le Roi en fust ^{re-}uertu, toutesfois il ne différa point de partir de Cefaree, pour aller a Iaphe. Et le Comte de Iaphe, sachant la venue du Roi, fit mettre son Chasteau en tel ordre, que chacun s'en esmerueilloit: car il mit a chacun carneau de son Chasteau, bien enuiron cinq cens hommes, chacun portant vne targe, & vn Penonceau a ses armes, qui estoient de fin or, a vne Crois patee de geulles: en sorte qu'il les faisoit tresbeau voir. Quant nous fusmes arriues a Iaphe, nous nous logeasmes aus champs, tout au tour du Chasteau, qui estoit assis lés la Mer en vne Isle: & fit faire le Roi, tout autour dudit Chasteau, vn Bourg, depuis l'un des murs, iusques a l'autre, en ce qu'il y auoit de terre, & le fit fermer. Et me souuient que souuent le Roi venoit voir ses ouriers: & pour leur donner courage de bien diligenter, il leur disoit que plusieurs fois il auoit porté la Hotte, pour gagner les pardons. Les Admiraus qui sceurent l'entreprinse du Soudan de Damas, n'oserent venir a Iaphe: mais enuoyerent au Roi, toutes les testes des Chrestiens qu'ils auoient pendues sur les murs du Qaahere, & les fit le Roi mettre en terre sainte: & pareillement lui enuoierent les Admiraus, tous les Enfans qu'ils auoient retenus, & qu'ils auoient fait renier la Loy de Dieu. Aussi enuoierent vn
Etc

Elephant, que le Roi enuoya en France. Ainsi que le Roi & tout son ost seiournoient a Iaphe, lui vindrent nouuelles que les gens du Souldan de Damas estoient sur les champs, & que l'un des Admiraus du Soudan estoit venu a trois lieus pres de l'ost, & auoit gasté tous les blés d'un Kasel qui estoit la pres.

Le Roi ayant entendu ces nouuelles, fit armer ses gens, & lui mesmes se mit en armes, pour aller voir que c'estoit: mais incontinent que celui Admiral nous sentit venir, il print la fuitte, & nos gens coururent apres a bride abatee: & y eut un Gentil homme de nos gens, qui couroit deuant les autres, qui vint a conceuoir un Turc, auquel donna si grand coup de lance, qu'il le mit par terre, sans rompre sa lance. Et quand l'Admiral vit que ce Gentil homme estoit seul, il se tourna vers lui: mais le Gentil homme lui donna un coup de son glaiue, qu'il lui fit vne grand' playe en son corps; & puis s'en retourna a nous.

CHAP. LXV.

D'une autre iournee ou lesdits Admiraus promirent se trouuer a Iaphe: du Prince d'Antioche qui vint vers le Roy: du Comte de Iaphe, & de ses vertus.

Quant les Admiraus d'Egypte sceuerent que le Roi, & tout son ost estoit

a Iaphe, ils enuoyerent deuers lui, pour auoir derechef autre assignation de iour, qu'ils pourroyét venir par deuers lui sans faute; & le Roi leur assigna encor vn autre iour; auquel ils promirent de se trouuer par deuers lui, pour conclure du tout. Et durât ce temps, que nous attédions venir la iournee, le Comte de Den vint deuers le Roi, & amena avecq' lui, le bon Cheualier Arnoul de Guymene, & ses deus freres, & fit le Roi Cheualier le Comte de Den, qui estoit encores vn ieune iouuenceau, & le retint a soi lui diziesme. Séblablement vindrent deuers le Roi le Prince d'Antioche & sa Mere: ausquels le Roi fit tresbon recueil, & les receut honorablement. Et fit le Roi Cheualier le Prince d'Antioche, qui n'auoit point encores plus haut de seze ans: mais onques si sage enfant, ie ne vi de tel aage: & apres qu'il fut fait Cheualier, il fit vne requeste au Roi, lui suppliant qu'il lui donnast audience, de quelque chose qu'il lui vouloit dire, en la presence de sa Mere: ce que le Roi lui ottroya volontiers. Et alors il dit au Roi en certe maniere: Sire, il est vray que Madame ma Mere, qu'ici est presente, me tient en * bail, & m'y tiendra encores, iusques a quatre ans, pour raison de quoi elle tient toutes mes terres & en iouyt: en sorte que ie n'ai puissance de rien faire: & combien qu'elle ait la iouissance de mes Seigneuries, toutesfois elle

ne

* c. comme
en tutele.

ne deuroit pas les laisser perdre ne de-
choir, ains plustost les deuroit augmenter
& accroistre, ce qu'elle ne fait; car elle lais-
se perdre ma Cité d'Antioche entre ses
mains. Pourtant Sire ie vous supplie hum-
blement, de lui vouloir remontrer; & fai-
re qu'elle me baille deniers & gens, pour
aller secourir mes gens qui sont dans la
Cité, ainsi qu'elle est tenue de faire; car
i'aime trop mieus le faire ainsi, que de
sejourner en la Cité du temple, faisant
grans despens, sans aucun profit. Apres
que le roi eut entendu sa demande, il fit
enuers sa Mere, qu'elle lui bailla deniers
& gens, & s'en alla le Prince en Antioche,
ou il fit merueilles depuis. Et deslors,
pour l'honneur du roi, il escartela ses ar-
mes, & les mesla avec celles du roi.

Ie ne veus mettre sous silence, les ver-
tus & prouesses du Comte de Iaphe, mes-
sire Gautier de Brienne, afin que ceus qui
entendront, ses excellens faits, soient in-
cités. & prouoqués a les ensuiure. Il tint
long temps le Comté de Iaphe en son
viuant, & le defendit contre les Eryp-
tiens, lesquels sans cesser lui menoient la
Guerre: & fit sur eus tant de beaux faits
d'armes, qu'il en fera memoire à iamais:
& vous assure qu'il n'auoit aucun reue-
nu, pour entretenir ses gens; mais il estoit
si accompli en valeur, que des courses que
il faisoit sur les Sarazins, & de ce qu'il ga-
gnoit sur eus, il soudoyoit ses gens de

guerre. Aduint vne fois qu'il print sur les Sarazins, grād' quantité de draps de Soye de diuerſes manieres, lesquels il fit amener a Iaphe, & les departit tous a ſes Cheualiers, ſans en reſeruer rien pour lui. Au moien de quoi, il entretenoit ſes Cheualiers en amour & amitié: & auoit vne couſtume louable en lui, que le ſoir quād il eſtoit departi de ſes Cheualiers, il entroit en ſa Chappelle, & là eſtoit longuement a prier Dieu: puis ſ'en alloit coucher avec ſa femme, qui eſtoit vne notable Dame, & ſœur du Roi de Chyppre.

CHAP. LXVI.

Comme Barbaquan empereur de Perſe eſtant chaffé hors de ſon pays, par les Tartarins, ſ'en vint au royaume de Hieruſalem: et des maus qu'il y fit, et aus autres lieux circonuoisins. de l'armee qui fut faite contre lui: Et comme ayant gaigné vne bataille, ou le Comte de Iaphe fut prins, avec pluſieurs autres: par apres ledit empereur de Perſe fut prins, par le Soudan de la Chamelle: Et de la mort du comte de Iaphe.

L'Vn des Princes des Tartarins auoit chaffé hors de ſon Royaume l'Empereur de Perſe: lequel auoit nom Barbaquan, & l'auoit contraint de ſoi retirer au Royaume de Hieruſalem. Si deués ſçauoir, que quand icelui Barbaquan vint en Hieruſalem, il fit tant de maus, que c'eſtoit vne choſe grandement pitoyable.

A sa venue il print le Chasteau de Taberie, qui appartenoit a. messire Heude de Montbelliar, & tua tant de nos gens qu'il peut rencontrer, hors dudit Chasteau, & tous les Pelerins qu'il trouua hors d'Acre, & de Iaphe. Et quand il eut fait tant de maus, il se tira vers Babyloine: afin d'auoir secours du Soudan de Babyloine, lequel se deuoit ioindre avec lui, pour nous courir sus. Et sur ce point les Barons du pais, & les Patriarches aduiserent qu'ils iroient combattre l'Empereur de Perse, auant qu'il eust secours du Soudan de Babyloine: & enuoierent querir pour leur secours le Soudan de la Chamelle, qui estoit l'un des meilleurs Cheualiers, & des plus loiaus qui fust en toute Payennie, lequel vint a eus, & le receurent a tresgrand' honneur en Acre. Puis apres tous ensemble se partirent d'Acre, & vindrent a Iaphe. Quand toute celle armee fut a Iaphe, nos gens prirent le Comte Gautier, que il voulist venir avec eus, contre l'Empereur de Perse: lequel respondit que tresuolontiers il iroit, pourueu que le Patriarche d'Acre lui donnast absolution, qui des long temps l'auoit excommunié, pource qu'il ne lui vouloit rendre vne Tour, qui estoit en son Chasteau de Iaphe, laquelle Tour on nommoit la Tour du Patriarche: mais icelui Patriarche, ne voulut oncques par aucunes prieres, lui donner l'absolution. Toutesfois le

Comte Gautier ne demoura point pour cela, qu'il ne vinst avec nous en bataille. Et furent faites trois batailles: dont mesire Gautier conduisoit la premiere: le Soudan de la Chamelle la seconde: & la troisieme menoit le Patriarche, & les Barons du pays: & estoient les Cheualiers de l'Hospital, en la bataille du Comte de Iaphé. Quand leurs batailles furent ainsi ordonnees, ils se mirent aus champs: mais ils n'allerent pas longuement, qu'ils decoururent leurs ennemis, qui pareillement ordonnoient leurs gens en trois batailles. Quand le Comte Gautier s'en apperceut, il s'escria: Seigneurs, que faisons-nous! nous leur donnons loisir de mettre ordre en leurs batailles: & aussi leur donons courage, quant ils nous voient ici arrestés, sans les assaillir! parquoi ie vous prie que nous leur allons courir sus: mais oncques n'y eut personne, qui l'en voulust croire: & quand il vit que nul n'en tenoit conte, il se tira deuers le Patriarche, & lui demanda absolution: mais onques le Patriarche n'y voulut entendre. Avec le Comte se trouua l'Euesque de Raines, qui estoit grand clerc, & auoit fait plusieurs prouesses en la compaignie du Comte Gautier, lequel lui dit: Monsieur, ne vous troublez point en vostre conscience, de l'excommuniment du Patriarche, car il a tresgrand tort: & de ma puissance ie vous absouls au nom du
Pere

Pere, & du Fils, & du Saint Esprit, Amen: & ayant ce dit, se mit a crier, allons & marchons sur eus: & incontinent ferirent des esperons, & se vindrent joindre a la dernière bataille des ennemis, ou estoit l'Empereur de Perse, qui auoit grand nombre de gens, & beaucoup plus que n'auoit le Comte Gautier en sa bataille: & tellemēt le firent, qu'il y eut plusieurs morts, & natures d'un costé & d'autre: mais en la fin le Comte Gautier fut prins prisonnier: car tous nos gens s'enfuirent & l'abandonnerent vilainement: en sorte que plusieurs, par desespoir s'en allerent jeter en la Mer. Et la cause de tel desordre fut: que l'une des batailles de l'Empereur de Perse se vint assembler, a la bataille du Soudan de Chamelle, lequel se deffendit si tresvaillamment, que de deus mille Turcs qu'il auoit, il ne lui en demoura qu'environ quatre vingts: en sorte que force lui fut, se retirer au Chasteau de la Chamelle: & quand les gens du Comte Gautier virent la retraite, & desconfiture du Soudan de la Chamelle, ils perdirent tous courage, & se mirent en fuite. Et voyant l'Empereur de Perse qu'il auoit eu victoire, delibera de la poursuiure: & voulut aller assieger le Soudan en son Chasteau, ou il s'estoit retiré. Mais le Soudan, comme bien aduisé, appella ses gens, & leur dit: Seigneurs, si nous nous laissons ici assieger du Roi de Perse, nous sommes per-

dus : car nous ne ſçaurions longuement tenir contre lui noſtre Chateau : & ſ'il nous tenoit vne fois en ſa puiſſance, il n'auroit aucune merci de nous. Parquoi il me ſemble qu'il vaut beaucoup trop mieus que nous allions courir ſur eus, que les attendre ici. & de ce conſeil furent ſes gens. Et de fait, il enuoia tous ſes gens qui eſtoient mal armés, par derriere vne vallee, qui eſtoit bien couuerte, leur donnant charge d'afſaillir l'oſt de l'Empereur de Perſe par derriere, & il l'aſſauroit par deuant, avec le demeurant de ſes gens. Quand ceus qui eſtoient en la vallee, virent leur point, ils coururent ſur la queuë aus gens de l'Empereur: tellement qu'ils tuoient femmes & enfans, ſans eſpargner rien. Et quand l'Empereur, qui marchoit deuant, entendit le bruit de ſon oſt, il ſe tourna arriere, pour les vouloir ſecourir: mais le Soudan ſe ietta ſur eus, ſi aſprement que c'eſtoit merueilles : & tellement fut aſſailli l'Empereur, deuant & derriere, que de xxv. mille hommes qu'il auoit ne lui en demoura pas vn ſeul, que tous ne fuſſent mis a mort.

Or vous deués ſçauoir, que l'Empereur de Perſe, auant qu'il ſe partiſt pour aller aſſieger le Chateau de la Chamelle, il amena le comte Gautier deuant ſa Cité de Iaphe, & là le fit pèdre par les bras a vnes Fourches : en ſorte que ceux qui eſtoient dans le Chateau le pouuoient aiſement voir

voir : & leur faisoit dire , que iamais il ne feroit despendre leur Comte , s'ils ne lui rendoient le Chasteau ; & comme le Comte pendoit ainsi , il s'escrioit a haute voix a ses gens , que pour quelque peine qu'ils lui vissent endurer , qu'il ne rendissent pas le Chasteau a l'Empereur ; & que s'ils le faisoient , que l'Empereur les feroit tous mourir. Quand l'Empereur vit qu'il n'y pouuoit autre chose faire , il enuoya le Comte au Soudan de Babyloine , & lui en fit present , ensemble du maistre de l'Hospital , & de plusieurs autres grans personages , qu'il auoit prins prisonniers : & pour conduire le Comte Gautier , & les autres , y auoit bien trois cens Cheualiers : ausquels aduint tresbien , qu'ils ne se trouuerent point a la tuerie deuant le Chasteau de la Chamelle.

Quand les Marchans de Babyloine furent aduertis que le Soudan auoit en ses prisons le Comte Gautier , ils s'assemblerent , & tous d'une conspiration allerent faire vne clameur au Soudan du Comte de Iaphe , lui demandant droit de ce qu'il les auoit plusieurs fois dommagés , & prins leurs biens , tant qu'il les auoit destruits. Et le Soudan , pour obtemperer a leur requeste , leur deliura entre leurs mains , le Comte Gautier , pour en prendre telle vengeance qu'ils voudroient. Et les meschans traistres chiens , entrerēt en la prison , ou estoit le Comte Gautier : lequel a-

pres plusieurs tourmens, ils mirent par pieces, & hacherent son corps par morceaux: dont ce fut grand' pitié, & perte, d'un tant vaillant, & magnanime Prince.

CHAP. LXVII.

Comme le Souldan de Damas fit la guerre aux Admiraux d'Egypte, & quelle fin eut icelle guerre.

OR reuenons au Souldan de Damas, lequel retira ses gens qu'il auoit a Gadres, & entra en Egypte, pour assaillir les Admiraux. Les Admiraux ayans fait assemblée de grosse troupe de gens, vindrent au deuant du Souldan de Damas, & se donnerent la bataille; & telle fut leur fortune, que l'une bataille des Admiraux fut desconfite, par une bataille du Souldan: & la seconde bataille des Admiraux, vainquit l'autre bataille du Souldan: en maniere que le Souldan s'en retourna arriere a Gadres, fort nauré en la teste, & autres lieux de son corps. Et durant qu'il estoit a Gadres, les Admiraux enuoierent une Ambassade deuers lui, par le moien de laquelle ils firent paix & accord entr'eux; & ainsi nous demourasmes mocqués d'une part & d'autre: car des lors en auant, nous n'eusmes, ne paix ne trefues, ni au Souldan, ni aus Admiraux. Et sachés que nous n'estions en nostre ost, que quatorze cens, ou enuiron, de gens defensables.

Tantost

Tantost que le Souldan de Damas fut appaisé avec les Admiraus d'Egypte, il fit amasser tous ses gens qu'il auoit a Gardes, & partant de la, vint passer pres de nostre ost, avec bien vingt mille Sarazins, & dix mille Beduyns, & passerent a bien pres de deus lieues de nous, qu'oune ne nous oserent assaillir; & fusmes en aguets le Roi, le maistre de son Artillerie & moi trois iours, de peur qu'ils se ferissent en nostre ost secrettement.

CHAP. LXVIII.

Comme le maistre des Arbalestiers, avec treze vingts de ses hommes étant enclos des Sarazins fut secouru.

LE iour de la Saint Ian d'apres Pasques, durant que le Roi oioit son sermon, il vint vn des gens du maistre de l'Artillerie, qui entra tout armé en la Chapelle du Roi, & lui dit, que les Sarazins auoient enclos sur les champs, le maistre des Arbalestiers; & lors ie requis au Roi, qu'il me donnast congé d'y aller: ce qu'il fit. & me fit bailler quatre cens hommes d'armes, & lui-mesmes nomma ceus qu'il vouloit que ie menasse quant & moi. Si tost que nous fusmes hors de l'ost, & que les Sarazins, qui tenoient enclos, le maistre des Arbalestiers, nous virent venir, ils se retirerent vers vn Admiral, qui estoit sur vn Tertre deuant nous, a tout bien mille hommes d'armes, & lors commen-

ça vn dur conflict entre les Sarazins, & la compagnie du maistre des Arbalestiers, qui n'estoient qu'environ quatorze vingts; & comme celui Admiral voioit que ses gens estoient pressés & affoiblissoient, il les renforçoit de gens frais; & aussi faisoit le maistre des Arbalestiers de son costé. Durant ce temps que nous estions ainsi combatans, le Legat, & les Barons du pays dirent au Roi, qu'il ne me deuoit pas auoir laissé aller aus champs, & que grand danger en pourroit venir. Au moien dequoi le Roi m'enuoia querir, & aussi le maistre des Arbalestiers: & adonc nous départismes des Turcs, & nous en reuinsmes en nostre ost. Plusieurs gés s'esbahissoient dequoi les Turcs nous auoient laissés en repos, sans nous auoir couçu sus: sinon qu'aucuns disoient, que ce auoit esté pource que leurs cheuaus estoient tous affamés, de ce qu'ils s'estoient tant tenus a Gadres, là ou ils auoient esté bien vn an entier.

CHAP. LXIX.

Comme les Sarazins estans venus deuant Acre, pour gaster les Iardins, s'en allerent sans rien y faire: & de ce que fit vn Cheualier Geneuois.

LEs autres Turcs qui estoient partis de deuant Iaphe, s'en vindrent deuant Acre, & manderent au Seigneur Dasur, qui estoit Connestable du Royaume

me de Hierusalem, qu'il leur enuoiall cinquante mille Befans, ou qu'ils destruiroient les Iardins de la ville. Le Seigneur Dasur leur respondit, qu'il ne leur en enuoiroit pas. Lors ils arangerent leurs batailles, & s'en vindrent le long des sables d'Acre, iusques a vn trait d'Arbaleste pres de la ville. Et adonc sortit hors de la ville le Seigneur Dasur, & s'alla mettre au mont, la ou estoit le Cymitiere saint Nicolas, pour deffendre les Iardins: & ainsi que les Turcs approcherent, sortirent d'Acre de nos gens de pied, qui commencerent a leur tirer d'arcs, & d'arbalestes a grand' force: mais de peur qu'ils ne se missent en peril, le Sire Dasur les fit retirer par vn Cheualier qui estoit de Gennes.

Ainsi que celui Cheualier de Gennes faisoit retirer ses gens de pied, qui estoient sortis, vn Sarazin vint a lui tout effrayé, & esmeu en courage, & lui dit en son Sarazinois, qu'il iousteroit a lui, s'il vouloit: ce ieune Cheualier lui respondit que tresvolontiers il le receuroit. Et ainsi qu'il vouloit courir sus au Sarazin, il apperceut là pres, a sa main senestre, huit ou neuf Sarazins, qui s'estoient la caches pour voir qui gaigneroit de ce tournoy, & ce Cheualier Geneuois fit semblant de vouloir courir sus a celui qui lui auoit présenté le combat: mais il dressa sa course a ces huit qui estoient caches: en sorte

qu'il en ferit vn parmi le corps, & le passa d'outre en outre, & tomba tout roide mort; & ce fait se retira vers nos gens: mais les autres Sarazins lui coururent sus, & l'un d'eus lui donna vn grand coup de masse sur son haubert: mais le Cheualier a son retour, lui donna vn tel coup de son espee sur la teste, qu'il lui aualla les touailles qu'il portoit en sa teste. Et deués sçauoir que les Sarazins, quand ils vont en bataille, qu'ils portent de ces touailles entortillees l'une sur l'autre: tellement que pour leur grand' durté, ils eurent beaucoup de coups, qui ne les peuuent endommager a cause desdites touailles qui les gardent. Vn autre Sarazin cuida donner vn coup de son glauiue au Cheualier: mais il guincha tant que le coup ne l'attraignit point; & au retour que fit le Sarazin, le Cheualier lui donna vn arriere-main de son espee sur le bras, tellement qu'il lui fit valler son glauiue par terre; & lors il emmena ses gens de pied, en despit des Sarazins. Ces trois beaux coups fit le Cheualier deuant le Seigneur Dahir, & autres grans personnages d'Acre, qui estoient montés sur les murailles pour les regarder. }

CHAP. LXX.

*Côme les Sarazins entrerēt en la ville de Saye-
ete, & la pillerent: & de ce qui empescha que
le Roy n'allast en pelerinage en Hierusalem.*

Après

A Pres ces choses, les Sarazins partirent de deuant Acre; & pource qu'ils ouyrent dire que le Roi faisoit fermer Sayecte, & qu'il auoit peu de bons gens d'armes, ils tirerent droit celle part. Quand le Roi en fut aduertí, pource qu'il n'auoit pas assés puissance, pour leur resister, il se retira, lui & le maistre de son Artillerie, & le plus de ses gens qu'il peut loger, dedans le Chasteau de Sayecte, qui estoit bien fort: mais ils n'y entrerent gueres, pource qu'il estoit fort petit. Et tantost que les Sarazins furent arriués, ils entrerent dans la ville de Sayecte: car ils n'y trouuerent aucune defense, pource que la ville n'estoit pas encores close, & tuerent bien enuiron deus mille pources gens de nostre ost. Apres auoir pillé la ville, ils s'en allerent a Damas. Quand le Roi sceut les nouuelles, & que les Sarazins auoient pillé & abatu Sayecte, il en fut grandement dolent, mais il ne le pouuoit amender: les Barons du país en furent bien ioyeus, pource que le Roi vouloit apres cela aller fermer Tala, là ou souloit auoir vn Chasteau, du temps des Macabees; & estoit assis ainsi comme lon va de Iaphe en Hierusalem: & pource qu'il estoit a cinq lieues loing de la Mer, les Barons ne s'accordoient pas qu'il fust fermé: & disoient que iamais on ne l'eust sceu auitailler, que les Sarazins ne nous eussent osté l'auitailement: car ils estoient

ent les plus forts. — Et pource remonstre-
rent les Barons au Roi, qu'il lui valloit
beaucoup mieus refaire Sayette, & plus
grand honneur lui seroit, que d'aller en-
treprendre autre nouveau edifice: ce que
le Roi leur accorda. Et durant le temps
qu'il estoit encores a Iaphe, on lui dit que
le Souldan de Damas le souffriroit aller en
Hierusalem & par bon asseurement: &
l'eut tresuolontiers voulu faire le Roi,
mais son conseil l'en destourna: pource
qu'il lui conuenoit laisser la Cité entre
les mains des ennemis, ce que les Sei-
gneurs du pais ne voulurent consentir: &
lui remontrerent par exemple, qu'il ne le
deuoit pas faire: car disoient-ils, quand le
Roi Phelippe se partit d'Acre pour aller
en France, il laissa tous ses gens en l'ost du
Duc Hugues de Bourgoigne, qui estoit
ayeul du Duc dernier mort. Et ainsi que
le Duc Hugues de Bourgoigne, & le Roi
Richard d'Angleterre estoient seiour-
nans en Acre, il leur fut apporté nouuel-
les qu'ils prendroient bien le lendemain
Hierusalem, s'ils vouloient: pource que
la grand' puissance des Cheualiers d'E-
gypte s'en estoitallee au Souldan de Da-
mas, en vne guerre qu'il auoit a Massa,
contre le Souldan du lieu; & tantost mar-
cherent le Roi Richard, & le Duc de
Bourgoigne droit a Hierusalem, & diui-
ferent leurs Batailles: dont le Roi d'An-
gleterre menoit la premiere, & le Duc de
Boutg

Bourgoigne l'autre apres, avec les gens du Roi de France : & ainsi qu'ils furent pres de Hierusalem, & en chemin de prendre la ville, il fut mandé de l'ost du Duc de Bourgoigne, au Roi d'Angleterre, que le Duc s'en retournoit seulement, afin que l'on n'eust peu dire, que les Anglois eussent prins Hierusalem : qui lui procedoit de grand' enuie. & ainsi qu'ils estoient sur ces parolles, vn des gens du Roi d'Angleterre s'escria & lui dit : Sire, Sire venés iusques ici, & ie vous montrerai Hierusalem : & le Roi Richard iette deuant ses yeus sa cotte d'armes, & tout en pleurant profera telles parolles a haute voix : Ha Sire Dieu, ie te prie que ie ne voye point ta Sainte Cité de Hierusalem, puis que ie ne la puis deliurer des mains de tes ennemis ! & cet exemple fut monstré ainsi au Roi, pource qu'il estoit le plus grand, & puissant Roi des Chrestiens, & que s'il faisoit son pelerinage en Hierusalem, sans la deliurer des mains des ennemis de Dieu, tous les autres rois qui viendroient audit voyage, se tiendroient a païs de faire seulement leur pelerinage, ainsi qu'auroit fait le Roi de France ; & pource disoient ils, Sire, vous ne deues visiter la Cité de Hierusalem, sans la deliurer, ainsi que fit le Roi Richard d'Angleterre.

CHAP. LXXI.

De la fortification que fit le Roi à Iaphe, &c de

l'empeschement a son voyage de Naples.

LE Roi emploia si grand nombre de deniers a fermer l'aphe, qu'on ne scauroit bonnement dire combien : car il ferma le Bourg de l'un des murs iusques a l'autre : & y auoit bien vingt & quatre Tours, tant grandes que petites : & estoient les Douues curees & faites dedans & dehors. Il y auoit trois grandes portes, dont le Legat auoit eu commission du Roi, d'en faire faire l'une des trois, & de la muraille, depuis celle porte, iusqu'a l'autre. Et pour connoistre par estimation ce que la chose pouuoit bien couster au Roi, il est verité qu'une fois me demanda le Legat, combien i'estimois qu'auoit cousté la porte, & le pan de la muraille qu'il auoit fait faire? & ie lui respondis, dix mille liures : mais il me dist par sa foy, qu'il en coutoit bien trente mille : parquoy on peut penser combien le Roi y despendit.

Quant le Roi eut paracheué de fermer & clore l'aphe, il lui print enuie de faire a Sayecte, comme il auoit fait a l'aphe, & de la reffaire comme elle estoit, auant que les Sarazins l'eussent abbatuë; parquoy il s'esmeut pour y aller, & lui & son ost, le iour de la feste de saint Pierre, & saint Pol : & quant il fut deuant le Chasteau Dasur, il appella du soir son conseil, & demanda aduis d'une chose qu'il auoit enuie de faire : c'est assauoir, qu'il
vou

vouloit prendre vne Cité des Sarazins, qu'on appelloit Naples, qui se nomme es escritures du vieil Testament, Samarie. Lors les Seigneurs du Temple, les Barons & Admiraus du pays, lui conseillerent de le faire : mais qu'il n'y deuoit point estre en personne, de peur des dangers : disans que s'il estoit prins, ou tué, toute la Terre-sainte seroit perduë. Et le Roi respondit, qu'il ne permettroit ia que ses gens y allassent, s'il n'y estoit en personne, & demeura l'entreprinze pour tel discord. Adonc nous nous partismes, & vinsmes par nos iournees, iusques aus Sables d'Acre, ou le Roi se logea, & tout son ost, celle nuit. Et quant vint au l'endemain, il vint a moi vne grand' quantité de gens de la grand' Armenie, qui alloient en Pelerinage en Hierusalem : & me vint supplier icelui peuple, pource qu'ils auoient ouï dire que i'estois le proche du Roi, que ie leur voufisse montrer le Roi S. Loys, & le me firent dire par vn Truchement Latin qu'ils menoient. Lors ie m'en allai vers le Roi, & lui di que ce peuple le vouloit voir : & alors il se print a rire, & me dit que ie les fisse venir deuant lui : & tantost ie lui amenai celui peuple, lequel le vit avec vne grand' reuerence & admiration : puis s'en retourna.

CHAP. LXXII.

*De ce qui aduint a l'Auteur estant logé au
lien de Passe-poullain.*

LE lendemain, le Roi & son ost se partit des Sables d'Acre, & allasmes loger en vn lieu qu'on appelle Passe-poulain, là ou il y auoit de mout belles & claires eaus de Fontaine, dequoi on arrouse les cannes dont est fait le Succre. Et quāt ie fu logé, l'vn de mes Cheualiers me vint dire: Sire, or vous ai-je pas mieus logé que vous n'estiés hier? & l'autre Cheualier, qui m'auoit logé le iour deuant, lui va dire: Vous estes fol trop hardi, quant vous blasmes a Monsieur chose que i'aie faitte: & ce disant, il faillit sur le Cheualier, & le print aus cheueus; dequoi ie fu bien marri, de ce qu'il auoit entrepris vne telle follie deuant moi. si le fis sortir hors de mon logis, & iurai que iamais n'i entreiroit. Ne tarda gueres que le Connestable de France vint deuers moi, & me pria de vouloir reprendre le Cheualier; mais ie lui respondi que i'auois iuré de ne le reprendre; & que ie ne le reprendrois pas, si le Legat ne me donnoit absolution de mon serment.

Adonc le Connestable alla par deuers le Legat, pour le prier de m'absoudre: & lui ayant compté tout le fait, le Legat lui fit response qu'il n'auoit puissance de m'absoudre; car le sermēt que i'auois fait estoit iuste & raisonnable; veu que le Cheualier m'auoit offensé. Ceci ai ie voulu dire, affin que ceus qui liront cette histoire, puissent connoistre combien leger-

re

re chose est a vn homme de faire serment en sa colle; car souuent il s'en repent apres, ainsi que dit le vulgaire: Qui volontiers, & acoup iure, souuent il se pariure.

CHAP. LXXIII.

Ce qui fut fait a la ville de Belinas: & de la source du fleuve Iourdain.

L'Autre iour ensuiuant, le Roi alla deuant la Cité Dāsūr, qui est appellee Tyr en la Bible: & fut le Roi pareillement, en vouloir d'aller prendre vne Cité qui estoit là pres, qu'on appelloit Belinas, & trouua par son conseil, qu'il le deuoit faire; mais qu'il n'y seroit pas present; ce qu'il accorda a grād' peine. Et fut dit, que messire Phelippes de Môtfort, le Sire Dāsūr, messire Gilles le Brun Connestable de France, messire Pierre le Chambellan, & les maistres de l'Hospital & du Temple, avec tous leurs gens d'armes iroient. La nuit venuë, nous nous armasmes, & tirasmes droit a la Cité de Belinas, qui est appellee des Romains, Cæsarea Philippi: seant sur vne belle Fontaine, qu'on appelle Iour: & quant le iour apparut nous nous trouuasmes en vne belle plaine, qui est deuant celle Cité, ou il y a vne autre mout belle Fontaine qu'on appelle Dain: & les deus ruisseaus qui sortent de ses deus Fontaines, se viennent assembler assés loing de la ville: & là est appellé le fleuve qui en procede, le fleuve Iourdain, ou nostre Seigneur Iesus Christ fut baptizé.

Par le conseil des Maistres du Temple,

de l'Hospital, & des Barons du pays, fut
aduise que la bataille du Roi, en laquelle
i'estois, & mes quarante Cheualiers, &
aussi les preud'hommes du pays iroient
entre le Chasteau & la Cité, & entreroi-
ent le droit chemin, & les Hospitaliers a
main senestre, & les Templiers a main
droite de nous: en ce point nous partis-
mes tous d'un accord. Et come nous ap-
prochasmes de la ville par derriere, nous
trouuasmes plusieurs de nos gens mors,
que les Sarazins auoient tués dedans la
cité, & mis dehors. Et le costé ou nous de-
uions passer estoit tresperilleus, car nous
auions trois murs a passer, & si y auoit vn
costé, qui estoit si mal raboté, que nul ne
s'y pouuoit tenir a cheual; & au sommet
d'icelle petite montagne, y auoit grand
quantité de Turcs a cheual, là ou il nous
conuenoit monter. Et tantost i'apperceu
que nos gens rompoient, en vn endroit
les murs de la ville, & vn homme de ceux
là, cuida passer le mur a cheual: mais il
cheut & son cheual sur lui; & quant ie le
vi ainsi tombé, ie m'approché de lui: &
descendis a pié, & prins mon cheual par
le frain, & montasmes hardiment contre-
mont celui Tertre: lors que les Turcs, qui
estoient au haut, nous virent venir vers
eux, si courageusement, ils s'en firent, &
nous laisserent la place. En celle place y a-
uoit vn chemin sur la Roché, qui descen-
doit en la Cité: quant nous fusmes au
haut

haut du Rocher, les Sarazins qui estoient en la Cité, n'oserent venir a nous : mais s'en fuirent hors de la ville, & la laisserent a nos gens, sans nul debat. Or vous deués sçauoir que i'auois avec moi les Allemãs, lesquels quant ils virent que les Turcs a cheual, s'en fuioient droit au Chasteau, qui estoit assés loing de la Cité, ils coururent apres eus maugré moi. Le Chasteau auoit nom Subberbe, & est assis au dessus de la ville, contremont la montaigne que on appelle Liban ; & depuis la Cité iusques au Chasteau, il y ha a passer de tresgrans Rochers. Quant les Allemans virent, que follement ils poursuuiuoient ceus qui estoient montés au Chasteau, qui sçauoient tresbien les destours de celles Roches, ils s'en reuindrent arriere : & voians les Sarazins, que les Allemãs s'en retournoient, ils se mirent a pié, & leur coururent sus, & en descendant des Rochers, ils leur donnoient de grans coups de Masse, tellement qu'ils les reboutoient asprement, iusques au lieu ou i'estois. Et quant ceus qui estoient avec moi, virent le meschief, que les Sarazins faisoient aus Allemans au descendre, & qu'ils les poursuuiuoient tousiours, ils commécerent a s'effroier, & auoir peur ; alors ie leur di que s'ils s'en fuioient, que ie les ferois tous casser, & mettre hors des gages du Roi a jamais. Et ils me respondirent : Sire de Ionuille, nous l'auons beaucoup pire que vous, car vous estes a cheual, pour vous

en fuir quant vous voudrés, & nous sommes a pié; & pource sommes nous en plus grand danger d'estre tués, si les Sarazins venoient iusques ici. Et lors ie descendi a pié avec eus, & enuoiai mon Cheual en la bataille du Temple, qui estoit bien a vne portee d'arbaleste de nous; & ce fis ie, pour leur donner courage. Et ainsi comme les Sarazins chassoient les Allemans, là se trouua vn mien Cheualier, qu'un Sarazin ferit, d'un carrel parmi la gorge, & cheut deuant moi tout mort: & alors me dit vn Cheualier qui auoit nom messire Hugues d'Escoffe, Oncle du Cheualier mort, que ie lui allasse aider, a porter son neueu mort aual, pour le faire enterrer; mais ie n'en voulus rien faire: car le Cheualier estoit allé lassus courir avec les Allemans outre mon gré: parquoy si mal lui en auoit prins, il en estoit cause. Tantost que messire Ian de Vallenciennes, ouit dire que nous estions en grand desarroi, & en grand peril de nos vies, il s'en alla par deuers messire Oliuier de Termes, & a ses autres Cappitaines de la Torte Langue, entre lesquels estoit messire Arnoul de Commenge, duquel i'ai deuant parlé, & leur dit: Seigneurs, ie vous prie & commande de par le Roi, que vous me suivies, pour aller aider au Seneschal de Champagne. & vn Cheualier qui auoit nom messire Guillaume de Beaumont, lui dit que i'estois mort: mais nonobstant, il
vint

vint droit au lieu ou i'estois: & quant ie le
 vi, ie me rendis a lui. Quant messire Oli-
 uier de Termes fut arriué a nous, il vit
 bien que nous estions en grand peril, &
 que nous ne pouuions descendre, par le
 mesme chemin que nous estions montés,
 car les Sarazins nous eussent tous abatus
 & acablés: parquoi il nous fit descendre,
 par vn pendant qui estoit en celle monta-
 gne, comme si nous eussions voulu aller a
 Damas. & disoit que les Sarazins pense-
 roient que nous les voussions aller sur-
 prendre par derriere. Quant nous fusmes
 descendus iusques en la Plaine, il fit met-
 tre le feu a de grans gerbiers de froment,
 qui estoient parmi les champs: & peu a
 peu nous fismes tant, que nous fusmes
 rendus a saulueté, par le bon conseil de
 messire Oliuier de Termes; & le lende-
 main nous nous rendismes a Sayecte, là
 ou estoit le Roi; & trouuasmes qu'il auoit
 fait enterrer les corps des Chrestiens, qui
 auoient esté tués, & lui mesmes les aidoit
 a porter en terre; & soiés certains, que
 plusieurs se bouchoient le nés, pource
 qu'il y auoit aucuns corps, qui estoient
 desia infets: mais le bon Roi n'en fit onc-
 ques semblant de les sentir: & nous auoit
 desia préparé nos logis, pour nous reposer.

CHAP. LXXIIII.

*Le roi de Tartarie prend la ville de Bandac, &
 le Caliphe seigneur d'icelle, & comment.*

CE pendant que nous estions deuant
 Sayecte, vindrent des Marchans au

*c. le chef de
leur secte.*

Roi, lesquels lui apportèrent nouuelles; que le roi de Tartarie auoit prins la Cité de Bandac, & * Lapostole des Sarazins, qui estoit le Sire de la ville, & l'appelloit on, le Caliphe de Bandac, & fut telle la maniere de la prise; c'est assauoir, que le Roi de Tartarie, qui auoit conspiré vne grand' cautelle, manda au Caliphe de Bandac, apres l'auoir assiegé, que pour paix & accord faire entr'eus, il vouloit qu'il fust fait mariage, entre ses enfans, & les enfans d'icelui Caliphe de Bandac. Auquel mandement respondit le Caliphe par son conseil, qu'il estoit trescontent. Parquoi le Roi de Tartarie, lui manda de rechet, que il lui enuoiaist quarante des plus grans personnages qu'il eust en son conseil, pour traiter & accorder leurs mariages; ce que le Caliphe fit, & lui enuoia quarante de ses Conseillers, & le Roi de Tartarie les retint; & manda encores au Caliphe, que ce n'estoit pas assés, & qu'il lui enuoiaist encores autres quarante hommes, des plus riches, & puissans qu'il eust point, afin que leurs traités de mariages fussent plus seurement faits: & le Caliphe, pensant qu'il dist verité, lui enuoia pour la seconde fois autres quarante des plus riches qu'il eust en sa subiettion; & ainsi fit il encores la troisieme fois. Et quant le Roi de Tartarie eut deuers lui, six vingts des plus grans Cappitaines, & des plus riches & puissans hommes de la Cité, il se
pen

penſa bien que le demourant n'eſtoit que menu peuple, qui ne pourroit grandemēt reſiſter, ne ſoi defendre. Parquoy il fit couper la teſte a tous ces ſrx vingts perſonnages qu'il auoit deuers lui, & puis aſſaillit la ville aſprement, & la print, & le Caliphe leur Seigneur auſſi.

Quant il eut la ville en ſa puiſſance, il voulut couvrir ſa deſſoiauté & trahiſon, mettant le blaſmē ſur le Caliphe, lequel il fit mettre en vne cage de fer: & la le fit ieufner tant qu'il peut, iuſques a l'extreme neceſſité: & puis ſ'en vint a lui le Roi de Tartarie, & lui demāda ſ'il auoit point faim de manger; & le Caliphe lui reſpondit qu'oui vraiemēt, & que ce n'eſtoit pas ſans cauſe. Lors le Roi de Tartarie lui fit apporter & preſenter deuant lui, vn grand taillouer d'or, tout chargé de ioiaus, & pierres precieufes; & le Roi lui demanda, Caliphe connoiſtu point ces ioiaus, & ces grans treſors que tu voi deuant toi? Et il reſpondit qu'oui, & que d'autres fois auoient ils eſté ſiens & en ſa puiſſance. Et de rechef le Roi lui demanda ſ'il aimoit bien ces grans ioiaus? Et le Caliphe lui reſpondit qu'oui. Or fit le Roi de Tartarie: Puis que tu aimes tant les treſors, ſi en prens ce que tu voudras, & en mange pour appaiſer ta faim. Le Caliphe lui reſpondit, que ce n'eſtoit pas viande a manger. Lors lui dit le Roi de Tartarie; Or a preſent peus tu voir ta grand' faute: car ſi tu euſſes donné de tes treſors, que tu re-

nois si chers, a tes gens-d'armes pour les soudoier, tu te fusses bien defendu contre moi: mais ce que tu as plus aimé, t'a failli au besoing.

CHAP. LXXV.

Le voyage que l'Auteur fit a nostre Dame de Tourtouze, & de la charge qu'il eut du Roy: & d'une pierre merueilleuse, qui fut donnee au Roy.

DVrant ces choses, vn iour moi estant deuant le Roi, lui priaï qu'il me donnast congé d'ailer en Pelerinage, a nostre Dame de Tourtouze, qui estoit vn voiage bien requis, & ou il y auoit grand' quantité de Pelerins chascun iour: pource que le premier Autel qu'õcque fut fait, en l'honneur de la Mere de Dieu, estoit là, comme lon disoit: & y faisoit nostre Dame de grans miracles tous les iours: & entr'autres, elle en fit vn de mon temps, d'un pauvre homme demoniacle: lequel vn iour fut amené deuant celui Autel de nostre Dame de Tourtouze; & ainsi comme lon prioit Dieu & nostre Dame, pour sa guerison, le Diable, que le pauvre homme auoit dedans le corps, respondit, nostre Dame n'est pas ici, elle est en Egypte, pour aider au Roi de France, & aus Chrestiens, qui auourd'hui arriuent en la Terre-sainte a pié, contre toute Payennie, qui sont a Cheual. Si fut mis en escrit, le iour que le Diable profera ces mots, & fut apporté

porté au Legat qui estoit avec le Roi : lequel me dit depuis, que celui mesme iour nous estions arriués en la terre d'Egypte.

Le Roi tresuolontiers me donna congé d'aller en ce Pelerinage ; & me donna charge de lui acheter pour cent liures de Camelots, de diuerses couleurs, qu'il disoit vouloir donner aus Cordeliers, quant il seroit retourné en France. Au moien dequoy, ie pensai bien qu'il ne demoureroit gueres plus longuement a s'en reuenir en France. Et quant ie fu a Triple, là ou estoit le lieu de mon Pelerinage, apres auoir faitte mon oblation a nostre Dame, i'achetai les Camelots que le Roi m'auoit enchargé : mes Cheualiers me demanderent que i'en voulois faire : & ie leur respondis que ie les achetois pour les reuendre, & y gagner. Et deués sçauoir, que le Prince de celle terre, estant aduerti que i'estois parti de l'ost du Roi, vint au deuant de nous, & nous fit grand'honneur, & nous offrit de grans dons, si nous les eussions voulu prendre : mais nous le remerciasmes humblement, & ne voulusmes rien prendre de lui, que des reliques, que i'apportai au Roi, avec ses Camelots.

Or deués entendre, que quant ie fu de retour, la Roine fut bien aduertie que i'auois esté en Pelerinage, & que i'auois apporté des reliques : & quant ie fu arriué, ie lui enuoiai quatre pieces de Came-

lot, par vn de mes Cheualiers: lequel vint trouuer la Roine en sa Chambre, & aussi tost que le Cheualier fut entré, la Roine se mit à genous deuant ces Camelots, qui estoient enueloppés en vne couaille, pensant que ce fussent les reliques que i'auois apportees. Et quant le Cheualier vit que la Roine s'agenoilloit deuant lui, il fut bien estonné: car il ne sçauoit pourquoy elle le faisoit. Adonc il se mit à genous aussi, & regardoit la Roine. Quant la Roine le vit ainsi agenoiller, che lui dit: Leués vous, Sire Cheualier, vous ne vous deués pas agenoiller, quand vous portés des saintes reliques. Lors le Cheualier lui dit, que ce n'estoient pas reliques: mais que c'estoient Camelots que ie lui enuoiois: adonc la Roine, & les autres Dames, se prindrent fort a rire: & dit la Roine au Cheualier: Sire, Cheualier, mal iour soit donné a vostre Seigneur, quant il m'a fait agenoiller deuant ses Camelots.

I'auois oblié a vous dire, que le Roi estant a Sayccte, vn grand personnage d'Egypte lui enuoia vne Pierre tres-merueilleuse: car iamais on n'en vit de semblable. Elle se leuoit par escailles: & quant on auoit leué vne escaille, on trouuoit outre les deus Pierres, la forme d'un poisson de Mer, qui estoit entaillé là dedās, & au poisson ne faillait riē de couleur ne de façō: & la matiere estoit de mesme que la Pierre.

Le

Le Roi m'en donna vne portion: mais on trouua au lieu dont elle fut leuee, la forme d'une Tanche, en la propre couleur & forme qu'elle doit estre.

CHAP. LXXVI.

Comme le Roy S. Loys eut nouuelles de la mort de sa Mere, & du deuil qu'il en fit: & comme l'Auteur fut enuoyé que. i. pour reconforter la Roine, & des propos qu'il eut avec elle: & quelle auoit esté la Roine Blanche, enuers la Roine de France, femme du Roy S. Loys.

TAntost apres le Roi eut nouuelles que Madame sa Mere estoit morte, dont il mena si grand deuil, qu'il fut par deux iours en sa chambre sans que personne sceust parler a lui: & les deux iours passés, il m'enuoya querir, par vn de ses Vallers de chambre, & aussi tost qu'il me vit, il s'escria, en estendant les bras: Ha Seneschal, j'ai perdue ma Mere! & ie lui dis: Sire, ie ne m'en esbahis point: car vous sçaués qu'elle auoit vne fois a mourir: mais ie m'esmerueille bien du grand deuil que vous en menés, attendu que vous estes si sage Prince: & vous sçaués bien que la peine & douleur que le Sage a en son cœur, ne doit apparoir au visage: car si le visage monstre la tristesse que le cœur a, les ennemis en haufferont leur courage, & les amis seront a mal aise: lors

il s'appaisa vn peu, & fit faire de mout beaus seruices Outre-mer, pour l'ame de saditte Mere : & d'auantage il enuoya vn grand sommier chargé de Pierres precieuses, & autres ioyaus, aus Eglises de France, avec lettres missiues, priant aux Prelats & Chappitres, qu'ils voussissent prier Dieu pour lui, & saditte Dame de Mere.

Après que ie fu parti de la chambre du Roy, madame Marie de Bonnes-vertus, me vint prier que i'allasse deuers la Roine, pour la reconforter, & qu'elle menoit vn merueilleus deuil. Quant ie fu en sa chambre, & que ie la vi pleurer si amèrement, ie ne me peus tenir de lui dire: qu'il estoit bien vrai, qu'on ne doit mie croire femme a pleurer, car le deuil qu'elle menoit, estoit pour la femme qu'elle haioit plus en ce monde. Et lors elle me dit, que ce n'estoit pas pour elle qu'elle pleuroit ainsi, mais que c'estoit pour le grand malaise, en quoi le Roi estoit, & aussi pour leur fille, qui estoit demouree en la garde des hommes: laquelle fut depuis Roine de Nauarre. Et la cause pourquoi la Roine n'aimoit pas la Mere du Roi, estoit pour les grans rudesses, qu'elle lui tenoit; car elle ne vouloit souffrir que le Roy hantast, ne fust en la compagnie, de la Roine sa femme, ains le deffendoit a son pouuoir. Et quant le Roi cheuauchoit aucunesfois par son Royaume, & qu'il auoit

auoit la roine Blanche sa mere, & la roine Marguerite sa femme, communement, la roine Blanche les faisoit separer l'un de l'autre, & n'estoient iamais logés ensemblement. Et aduint vn iour, qu'eus estans a Pontoise, le Roi estoit logé au dessus du logis de la roine sa femme, & auoit instruits ses Huissiers de salle, en telle facon, que quant il vouloit aller coucher avec la roine, & que la roine Blanche vouloit venir en la chambre du roi ou de la roine, ils battoient les chiens, afin de les faire crier: & quant le roi l'entendoit, il se mussoit de sa mere: si trouua celui iour la roine Blanche, en la chambre de la roine, le Roi son mari, qui l'estoit venue voir, pource qu'elle estoit en grand peril de mort, a cause qu'elle estoit blessée, d'un enfant qu'elle auoit eu, & le trouua caché derriere la roine, de peur qu'elle ne le vist: mais la roine Blanche sa mere l'apperceut bien, & le vint prendre par la main, lui disant: venés vous en, car vous ne faites rien ici, & le sortit hors de la chambre. Quant la roine vit que la roine Blanche separoit son mari de sa compagnie, elle s'escria a haute vois: hélas, ne me laisserés vous voir mon Seigneur! ni en la vie, ni a la mort! & ce disant elle se passa, & cuidoit on qu'elle fust morte: & le Roi qui ainsi le croyoit, y retourna la voir subitement, & la fit reuenir de pa-maison.

CHAP. LXXVII.

De la deliberation que le Roy print pour s'en retourner en France. & comme l'Auteur, par le commandement du Roy, conduit la Reine, & ses enfans, d'Acre a Sur : puis traite comme ils se mirent sur Mer pour venir en France.

TAntost apres que le Roi eut fait faire les seruices, pour madame sa Mere, il voulut sçauoir, s'il s'en deuoit retourner en France, ou demourer encores là: & estant sur ce propos, il appella le Legat, & lui fit faire plusieurs processions, en requerant a Dieu, qu'il lui donnast a connoistre, lequel il feroit le mieus a son plaisir, ou de s'en aller en France, ou de demourer. Et apres que les processions furent faites, vn iour que i'estois allé à l'esbat, avec les riches hommes du pays, le Roi me fit appeller: & quand ie fu aupres de lui, ie trouuai le Legat qui estoit avec lui, lequel me dit: Seneschal, le Roi se loue grandement des bons & agreables seruices, que vous lui aués faits, & desire grandement vostre profit & honneur: & me fait vous dire, afin que vous en soyés aise, que son intention est de s'en aller en France, dedans Pasques qui viennent. Et ie respondi, que nostre Seigneur le laissast faire a sa volonté. Apres ces paroles, le Legat se departit du Roi, & me pria de l'accompagner iusqu'a son logis, & me fit entrer

entrer en sa garde-robbe : & incontinent me prenant par les mains, se mit tendrement a pleurer, & me dit : Seneschal, ie suis tres-ioyeus, & rends graces a Dieu, dequoi vous estes ainsi eschappé des grâs perils ou vous aués esté, en cette terre. Et d'autre part ie suis moult triste de quoi il me faut laisser vostre bonne compagnie, pour m'en retourner a Rome, entre gens si desloyaus comme il en y a : mais ie vous dirai, mon intention est de demourer encores vn an apres vous, en Acre, pour despendre tous mes deniers, a faire fermer & clorre les faus-bourgs d'Acre, afin que on ne me vienne rien reprocher.

Le lendemain que ie fu retourné chés le Roi, il me commanda que ie fusse armé, moi & mes Cheualiers. Et quand ie fu armé, ie lui vins demander ce qu'il lui plaisoit que ie fisse : & il me dit, qu'il vouloit que i'emmenasse la Roine, & ses enfans, iusqu'a Sur, qui estoit a sept lieues d'Acre : ce que promi tres-volontiers faire, combien qu'il y auoit grand peril : car nous n'auions, ne paix ne trefues avec les Egyptiens, n'avec ceus de Damas. Si partismes ce matin d'Acre, & vinsmes coucher a Sur, sans auoir aucun empeschement, & si descendismes deus fois par le chemin, en la terre de nos ennemis, pour repaistre & allaitter les petis enfans. Tantost apres le Patriarche, & les Barons du pays, qui longuement auoient accompa-

gné le Roi, voyans qu'il auoit fermé Saye-cte de grans murs, s'en vindrent a lui, & lui rendirent humblement graces, des grans biens qu'il leur auoit faits, & lui dirent: Sire, nous voyons bien clairement, que vostre demeure (avec nous) ne peut gueres plus durer, pource, nous vous conseillons tous de vous en aller a Acre, pour faire apprester vos affaires: afin que soyés prest a partir ce Carefme pour aller en France. Ainsi s'en partit le Roi, de Saye-cte, & vint trouuer la Roine a Sur: & de la partismes, enuiron le commencement de Carefme, & vinsmes a Acre. Et durant le Carefme, le Roi fit mettre ordre a ses Nauires, dont il y en auoit quatorze: & la vigile de la feste S. Marc apres Pasques, le Roi & la Roine s'embarquerent, & fismes voile en plaine Mer, & eusmes assés bon vent au partir: & me dit le Roi a l'heure, qu'il estoit né le iour de S. Marc. Et ie lui respondi, qu'il pouuoit bien dire qu'il estoit René: attendu qu'il estoit eschappé celle mesme feste de S. Marc, de celle dangereuse terre, ou nous auions tât enduré.

CHAP. LXXVIII.

*Ici est escriu bien au long, les fortunes qui ad-
uindrent au Roy, & a ses gens estans
sur Mer, depuis Acre, ins-
ques en la Pro-
uence.*

LE Samedi d'apres, nous arriuasmes en l'isle de Chypre, & vinsmes premierement en vne Montagne pres de la dite itle, qu'on appelloit la Montagne de la Croix, de laquelle on voyoit Chypre. Mais quand se vint sur le vespre, il se leua vne si tres-grand' Bruine, qui descendoit de la terre en Mer, que nous perdismes la Montagne de veue. Au moyen dequoi, nos Mariniers pensoient estre plus loing de l'isle, qu'ils n'estoient.

A cette cause nosdits Mariniers, pour cuider arriuer d'heure en Chypre, s'efforcerent de tout leur pouuoir de nautiger: en sorte que nous vinsmes arriuer sur vne queue de Sable, ou nous fusmes assablés, & commençasmes a auoir grand' peur, pensans que nos Nauires se deussent fendre: mais la bonne fortune nous auoit mieus conduits, que nous ne pensions: car si nous ne nous fussions enterrés en ce lieu, nos Nauires eussent heurté contre des Rochers, qui estoient la pres, couverts, si qu'ils se fussent tous enfondrés. Il y eut vn Marinier qui ietta sa plombee en Mer, & trouua que la Nef n'estoit plus atterree, dont chacun se resiouit: car nous cuidions tous estre noyés. Le matin, le Roy enuoya querir les maistres Nautonniers des Nefs, qui amenèrent avec eus quatre Plongeons (gens qui vont a nou au fons de l'eau, comme poissons) lesquels se ietterent en la Mer, & passerent par des-

sous la Nef ou estoit le Roi: & quand ils furent reuenus sur l'eau, on les ouyt tous quatre a part, pour sçauoir qu'ils auoient trouué: mais chacun d'eus rapporta qu'au lieu ou auoit heurté nostre Nef, le Sable auoit bien emporté trois toises du tison sur quoi estoit la Nef fondée. Et quand on les eut ainsi ouys rapporter l'un comme l'autre, le Roi & nous fusmes bien estonnés. Lors le Roi demanda aus Mariniers conseil, de ce qu'il deuoit faire. lesquels lui dirent: Sire, si vous nous voulés croire, vous descendrés de cette Nef, & vous mettrés en vne autre: car nous voyons bien que puis que le fondement de cette Nef a souffert tel heurt, que les aides d'icelle sont toutes eslochees. Parquoi nous doutons grandement, que quand viendra en la grand' Mer, que la Nef ne puisse endurer longuement les grans coups des vagues, sans se desrompre: & tel exemple auons nous veu d'une autre Nef, qui auoit ainsi heurté, quand vous partistes de France: laquelle estant venue a la grand' Mer, se despeça incontinent, & furent noyés tous ceus qui estoient dedans, fors vne pource femme, qui tenoit son enfant entre ses bras: laquelle se sauua sur vne piece de la Nef. Ce que i'affirmai au Roi estre vrai: car i'auois veu la femme, & son enfant, qui estoient arriués deuant la Cité de Iaphe, & les vi en la maison du Comte de Joigny qui les faisoit nourrir, pour l'hon-

neur de Dieu. Lors le Roi appella ses gens de conseil, pour sçauoir qu'il estoit de faire : & nous lui conseilla fines tous, de faire ce que les Mariniers lui auoient dit. Encores appella le Roi derechef les Nautonniers, & leur demanda sur la foy & loyauté, qu'ils lui deuoient, si la Nef estoit leur, & qu'elle fust pleine de marchandise, s'ils en descendroient point ? & ils lui respondirent tous ensemble, que nenni : & qu'ils aimeroient mieus mettre leurs corps en aduenture, que de laisser perdre vne telle Nef, qui leur cousteroit quarante ou cinquante mille liures. Et pourquoi, fit le Roy, me conseillés vous donques que i'en descende ? Et ils lui respondirent : Sire, vous & nous n'est pas tout vn, car or ni argent ne pourroit estre si grand, qu'il fust tant estimé, comme vostre corps, & de Madame vostre espouse, & de vos trois enfans, que vous aués ici : & pourtāt nous ne vous conseillerons iamais, que vous vous mettiés en tel danger. Or vous dirai-je, fit le Roi, mon aduis : que si ie sors de cette Nef, il y a cinq ou six cens personnes ceans, qui demoureront en l'isle de Chyppre, car ils ne voudront pas essayer le danger de la Mer, & n'y a aucun ceans, qui n'aime autant son corps, comme ie fai le mien : & si vne fois nous descendons, iamais n'auront espoir de s'en retourner en leur pays. Pourtant vous die, que i'aime mieus mettre moi, ma fem-

me, & mes enfans en danger, & en la main de Dieu, que de faire tel domnage a tant de peuple, comme il y a ceans.

En celle Nef du Roi estoit messire Oliuier de Termes, qui estoit le plus vaillant & hardi Cheualier, que ie conu oncques en la Terre-sainte: mais il n'osa demourer en la Nef, & se fit descendre en l'isle de Chypre: & fut plus d'un an & demi, auant qu'il s'en peult reuenir. Or pensés donc qu'eussent peu faire, tant de petits personages, qui n'eussent eu de quoi payer les tributs, attendu qu'icelui messire Oliuier de Termes, qui estoit si grand personnage, eust tant d'affaires?

Après que Dieu nous eut eschappés de ce peril, nous entraimes en vn autre: car il se leua vn si treshorrible & merueilleux vent, qu'il nous reiettoit, maugré nous sur l'isle de Chypre, que nous auions ia passée. Et ietterent les Mariniers quatre de leurs Ancres en Mer, mais oncques ne sceurent arrester nostre Nef, iusques a ce que la cinquieme Ancre y fut ietee. Et sâchés qu'il conuint abbatre les paremens de la chambre du Roi, & estoit si grand le vent, que personne n'y osa demourer, de peur que le vent ne le iettast en la Mer. & la Roine tantost s'en vint en la chambre du Roi, ou elle le cuidoit trouuer, & n'y trouua que messire Giles le Brun, Connestable de France, & moi, qui estions là couchés: & quand ie la vi, ie lui demandai
qu'elle

qu'elle vouloit ? & elle me respondit, que elle demandoit le Roi, pour lui prier qu'il voulist faire quelques veus a Dieu ou a ses saints, afin que nous puissions estre deliurés de celle tourmente: car les Mariniers lui auoient dit, que nous estions en grand danger d'estre noyés. Et ie lui di : Madame, promettés faire le voyage, a monsieur S. Nicolas de Varangeuille, & ie croi que Dieu nous rendra a sauueté en France. Lors elle me respondit, ha Seneschal, i'auois peur que le Roi ne voulist pas que ie fisse le voyage, & qu'il le voulist accomplir en personne. Au moins Dame (si-ie) promettés lui, que si Dieu vous rend en France a sauueté, que vous lui donnerés vne Nef de cinq marcs d'argent, pour le Roi, pour vous, & vos enfans : & vous assure que si ainsi le faites, a la priere de S. Nicolas, Dieu nous aidera. Et ie promets moi-mesmes, que moi retourné a Ionuille, l'irai voir iusques au lieu a pied, & tout deschaus. Lors la Roine promit, de donner a S. Nicolas vne Nef d'argent, & me requit de la pleger, ce que ie fi volontiers. Et tantost apres elle retourna a nous, & nous dit, que Dieu a la supplication de S. Nicolas, nous auoit garantis de ce peril. Et deus sçauoir, que la Roine estant reuenue en France, fit faire la Nef d'argent, & y fit enleuer le Roi, elle & ses trois enfans, les Mariniers, le mast, les cordages, & les gouuërnaus tous d'argent, & cousus a

fil d'argent:laquelle Nef elle m'enuoya:& me manda que ie la portasse, a monsieur S.Nicolas: & ainsi le fi-ie: & encores depuis long temps apres, l'y ai-ie veue, quand nous menasmes la sœur du Roy, au Roy d'Alemagne.

Quand le Roi vit que nous estions eschappés de ces deus perils de Mer, il se leua sur le ban de la Nef, & m'appella: & quand ie fu deuant lui, il me dit: Or regardés, Seneschal, si Dieu ne nous a pas bien monstré son grand pouuoir, quand par vn seul des quatre vents de Mer, i'ay cuidé estre noyé, & tous mes gens aussi! parquoi nous lui deuons rendre grands graces. & ne pouuoit le roi allés se contenter, de parler de ces deus grands perils ou nous auons esté.

En l'isle de Chyppre, nous prinsmes eau fresche, & autres petites choses, qui nous estoient necessaires:& de la vinsmes en vne autre isle, que l'on appelloit l'isle de Lampieuse, en laquelle nous descendismes, & y prinsmes grand' quantité de connils: & y trouuasmes vn Hermitage ancien,dedans les roches: & en cet Hermitage auoit vn beau courtil, qui estoit affié d'Oliuiers, Figuiers, Seps de vignes, & de plusieurs autres petis fructiers:& au milieu auoit vne belle Fontaine, dont sortoit vn petit ruisseau, qui couroit par tout le courtil. Le roi, & nous allasmes iusques au bout du courtil,& trouuasmes

vn

vn Oratoire, dont en la premiere voute que nous trouuafmes, qui estoit blanchie de chaus, y auoit vne belle Croix de terre vermeille: & en vne autre voute plus auant, nous trouuafmes deus corps morts, qui auoient les mains sur le pis, & n'y auoit rien plus que les costes, qui s'entre-tinssent, & estoient ces deus corps couchés vers Orient, ainsi qu'on a de coustume, de mettre les autres morts en terre: & quant nous eufmes bien veu par tout, le Roi & tous nous autres, nous retirafmes en la Nef: & quand nous fusmes dedans, le maistre Marinier nous dit, qu'il auoit perdu vn de ses Mariniers, & se pensoit bien, qu'il estoit demouré en l'Hermitage, pour y viure le demourant de sa vie. A cette cause le Roi fit laisser trois sacs pleins de Biscuit, sur la riuë d'icelle Isle, afin que le Marinier qui estoit là demouré, les trouuaft, & qu'il en vesquist.

Après par nos iournees, nous vinsmes a passer aupres d'vne autre Isle, qui auoit nom Pantaneele: laquelle estoit peuplée de Sarazins, qui estoient subiets, partie au Roi de Cecille, & partie au roi de Tunes: & d'aussi loing que nous descourismes celle Isle, la Roine requit au Roi que son plaisir fust, enuoyer trois Gallees en celle Isle, pour apporter des fruits a les trois enfans: & ainsi le fit le Roi, & leur com-manda qu'ils se despechassent hastiue-ment de nager, afin qu'ils fussent tous

prests de venir a lui quand il passeroit deuant l'isle. Or il auint que quand le roi passa deuant le Port de ladite Isle, il ne trouua point cesdites trois Gallees, qu'il auoit enuoyees. Adonc le roi demanda aus Mariniers leur conseil, & qu'il leur sembloit desdites trois Gallees. Les Mariniers lui respondirent, qu'il leur sembloit que les Sarazins auoient prises ses Gallees, & les gens qui estoient dedans. Partant, Sire, nous vous conseillons (firent-ils) que vous ne les attendés pas: car vous estes ici pres des royaumes de Cecille, & de Tunes, dont les rois ne vous aiment gueres, ne l'un ne l'autre: & si vous nous voulés laisser nager, nous vous mettrons encores auuit hors de leurs dangers: car nous passerons en bref tous leurs destroits. Vrayement, dit le Roi, ie ne vous en croirai ja, & vous commande que vous tournés les voiles de la Nef, & que nous allions querir nos gens. Et quoi qu'il en fust, il nous conuint ainsi le faire, & delayasmes bien huit iours, pour les attendre, pour leur gloutonnie, qu'ils s'estoient demourés a manger.

Vn autre accident arriua en Mer, en la Nef de messire Dargones, qui estoit l'un des plus puissans Seigneurs de Prouence: c'est que lui estant au lit, le Soleil venoit frapper sur son visage par vn pertuis: lors il appella vn de ses Escuyers, & lui commanda de boucher le pertuis. Et pour ce faire

faire l'Efcuyer fortit hors de la Nef, & en sortant, le pied lui faillit, & cheut en la Mer. Incontinent qu'il fut cheut, la Nef s'ellongna de lui, & n'y auoit aucun es- quif pour le secourir: nous qui estions en la Nef du Roi, qui venions apres, le vis- mes bien vne lieue loing de la Nef, dont estoit cheut, & cuidions que ce fust quel- que autre chose, qui fust en la Mer: car ce- lui Efcuyer ne se bougeoit, ni ne s'aidoit en aucune façon: & quand nous l'eusmes apperceu de pres, l'vne des Gallees du Roi le recueillit, & fut mis en nostre Nef.

Nous lui demandasmes pourquoi il ne s'aidoit autrement en la Mer, ou a nager, ou a crier aus gens de sa Nef? Et il nous dit, qu'il n'auoit nul besoing de le faire: car si tost qu'il fut tombé en la Mer, il a- uoit inuoqué nostre Dame de Vauuert: laquelle le soustenoit par les espaules, iuf- qu'a tant que la Gallee du Roy fust arri- uee a lui.

CHAP. LXXIX.

*Somme le Roy print terre au Port d'Ieres: Et
comme l'Abbé de Cluny vint deuers lui: Et
de la longue audience que le Roy lui donna.
d'un Cordelier predicateur que le Roy voulut
ouyr.*

AV bout de six semaines, que nous fusmes partis d'Acre, nous vinsmes arriuer au Port d'Ieres, deuant le Cha-

steau, qui estoit au Comte de Prouence, qui aussi estoit Duc d'Anjou, & frere du Roi: & tout le conseil fut d'opinion que le Roi deuoit descendre là, & qu'il estoit en la terre de son frere: mais le Roi dit qu'il ne descendroit ia, iusqu'a ce qu'il seroit a Ayguesmortes, qui estoit sa terre. & sur ce differant nous tint le Roi, le Mecredi, & le Ieudi, sans qu'il voulist accorder a descendre. Et le Vendredi, comme il estoit seant, sur vn des rangs de la Nef, il m'appella, & me demanda conseil, s'il deuoit descendre, ou non. Je lui di qu'il me sembloit qu'il deuoit descendre: & lui contai que Madame de Bourbon, estant vne fois en ce mesme Port, ne voulut descendre, ains se remit sur Mer, pour aller en Ayguesmortes: mais elle demoura bien sept semaines, ou plus sur Mer. Adonc le Roi s'accordant a mon conseil, descendit a Ieres, dont la Roine & les autres furent bien ioyeus.

Le Roi & toute sa gent, seiourna au Chasteau d'Ieres, ce pendant qu'on pourchassoit des cheuaus pour nous en venir en France: durant lequel temps, l'Abbé de Cluni, qui fut depuis Euesque de Loline, enuoya au Roi deus beaus Palefrois, l'vn pour lui, & l'autre pour la Roine: lesquels estoient estimés, valoir chacun cinq cens liures. Apres l'Abbé vint vers le Roi, & lui supplia qu'il lui donnast audience le lendemain, touchant ses affaires

res : ce que le Roi lui ottroya volontiers. Et le lendemain, l'Abbé ne faillit pas : & parla au Roi longuement : qui l'escoutoit a grand plaisir. Quand l'Abbé se fut parti, ie demandai au Roi, si ie lui demandois quelque chose a reconoistre, s'il le feroit? & il me dit, qu'ouy volontiers. Adonc ie lui di : Sire, n'est il pas vrai que vous aués escouté l'Abbé de Cluni, ainsi longuement, pour les deus Cheuaus qu'il vous a donnés? Et le Roi me respondit, que certes ouy. Et alors ie lui di, que ie lui auois fait telle demande : afin qu'il deffendist aus gens de son conseil iuré, que quand ils arriueront en France, qu'ils ne prissent rien de ceus qui auroient affaire a eus : car soyés certain, si-ie, que s'ils prennent, ils en escouteront mieus, & plus longuement, ainsi que vous aués fait l'Abbé de Cluni. Lors le roi appella tout son conseil, & leur conta en riant, la demande que ie lui auois faite, & la raison d'icelle : a quoi ils respondirent que ie lui auois tresbien conseillé.

On dit au roi, lui estant a Ieres, qu'il y auoit vn Cordelier, qui s'appelloit, frere Hugues, qui alloit prescher par le pays, & estoit de grand sçauoir, & d'une tresbonne vie. le roi le voulut voir & ouyr prescher : parquoi il fut enuoyé querir : & quand il arriua a Ieres, nous allasmes au deuant de lui, & visines que grand' compagnie de gés le suiuiot a pied. Quand

il fut arriué, le roi le fit prescher: & le premier Sermon qu'il fit, fut sur les gens de Religion, qu'il blasmoit grandement pource qu'il voyoit qu'en la compagnie du roi en y auoit plusieurs: & disoit qu'un Religieus ne pouuoit viure hors du cloistre, sans pecher continuellement: & tout ainsi que le poisson hors de l'eau, ne peut viure, aussi le religieus hors de son cloistre, ne peut viure en vertu, & selon son obseruance.

Après qu'il eut longuement parlé des gens de religion, il adressa sa parole au roi, & lui donna plusieurs enseignemens: & entre autres, que s'il vouloit longuement viure en paix, & au gré de son peuple, qu'il fust droiturier: & disoit que les royaumes & Seigneuries estoient mués & changés d'un Seigneur a autre, par faute de faire iustice & droiture. Pource disoit-il, se garde bien le roi qu'il face administrer iustice en son royaume de France: afin qu'il puisse viure en paix.

Après qu'il eut presché, le roi le fit prier plusieurs fois qu'il voulsist demourer avec lui, tât qu'il seiourneroit en Prouence, mais oncq' ne le voulut faire: & disoit qu'il ne demoureroit iamais en la compagnie d'un roi. Et vne fois le roi me print par la main, & allasmes au Cordelier, lui prier qu'il voulsist demourer: mais il respondit bien rigoureusement, qu'il n'en feroit ia riens, & qu'il s'en iroit en autre lieu.

lieu, ou Dieu l'auroit plus agreable, qu'en la compagnie du Roy. Il ne fut qu'un iour avec nous; & le lendemain s'en alla contremont: j'ai depuis ouy dire qu'il gist a Marseille, la ou il fait de beaux miracles.

CHAP. LXXX.

Comme le Roy estant arrive en France, Antheur print congé de lui, & alla en sa maison, a Ionuille: puis comme il vint vers le Roy, a Soissons, & des choses qui se traistoyent en ce temps-là. le mariage du Roy de Navarre avecques la fille du Roy S. Loys.

A Pres ces choses, le Roi partit d'Ieres, & s'en vint en la ville d'Aix, pource qu'il vouloit aller visiter la Magdaleine, qui gisoit a vne iournee là pres: & y fut le Roi, & visita le lieu qui est appelle la Basme, qui est vn haut Rocher, ou la Magdaleine (comme lon disoit) avoit vescu longue espace de temps en Hermitage. D'Aix le Roi vint loger a Beaucaire, qui est en sa terre. Et quand ie vi qu'il estoit en son pouvoir, ie prins congé de lui, & m'en allai a Ionuille, ou ie sejour nai quelque espace de temps. Apres ie m'en parti de là & m'en allai a Soissons, ou ie trouvai le Roi, qui me fit si grand' chere, que tous s'en esmerueilloient. Là ie trouvai le Comte Ian de Bretagne, & sa femme, le Roi Thibaut de Navarre, & la fille du Comte Thibaut de Champagne.

& pource que le Roi de Nauarre preten-
doit quelque droit, au pays de Champ-
agne, le Roi leur donna assignation, a lui
& a la fille de Champagne, a Paris en Par-
lement, pour les ouyr, & leur faire droit.
Au moyen dequoi nous y allasmes tous
avec le Roi.

Quant nous fusmes a Paris, le Parle-
ment fut tenu: & pource que le Roi de
Nauarre, auoit deliberé de demander a
femme, Ysabeau fille du Roi S. Loys, nos
gens de Champagne m'amenerent pour
en porter la parolle au Roi, pource qu'ils
auoient veu le bon visage & amitié qu'il
m'auoit monstree a Soissons. Parquoi ie
m'en allai delibereement vers le Roi, &
lui parlai de ce mariage. Et il me dit, Se-
neschal allés vous en premier accorder &
faire vostre paix avec le Comte de Bre-
tagne, & puis cela fait le mariage s'ac-
complira: ie lui di qu'il ne deuoit demou-
rer pour cela. & il me respondit, que pour
aucune chose il ne mariroit sa fille outre
le gré de ses Barons, & iusques a ce que la
Paix fust faite au Comté de Bretagne.

Tantost ie m'en retourné deuers la
Roine Marguerite de Nauarre, & le Roi
son fils, & deuant leur conseil racomptai
la responce, que le Roi m'auoit faitte. La-
quelle par eux entendue, s'en allerent fai-
re leur Paix au Comte de Bretagne: & a-
pres la Paix faitte, le mariage fut conclu,
entre le Roi Thibaut de Nauarre, & Ysa-
beau

beau de France fille du Roi : & furent les nopces faites a Melun, a grand triomphe : & de là le Roi de Nauarre , mena sa femme a Prouins , ou ils furent honnorablement receus.

CHAP. LXXXI.

Comme le Roy S. Loys se maintenoit depuis qu'il fut retourné de son voyage d'Oltre-mer: tant en son vestement, que manger.

IE vous veus maintenant compter la maniere, comme le Roi vesquit, depuis qu'il fut venu d'Oltre-mer. Et deués sçauoir , qu'oncques puis en ses habits, ne voulut porter menus vert, ne gris, ne estoilette, oncques eltriefs ni esperons dorés il ne porta : ses robbes estoient de camelin ou de pers, & les fourrures de garrintes, ou de iambes de Lieure. En sa bouche il fut si tres-sobre, qu'oncques il ne deuïsa , qu'on lui appareillast diuerses viandes & delicieuses : nrais prenoit patiemment de ce qu'on seruoit deuant lui. Il buuoit tousiours en vn voirre, & atrempoit bien fort son vin. Communement quant il mangeoit, il auoit derriere lui, des pources grand' quantité, qu'il faisoit repaître, & puis leur donnoit de ses deniers. Apres disner, il auoit des Prestres, qui lui disoient graces: & communement apres disner, quant il estoit en son priué, il se seoit volontiers sur le pié de

son lit : & quand quelque prescheur lui vouloit alleguer quelque liure ou authorité, il lui disoit ; ne m'alleguez point ici, car il n'y a que beaux quolibets, apres le manger, & que chacun die ce qu'il voudra honnestement. ~

CHAP. LXXXII.

De sa prudence & bon conseil. & de ce qu'il respondit a l'Euesque d'Auxerre, & autres Prelats, a vne requeste qu'ils lui auoient faite.

IL estoit tenu le plus sage homme, qui fust en tout son conseil, & qui auoit plus grand' prudence, a pouruoir aus affaires soudains : en sorte que quand il lui aduenoit quelque chose d'importance, dont il failloit respondre necessairement, iamais il n'attendoit son conseil, quand il voioit que la chose requeroit celerité. Vne fois ie fu present qu'il respondit a tous les Prelats de France, d'une requeste, qu'ils lui firent, qui fut telle : que l'Euesque d'Auxerre lui dit: Sire tous les Prelats d'Englise que vous voies ci, me font dire, que la Foy Chrestienne deschoit, & sera encores pis, si vous n'y mettés remede. Par tant nous vous requerons humblement, que vous faciés ordonnance, & commandement, a tous les iuges & iusticiers de vostre Roiaume, qu'ils contraignent tous ceus qui auront esté an & iour en sentence d'excommuniment, a se faire absoudre

& satisfaire a nostre mere sainte Eglise. Et le Roi respondit, que moult volontiers il feroit faire le commandement, ainsi qu'ils le requeroient: mais que ses iuges & iusticiers, eussent premierement, & auant toute œuvre, connoissance si la sentence estoit a bon droit donnée, ou non. Et apres que les Prelats eurent entr'eus consulte, dirent au Roi, que iamais ils ne souffriroient qu'il eust conoissance sur la iustice Ecclesiastique. Et alors le Roi leur respondit, qu'il ne vouloit pas aussi, que de ce qui appartenoit a sa iustice, qu'ils en eussent aucune connoissance: & qu'autrement il feroit contre raison, & leur donna l'exemple. N'aués vous pas bien sceu (fit il) que l'Euesque de Bretaigne a tenu par l'espace de sept ans, le Comte de Bretaigne, en sentence d'excommuniment, & toutes fois pource que c'estoit a tort, il a esté absous en Court de Romme? Ainsi donc, si ie l'eusse contraint de se faire absoudre des la premiere année, force lui eust esté qu'il eust baillé a l'Euesque de Bretaigne, ce qu'il demandoit; & en ce faisant ie lui eusse fait grief & tort.

CHAP. LXXXIII.

*Combien lui estoient en horreur les blasphemers.
& comme il faisoit punir les blasphemateurs.*

IE demourai en sa compagnie par l'espace de vingt & deus ans, mais onques en ma vie pour quelque courroux qu'il

eust, ne lui ouis iurer ne blasphemer Dieu, ne sa digne Mere: mais quant il vouloit affermer quelque chose, il disoit: Vraiment il est ainsi, Vraiment il ne va pas ainsi: & le monstra bien Outre-mer, quant il ne voulut iamais renier Dieu, au cas qu'il faudroit la foi baillée au Soudā, quant il estoit prisonnier, ainsi qu'aués entendu ci deuant. Tous ceus qu'il pouuoit attaindre d'auoir fait aucun villain serment, ou renier Dieu, & les saints, il les faisoit griefuement punir.

Je vi vne fois a Cefarée, Outre-mer, qu'il fit eschaller vn Orfeure, en braies & chemises mout villainement, & a grand deshonneur, pour auoir blasphemé Dieu. Et depuis qu'il fut retourné d'Outre-mer, il fit brusler, & merquer a fer chaut le nés & la balieure d'un Bourgeois de Paris, pour vn blasphème qu'il auoit fait. Et ai oui dire au Roi, de sa propre bouche, qu'il eust voulu auoir esté seigné d'un fer tout chaut, & il eust peu tant faire, qu'il eust osté tous les blasphèmes, & iuremens de son Royaume. Iamais ie ne lui ouis nommer, ni appeller le Diable, si ce n'estoit quant il lisoit quelque liure, qu'il le lui fallust nommer par exemple; qui estoit vne chose grandement vertueuse a vn Roi. que pleust a Dieu que tous les autres Seigneurs le ressemblassent en cela: car ie voi qu'on ne sçait pas dire trois mots, que le nom du Diable n'y soit entre

trelassé.

CHAP. LXXXIIII.

De sa charité enuers les pauvres: & autres choses à ce mesme propos.

IL estoit si charitable enuers les pources, que chacun en auoit grande admiration. Par tout la ou il alloit en son Royau-
me, il visitoit les pources Eglises, les Mal-
laderies & Hospitaus, & s'enqueroit des
pources Gentils-hommes, & des pources
Femmes vefues, & pources filles a marier,
& leur donnoit largement de quoi viure.
Il y auoit communement vi. xx. pources,
qui estoient repeus par chacun iour en sa
maison, quelque part qu'il fust: & au
temps de Carefme il en auoit douze
vingts, & leur faisoit donner de ses pro-
pres viandes qu'il mangeoit: & plusieurs-
fois l'ai veu moi-mesmes, qu'il seruoit les
pources, & leur donnoit a boire. Et quant
se venoit aus Festes annuelles, le iour des
vigiles, auant qu'il beust ne mangeast, il
les seruoit a table; & apres le repas, il leur
donnoit certaine somme de deniers; &
vous assure qu'il estoit si grand aumos-
nier, & donnoit si largement aus pources,
qu'il y eut aucuns de ses familiers, qui
murmuroient de ce qu'il faisoit si grans
dons & aumosnes: mais le bon Roi leur
respondit, qu'il aimoit mieus faire grans
& excessifs despens, a faire des aumosnes,
qu'en boubans & vanités mondaines.

Toutesfois quelques aumosnes qu'il fist, ne laissoit il pas a faire grande & large despense en sa maison, & telle qu'il appartenoit a tel Prince; en sorte qu'aus Parlemens & estats, qu'il tenoit a faire ses nouueaus establissemens, il faisoit seruir tous les Cheualiers, & autres, en plus grand'abondance, & plus exquisement, que iamais n'auoient fait ses predecesseurs.

Il me demanda vn iour, si ie lauois point les piés aus pources, le iour du Ieudi absolu: & ie lui respondi que non, & que il me sembloit que cela n'estoit point honeste. Adonc le bon Roi me dit, ha Sire de Ionuille, vous ne deués pas auoir en desdain, ce que Dieu a fait pour nostre exemple, qui les laua a ses Apostres, lui qui estoit leur maistre, & sans nulle comparaison plus digne qu'eus. Et croi que bien a tard feriés vous ce que le Roi d'Angleterre, qui ores est, fait; car a celui iour du Ieudi saint, il laue les piés aus Ladres, & puis les baise.

CHAP. LXXXV.

De plusieurs Eglises & Monasteres, qu'il a fondees & dotees, comme il conseroit les benefices.

IL fit faire & edifier plusieurs Eglises & Monasteres; c'est assauoir, Reaumont, l'Abbaye de saint Anthoine lés Paris, l'Abbaie du Lis, l'Abbaie de Malborson, & plusieurs autres religions de Iacobins,
&

& Cordeliers. Il fit semblablement faire la maison-Dieu de Pontoise, celle de Vernoul, la maison des Quinze-vingts de Paris, & l'Abbaie des Cordeliers de saint Clou, que madame Ysabeau sa sœur fonda a sa requeste.

Les benefices des Eglises qui escheoient a sa donaison, auant qu'il en voulust pouruoir aucun, il s'enqueroit a bonnes personnes, de l'estat & condition de ceus qui les demandoient, pour sçauoir s'ils estoient clerics, & lettrés : & ne vouloit iamais que ceus a qui il donnoit les benefices, en tinssent plus qu'a leur estat n'appartenoit : & ne les donnoit que par grand conseil de gens de bien.

CHAP. LXXXVI.

De la bonne iustice qu'il faisoit faire; & des bonnes Ordonnances, dignes d'estre veues, qu'il fit publier par son Royaume : & du grand bien qui aduint en France, au moyen de la bonne iustice qu'il y faisoit exercer.

IL estoit si doiturier, qu'il ne reffusoit iamais iustice a ceus qui la lui demandoient; & estoit sa principale cure de bien regler ses Iuges, & iusticiers, & oster du tout les abus qui se faisoient en iustice. A cette cause, il fit vn tresbel Edit, sur le reglement de ses officiers; lequel i'ai voulu inserer a mon hystoire, pour donner vouloir aus Rois de France, qui seront

apres lui, de le faire obseruer & garder, selon sa teneur, qui est telle.

NOUS Loys par la grace de Dieu Roi de France, Establiſſons que tous nos Baillifs, Preuoſts, Maires, Iuges, Receueurs, & autres, en quelques offices qu'ils ſoient, que chaſcun d'eus doreſnauant fera ſerment, que tant qu'ils ſeront exerçans leſdits offices, ils feront droit & iuſtice a vn chaſcun, ſans auoir aucune acception de perſonnes, tant a poures, comme a riches, & a l'eſtranger, comme au priué; & garderont les vs, ſtyles, & couſtumes, qui ſont bonnes & approuuees. Et ſi par aucun d'eus eſt fait au contraire de leur ſerment, nous voulons, & expreſſement enioignons, qu'ils en ſoient punis, en biens & en corps, ſelon l'exigence des cas. La punition deſquels nos Baillifs, Preuoſts, Iuges, & autres officiers, nous reſeruons a nous, & a noſtre connoiſſance: & a eux, de leurs inferieus & ſuietſ. Nos Treſoriers, Receueurs, Preuoſts, & Auditeurs des comptes, & autres officiers & entremetteurs de nos finances, iureront que bien & loyaument ils garderont nos Rentes & Domaines, auec tous & chaſcuns nos droits, libertés, & préeminances: ſans laiſſer, ne ſouffrir en eſtre rien ſouſtrait, oſté ni amenuiſé. Et auec ce qu'ils ne prendront, ne laiſſeront prendre, eus ne leurs gens & commis au-

cuns

cuns dons , ne presens qu'on leur veuille faire , a eus , n'a leurs femmes & enfans , n'a autres , pour & en leur faueur. Et si aucun don en est receu , qu'ils le feront incontinent , & sans delai rendre & restituer. Et semblablement qu'ils ne feront faire aucuns dons , ne presens , a aucunes personnes , dont ils soient suiets , pour quelque faueur ou support. Et avec ce iureront , que là ou ils sçauront , & connoistront aucuns officiers , sergens , ou autres qui soient rapineurs , abuseurs , en leurs offices , parquoi ils doiuent perdre leurs dits offices , & nostre seruice , qu'ils ne les soustiendront , ne celeront , par faueur , promesse , ni autrement. Ains qu'ils les puniront , & corrigeront , selon que le cas le requerra , en bonne foi & equité , & sans aucune haine ne rancune. Et voulons , iacqoit ce que lestdits sermens soient prins deuant nous , que ce nonobstant , ils soient publiés deuant les Clercs , Cheualiers , Seigneurs , & toutes autres gens de commune : afin que mieus & plus fermement ils soient gardés , & qu'ils ayent crainte d'encourir le vice de pariure : nompas seulement pour la crainte & punition de nos mains , & de la honte du monde : mais aussi de la peur & punition de Dieu. Et apres nous prohibons & defendons , a tous nosdits Baillifs , Preuosts , Maires , Iuges , & autres nos officiers , qu'ils ne iurent , ne dient aucune parole de

Dieu, de sa digne Mere, & benoists Saints & Saintes de Paradis: & a semblable qu'ils ne soient ioueurs de dés, ne frequentans les Tauernes & Bourdeaux, sur peine de priuation d'office, & de punition, telle qu'au cas appartiendra. Nous voulons aussi, que toutes les folles femmes de leurs corps, & communes, soient mises hors des maisons priuees, & separees d'auec les autres personnes, & qu'on ne leur louëra, n'affermira aucunes maisons, ne habitations, pour faire & entretenir leur vice, & peché de luxure. Apres ce, nous prohibons & deffendons, que nuls de nos Baillifs, Preuosts, Iuges, & autres officiers, & administrateurs de iustice ne soient tant hardis, d'acquérir ni acheter par eus, ne par autres, aucunes terres, ne possessions es lieux dont ils auront la iustice en main, sans nostre congé, licence, & permission: & que soions premiere-ment acerrenés de la chose: & si au contraire le font, nous voulons & entendons, lesdittes terres & possessions, estre confiscuees en nostre main. Et au semblable, ne voulons que nos dessusdits officiers, superieurs, tant qu'ils seront en nostre seruice, marient aucuns de leurs fils, filles, ni autres parens qu'ils ayent en leurs baillies & ressorts, sans nostre congé especial. Et tout ce desdits mariages & acquests deffendus, n'entendons point auoir lieu, entre les autres iuges & officiers in-
fer

ferieurs, ni entre autres mineurs d'office. Nous deffendons aussi, que Baillif, Preuost, n'aucun autre, ne tiennne trop grand nombre de Sergens, ni de Bedeaux, en façon que le commun peuple ne soit greué. Nous deffendons pareillement, que nuls de nos suiets, ne soient prins au corps, ni emprisonnés pour leurs dettes personnelles, fors pour les nostres, & qu'il ne soit leuee aucune amende sur nosdits suiets, pour sa dette. Auec ce, nous establissons, que ceus qui tiehdront nos Preuostés, Vicomtés ou autres nos offices, qu'ils ne les puissent vendre ne transporter a autre personne, sans nostre congé. Et quant plusieurs seront compagnons en vn office, nous voulons que l'vn l'exerce pour tous. Nous deffendons aussi qu'ils ne deslaisissent homme de saisine qu'il tiennne, sans connoissance de cause, ou sans nostre especial commandement. Et ne voulons qu'il soit leué aucunes exactions, pilleries, tailles, ne coustumes nouvelles. Aussi nous voulons que nos Baillifs, Preuosts, Maires, Vicomtes, & autres nos officiers, qui par aucun cas seront mis hors de leurs offices & de nostre seruice, qu'ils soient, apres ce qu'ils seront ainsi deposés, par quarante iours residens au pais desdittes offices en leurs personnes, ou par Procureurs especial: afin qu'ils respondent a ceus qui viendront nouvellement ausdites offices, a ce qu'ils

leur voudront demander de leurs mesfaits, & de leurs plaintes.

Par lesquels establissemens ci dessus, le Roi amanda grandement son Royaume, tellement que chacun viuoit en Paix & tranquillité. Et deués sçauoir qu'au temps passé, l'office de Preuost de Paris se vendoit au plus offrant: dont il aduenoit que plusieurs pilleries, & malefices estoient commis: & estoit totalement iustice corrompuë par faueurs, dons, & promesses, dont le commun peuple, n'osoit habiter au Royaume de France: en sorte qu'il estoit presque vague. Et souuentefois n'y auoit il aus plaits de la Preuosté de Paris, que dix personnes au plus, pour les iniustices, & abusions que l'on y faisoit. Pourtant ne voulut plus le Roi, que la Preuosté fust vendue, ains estoit office qu'il donnoit a quelque grand sage homme, avec bons gages: & fit abolir toutes les mauuaises coustumes, dont le pource peuple estoit greué au parauant: & fit enquerir par tout le païs, ou il pourroit trouuer quelque bon iusticier: & lui en fut amené vn qu'on appelloit Estienne Boyleau, auquel il donna l'office de Preuost de Paris: lequel depuis se gouerna tressagement audit office, en sorte qu'il n'y auoit larron, ni autre malfaiteur, qui osast demourer en Paris, que tantost il ne fust pandu, ou puni a la rigueur de Iustice, selon la qualité du delit.

CHAP. LXXXVII.

L'instruction qu'il bailloit à ses Enfans.

LE Roi auant que s'aller coucher, le plus souuent, faisoit venir ses enfans deuant lui, & leur recordoit les beaus faits & dits des Rois, & autres Princes anciens: & leur disoit qu'ils les deuoient retenir, pour y prendre exemple. Et pareillement leur monstroit les faits des mauuais Hommes, qui par luxures, rapines, auarices, orgueils, auoient perdu leurs terres & seigneuries: & les enhortoît d'en auoir souuenance, afin de ne faire comm'eus.

CHAP. LXXXVIII.

*De l'accord qu'il fit avec le Roi d'Angleterre;
& qui le mouuoit a cela faire.*

DVrant le temps que le Roi S. Loys menoit telle sainte vie, il moienna de faire venir en France le Roi d'Angleterre, sa femme, & leurs enfans, pour faire Paix & accord entr'eus. Ce que les gens de son cōseil, lui empeschoient tousiours de faire, & lui disoient: Sire, nous sommes grandement esmerueillés, comme vous voulés consentir, a bailler au Roi d'Angleterre, si grand' partie de vostre terre, que vous & vos predecesseurs aués acquise sur lui, & par ses meffaiets: & nous semble que vous n'en estes pas bien aduertti, car le Roi d'Angleterre ne vous en

sçaura ne gré ne graces. Et le Roi leur respondoit, qu'il sçauoit bien que le Roi d'Angleterre, & son predecesseur, auoient iustement & a bon droit perdu les terres qu'il tenoit, & qu'il n'entendoit leur rendre aucune chose, aquoi faire il fust obligé: mais il faisoit seulement, pour entretenir Paix & vnion, entr'eus & leurs enfans, qui estoient cousins germains: & pense, faisoit il, qu'en ce faisant ie ferai tresbien: car en premier lieu, ie ferai Paix avec le Roi d'Angleterre, & secondement ie le ferai mon Homme lige, qu'il n'est encores, car il ne m'a fait aucun hommage.

CHAP. LXXXIX.

De la Paix & accord que le Roi moyennoit, tant enuers les Princes & Seigneurs de son Royaume, comme enuers ses voisins: & de la rejsponse qu'il fit à son Conseil, qui le vouloit empescher de cela faire.

ET deués sçauoir, que le roi S. Loys fut le Prince du monde, qui plus se traouailla a mettre Paix entre ses suiets: & par especial, entre les Princes & Seigneurs de son Royaume, & des voisins. Il fit la Paix, apres nostre retour d'Outre-mer, entre le Comte de Challons mon oncle, & le Comte de Bourgoigne son fils, qui auoient grand' guerre ensemble. Et pour faire ledit accord, il enuoia plusieurs gens de son conseil, iusques en Bourgoigne, a ses desp

despens,iusques a ce que le traitté de paix fut conclud. Pareillement il mit d'accord le second Roi Thibaut de Nauarre , avec les Comtes de Chassons , & de Bourgoigne , qui faisoient grand' guerre l'un contre l'autre:& le fit a ses propres despens.

Après qu'il eut faite la paix , entre les Princes dessusdits , il s'esmeut vne grand' guerre,entre le Comte Thibaut de Bar,& le Comte de Luxembourg , qui auoit sa sœur a femme : lesquels se combattirent l'un l'autre main a main,deffous Pigni, & print prisonnier le Comte de Bar, le Comte de Luxembourg , apres gaigna le Chasteau de Lignei , qui estoit au Comte de Luxembourg,acause de sa femme. Et pour faire la Paix , le Roi y enuoia monsieur Perron le Chambellan , qui estoit l'homme du mode , en qui il croioit plus: & tant si trauailla le Roi,qu'il les appointa.

Les gens de son grand Conseil le reprenoient aucunesfois , pource qu'il prenoit ainsi grand' pene a appaiser les estrangers , & qu'il faisoit mal qu'il ne les laissoit guerroyer , & que les appointemens s'en feroient mieus apres. A quoi leur respondit le Roi , qu'ils ne disoient pas bien : car disoit il , si les Princes & grans Seigneurs qui sont voisins de mon Royaume , voioient que ie les laissasse guerroyer les vns aus autres, ils pourroient dire entr'eus que le Roi de France , par sa

malice nous laisse guerroyer; & pource pourroient ils auoir haine a moi, & me pourroient venir courir sus, dont mon Royaume pourroit beaucoup endurer: & d'auantage, ie pourrois encourir l'ire de dieu, qui dit: que benoist est celui qui s'efforce de mettre vnion & concorde, entre les discordans. Et vous assure, que pour le bien & iustice que les Bourgoignons & Lorrains voioient au Roi, ils l'aimoient tant, & lui obeissoient, qu'ils furent tous contans de venir plaider deuant lui des discords qu'ils auoient les vns contre les autres, & les y vi venir plusieursfois a Paris, a Reims, a Melun, & ailleurs, là ou le Roi estoit.

CHAP. XC.

Comme Charles Duc d'Anjou, & frere du Roi, par le moyen des Papes Urbain & Clement, fut Roi de Sicile: & comme Manfroi fut tué en vne bataille.

COMME le Roi S. Loys viuoit en cete felicité, le Pape Urbain enuoia ses Ambassadeurs par deuers lui, le priant qu'il lui enuoialt son frere Charles, Duc d'Anjou: auquel il donneroit le Royaume de Sicile, que Manfroy bastard de l'empereur Federic, tenoit & occupoit contre sa volonté. Au moien dequoi le Roi, par l'aduis & deliberation de son conseil, dressa vne grosse armee, & la bailla a son frere Charles; lequel embarqué a Marseille
le

le, vint a Romme, ou il fut honorablemēt receu du Pape Clement, successeur d'Urban, & fut couronné Roi du Royaume de Sicile; a la charge toutesfois de quarāte mille ducats de pension, qu'il seroit tenu de payer chacun an au Siege apostolique. Apres qu'il eut seiourné par aucune espace de temps a Rome, prenant congé du Pape, marcha avec toute son armee droit a son ennemi Manfroy, avec lequel il cōbarir, & fut le conflit bieu dur d'un costé & d'autre: mais finablement Charles demoura vainqueur, & fut tué Manfroy en la bataille. Parquoi Charles iouit du Royaume de Sicile; mais ce ne fut pas pourtāt sans beaucoup d'autres empeschemens, & guerres qu'il lui conuint faire en Apulie: desquelles ie ne ferai point mention ici, delaisant la matiere a ceus qui escriront les faits & gestes dudit Charles, qui sont assés grands pour remplir vn volume.

CHAP. XCI.

*De la bonne vie du Roi S. Loys, & combien
il a eu d'enfans: & comme ils ont
esté pourueus.*

LE Roi S. Loys perleueroit tousiours de bien en mieus, en sainteté & bonne iustice: en sorte que sa renommee voloit par tout le monde, & n'y auoit Roi ne Prince, qui ne desirast auoir son amitié: il auoit mise telle Police par tout son Roy-

aume, que ses suiets viuoient en grand' tranquillité; & brief, il n'auoit rien omis a faire en son Royaume, ni en la Terre sainte, qui ne fust digne d'un trefuiste, & tref-saint Roi; en maniere que les Turcs & Sarazins mesmes, pour les saintes euures qui estoient en lui, le tenoient & reputoient saint Homme. Et non seulement florissoit il en son Royaume, en le bien gouuernant; mais encores en sa maison, il estoit tresheureus, car il eut de Madame Marguerite sa femme cinq fils: dont les quatre estoient viuans, Phelippe le premier, qui succeda a la couronne: Pierre, qui fut Comte d'Alançon: Robert qui fut Comte de Clermont en Beauuoisin: Ian, qui fut surnommé Tristā, comme ie vous ai conté, & fut Comte de Neuers, & Loys qui mourut ieune. Pareillement il eut de sadite espouse, quatre filles. c'est a sçauoir, Blanche qui fut femme du Roi de Castille: Ysabeau qui fut mariee au Roi de Nauarre: Marguerite qui fut femme du Comte de Breban; & Agnes femme du Duc de Bourgoigne.

CHAP. XCII.

Comme le Roi S. Loys ayant receu vne Ambassade des Seigneurs de la Terre-sainte, entreprint de rechef a'y aller: & comme il manda les Seigneurs de France. Qui furent ceux qui se croiserent avec lui: & de ce qu'il fit premier que s'en aller.

Com

Comme le Roi S. Loys estoien en cette heureuse vie, & tenant son peuple en paix, ayant mis fin a toutes ses entreprises, comme si le temps de sa mort s'approchoit, vindrent vers lui les Ambassadeurs des Seigneurs & Barons de la Terre-sainte, ensemble les Ambassadeurs du Pape; lesquels lui remontrèrent l'estat & la desolation des pources Chrestiens qui estoient Outre-mer: lui suppliant, & enhortant d'entreprendre de rechef la guerre contre les Infideles, & faire le voiage de la Terre-sainte. Et le Roi, qui de sa propre & liberale volonté, se consentoit a la guerre, ne fut pas malaisé a estre persuadé: ains respôdit aus Ambassadeurs, qu'en bref il dresseroit son armee, pour passer la Mer: pour aller secourir les Chrestiens, & recouurer ce qu'ils auoient perdu.

Le Carefme apres qu'il eut faite la responce aus Ambassadeurs, desirant accomplir sa promesse, il manda tous les Barons de son Royaume, pour venir a lui a Paris; & enuoia pareillement a moi a Ionuille, dont ie me cuidai assés excuser, pour vne fièvre quarte que j'auois: mais il me manda qu'il auoit assés gens, qui scauoient donner guarison de fièvres quartes; & que ie ne fisse faute de venir a Paris: ce que ie fis: mais onques ne sceus entendre de lui pourquoi il nous auoit ainsi mandés. Si m'aduint que le iour de la feste nostre Dame Mars, ie m'endormi.

a matines, & en mon dormant me fut aduis, que ie voiois le Roi a genous deuant vn autel, & qu'il y auoit plusieurs Prelats deuant lui, qui le reuestoient d'une Chasuble rouge, qui estoit de Sarge d'Arras. Et tantost que ie fu esueillé, ie racontai ma vision a vn mien Chappelain, qui estoit tressage homme: lequel me dit que le Roi se croiserait le lendemain. & ie lui demandai comme il le scauoit; & il me respondit qu'il le scauoit par mon songe. & que la Chasuble rouge que ie lui voiois mettre sus, signifioit la Croix de nostre Seigneur Iesus Christ, laquelle fut rouge de son precieus sang, qu'il respendit pour nous, & ainsi que la Chasuble estoit de Sarge d'Arras, qu'aussi la croisee seroit de petit exploit, ainsi qu'il disoit que ie verrois le lendemain.

Or aduint que le lendemain le Roi, & ses trois fils Phelippe, Ian, & Pierre se croiserent, pareillement se croisa le Roi de Nauarre, & plusieurs autres grands personages; mais leur croisee fut de peu d'effet, ainsi que mon Prestre m'auoit predit. Apres que le Roi S. Loys fut croisé, il me pressa fort de me croiser, & entreprendre le chemin du pelerinage de la Croix; & le me fit dire plusieurs fois par le Roi de Nauarre: mais ie leur respondi, que tandis que i'auois esté Outre-mer au seruice de Dieu, que les officiers m'auoient trop greué & affollés mes suiets, tant qu'ils

qu'ils en estoient si apouris, qu'il ne seroit iamais qu'ils ne s'en sentissent. A cette cause ie m'excusai enuers le Roi, de prendre la Croisee; car ie voiois bien a veuë d'œil, que si ie me metois au voiage, que ce seroit au grand dommage & totale destruction de mes pources suiets, & que Dieu auoit abandonné son corps a mort cruelle, pour sauuer son peuple.

Depuis r'ai ouï dire a plusieurs, que ceus qui lui conseillerent l'entreprinze de la Croix, firent vn tresgrand mal: car tandis qu'il fut au Royaume de France, tous ses suiets & voisins viuoient en paix, & regnoit iustice: mais incontinent qu'il en fut dehors, tout commença a decliner, & empirer. Et d'auantage, le bon Roi estoit aagé de soixante & dix ans, ou enuiron: a raison dequoi, il estoit si foible, & debilité de sa personne, qu'il ne pouuoit souffrir, ni endurer le harnois sur lui: & si ne pouuoit estre longuement a Cheual: & fallut que ie l'apportasse vne fois entre mes bras, depuis la maison du Comte d'Auxerre, iusques aus Cordeliers.

Après la Croisee ainsi faite, il fut deliberé quel chemin deuoit tenir le Roi; & par aduis de son conseil fut conclud, que il iroit premierement descendre a Tunes: car le Roi d'icelle terre auoit enuoyé ses Ambassadeurs par deuers le Roi S. Loys, par lesquels lui fit entendre l'affection qu'il auoit de connoistre la Foy de Iesus

Christ, & icelle confesser, si loisiblement faire le pouuoit, par le consentement des Barons de son pais. Parquoy le roi S. Loys, prenoit espoir d'attirer a soi, & a la Foy Euangelique, icelui Roi de Tunes. A cette cause le Roi fit apprester ses Nauires, & tout son equipage de Mer, a Marseille: & aiant fait son testament, & delaisé le gouuernement de son Royaume, a messire Simon de Nelle, a messire Matthieu comte de Vendosme, & a l'Abbé de S. Denis, s'embarqua audit Marseille, avec ses trois fils, le premier iour du mois de Mars, l'an de grace, Mil deus cens Lxix.

CHAP. XCIII.

Comme le Roi estant arriué au port de Carthage, print la ville d'assaut: Et comme estant audit lieu, la Peste se mit en son Camp: de la maladie du Roi, Et des bons enseignemens qu'il-bailla a Monsieur Phelippes, son fils aisné: et de la mort du Roi S. Loys.

DV chemin qu'il fit pour aller a Tunes, ne des aduentures qu'il eut sur la Mer, ie n'en escrirai rien ici: pource que ie n'y estois pas, & mon intention est de ne raconter en mon histoire aucune chose, de laquelle ie ne sois bien certain.

Nous

Nous dirons donc, que le Roi & toute son armee vindrent iusqu'au Port de Carthage, ou ils descendirent, & print terre ferme: & apres quelques batailles, tant par Mer, que par Terre, Carthage fut prinse d'assaut, & entra le Roi dedans, & son ost: & combien qu'il eust grand vouloir d'aller a Tunes, toutesfois il voulut seiourner a Carthage, attendant le Roi de Sicile son frere, qui deuoit arriuer, a tout grosse troupe de gend'armerie. Cependant qu'il seiournoit, a cause de la corruption de l'air, & des eaux pourries, la peste se mit en l'ost du Roi, dont plusieurs moururent, & par especial Ian Tristan Comte de Neuers, & le Legat du Pape. Durant le cours de cette maladie, il print vn flux de ventre au Roi, & a monsieur Phelippe son fils, avec les fieures quartes. Et connoissant le bon Roi, que l'heure de sa mort approchoit, estant couché au lit, appella monsieur Phelippe son fils aîné, auquel (comme a son hoir principal) donna plusieurs beaux enseignemens, que il lui commanda garder, comme par Testament: lesquels enseignemens i'ai ouï dire, que le Roi mesmes les voulut escrire de sa main, auant que mourir: parquoy ie les ai voulu mettre ici, pour la bonne doctrine que ie trouue en eux; afin que les Princes, en les lisant, y puissent prendre exemple de bien viure.

BEau fils (fit le Roi) La premiere chose que ie te commande a garder, c'est que de tout ton cuer tu aimes Dieu : car autrement nul homme ne peut estre sauue, & te garde bien de faire chose qui soit desplaisante a Dieu : car tu dois plustost desirer a souffrir toutes manieres de tourmens, que de pecher mortellement. Si Dieu t'enuoye aduersité, reçois la benignement, & lui en rends graces : & pense que tu l'as bien deserui, & que le tout te tournera a ton profit. S'il te donne prosperité, li l'en remercie humblement, &
„ garde toi bien de t'enorgueillir: car lon ne
„ doit pas guerroyer Dieu des dons qu'il
„ nous fait. Confesse toi souuent: eslis confesseur idoine, qui soit preud'homme, & qui te puisse seurement enseigner a faire les choses qui te sont necessaires, & aussi celles dont tu te dois garder: & que tu sois tel que tes confesseurs, parens & familiers te puissent hardiment reprendre de ton mal que tu auras fait, & aussi a t'enseigner tes faits. Escoute le seruice de Dieu, & de nostre mere sainte Eglise, deuotement, de cuer, & de bouche : & par especial, a la Messe, depuis que la consecration sera faite, que tu sois sans bourder, ne caqueter a personne. Ayes le cuer dous & piteus aus poures, & a ceus qui sont en necessité & les reconforte, & aide en ce que tu pourras. Maintien & garde les bonnes coustumes de ton Royaume, & abaisse &
COR

corrige les mauuais. Garde toi de trop grand' conuoitise : & ne mets pas sur ton peuple trop grans tailles & subides, si ce n'est pour la grand' necessité de ton Royaume. Si tu as en ton cueur aucun malaise, di le incontinent a ton confesseur, ou a aucune bonne personne, qui ne soit pas pleine de vilaines paroles: & ainsi pourras ton mal legerement porter, par le confort qu'il te donera. Fais bien garde, que tu ayes en ta compagnie preud'gens & loyaus, qui ne soient point pleins de conuoitise, soient gens d'Eglise, de Religion, seculiers ou autres. Fui la compagnie des mauuais : & t'efforce d'escouter les paroles de Dieu, & les retiens en ton cueur. Pourchasse continuellement prieres, Oraisons, & pardons. Aime ton honneur. Garde toi de souffrir aucun, qui soit si hardi, de dire deuant toi, aucune parole, qui soit commencement d'esmouuoir aucun a peché, ne qui mesdie d'autrui derriere, ou deuant, par detraction. Ne souffre dire aucune vilaine chose de Dieu, de sa digne Mere, ne des Saints. Souuent regracie Dieu, des biens & de la prosperité qu'il te donnera. Aussi sois droiturier & faisant iustice a chacun, tant au poure, comme au riche : & a tes seruiteurs sois loyal, liberal, & roide de parole : a ce qu'ils te craignent, & aiment comme leur maistre: & si aucune controuerse, ou action se meut, enquiers toi iusques a la verité, soit tant

pour toi, que contre toi. Si tu es aduertí d'auoir aucune chose de l'autrui, qui soit certaine, soit par toi, ou par tes predecesseurs, fais la rendre incontinent. Regarde a toute diligence comment tes gens & suiers viuent en paix, & en droiture deſſous toi, par especial es bonnes Villes, & Cités, & ailleurs. Maintien les franchises & libertés, telles que les Anciens ont gardeeſ, & les tiens en faueur & amour: car pour la ri cheſſe & puissance de tes bonnes Villes, tes ennemis & aduerſaires douteront de t'ailſſir, & de meſprendre enuers toi: par especial, tés pareils, & tes Barons. Aime & honore toutes gens d'Eglise, & de religion: & garde bien qu'on ne leur oſte leurs reuenus, dons, & aumosnes que tes Anciens leur ont laiſſés & donnés. On raconte du Roi Phelippe, mon ayeul, qu'une fois vn de ſes conſeillers lui dit, que les gens d'Eglise lui faiſoient perdre & amenuiſer les droits, & libertés, meſmement ſes iuſtices, & que c'eſtoit grand' merueille comment il le ſouffroit ainſi: & le Roy mon ayeul, lui reſpondit, qu'il le croyoit bien: mais que Dieu lui auoit fait tant de biens & de gratuités, qu'il aimeroit mieus laiſſer aller ſon bien, que d'auoir debat aus gens d'Eglise. A ton pere, & a ta mere, porte honneur & reuerence, & garde de les courroucer, par deſobeiſſance de leurs bons commandemens. Donne les benefices qui t'appartiendront, a bonnes perſonnes

sonnes, & de nette vie: & si le fais par le conseil de gens de bien. Garde toi d'escouuoir guerre contre homme Chrestien, sans grand conseil, & qu'autrement tu n'y puisses obuier: & si tu as aucune guerre, garde les gens d'Eglise, & ceus qui ne t'auront en rien meffait. Si guerre & debat y a entre tes suiets, appaise les au plustost que tu pourras. Prends souuent garde a tes Baillifs, Preuosts, & autres tes officiers, & t'enquiers de leur gouuernement: afin que si chose y a en eus a reprendre, que tu le faces. Et fai que nul vilain peche ne regne en ton Royaume, mesme-ment blasphemie, ni heresie: & si aucun en y a, fais le tollir & oster. La despense que tu feras en ta maison, fais qu'elle soit raisonnable, & de mesure. Et te suppli, mon enfant, qu'en ma fin tu ayés de moi sou- uenance, & de ma poure ame, & me se- coure par Messes, oraisons, prieres, au- mosnes, & biensfaits par tout ton Royau- me, & m'ottroye part & portion en tous les biensfaits que tu feras: & ie te donne toute benediction, que iamais pere peut donner a enfant. Priant a toute la Trinite de Paradis, le Pere, le Fils, & le saint Es- prit, qui te garde & defende de tous maus: par especial de mourir en peché mortel: a ce que nous puissions vne fois, apres cette mortelle vie, estre deuant Dieu ensemble, a lui rendre graces & louanges sans fin, en son Royaume de Paradis, Amen.

Quand le bon Roi S. Loys eut ainsi enseigné & endoctriné monsieur Phelippe son fils, la maladie qu'il auoit, lui commença incontinent a croistre durement: & lors il demanda les sacremens de S. Eglise: lesquels lui furent administrés en sa ferme memoire: & bien l'apparut: car quand on le mettoit en onction, & qu'on disoit les sept Pseaumes, lui-mesmes respondoit les versets desdits sept Pseaumes, avec les autres qui respondoient au Prestre, qui lui bailloit la sainte onction. Et ai ouy depuis dire a monsieur le Comte d'Alançon son fils, qu'ainsi que le Roi approchoit de sa mort, il s'efforçoit d'appeller les Saints & Saintes de Paradis, pour lui venir aider & secourir a son trespas: & par especial il inuquoit monsieur Saint Iaques, en disant son oraison, qui commence: Elto domine. Monsieur saint Denis de France appella-il, en disant son oraison: qui valloit autant a dire, comme, Sire Dieu, donne nous grace, de pouoir despriser & mettre en oubli, la prosperité de ce monde, en maniere que nous ne doutions nulle aduersité. Madame sainte Geneuiefue reclamoit il aussi: & apres se fit mettre en vn lit couuert de cendres, & mit ses mains sur la poitrine, & en regardant vers le ciel, rendit l'ame a Dieu, a telle mesme heure que Iesus rendit l'esprit en l'arbre de la Croix. Et trespassa de ce siecle en l'autre, le lendemain de la feste S.

Barthelemi, au tres-grand regret de tout le monde.

Certes pitieuse chose est, & digne de pleurer le trespassement de ce S. Prince, qui si saintement a vescu & gouverné son peuple en repos & tranquillité; & tout ainsi que l'escriuain enlumine son liure pour estre plus beau, semblablement le saint roi auoit enluminé & esclarci son royaume, par grands aumosnes, & par plusieurs Eglises & monasteres qu'il a edifiees en son viuant, dont Dieu est au-iourd'hui loué & honoré nuit & iour.

Le corps du Roi S. Loys fut apporté a Paris: & de la fut conuoyé a tres-grand honneur iusques a Saint Denis: ou il fut enseveli, au lieu propre ou il auoit des pie ça elleu sa sepulture. Auquel lieu, Dieu par ses prieres a depuis fait maints beaux miracles, comme nous dirons ci apres.

CHAP. XCIIII.

De plusieurs choses dignes de memoire, faites & dites par le Roy S. Loys, tant en son voyage d'Outre-mer, qu'en France: & comme il fut canonizé.

DE telle bonne vie fut le bon Roy, qu'il se confessoit tous les Vendredis a son prestre: & apres sa confession, il despouilloit ses espaules, & se faisoit battre par sondit prestre, a tout cinq petites chesnettes de fer, qu'il portoit dans vne boe-

te. Il porta souuentefois la haire, iusques en sa vieillesse, qu'il la laissa par l'admonestement & conseil de son Confesseur: & au lieu d'icelle, encores portoit il sur la chair vne ceinture faite de poil de Bouc, qui estoit tref-apre. Tous les iours il oyoit sa Messe a note, & vne Messe basse de Requiem. Tousiours apres disner il se repositoit en son lit: & puis quand il estoit leué, il disoit des Morts, avec vn de ses Chappellains: & puis Vespres: & tous les soirs il oyoit ses Complices. Durant le temps que ie fu a sa compagnie, ie lui ai veu faire & dire plusieurs choses dignes de memoire, tant Outre-mer que par deça, lesquelles i'ai voulu mettre en ce present liure: non seulement pour plus amplement remonstrer la vie du Saint Roi, mais aussi afin que ses faits & dits soient le moyen de bien viure a ceus qui liront cette Histoire.

Aduint vn iour que le roi S. Loys ouyt dire beaucoup de bien de maistre Robert de Sorbon, & que c'estoit vn grand preud'homme: parquoi il le fit venir a lui, & le fit manger & boire en sa table: & vn iour que i'estois assis aupres dudit maistre Robert, nous commençames a parler lui & moi a conseil: quoi voyant le roi nous reprist durement, nous disant: Vous faites tref-mal de parler ici en secret: parlés haut, fit-il, afin que ne donnés souspeçon a vos compagnons, que vous parlés d'eux
en

en mal. Car celui, disoit-il, qui est a table en bonne cōpagnie, qui ha a dire quelque chose ioyeuse & plaisante, la doit dire que tout le monde l'entende: autrement si c'est chose d'importance, la doit taire, sans en parler.

Quand le bon Roi estoit a son plaisir, il me faisoit plusieurs questions, present maistre Robert: & vne fois entre les autres me demanda, Seneschal, or me dites la raison pourquoy c'est que preud'homme vaut mieus qu'homme? Et lors commença noise entre maistre Robert & moi: & quand nous eusmes longuement debatū, le bon Roi dit sa sentence en cette maniere: Maistre Robert, ie voudrois bien auoir le nom de preud'homme: mais que ie fusse bien preud'homme, & le remanant vous demourast. Car preud'homme est si tref-grand' chose, & si bonne, qu'il remplit la bouche en le proferant. Au contraire, disoit le bon Roi, que mauuaise chose estoit l'autrui prendre: car le rendre estoit si tref-gref, que seulement a le nommer, il escorchoit la gorge, pour les deus R R qui y sont; lesquelles R R signifient les rentes au Diable, qui tous les iours attire a lui ceux qui veulent rendre le Chasteau d'autrui: & bien subtilement le fait le Diable, car il seduit les vsuriers & rapineurs, & les esmeut de donner aus Eglises leurs vsures & rapines pour Dieu, ce qu'ils deussent rendre s'ils sçauent a

qui. Il me dit, estant sur ce propos, que ie disse, de par lui, au Roi Thibaut son fils, qu'il se prinst garde de ce qu'il faisoit, & qu'il n'encombrast son ame, cuidant estre quitte des grans deniers qu'il donnoit & laissoit a la maison des freres Prescheurs de Prouins: car le sage homme, tandis qu'il viuoit, deuoit faire tout ainsi que bon executeur d'un testament. C'est assauoir que le bon executeur premierement, & auant autre œuure, il doit restituer & reestabli les torts & griefs faits a autrui, par son trespas: & du residu des biens du mort, doit faire les aumosnes aus poures de Dieu, ainsi que le droit escrit l'enseigne.

Le saint Roi estoit vn iour de Pentecoste a Corbeil, accompagné de bien trois cens Cheualiers, ou nous estions maistre Robert de Sorbon & moi: & le Roi apres dîner descendit au prael dessus la chapelle, & alla parler au Comte de Bretaigne, pere du Duc qui a present est. Et deuant tous les autres Cheualiers, me print ledit maistre Robert par mon manteau: & me demanda en la presence du Roi, & de toute la noble compagnie: Assauoir mon, si le Roi se leoit en ce prael, & vous vous allassies assoir en son banc plus haut que lui, si vous seriez point a blasmer? Auquel ie respondi qu'ouy vraiment. Or doncques, fit il, faites vous bien a blasmer, quant vous estes plus noblement & riche

richement vestu que le Roi: car vous vous vestés de plus fins draps, plus precieus, & plus riches que le Roi ne fait. Et ie lui di, maistre Robert, ie ne fais pas a blasmer (sauf l'honneur du Roi & de vous) car l'habit que ie porte, tel que le voyés, m'ôt laissé mes pere & mere, & ne l'ai point fait faire de mon autorité: mais au contraire est de vous, dont vous estes bien fort a blasmer, car vous qui estes fils de villain & de villaine, aués laissé l'habit de vos pere & mere, & vous estes vestu de plus fin camelin que le Roi n'est: & lors ie prins le pan de son sargot, & de celui du Roi: que ie ioignis l'un pres de l'autre: & lui di: or regardés si i'ai dit verité? Et adonc le Roy entreprint a deffendre de parole maistre Robert, & lui couvrir son honneur de tout son pouuoir, en monstrant la grand' humilité qui estoit en lui, & comme il estoit pitoyable a chascun. Apres ces choses, le Roi appella messeigneurs Phelippe pere du Roi, qui or est, & le Roy Thibault ses fils, & puis apres s'assist a l'huis de son oratoire, & mit la main a terre, & dit a ses deus fils, seés vous ci pres de moi, qu'on ne vous oye. Ha sire, firent ils, pardonés nous s'il vous plaist, il ne nous appartient pas de nous seoir si pres de vous. Et lors il me dit, Seneschal seés vous ci: ce que ie fi, & si pres de lui que ma robbe touchoit la sienne: & puis fit assseoir ses fils aupres de moi, & leur dit:

grand mal aués fait , quant vous qui estes mes enfans , n'aués fait au premier coup ce que ie vous ai commandé , & gardés que iamais il ne vous aduienne : & ils respondirent que non feroit il. Et lors il me va dire , qu'il nous auoit appellés pour se confesser a moi , de ce qu'a tort il auoit deffendu & soustenu maistre Robert contre moi : mais , fit il , ie le vi si trefesbahi , qu'il auoit assés mestier que ie lui secourusse , nonobstant que ne le fisse pas pour maistre Robert defendre , & ne le croyés pas aussi ; car ainsi que dit le Seneschal , on se doit vestir bien honnestement , affin d'estre mieus aimé de sa femme , & aussi que vostre gent vous en prisera plus : & aussi dit le Sage , que lon se doit vestir en telle maniere , & porter selon son estat , que les preud'hommes du monde ne puissent dire , Vous en faites trop : ni aussi les ieunes gens , Vous en faites trop peu.

Le bon seigneur Roi estant vne fois griefuement malade a Fontaine-blandi , en Gastinois , dit a monsieur Phelippe son aîné fils : Beau fils , ie te prie que tu te fasses aimer au Peuple de ton Royaume : car autrement i'aimerois mieus qu'un Escossois vinst d'Escoffe , ou quelque autre loirain estrangier qui gouuernast le Peuple du Royaume bien & loyaument , que tu le gouuernasse mal a point , & en reproche.

Il m'appella vne fois , & me dit qu'il

vouloit parler a moi: & en presence de plusieurs me dit: L'ai appelle ces freres Religieus qui ci sont, pour vous faire vne question, de chose qui touche Dieu. Et lors adressant sa parole a moi, me dit en cette maniere: Seneschal, fit il, quelle chose est ce que Dieu? & ie lui respondi: Sire c'est si souueraine & bonne chose, que meilleure ne peyt estre. Vrayement, fit il c'est moult bien respondu: car cette vostre response est escrete en ce liuret que ie tien en ma main. Autre demande vous fais ie, dit il, assauoir mon le quel vous aimeriés mieus, estre ladre, ou commettre vn peché mortel? & moi qui onques ne lui voulus mentir, lui respondi: que j'aime-rois mieus auoir fait trente pechés mortels, qu'estre mezeau. Et quant les freres furent departis de là, il me rappella tout seullet, & me fit soir a ses piés: & me dit: comme aués vous osé dire ce qu'aués dit? Et ie lui respondi, qu'encores le disois- ie bien: & il me va dire, ha fol musart, vous y estes deceu! car vous sçaués que nulle si laide mezellerie n'est, comme d'estre en peché mortel: & l'ame qui y est du tout, est semblable au Diable d'Enfer. Et bien est vrai, fit il, car quant l'homme est mort, il est sain & guari de sa mezellerie corporelle: mais quant l'homme qui a fait peche mortel meurt, il ne sçait pas qu'il ait eu en sa vie telle repentance que Dieu lui vueille pardonner. Parquoi grand' peur

doit il auoir, que celle mezellerie de peché lui dure longuement, & tant que Dieu fera en Paradis. Pourtât ie vous prie, dit il, que pour l'amour de Dieu premierement, puis pour l'amour de moi, vous reſtraignés ce dit en voſtre cueur: & que vous aimés beaucoup mieus que mezellerie, & tous autres maus & meſchefs vous vinſſent au corps, que commettre en voſtre ame vn ſeul peché mortel, qui eſt ſi infame mezellerie.

On lui raconta de mon frere ſire Gilles de Bouyn, qui eſtoit vn Cheualier bien accompli, & qui ſur toutes choſes craignoit & aimoit Dieu, lequel il enuoya querir: & combien qu'il ne fuſt pas de France, ſi lui donna il la Conneſtableie du royaume, pource ſeulement qu'il le connoiſſoit dedié au ſeruice de Dieu.

Il me demanda vne fois, ſi ie voulois eſtre honoré en ce monde preſent, & en la fin auoir Paradis? Et ie reſpōdi qu'ouy, ie le voudrois bien ainſi. Gardés vous doncques, ſit il, de faire ne dire aucune villenie a voſtre eſciant: & ne deſmantés iamais aucun de ce qu'il dira deuant vous, ſi ainſi eſtoit que ie n'y euſſe honte & dommage, ou peché a le ſouffrir. Et diſoit que ſouuentes fois de deſdire aucun, ſuruenient dures paroles, dont pluſieurs ſe diffament, & s'entretuent, & que mille hommes en eſtoient morts.

Il auoit de couſtume de nous enuoyer
uoyer

uoyer les seigneurs de Nette, de Soissons, & moi, ouyr les plaits de la Porte, qu'on appelle autrement, les requestes du Palais a Paris: & puis il nous enuoyoit querir, & nous demandoit comme tout se portoit, & s'il y auoit aucuns qu'on ne peust depescher sans lui. Et plusieurs fois selon nostre rapport, il enuoyoit querir les plaidoyans, & les contentoit, les mettant en raison & droiture.

En Esté souuentesfois, apres qu'il auoit ouy Messe, il s'en alloit esbarre au bois de Vincenes, & se seoit au pied d'un chesne, & nous faisoit assoir aupres de lui: & tous ceus qui auoient affaire a lui, venoient parler deuant lui seurement, sans qu'ils eussent empeschement d'aucun huisfier. Et puis le roi demandoit a haute bouche: s'il y auoit aucun qui eust partie: & s'il se presentoit aucun, le roi l'escoutoit, & donnoit sa sentence selon equité. Aucunesfois il commendoit a monsieur Pierre de Fontaines, & a monsieur Geoffroi de Vilete, d'ouyr les parties, & leur faire droit. Aussi i'ai veu plusieurs fois que le bon roi venoit au iardin de Paris, habillé d'une cotte de Camelot, d'un surcot de tircetaine, sans manches, ayant un manteau par dessus de sandal noir, & faisoit estandre des tapis, & puis donnoit audience, & faisoit iustice a tous ceus qui venoient deuant lui.

Le saint Roi monstra sa grand' loyauté,

au fait de monsieur Regnaut de Brie : lequel vn iour apporta vnes lettres au Roi, par lesquelles il monstroit que le Roi auoit donné aux hoirs de la Comtesse de Boulongne, qui puis n'agueres estoit morte, le Comté de Dampmartin, & les seaux d'icelles lettres estoient tous brisés & cassés, en sorte qu'il n'en restoit autre chose que la moitié des iambes de l'image du Roy, & le chancel sur quoi le Roi auoit les pieds. Le Roi nous monstra lesdites lettres, qui estions de son Conseil, pour lui donner aduis de ce qu'il deuoit taire: & tous fusmes d'opinion qu'il n'estoit tenu de mettre icelles lettres en execution. Et tantost il appella Ian Sarazin, son Chambellan, & lui dit qu'il lui baillast vne lettre qu'il lui auoit commandé faire: & quant il eut la lettre veüe, il regarda au seel qui y estoit, & au ramenant du seel des lettres dudit Regnaut, & nous dit: Seigneurs, voici le seel de quoi i'vsois auant mon partement du voyage d'Oltre-mer, & ressemble ce demeurant de seel à l'impression du seel entier. Parquoi ie n'oserois, selon Dieu & raison, retenir le Comté de Dampmartin. Et lors il appella mondit sieur Regnaut de Brie, & lui dit: Beau sire, ie vous rends le Comté que vous demandés.

Le saint Roi, par la volonté de Dieu, faisoit tous les iours de beaux miracles à ceus qui le requeroient de bon cuer. Par-
quoi

quoi le Pape Boniface huitiesme de ce nom, estant aduerti des grans miracles qu'il faisoit, enuoya a Paris l'Arceuesque de Rouen, & vn Euesque avec lui, pour s'enquerir de la verité. Si s'en allerent a S. Denis en France, auquel lieu ils furent long temps, pour informer de la vie & des miracles du bon Roi S. Loys: durant lequel temps ils m'enuoyerent querir pour estre interrogué, & fu bien deus iours avec eus. Apres qu'ils eurent bien informé du tout, ils porterent l'enqueste a Rome. Laquelle veüe par le Pape, il Canoniza le roi S. Loys, & le coucha au nombre des Confesseurs, dont tout le monde eut tres-grand' ioye: & son lignage reccut honneur perpetuel.

Apres que ces bonnes nouuelles furent apportees de Rome, que le roi S. Loys estoit Canonizé, le roi Phelippe son fils, donna & assigna iournee pour leuer le saint corps: & le leuerent l'Arceuesque de Reims, messire Henri de Villiers Arceuesque de Lyon, & plusieurs autres Euesques le portèrent, dont ie ne sçai le nom.

Quant il fut leué, frere Ian de Semoins le prescha deuant le peuple, & compta sa vie comme elle est ci deuant escrite: & par especial parloit souuent de la grand' Foy & loiauté que le roi S. Loys auoit tousiours gardee, mesmes aus Sarazins. Et tantost que le sermon fut fini, le roi Philippe, & ses freres rapporterent le corps du


Roi leur pere, en ladite Eglise S. Denis: ou depuis l'a fait, & fait tous les iours plusieurs miracles.

Et pour mettre fin a mon Histoire, ne veus mettre sous silence, ce qui m'aduint du Roi S. Loys. Vn iour moi estant a Ionuille, & en ma chappelle, il me fut aduis en dormant, que le saint Roy estoit deuant moi en vie, & me sembloit estre bien aise & ioyeux: & puis par vne grand' ioye que i'auois de le voir, ie lui disols: Sire, quant vous partirés d'ici, ie vous menerai loger en vne autre mienne maison, que i'ai a Cheuillon: & me sembloit alors que il me respondoit en riant: Sire de Ionuille, soy que doi a vous, ie ne me partirai pas si tost d'ici, puis que i'y suis: Et a l'heure ie m'esueillai: & ayant souuenance de mon songe, pense en moi, que c'estoit le plaisir de Dieu & de lui, que ie le logeasse en ma chapelle. Parquoy vn peu de temps apres, ie fis faire vn autel en l'honneur de Dieu & de lui, & y fondai vne messe perpetuelle par chacun iour.

Je prierai les lecteurs de ce mien labeur, qu'ils vueillent prendre en bonne part tout ce que i'y ai escrit: vous assurant tout ce que i'affirme auoir veu estre veritable: & quant a ce que ie recite auoir ouy, ie le tien de gens dignes de croire.

F I N.





LA TABLE
du contenu en la presente Histoire.

*

E Pistre de l'auteur au roy Phelippe, fils du
roy S. Loys. fol. 1

Quel fut le roy S. Loys; ensemble de ses con-
ditions & bonnes meurs. chap. j. fol. 3

De la naissance du roy S. Loys; et a quel iour,
& quelle signification il referoit de ce iour là.
Aussi a quel iour il fut couronné: & de la bonne
doctrine qu'il apprint en sa ieunesse, par le moien
de sa mere: ensemble des bons enseignemens que
elle mesmes lui donnoit. ij. 5

Comme le comte de Tholozé print chasteau
Sarazin pres Tholozé: & comme la roine Blan-
che, mere du roy S. Loys, pour resister audit Com-
te, envoya armee contre lui, & de ce qui en ad-
uint. iij. 8

De l'entreprise du comte de Boulōgne, pour avoir
la regence du royaume de France, & l'oster a la
roine Blanche, mere du roy S. Loys: ensemble
ceux qui tenoient le parti audit Comte: & de la
bonne vigilance que ladite roine Blanche avoit,
pour resister a leur entreprise. iiij. 9

Ce que voulurent faire les ducs de Bretaigne,
& comte d'Eureus son frere a ladite conspira-
tion, a l'encontre du roy S. Loys, & qui fut cause
de rompre leur entreprise. v. 13

Comme les ennemis du Roy tascherent par di-
vers moiens d'attirer a eus Thibaut comte de

TABLE.

Champagne, ou bien de le mettre en la male grace du Roy. vj. 15

Comme le duc de Bretagne, & autres barons de France se trouuans deceus & trompés de leur entreprise, manderent la roine de Chyppe, pour faire la guerre contre Thibaut comte de Champagne. vij. 18

Incident, auquel est traité du droit du comté de Champagne, querellé par la roine de Chyppe: ensemble d'aucunes choses faites, tant par le roy Phelippes, que par le roy Richard d'Angleterre, en un voyage d'outre-mer. viij. 19

De la venue de la roine de Chyppe, & de ce qui fut fait tant par ceus qui tenoient son parti, comme de la part du comte Thibaut ix. 20

L'appointement fait par le roi S. Loys, entre la roine de Chyppe, & Thibaut comte de Champagne. x. 24

De la guerre de Bretagne faite par le Roy: & quelle fin elle eut. xj. 26

Comme le Roy estant en paix, bailla le comté de Poitou a son frere Alphons: qui fut moien, qu'Hugues comte de la Marche, sa femme et autres s'esleuerent contre le Roy, qui fut commencement d'une grand' guerre. xij. 28

De la guerre que le Roy fit contre les comtes de la Marche, & de Luzignen: & comme le roy d'Angleterre vint a leur aide: ensemble des aguets que la comtesse de la Marche dressa contre le Roy: & quelle fin prit celle guerre. xiij. 32

Le different qui fut entre les comtes de Tholoze, & de Prouence, qui fut cause dont ne l'un ne l'autre se trouuerent avec le comte de la Marche

TABLE.

che, a la rencontre qui fut faite a Taillebourg: et les aliances que fit ledit comte de Prouence, es rois de France & d'Angleterre. Aussi de la guerre & paix, faite avec le comte de Besiers.
xiiij. 38

L'empeschement qui fut fait au comte de Tholoze, a ce qu'il n'espousast Beatrix, iij. fille du comte de Prouence: & comme apres la mort du comte de Prouence, Charles frere du Roy fut marié avec elle; puis apres reduit le comté de Prouence a lui: & depuis les Prouenceans le receurent pour leur Comte.
xv. 40

Ce que faisoit le roy S. Loys apres auoir mis fin aux guerres precedentes: & des bonnes loix qu'il establit en son Royaume, ensemble de ses vertus & bonne vie. Le voyage que firent les comte de Champagne & duc de Bretagne en Asie; & aussi de celui du roy d'Angleterre en Afrique.
xvj. 41

D'une maladie du roy S. Loys; & comme il se croisa, pour aller contre les ennemis de la Foy: et qui furent ceux qui se croiserent avec lui; et comme il s'embarqua a Marseille.
xvij. 44

Description de l'Authent de ce qu'il fit sur la deliberation de son voyage d'outre-mer; & des choses qui lui aduindrent depuis Champagne iusques a Marseille, & depuis Marseille iusques en Chyppe, ou il vint trouuer le roy S. Loys.
xviij. 48

Le grand appareil de viures que le Roy auoit en l'isle de Chyppe. du different des deux archuesques dudit lieu; l'un Grec, l'autre Latin: la cause du long sejour du Roy en ce lieu là; de l'am

TABLE.

bassade qu'il eut du roy de Tartarie, & de la re-
sponse qu'il lui fit. Et des autres nouvelles qu'il
eut de Syrie, que lui enuoyoit le maistre des Tem-
pliers. xix. 51

Des Princes d'outre-mer, & de l'estat &
puissance du Soudan de Comue, aussi de celui de
Babylone; et en quel estat estoient lors leurs af-
faires. xx. 56

Comme le Roy partit de Chypre pour venir
en Egypte: & comme il arriva devant la ville
de Damiette: des fortunes qu'eut sur mer son ar-
mee: & comme la ville de Damiette fut prise.
xxj. 59

De ce qui fut fait en la ville de Damiette,
pendant que le Roy y sejournoit. xxij. 68

Comme le Soudan avec grand nombre de Sa-
razins vint assaillir les Chrestiens: & de ce qui
fut fait pendant que l'un camp estoit devant
l'autre. xxij. 72

Comme apres que le comte de Poitiers fut ar-
riué à Damiette, le Roy delibera avec son conseil
d'aller en Babylone. Et de ce qui lui aduint sur
le chemin. xxiiij. 78

Description du fleuve du Nil; & des choses
merueilleuses d'icelui. xxv. 81

Comme le Roy estant logé entre le fleuve de
Rexi, & celui qui vient de Damiette, rencontra
l'armee du Soudan qui lui empescha le passage.
xxvj. 83

Comme estant mort le Soudan de Babylone,
les Sarazins esleurent Secedun: & de ce qui fut
fait, tant du costé des Sarazins, comme de celui
des Chrestiens. xxvij. 85

D'un

TABLE.

D'un engin, que les Sarazins nommoient la Perriere, et du feu gregeois qu'ils iettoient contre les Chats chatels du Roy, & comme lesdits Chats chatels furent bruslés, & puis vn autre refait, depuis encores bruslé. xxviij.88

Comme vn Beduyn enseigna vn gué pour passer la riuiera, et comme le comte d'Arthois ayant baillé la course a ceux qui gardoyent le gué, & poursuini au trauers la ville de la Massourre, fut tué en repassant par ladite ville. Et de la cruelle bataille qui fut faite par le Roy contre les Sarazins: & comme le Roy celle nuit logea au lieu dont il auoit chassé les Sarazins. xxix.93

Quelles gens sont les Beduyns, de leur loy, habitation, & façon de faire. xxx.111

Les efforts que firent les Sarazins, pensant reconquerir les engins que le Roy auoit gagné sur eux: Et de ce que fit vn Prestre a l'encontre des Sarazins. xxxi.112

Ce qui aduint en vne bataille que le Roy eut contre les Sarazins; & quel ordre fut tenu, tant de la part du Roy, que de celle de ses ennemis. xxxij.117

Quelles gens sont ceux que le Soudan communement mene en guerre, & comme ils sont aguerrroyés; & de la façon de faire du Soudan enuers eux. xxxiiij.128

Comme apres la mort du Soudan de Babiloine, son fils lui succeda; et de ce qu'il fit a son commencement de regne, qui fut cause de conspirer sa mort. xxxiiij.131

Comme apres que les corps de ceux qui auoyent esté occis es deux batailles precedentes, &

TABLE.

ietés en la riniere quelque temps apres vin-
drent sur l'eau; & comme tant pour ceste occa-
sion, comme pour autres, il aduint vne perte &
maladie fort estrange à ceux du camp du Roy:
comme les Sarazins affamerēt le camp dudit sei-
gneur, & comme le Roy repassa par deuers le
duc de Bourgoigne. xxxv. 132

Incident de la mort de feu messire Hugues de
Landricourt; ce qui aduint a six cheualiers: &
de la maladie qu'auoit l'Auteur. xxxvj. 137

D'aucun pourparlé de paix entre le Soudan
& le Roy, lequel n'eut effect: & de la grand'
misere de celle pestilence qui continuoit de plus
en plus dans l'ost du Roy. xxxvj. 138

L'appareil que le Roy fit pour retourner a Da-
miette, & de ce qui en aduint. xxxvj. 140

Comme le Roy fut pris des Sarazins. xxxix. 141

Description de l'auteur, comme lui et les au-
tres qui estoient sur l'eau, et qui se pensoient sau-
uer a Damiette, furent pris des Sarazins, et com-
me ils furent traittés par apres. xl. 144

Comme apres la prise de l'auteur, l'admiral
des Galees du Soudan l'interroqua; et la respon-
se qu'il fit audit Admiral: comme les Sarazins
traittoient les pources prisonniers qui estoient
malades; & comme ledit Admiral mena l'au-
teur au lieu ou le roy S. Loys estoit prisonnier
avec plusieurs autres. xli. 149

Traitté bien au long de l'accord fait, tant
pour la deliurance du Roy, comme des autres qui
estoient prisonniers avec lui, & les propos qui
y furent tenus: ensemble d'autres choses bien pi-
royables. xli. 152

TABLE.

Comme le Roy & les autres prisonniers furent mis en des galees pour venir a Damiette: & comme en venant on les fit aborder en vne maison que le Soudan auoit fait tendre sur le fleuue: description de ladite maison. xliij.158

Piteuse mort du Soudan, par ses gens de la Halqua, & ce a l'instance de ses Admiraux. xliij.160

Comme apres la mort du Soudan les Admiraux traitterent les prisonniers; & comme les conuenances qui auoyent esté faites avec le Soudan furent renouvellees avec les Admiraux. xlv.163

La forme des conuenances faites avec lesdits Admiraux; ensemble les sermens faits, tant de la part desdits Admiraux, comme de celle du Roy: & a quoi il tint que le Roy ne fut esleu Soudan par les Admiraux. xlvj.165

Comme le Roy, avec les autres prisonniers, estant arriué deuant Damiette, fit deliurer la ville aux Sarazins, et ce qu'ils firent en ladite ville. xlvij.168

Comme apres que les Sarazins eurent en leur puissance Damiette, firent peu de conte de tenir leurs promesses au Roy. du different qui fut entre les Admiraux, touchant la mort ou deliurance du Roy. xlvij.170

De la deliurance du Roy & autres prisonniers, & de la forme qui fut obseruee. chap. xlix. fol.173

Des deniers que le Roy fit deliurer aux Sarazins, pour la rançon des prisonniers: & de sa loyauté au faict du payement de ladite rançon.

TABLE.

Et comme le comte de Pouiers fut deliuré. l. 174

Incident de plusieurs choses qui aduindrent tant en Egypte comme en autre part, a plusieurs personnes durât le tēps que le Roy y estoit. li. 178

Comme le Roy avec sa compagnie arriua en Acre; et de plusieurs fortunes et miseres qui aduindrent a l'Auteur, estant audit lieu. li. 186

Le conseil que le Roy tint sur ce qu'il deuoit faire, ou retourner en France, ou bien contre les Sarazins; de la diuersité des opinions en son conseil; & du bon vouloir qu'il eut en cela. li. 190

Le preparatif que fit le Roy pour remestre sus vne nouuelle armee. li. 199

De l'ambassade de l'empereur Ferri d'Allemagne, qui alloit au Soudan de Babyloine, et des propos qu'ils eurent avec le Roy en Acre. li. 202

Comme le Roy estant en Acre, receut vne autre ambassade du Soudan de Damas; & la response que le Roy fit: & des propos que le Religieux enuoyé par le Roy au Soudan de Damas, eut avec vne femme. li. 203

Comme messire Iean de Valencienne alla en Egypte vers les Admiraux, & de ce qu'il y fit. & comme le Roy fit refaire les murailles de la ville de Cefree. li. 211

Comme deux freres Prescheurs que le roy S. Loys auoit enuoyés au grand roy de Tartarie, retournerent par deuers lui, & racontèrent au Roy les grands merueilles qu'ils auoyent veues par dela de la premiere habitation des Tartarins & de leur seruitude, & tributs; de leur premier Roy, et de ses ordonnances, ensemble de leurs batailles & victoires. li. 214

De

TABLE.

De mesure Clenard de Semogan du royaume de Nerone, qui vint au service du Roy; et la maniere que lui & ses gens obseruoient a la chasse des Lyons.. lx.221

D'un autre chevalier, du nom de Conci, qui vint au service du Roy; et de ce qu'il dit de l'empereur de Constantinoble, & du roy des Comains. lxj.223

L'auteur va voir le Roy à Cefaree, & des propos & conuenances qu'ils eurent ensemble. lxij.225

De la iustice que le Roy fit faire a Cefaree, pendant qu'il y estoit. lxij.226

Comme le Roy & les admiraux d'Egypte auoyent delibéré de se trouuer a Iaphe, pour iurer leur alliance; & ce qui empescha que lesdits Admiraux ne s'y trouuerent point: & de ce que le Roy fit audit lieu de Iaphe. lxiiij.229

D'une autre iournée ou lesdits Admiraux promirent se trouuer a Iaphe. Du prince d'Antioche qui vint vers le Roy. du comte de Iaphe & de ses vertus. lxv.231

Comme Barbaquan, empereur de Perse, estant chassé hors son royaume par les Tartarins, s'en vint au royaume de Ierusalem; et des maux que il y fit & aux autres lieux circonuoisins; de l'armée qui fut faite contre lui; & comme ayant gagné vne bataille ou le comte de Iaphe fut prins, avec plusieurs autres; par apres ledit empereur de Perse fut prins par le Soudan de la Chamelle; & de la mort du comte de Iaphe. lxvj.234

Comme le Soudan de Damas fit la guerre aux admiraux d'Egypte, & quelle fin eut icelle

guerre.

. lxxij. 240

Comme le maistre des arbalestiers, avec xiiij. xx. de ses hommes, estant enclos des Sarazins, fut secouru.

lxxij. 241

Comme les Sarazins estans venus deuant Acre, pour gaster les iardins, s'en allerent sans rien y faire; & de ce que fit vn cheualier Geneuois.

lxxix. 242

Comme les Sarazins entrerent en la ville de Sayecte, et la pillerent: et ce qui empescha que le Roy n'allast en pelerinage à Ierusalem. lxx. 245

De la fortification que le Roy fit a l'aphe: & comme ledit seigneur ayant entrepris de prendre Naples, fut empesché.

lxxj. 248

Ce qui aduint a l'auteur estant logé au lieu de Passe poullain.

lxxij. 250.

Ce qui fut fait a la ville de Belinas, & de la source du fleuve Iourdain.

lxxij. 251

Comme le roy de Tartarie prit la ville de Bandidac, ensemble le Caliphe seigneur d'icelle, & par quelle cause: item, de la fin d'icelui Caliphe.

lxxij. 255

Le voyage que fit l'Auteur a nostre Dame de Tourrouze, de la charge qu'il eut du Roy; & d'une pierre merueilleuse qui fut donnee au Roy.

lxxv. 258

Comme le roy S. Loys eut nouvelles de la mort de sa mere, & du dueil qu'il en fit. comme l'auteur fut enuoyé querir pour reconforter la Roine, des propos qu'il eut avec elle: et quelle auoit esté la roine Blanche, enuers la roine de France, femme du roy S. Loys.

lxxvj. 261

Deliberation que le Roy print pour s'en retourner

retourner

tourner en France. & comme l'auteur, par le commandement du Roy, conduit la Reine & ses enfans, d'Acre à Sur. Puis traite comme ils se mirent sur mer pour venir en France. lxxviij. 264

Ample description des fortunes qui aduindrent au Roy & à ses gens, estans sur mer, depuis Acre iusques en Pronence. lxxviij. 267

Comme le Roy print terre au port d'Ierex; l'abbé de Cluni vint deuers lui: de la longue audience que le Roy lui donna: & d'un Cordelier predicateur que le Roy voulut ouyr. lxxix. 275

Comme le Roy estans arrivé en France, l'auteur print congé de lui, & s'en alla en sa maison à Ionuille. Puis comme il vint vers le Roy à Soissons; & des choses qui se traittoient en ce temps là. Le mariage du roy de Navarre avec la fille du roy S. Loys. lxxx. 279

Comme le roy S. Loys se maintenoit depuis que il fut retourné de son voyage d'outre-mer. & premier de son vestement & manger. lxxxj. 281

De sa prudence & bon conseil. de ce qu'il respondit a l'uesque d'Auxerre et autres Prelats, a vne requeste qu'ils lui auient faite. lxxxij. 282

Combien lui estoient en horreur les blasphemés: & comme il faisoit punir les blasphemateurs. lxxxij. 283

De sa charité enuers les pources; & autres choses à ce mesme propos. lxxxiiij. 285

De plusieurs Eglises & Monasteres qu'il a fondees & dotees: & a qui il desiroit de conferer les b. nefices. lxxxv. 286

De la bonne iustice qu'il faisoit faire. des bonnes ordonances dignes d'estre veues, lesquelles il

TABLE.

fit publier par son royaume; et du grand bien qui
aduint en France au moyen de la bonne iustice
qu'il y faisoit exercer. lxxxvj. 287

L'instruction qu'il bailloit à ses enfans. 87. 293

De l'accord qu'il fit avec le roy d'Angleterre,
& qui le mouuoit à cela faire. lxxxiij. 293

De la paix & accord que le Roy moyennoit
tant enuers les Princes & seigneurs de son roy-
aume, comme enuers ses voisins; & de la respon-
se qu'il fit à son conseil, qui le vouloit empêcher
de cela faire. lxxxix. 294

Comme Charles duc d'Anjou et frere du Roy,
par le moyen des papes Urbain & Clement, fut
roy de Sicile: & comme Manfred fut tué en vne
bataille. xc. 296

De la bonne vie que le roy S. Loys menoit: com-
bien il a eu d'enfans, & comme ils ont esté pour-
ueus. xcj. 297

Comme le roy S. Loys, ayant receu vne am-
bassade des seigneurs de la Terre-sainte, entre-
print derechef d'y aller; & comme il manda les
seigneurs de France: qui furent ceux qui se croi-
serent avec lui; & de ce qu'il fit premier que s'en
aller. xcij. 299

Le Roy estant arriué au port de Carthage, prit
la ville d'assaut: & comme estant audit lieu, la
peste se mit en son camp. de la maladie du Roy;
et des bons enseignemens qu'il bailla à monsieur
Phelippes son fils aîné; & de sa mort. xciiij. 302

De plusieurs choses dignes de memoire faites et
dites par le roy S. Loys, tant en son voyage d'ou-
ure-mer, qu'en France: et comme il fut Canonizé.
xciiij. 309

Fin de la Table.





